

清代傳記叢刊·綜錄類⑦
周駿富輯

國朝耆獻類徵初編(二)

卷一六六至
卷一六七五

(清)李桓輯



明文書局印行

國朝耆獻類徵初編卷百六十六目錄

疆臣十八

鄂海

那蘇圖

李珣

張謙

沈廷正

齊蘇勒

白鍾山

張鉞

國朝耆獻類徵初編卷百六十六疆臣十八目錄

國朝耆獻類徵初編卷百六十六

通奉大夫前署江西巡撫江西布政使司布政使湘陰李桓輯
疆臣十八

鄂海

鄂海滿洲鑲白旗人姓溫都氏由筆帖式授內閣中書游陟宗人
府郎中兼佐領康熙三十六年 聖祖仁皇帝親征噶爾丹鄂海
先赴甯夏儲備牲畜 駕至甯夏會陝西按察使缺 命於軍營
辦事之科道部郎內開列具奏 特簡鄂海任之 諭曰初任外
官者每於朕前奏言潔清其身以圖報恩及莅任後輒背其言朕
於從官二十餘員內簡爾爲按察使爾當益勵素行也三十七年

遷陝西布政使四十年擢陝西巡撫四十二年十一月 上幸西
安閱兵以滿洲及綠旗兵皆善射鄂海與將軍博靈總督華顯並
賜藥韃弓矢及 御書扁額貂皮冠服加一級十二月 詔於
河南府儲積米穀豫備山西賑貸並 命督撫等會勘由黃河輓
運事宜明年三月會勘三門底柱湍急灘多舟行甚險應自河南
府陸運至陝西太陽渡乃以舟運四月鄂海又奏勘閩渭河惟自
寶雞至郿縣一百四十餘里水落時重載難行郿縣以東河深水
平重船可以輓運疏下部議渭河與山西之汾河河南之賈魯河
並令巡撫設法挑濬四十九年十月擢湖廣總督五十一年五月
疏言臣前赴鎮筸閱視邊界聞邊外紅苗恃強滋事雖經永順土

司招撫並未納糧乃令總兵張谷貞辰州知府遲熾鳳凰營通判
黃樹傳集苗目宣布 聖主威德令其改過輸誠於是毛都塘等
五十二寨頭目開具八百餘戶丁口赴武昌投順八月又報盤塘
窩等八十三寨投順頭目續至得 旨鎮筸生苗居深山之中自
古以來並未向化鄂海等宣示朝廷德澤布揚聲威盡行招撫殊
屬可嘉在事官弁交部議敘今紅苗等已輸誠削髮宜安插得所
從容化導教之禮義文武官弁其各仰體朕無分內外咸俾同享
昇平宇內無不安樂之意五十二年四月 上以鄂海曾任陝西
才具素優兵民性情俱所熟悉調四川陝西總督十月疏言甘肅
洮岷邊外大山生番悉歸順得 旨洮岷邊外並無生番或係與

外藩蒙古王貝勒貝子公台吉等納糧之人不可止以投順爲美
名其事甚有關係當再行詳察尋奏大山在洮州東南近土司楊
汝松界外非蒙古納進番人今既率屬歸化請卽以楊汝松管理
又疏言四川建昌鎮屬會川營界外涼山番目阿木哨率屬歸順
願每歲貢馬四匹請給職銜其所屬三千餘戶仍令管理五十三
年正月疏言去歲甘肅所屬靖遠固原會甯諸處夏田少雨秋禾
失收疊奉 恩諭全免五十二年錢糧又經撫臣岳拜請動倉糧
賑恤亦奉 旨允行已遵照籌辦外惟是甘肅山高地冷歲止一
收民無儲畜其被災戶口或借或糶或賑三法並行災民方得安
堵且春夏間青黃不接小民謀食無由宜乘春和時耕種若無籽

粒牛具田畝坐荒秋收又復無望請於被災等處乏食窮民自二月至六月止日給糧大口三合小口二合以資養贍其有田地而無力耕作者每畝給糧五升每頃給銀三兩以爲籽本令所在道府等官確察妥辦諭令竭力耕種至流移未歸者臣與撫臣捐貲齋送回籍後如屋宇傾壞令地方官捐修安插十一月以朝邑縣與山西蒲州接壤疏請將同州州同及潼關營千總移駐以資彈壓事並下部議行五十六年十月四川巡撫年羹堯勦撫越嶲萬阿羊叛番奏繳土百戶印劄並奏把總皮登榜被射身死部臣以所繳印劄未聲明西糾土百戶阿卡何往又皮登榜被射情節前後所奏不符令鄂海確察尋奏土百戶阿卡因大兵進勦畏懼潛

逃已經招回西糾至年羹堯前奏皮登榜督造浮橋中箭身死今
據提臣康泰等咨稱實係身先渡河奮擊叛番被賊射斃乞 敕
部議卹賞疏下部議令川撫酌行給賞五十七年大兵征策妄阿
拉布坦撫遠大將軍貝子允禔等率兵分駐西甯甘州莊浪豫備
進勦鄂海奏撥西安藩庫銀四十萬兩解赴甘省協濟糧芻又奏
撥平涼鞏昌甯夏貯倉積穀十萬石運赴蘭州充餉又府谷山丹
等州縣衛以軍行所過奉 旨免徵錢糧草束并請豁免一體運
送軍需之陝屬葭州甘屬甯夏等二十八處丁糧以紓民力五十
八年四月又言 皇上軫念西陲百姓轉運急公 特恩蠲免五
十八年地丁銀兩以軍務未竣不及米豆草束第各省額徵類多

折色惟甘省邊地銀數少而糧草多至平涼慶陽西甯涼州等府
且有全徵本色者是沿邊軍需用力最多之地轉不得其霑實惠
請將甘屬五十三四五六等年未完民欠錢糧草束一例蠲免使
民盡力輸納本年額徵糧草以佐軍需則 皇仁溥而民氣裕疏
下戶部寢其議奉 特旨盡予豁免五十九年五月固原提督金
國正疏奏陝西兩年歉收百姓有流離狀 諭曰總督鄂海平昔
居官亦優今因年老聲名漸不如前陝西兩年歉收之處並未詳
悉上聞其令明白回奏鄂海尋奏西安等四府一州比歲豐稔惟
延安沿邊堡所及甘肅涼州諸處歉收俱經題報所有五十七八
兩年借給災黎銀米謹彙列實數陳奏疏入報 聞六十年五月

命鄂海辦理軍前糧餉而以四川巡撫年羹堯代爲總督十月
疏言遵 旨至甘州料理糧餉甘州等處山多田少所產糧草有
限宜豫爲籌備請於河南湖廣運至陝西糧餉內撥米六萬石疏
豆四萬石半送甘州半送涼州 從之十二月 諭議政大臣曰
吐魯番見駐官兵其可種之地甚多總督鄂海在軍營無事可卽
往彼效力六十一年六月靖逆將軍富甯安請派大臣專司吐魯
番種地積糧 上命鄂海同副都統克什圖管理遇有軍務一體
調遣 世宗憲皇帝雍正元年十月以原品休致仍在吐魯番種
地效力三年四月卒

右 國史館本傳

那蘇圖

那蘇圖滿洲鑲黃旗人姓戴佳康熙三十六年襲雲騎尉世職五十年授藍翎侍衛遷治儀正雍正元年遷雲麾使二年授頭等侍衛五年四月遷鑿儀使七月授兵部侍郎十二月命爲黑龍江將軍八年調奉天將軍十二年疏言興京岫巖鳳凰城民員窩逃捕役不能徧及僮有失事請將旗員查參民員協緝其餘各城旗民官一體巡查互揭隱庇疏防失察者旗員由將軍民員由府尹題參限緝路斃命案旗員文武會驗查拏下部議行乾隆元年正月奏言齊齊哈爾所屬烏蘭諾爾驛站至瑚蘭河向設六臺皆以民力當差請每站派兵十給馬五牛五以備運送公文官物呼倫

貝爾向設十臺請停撥波爾德兵百挑索倫無牲畜人六十免納
貂皮差安六臺再挑呼倫貝爾兵四十安四臺 從之八月擢兵
部尙書二年正月調刑部尙書九月授兩江總督先是協辦吏部
尙書顧琮請設塘堡復衛所下江浙督撫詳議三年八月那蘇圖
條奏八事一明沿海衛所武事廢弛我 朝裁衛設營江南有金
山柘林青村南匯川沙吳淞劉河等營提標駐松江控制崇明狼
山二鎮對峙海口塘汛兵聲連絡琮請復衛所無庸議一礮臺有
應改添修葺者華亭縣滌缺墩改建臺一柘林城南門福山營挑
山嘴各添建臺一吳淞營王家嘴舊臺海潮衝刷應移建塘內劉
河營北七丁口舊臺已圯應修一礮臺舊制高二丈屋九架瞭望

門八大小礮入置屋內穴墻施放未便應拆房屋圍墻設垛口安
放礮位置木蓋蔽風雨畱屋二貯火藥一明自浙江乍浦及江南
金山柘林青村南匯川沙寶山吳淞劉河福山共建十城分兵駐
守今劉河半坍入海劉河營移駐舊城西北茜涇卽請茜涇建城
一墩臺營房向在塘下宜將土塘幫寬二三丈高與塘平墩臺卽
築塘上旣資瞭望兼護塘身一崇明鎮西南之二條監河顧四房
溝及堂沙頭港地關緊要請於三處添弁兵及車輪礮一海商出
入海口稽查已嚴至支河汊港恐有乘閒出入者應令地方官及
弁兵一體嚴查議行先是兵部侍郎吳應棻等條奏江廣原撥閩
省倉穀三十萬石內改撥二十萬石截畱江南其餘運交閩省十

月那蘇圖奏言今歲兩江被旱需賑濟平糶已往江廣等處採買見在陸續運回其上年不被災州縣本年應徵漕糧全行截留兩江米穀不虞缺少閩爲海疆重地本省既不產米鄰省海運不易若截留三分之二則倉貯仍不充裕應請截留十萬石分撥兩江缺米州縣存貯餘二十萬石仍運閩爲便得 旨所見甚屬可嘉實封疆大臣之度也又疏陳海塘事宜一奉賢南匯上海寶山等縣土塘應如前督臣趙宏恩前撫臣顧琮所請歲加修補一奉賢等縣從前建塘時於塘根取土成溝前撫臣楊永斌慮積水漫溢奏請因勢開河但水侵塘根易損應離塘根二十丈挑挖其不及二十丈者仍令填補成岸一倪家路土塘海水汕刷恐致衝損應

照顧琮原議預築抄塘一百餘丈接連直塘以資捍禦一楊家嘴
礮臺舊址已爲海水衝汕不能保護土塘請於迤東一帶添建石
塘一千三百丈抄進土塘內繞護城池部議 從之四年 詔免
上下兩江地丁錢糧四月那蘇圖奏言向例蠲免不分貧富但富
戶遇歉未傷元氣貧民素乏蓋藏多免一分卽受一分之惠請以
各州縣實徵冊爲據額設自五錢以下者全蠲五錢以上至五兩
者計全免家戶之外將所餘之數酌量勻數蠲免五兩以上者無
庸議蠲得 旨卿能如此悉心酌議如此擔當辦理實屬可嘉之
至古人云有治人無治法尙當訪查胥役毋令因事滋擾則全美
之舉也又疏言江北安慶等府州鹽梟盜賊拒捕毆兵地廣難以

擒截宜照水路巡遊例令陸路鎮協營每日派千把一帶兵於汛地遊巡與鄰營定期會哨近者月三次遠者二次不力者參革治罪拏獲者紀功酌賞 詔如所請十月丁母憂五年四月授刑部尚書十一月署湖廣總督六年八月調兩浙總督七年四月調閩浙總督十月疏裁閩省鹽場浮費五條一福蒲兩灣浦詔等場向設委員十八請將王祥團歸併福清場白沙團歸併洪淡團上里場歸併莆田場永安等埕歸併浯州場裁委員各一一福清之三小團浯州之烈嶼岬漳浦之東場裁委員三交各該處佐雜帶管一場員止許跟役三火夫一餘皆裁一鹽場關口督撫兩標弁巡查恐有擾累除竹崎浦下等處鹽多事冗仍委弁巡查外餘悉裁一

革各場員年節規禮受者照不枉法贓題參部議 從之八年十月疏言閩省世職或祖父征臺有功或投誠議敘向例地方官具結送部部臣據結查覈近多請託親族鄉鄰冒結求准見訪出魏世忠三人照例題參其餘跡涉可疑年遠無稽者請清查裁革

上是之十二月疏言浙省溫台二洋爲漁船採捕之所汛兵向有陋規雍正五年前督臣李衛改爲塗稅嗣經大學士管浙江總督事嵇曾筠奏減半徵收惟是漁船出洋海關收其樑頭印官徵其漁課不應再加塗稅請除爲便 詔永遠革除七年七月調兩廣總督八月奏言臺灣孤懸海外聚居者屬漳泉潮惠游惰之人巡臺御史熊學鵬議開荒地臣思曠土久封遽行召墾恐匪徒蜂聚

滋事已告之巡撫中止疏入報 聞十年二月同署巡撫託庸合
疏言粵西塘房墩臺向資民力上年提督豆斌勅撥項興修前督
臣馬爾泰請動鹽餘銀兩修通衢塘房四百餘該省塘房一千三
百餘今止修通衢未計全局且每年補葺無項可撥請將鹽餘銀
兩分給各省爲備辦料物之用其應需匠作人工修理通省塘房
以及將來修補仍資民力爲便 上是之三月條奏兩廣鹽務章
程一商欠鹽價羨餘等銀請分飭州縣提訊欠數押取認狀保結
數多者五年帶徵次四年三年又次二年儻商民頂替久已無著
卽令替商完項或官吏侵漁捏造則著落捏報之官吏完補仍照
例治罪一帶徵商欠全完者題請議敘屆限不完及不足數者照

承迫虧空徵錢糧例參處一埠商有霸占引地拖欠帑本者道州府縣應嚴查革逐另募一運鹽到埠州縣驗封開倉時先收鹽價方許發賣賣畢卽催繳餘鹽羨銀一新舊鹽包均勻配銷以免窒滯一兩廣龍鹽皆發帑收買豈容額外私增今正課餘鹽之外有加二五並加一貼增鹽斤既非顯明加增又未按鹽增餉應悉除革一兩廣私鹽充斥宜懸賞格嚴緝一各屬收受鹽規應令自首一運司分司鹽庫向有不報部之項應令運司分司及西鹽道查覈報部部議 從之五月調直隸總督十月奏霸州豐潤營田牧令未能兼理宜設專員以收實效 從之十一年條奏八旗屯田章程一旗戶撥收受在屯房地四至該州縣造冊申理事廳秋後

令鄉長屯目確查取無典賣甘結一旗戶初下鄉屯未諳農事准
雇傭助耕不許外租招佃一命盜各案仍歸各州縣管理如有窩
賭窩逃等罪責令鄉長屯目查報一旗戶地畝私典私賣將房地
追出解旗治罪出銀典買之人罪如律追價入官一領受房屋破
損自行葺補作踐者重究一旗戶探親事故往返五日以上者鄉
長屯目代稟理事廳給票依限回屯距理事廳遠者卽就該地方
官給票私行逗遛者懲治下軍機大臣議行十二年三月 上東
巡回蹕那蘇圖扈從至通州 賞銀一萬兩尋條奏山海關事宜
一出關之人未盡如期回籍銷案者舊例年終造冊稽察未免稍
遲應令臨榆縣與守關官弁按季造冊卽由永平府轉報存案一

移咨所往州縣查對俟應回時卽行遣逐一喜峰口等十五處商
販向無給票應照山海關之例給票凡赴奉天商販應由山海關
者不得徑由古北口一北海商船有帶流民入奉者請 敕山東江
浙閩廣各督撫通禁一山海關至古北口坍塌邊牆嚴查偷越九
關臺及關外中後所地關緊要請 敕古北口提督及奉天將軍
府尹設法稽查下大學士議行七月晉太子少傅十三年四月晉
太子太保尋授領侍衛內大臣仍畱總督任十月請赴金川軍營
協同班第辦事 上不許尋劾靜海縣原任刑部侍郎勵宗萬在
籍縱容弟僕霸占官地未交價銀強收租息宗萬及弟流徒有差
並請派宗萬修固安縣城得 旨勵宗萬在朝無楊震之節歸鄉

國朝通志卷之六
有楊惲之行營私壟斷按律奚辭但據那蘇圖奏請派修固安縣城罪不重科尙念曾居卿貳免其城旦勵宗萬宜痛自改悔安靜家居怙終不悛定從重治罪十一月以辦理勦金川兵臺站妥協交部議敘十四年四月 命暫署河道總督七月卒 諭曰那蘇圖久任封疆公忠敬慎茂著勞績著加贈太子太傅入祀賢良祠應得卹典察例具奏 賜祭葬如例諡恪勤

右 國史館本傳

純皇帝初政時擢用滿洲諸臣爲封疆大吏皆極一時之盛若簡儀親王德沛尹文端公繼善黃文襄公廷桂等事已具載矣其他如那公蘇圖以武臣起家歷任七省制軍薨日家無儋石其撫苗

一疏議論宏遠預識末年紅苗之亂尤爲卓見吳春麓侍御嘗讀其疏謂余曰那公初無赫赫名乃能深慮至此反勝黔督名將多矣時黔督爲張公廣泗以知兵著也馬公爾泰爲費直義後裔任兩江閩省俱制府亦以廉謹稱職策公楞爲果毅公裔性剛毅頗爲僚屬所怨然識見明敏卒爲世重雅公爾圖明醫理嘗侍 孝 聖憲皇后醫藥爲 純皇帝所倚重其在河南巡撫時亦以廉潔著其請罷祀田制府文鏡一疏世多稱之傅公德清貞剛介素談程朱之學爲徐文定楊文定二公所賞識任豫撫時前撫臣王士俊以苛酷爲民所怨公下車時立更其制歡聲徧野有三月魯治之稱去任時萬民挽車泣送擁塞閭巷實皆干城楨榦之選不負

上委任之專也

右錄宗室昭榘撰

李珣

李珣河南人康熙己卯舉人初任黃梅令值大水壞田禾民皆菜色珣發倉廩振之以未呈報上官嫌其專不爲請銷遂罄其家資賠補之尋遷永綏司馬黃梅老幼哭送百餘里後擢知辰州府雍正十三年二月貴州九股生苗作亂朝命部院大臣經理軍務調楚粵官軍赴征湖廣巡撫鍾保知珣忠勤廉幹飛檄趣署辰州兵備道駐節沅州甫下車黔省來求援珣顧沅兵僅足自守於是飛檄四出調集指揮分撥堵禦賊鋒少頓黔民避苗難挈家奔沅者數萬人乃與有司謀發倉廩以振守者難之珣曰難黎至此求生不急安恤之勢必四出剽掠是爲朝廷添一患矣脫發粟有

國朝通志卷之百二十一
三
罪余自當之遂赴倉磴米度東郊演武場及北關外隙地各爲草
舍數百間編次安插按口給領全活甚多沅之西溪與黔之羅翁
接壤苗情煽動親帥軍壯壁於界橫塘之役官兵稍卻珣整軍直
前苗始懼退乾隆元年夏捷 聞升按察使仍兼兵備道尋丁內
艱歸服闋補山東按察使卒於官

論曰公之鎮理於沅也力排眾議慨發倉廩非汲長孺之矯制救
荒乎軍需旁午雍容擘畫錯節盤根無不迎刃而解則范希文之
理軍治郡不是過也撫愛軍民安集羈旅沅人恃以無恐黔民相
慶更生祠之奉所謂功在旂常馨香食報宜矣

右傳瑋珠撰

張謙

張謙字子吉湖北武昌人康熙庚辰進士知珙縣前令與土人何姓者爲讎虛報隱糧賦較他縣獨重又官給酒米悉取諸民吏緣爲奸民多逋竄謙革諸供應勸民墾荒民乃生聚又捐貲焚鑿江中歐趙二灘行者稱便縣穀賤鹽貴謙請民得以穀易鹽於是益勤開墾暇日課士示以文體縣人始知嚮學苗人有獻卻之歷刑部郎中精律例部事多倚辦念六十以上充軍者多道死謙請得以贖論報可督學雲南公廉協士論除竄籍替考諸積弊雍正元年擢雲南按察使嚴懲賭博驅土娼民翕然嚮化晉大理寺少卿巡撫貴州未至道卒賜金千兩給祭葬

日本書紀卷之六十一

右述聞謔謠錄

三

沈廷正

沈廷正漢軍鑲白旗人康熙四十一年由筆帖式授湖廣羅田知縣四十六年十二月遷陝西商州知州五十三年八月遷蘭州府同知雍正元年二月遷臨洮知府六月調延安二年七月上以廷正居官聲名甚好加道銜改西安知府未赴任卽擢河南開歸河道三年十二月遷河南按察使嗣奏豫省臨河州縣應以黃河爲界分管南北以便巡防其附近兌漕水次之沿河地方豫爲廣貯倉糧以濟漕運至丁銀俱按地派徵以廣 皇仁事下部議行四年三月遷福建布政使八月部議廷正任延安府時會審虧空案限滿擅那西安貯庫銀代完應革職得 旨沈廷正在豫省開

歸道按察使任內聲名俱好從前此案乃畏懼年羹堯勢力偏勒索致並非伊之本意從寬免革職五年四月奏言閩省倉庫多虧缺督臣高其倬深知陋弊令臣委員查辦閩省捐監積穀通計一百八十二萬四千二百二十二石除征臺軍需并連江水災豁免及參追虧空等項外餘各屬貯倉穀據稱有累年發糶尙未買補并前任流交見存穀價者有碾米給兵尙未徵補者有累任流交民欠及發價採買未補者見存貯數合之原額尙未及半此倉貯之所以有名無實也平糶原以濟民秋收應照數買補無如各屬延緩槩存價銀今俱令解貯司庫以杜侵挪秋成時發還買補又兵米原係地方徵收支放祇緣青黃不接時暫借倉穀碾給乃借

後任民拖欠以致累年未清今飭所司照數徵補不得以完作欠
又流交穀價乃累任州縣交代倉貯缺額遂折價移交近年穀價
稍貴不敷買補價雖實貯穀已虛懸更有流交民欠一項據發價
採買未交累任相沿僅存空額穀無實貯以上各項前於三年奏
報案內俱皆捏造實貯此番徹底盤查飭令各屬據實具結各道
府仍照往年槩出實貯印結臣詳明駁換而限期迫屆隨將報到
各數彙造草冊呈送督撫經署撫臣毛文銓令臣將三年捏報實
貯改作四年平糶臣查三年捏報實貯穀數一切流交民欠存價
未買等項在內若改作四年平糶固可符捏報實貯之數然臣何
敢改移年分自蹈欺妄各府縣與巡撫通同一氣紛紛具報買補

將完何以從前艱於採買而此時如此之易欺飾顯然臣甯受巡撫與屬員之怨不敢少有瞻顧據實上陳得旨朕原謂毛文銓不妄高其倬亦慮其偏於善柔爾此奏甚屬可嘉秉公正色勉力爲之六月 上命常賚爲福建巡撫以廣東巡撫楊文乾赴閩會同盤查延正卽以通省各項倉穀及累年未完正雜錢糧江浙運閩米穀糶賣價銀各數按項造冊徹底清理內有虧空那移官侵吏蝕及虛開民欠者通詳題參仍勒限完補至存庫穀價有多寡之不同地方有產穀不產穀之分或往鄰省購買或於本省採買仍立限運回收貯先後具疏以聞均蒙 嘉獎十一月擢貴州巡撫六年五月部議延正於延安府任內失察甘泉縣侵蝕給賞老

民銀兩應降一級調用得旨從寬畱任又諭曰沈廷正任內處分之案甚多朕俱開恩寬宥者因伊前在福建布政使任內將通省錢糧倉穀未清之項徹底查明據實陳奏朕遣楊文乾等前往確查始將積年虧空盡行清理實係沈廷正陳奏之力朕彼時不將沈廷正之奏宣示於眾者因沈廷正見爲閩省藩司恐清查之員有所瞻顧牽制且藩司專司通省錢糧凡各屬未清之項或有干涉沈廷正之處令楊文乾等將各項清查歸結沈廷正已升黔撫而福建藩司任內並無絲毫未清之項實屬不徇情面實心任事之員則朕屢次加恩寬宥之由理應曉諭內外知之七月疏言布政使祖秉圭與臣籌畫糶借倉糧並嚴禁地方官於秋收後

派民買送米穀事臣自入境時卽訪聞黔省各府州縣去歲平糶倉糧減價太多致秋成時官民買補維艱又賣糧惟委佐雜官監糶豪棍衙蠹各捏戶口爭先糶買窮民終日不得顆粒及糶買時府州縣親戚家人勾同書吏將戥頭斗面任意高下臣飭各屬親身監糶不致欺隱秋成斷無不敷買補之理所有派發民間買送之弊嚴行禁革至借給倉糧在祖秉圭謂糶不如借臣愚以爲糶糧尙有價銀存庫而借糧多係豪矜地棍串通滑吏爲之誘一二窮民以呈首借領內多假託姓名或秋收少薄或經手官升遷事故藉口延挨虛懸倉儲故青黃不接時只宜平糶不得輕借若地方實係歉收窮民嗷嗷待哺無力糶買又應仰體 皇仁一而酌

據照例借給一面繕摺奏聞此暫時權宜非可定例與平糶並行也得旨覽借糶二議汝所見是又奏言黔省各路生苗陸續向化惟黎平鎮遠平越都勻與楚粵接壤生苗尙干法紀而入萬古州九股生苗盤踞深山見經按察使張廣泗化誨招撫清理疆界臣以張廣泗隨帶出力官兵須加賞賚卽投順生苗亦應給賞銀牌花紅且張廣泗行營需費甚多請將司庫捐納公費銀一千兩以五百爲豫備賞賚官兵苗民之用以五百給張廣泗爲行營盤費諭速行給與毋遲是月調雲南巡撫仍署貴州巡撫十二月疏言前撫臣何世基奉敕建龍神祠將祀明臣王守仁之陽明書院移其牌位改作神祠查王守仁謫貴州龍場驛丞時講明

國朝通志卷之六十一
聖賢之學化民牖俗黔之人士始知誦習詩書臣考之記載訪之
輿論王守仁實有功名教是以陽明書院素爲貴州省城士子瞻
仰讀書之所請仍其舊別建龍神祠宇得 旨此舉妥協之至何
世堪素畱心理學伊等皆各立門戶互相是非若云無心之失何
至錯誤若此不必究論俯順輿情改建爲是七年正月赴雲南任
五月疏言曲靖府屬陸涼州馬廠因上流水漲淹麥臣仰體 皇
上惠愛邊黎至意將馬廠被淹田地應輸本年糧折銀一千餘兩
免徵奉 旨當日正以地非沃壤所以作爲馬廠也照汝所請料
理八年六月奏言宣威州新由土司改設州治請設學正一員下
部議行八月授河東河道總督九月遷都察院副都御史仍畱河

道總督任九年六月奏言東省運河隄岸爲漕艘往來要津汶上所轄之何家壩當汶河西岸蓄水濟運衝刷流沙爲南北運河關鍵因建立年久隄岸潰缺一遇汶漲沙流入運劉老石頭二口遂至於墊淺澀急須照舊整理俾蓄洩有資俟估詳題請修築臣又念黃河工程較運河更爲緊要今屆秋汛親由曹縣芝麻莊一帶查勘各工俱各平穩惟豫省封北岸趙家寨工程當全黃頂衝見今大溜埽灣直射隄根甚爲險要星夜防護而祥符程家寨工偪近省城最爲緊要地業將北岸開挖引河導溜北徙正在守候開放聞北風連作全河勢往南岸臣親率各員駐宿引河工所俟水勢漲發風色順利卽當相機開放 諭亟宜恪秉誠敬以祈神佑

竭力防護以盡人事也九月調直隸河道總督十年二月以病解任回旗閏五月卒

右 國史館本傳

齊蘇勒

齊蘇勒滿洲正白旗人姓納喇氏初由官學選天文生爲欽天監博士遷靈臺郎尋以內務府主事出任永定河分司康熙四十二年 聖祖仁皇帝南巡閱河齊蘇勒隨至淮安奉 諭曰朕觀黃河險要地方應下挑水埽壩見今永定河經朕親臨指示挑水埽壩俱有裨益爾遵照朕指示式樣前往煙墩九里岡龍窩三處築挑水壩數座於朕回鑿前完工齊蘇勒遵 旨如期竣事乃回任海遷翰林院侍講國子監祭酒仍管永定河分司事務會奉 命同副都御史牛鈕監修河南武陟等縣決口隄工奏自沁河隄頭至滎澤縣大隄十八里平行處接築遙隄使全河之水盡歸一道

專力刷深不致旁溢六十一年十二月 世宗憲皇帝授爲山東按察使兼理運河事 命先往河南籌辦黃河隄工時河南巡撫楊宗義奏請於馬營口南舊有河形處修挑引河齊蘇勒同河道總督陳鵬年疏言河不兩行此洩則彼淤有必然之勢馬營口甫經築隄若開引河有旁洩浸隄之慮寢其事雍正元年正月 命齊蘇勒署理河道總督尋實授四月疏言陽武祥符商邱界黃河北岸有支流三偏隄繞行五十餘里南岸青佛寺邊有支流一偏隄繞行四十餘里不急爲截斷恐刷損大隄已築壩堵絕並接築子堤九千二百八十八丈隔隄七百八十八丈會奏 詔豫籌山東諸湖高洩事宜以利漕運疏言汶上縣之南旺馬踰蜀山等湖東

平州之安山湖濟甯州之馬場湖魚臺縣之昭陽獨山等湖滕嶧二縣之微山稀山等湖皆運道所資以蓄洩昔人名曰水櫃因土人乘涸占種漸致狹小宜乘湖水稍落時除墾熟田畝外丈量立界嚴禁侵占設法蓄水如遇運河水漲引注湖中相平卽築堰截堵遇運河水淺則引之從高下注其諸湖或應築隄栽樹或應建閘啟閉令各州縣循例辦理則湖水深廣運道流通漕艘無阻滯之虞矣八月奏言洪澤湖水微弱黃水有倒灌之勢臣率道廳督築清口兩岸大壩各寬八丈東長二十六丈七尺西長二十四丈中畱水門五十丈東高清水以抵黃河見在淮水暢流惟此壩在洪濤大溜中兩面受敵必須加意修防因派工員協同汛弁率領

河兵一百長夫三百常川住宿工所多備埽料樁繩等項如遇湖漲壩工稍有蟄陷卽用料加鑲下埽搶護遇黃漲卽用混江龍鐵筧子諸器駕小舟往來疏濬不令少停九月奏報秋汛已過河工平穩得旨下部優敘加三級特賜戴孔雀翎二年四月廣西巡撫李紱將之任上諭及淮揚運河淤墊年久水高於城危險可虞李紱奏言若於運河之西另挑新河一道以所挑之土另築西隄而以舊河之身作爲東隄則東面永無潰決之患上卽命紱往會齊蘇勒商酌齊蘇勒奏言淮揚運河綿長三百餘里上接洪澤下通江口河之西岸偪臨白馬寶應界首諸湖水勢汪洋一望無際今若改挑新河築西隄於湖水之中畚鍤難施東岸之間

壩涵洞皆須另行剗建不惟糜費千百萬帑金而且大工終難告就 上是其言九月奏報秋汛得 旨齊蘇勒督率屬員修築壩隄堅固雖河水泛漲而各工無虞甚屬可嘉下部議敘 特予騎都尉世職是時 上知臣下有與尙書隆科多總督年羹堯夤緣結交者 諭齊蘇勒曰爾之勤勞固不待言而一塵不染獨立不倚從未聞夤緣結交更屬可嘉又 諭曰近日隆科多年羹堯大露作威福攬權勢光景朕若不防微杜漸此二臣將來必至不能保全爾等皆當疎遠之隆科多止論爾操守平常而年羹堯前歲數奏爾不學無術必不能料理河務朕以此知爾之獨立也三年二月副總河嵇曾筠奏請挑挖祥符縣回回寨引河 詔與齊蘇

勒商酌嵇曾筠復奏言亟宜乘汎水未發興工不及待會勘既而
齊蘇勒至武陟奉 詔同總督田文鏡察視引河有無裨益齊蘇
勒奏言挑挖引河必須上口正對頂衝而下口有建瓴之勢方可
吸引大溜歸入新河借其水力滌刷寬深嵇曾筠所挖引河工已
將竣臣往看上口之地勢與見在水向不甚相對改挖上首三十
餘丈以對頂衝以迎大溜又往對岸指示建築挑水壩挑溜順行
以對引河之口俟水漲時相機開放庶河勢得以直暢東注而南
岸隄根可保無虞矣奏至 諭曰朕慮嵇曾筠或料理未妥今覽
奏方慰可謂得法矣七月 命內閣學士何國宗偕測算官員攜
儀器閱河遇齊蘇勒所駐近地會同勘視齊蘇勒尋奏言 皇上

頒發儀器測度地勢於河工高下之宜甚有準則今洪澤湖滾水石壩舊立門檻太高不能隨勢洩水請 敕閱河諸臣於明春視海口後繞至湖口用儀器測度地勢改落石壩門檻庶全湖宣防有賴又奏言治河物料葦柳爲先每年捲埽之葦輒千百萬束俱動帑購買仍須以柳枝爲骨在官園伐以濟用柳多則工堅而帑省柳少則用葦多而工不固臣於去冬勸令道廳等官及標下營弁各於空閒之地栽種柳秧陸續據報一百二十三萬二千餘株今通行察閱除枯損之外成活八十九萬二千餘株又臣往來看工見山東江南蓄水沮洳之地皆可種葦今春令廳員買葦根試種近據報微山湖遷種葦八頃餘畝蔓延青蔥此皆各官自願試

種非邀議敘者今行之已有成效應請 敕部酌定嗣後議敘之例以種柳八千種葦二頃各紀錄一次爲率並責成專汛守備及千總把總培養柳枝遇枯損卽爲補栽違者分別議處如此三五年柳株處處成林湖葦叢生不費購買而工料充裕矣並得 旨允行十二月奏言河臣薪水舊由各廳供應每年有一萬三千餘兩臣奏明禁止並裁革四季節禮又河標四營舊有坐糧四十分每年一千一百餘兩臣到任後交中軍爲修造墩臺製換盔甲器械之用其鹽商陋規銀二千兩爲出操驗兵賞功犒勞等費而每年往來勘估及伏秋兩汛駐劄三省適中之地隨役及案卷不可減省凡車馬舟楫日用米蔬之需遠者數百金近者一二百金前

此尙可勉強支持今春由徐州赴武陟拮据實甚見據河庫道張
其任言庫收額解錢糧向有隨平餘銀五千兩除道衙日用及各
項工食不過千金餘銀四千兩請支銷看工車船等費臣因未經
奏明不敢擅便儻蒙 恩賞給則看工之盤費弗缺益得殫竭心
力辦理河務矣奏至得 旨此項通融取用甚好卿之清勤朕所
深悉勉爲之四年四月奏睢甯縣朱家口黃水驟長東岸壩臺大
埽蟄陷見在防守修築 上諭大學士曰齊蘇勒在工年久歷練
老成清慎勤三字均屬無愧今年已望七見壩埽蟄陷必晝夜焦
急朕甚憐之且此時勉強施工將來伏汛秋汛恐又不免衝決可
令酌量情形不必急迫齊蘇勒尋奏水復大漲壩埽倏陷水底慄

遵 聖諭俟過伏秋二汛并力僸修十二月奏報朱家口決口堵
閉合龍黃河自豫省至海口西岸壩隄完整 諭獎其悉心任事
經理有方加太子太傅五年以衰病奏 遣太醫齋葺診視尋入
覲 諭嗣後歲支養廉銀萬兩六年兩江總督范時繹江蘇巡
撫陳時夏奉 詔開濬吳淞江因於陳家渡築壩松江知府周中
鉉率千總陸章乘船督工下埽值潮迴溜激壩陷船傾周中鉉陸
章俱歿於水事 聞 予卹贈齊蘇勒知濬工未竟卽前往經理其
事尋奏言吳淞江陳家渡舊有土埂三道未曾挑清致有停沙淤
塞之患今築壩開濬適逢江水海潮並長刷淨土埂檻限毫無阻
滯工程可期速竣 上諭部曰吳淞江工程雖交與齊蘇勒一同

料理實則范時繹陳時夏應辦之事齊蘇勒一聞陳家渡壩工衝塌卽親往躡勘悉心經理仰賴 神佑水勢涌長將泥沙徹底刷淨水無阻滯工可告成此卽封疆大臣實心爲國爲民感召 天和之明驗著從優議敘尋部議加三級七年正月以疾劇奏 上命江蘇巡撫尹繼善署理河道總督復 遣太醫診視齊蘇勒疾二月卒得 旨齊蘇勒忠誠爲國志行端方操守潔清辦事明敏自簡任河道總督殫心竭力奉職勤勞邇年黃水安瀾運道通順隄工堅固河帑覈實厥功懋著今聞溘逝深爲軫惻應得卹典照例議奏外著加恩晉三等輕車都尉照例承襲並賞給藩庫銀三千兩爲歸櫬之資起程日同城文武官齊集奠送沿途地方官親

往奠醑並撥兵護送歷來河道總督如靳輔齊蘇勒二人實能爲
國宣勞有功民社著尹繼善等就近擇地爲靳輔齊蘇勒合建祠
宇令有司春秋致祭以昭朕優獎功勳至意 賜祭葬如典禮諡
勤恪以其子華善襲三等輕車都尉世職八年 詔建賢良祠於
京師齊蘇勒與靳輔並入祀

右 國史館本傳

齊蘇勒姓那喇氏滿洲正白旗人初任主事歷內務府郎中康熙
三十八年扈 蹕南巡親聆 聖祖指授治河方略由是畱心河
務洞悉原委其後緣事革職再起爲永定河分司升翰林院侍讀
國子監祭酒並領分司事務 世宗踐阼擢山東按察使有 旨

先赴河南會同巡撫楊宗義總河陳鵬年堵築武陟縣決口卒如
齊蘇勒議雍正元年二月超授河道總督疏言從前治河諸臣不
思防微杜漸之計隄岸瀕危始行搶救一丈之險頓成百丈千金
之費糜至萬金能相其機宜而預圖之則用力省而功易成又言
清口大壩及下中河一帶長隄歲久僅存故址其他頽敗者甚多
皆由河員偷安廢事冒銷帑金非嚴立章程不足以示勸懲并得
允行於是周歷黃河運河凡隄形高卑闊狹水勢淺深計里測
量以時按簿濬築奸無所容總河衙署一切私費舊皆取給屬員
每行部供張甚盛齊蘇勒始至悉行裁革舉劾必當其能否諸河
廳咸懍懍奉法事以大治二年七月颶風大作海潮涌起丈餘黃

河入海之路二水衝激凡三晝夜始退而濱海隄岸悉無恙 世宗嘉其忠勤特給騎都尉世職三年春河南祥符縣回回寨挑濬引河工將竣齊蘇勒遵 旨往勘奏改移上三十餘丈以對頂衝迎大溜復於對岸築挑水壩挑溜順行以對引河之口水長則相機開放大溜全歸新河而南岸遂得無虞六月加兵部尙書五年用河清 恩加太子太傅奉 命往勘江南浙江水利六年復奉 命至河南會同嵇曾筠詳勘雷家寺堵截支河事宜先是 世宗以河道底定益圖善後之策諭諸處工程徧加修理凡昔人建置未合者悉改之令可垂久遠齊蘇勒併力巡閱培高濬深增新補舊深愜 聖心以是年七月告成黃河自碭山縣至海口運河

自邳州至江口縱橫絲互三千餘里兩岸隄防崇廣若一自是河
工益完整矣七年正月卒於官 賜祭葬如典禮諡勤恪晉世職
爲三等輕車都尉給銀三千兩爲歸櫬資 特命有司建祠與前
河臣靳輔並祀焉

右 國史賢良小傳

齊蘇勒滿洲正白旗人由欽天監博士遷主事郎中出任永定河
分司康熙六十年授翰林院侍講督修河南武陟縣黃河決口六
十一年升山東按察使協理運河道事雍正元年授河道總督二
年以德勝至張莊河形陡直水勢建瓴於適中六里建設石壩令
較上下兩閘各減六尺水小資其攔蓄水大聽其漫溢漕運便之

三年加兵部尚書五年督塞朱家口決河加太子太傅尋卒於官
晉世職三等輕車都尉給藩庫銀三千兩送櫬回旗並命總督尹
繼善爲靳輔齊蘇勒合祠歲祭 賜諡勤恪八年入祀賢良祠

右小傳陸燿撰

齊蘇勒滿洲人雍正初總督河道疏復瓜洲花園港運道建閘啟
閉以順水勢堵瓜洲城西新開河道以免江水偪城之患莅政清
勤河防完固

右述聞湛瑤錄

白鍾山

白鍾山漢軍正藍旗人康熙四十四年由官學生補戶部筆帖式雍正元年遷江南山清裏河同知五年擢淮徐道九年遷江蘇布政使十年十一月條奏海疆事宜一狼山鎮駐通州蘇松鎮駐崇明距蘇州俱遠輓運不便請卽於所駐及附近州縣撥給一崇明孤懸海外地不產米前撫喬世臣奏准於江廣產米處採買積貯請撥萬石貯崇明縣倉備平糶一海濱漲出沙洲民居不能防患請令地方官督於農隙築土墩二丈以避潮至從之十二年七月授南河副總河十一月奏宿遷桃源安東三縣之夏家馬路陳家樓王家馬頭等處應下埽加鑲資捍禦阜甯縣之辛家蕩係黃

河頂衝兼有海潮上涌應築隄保固 從之十二月擢河東河道
總督乾隆元年十一月奏河標兵駐濟甯每青黃不接無倉儲可
資不得不稱貸貴糴追領餉償還約糧一斗費二斗之價見在河
標生息銀二千七百餘兩請買穀四千石設倉存貯令城守營守
備經管河標副將稽查春開糧貴借給兵丁秋收還補免加息十
二月奏陳豫東河防事宜一東省管河千把總共八員河兵六百
名應增河營守備一駐要地巡防並聽河道管轄一河灘土本虛
鬆漲發漫灘刷成支河黃水勢分則溜緩沙停正河日致淤高應
責成該管官於水落時堵塞支河堅實違者參處如式者議敘一
伏秋水發搶護險工購募夫料刻不容緩請撥河南司庫存公銀

五千貯南岸鄭州撥歸德府庫五千貯武陟封邱縣庫撥山東司
庫銀三千貯曹單縣庫動用仍按數歸款永遠儲備均下部議行
三年六月白鍾山因本年南米糧船較遲恐回空阻凍誤冬兌議
將東省本年停運及已回次船通融接運卽令南船自東回次受
兌免遲誤新運與山東巡撫法敏同奏聞 上以有裨漕務從之
十一月疏言河岸查出灘地葦地三千餘頃栽蘆葦備用造冊報
部至運河南陽南旺獨山安山湖隄兩旁俱係雜草秋深可刈作
埽心因管河文武汛官向無養廉變價支用未經歸公請嗣後武
汛備片並照標營給額定隨糧文汛州同等給養廉採草備公十
二月疏言管河州同等官在黃河則防守隄埽在運河則挑濬河

道護重價空懇照江南例每員歲給銀六十兩爲養廉按季支領
奏入俱報 聞四年四月疏言漳水向由直隸入海康熙四十五
年引漳入衛濟運故道漸淤全歸衛河勢難容受嗣經山東巡撫
岳濬等會勘於德州哨馬營建滾水壩開引河洩衛水由鉤盤河
達老黃河入海無如漳衛二水挾沙帶泥隨挑隨淤多費帑金漳
水舊有正河支河應擇易濬者復其故道於館陶建開衛水大聽
漳入海以防漲水小分漳入衛以濟運奏入 敕大學士鄂爾泰
詳勘議奏尋議於邱縣城東白和爾寨村東承漳河北折之勢接
開十餘里至漳洞村入舊河於所挑新河頭卡東流入衛處建閘
以時啟閉 上從之八年正月調江南河道總督四月疏言石林

一工自去冬堵塞後黃河已歸正流惟南岸淤高黃水側注北岸今北岸石林口復堵築堅固大溜必直趨以下之黃村韓家塘等處新築子堰恐難抵禦臣於對北挑引河引溜南趨加厚子堰捐修堡房派弁兵巡防十月奏言葦蕩左右兩營每年額採柴二百二十五萬束輪流運交備料乃日久弊生挂欠不清謹酌陳數條一官蕩民地縱橫夾雜兵民混採難禁應查明畫界兵民各分地一區使有專責一葦柴於霜降後採取性堅經久前無定限弁兵將堅好者盜賣臨期採青葦充數嗣後應定限年內督兵採取十分之六來年清明前採完運交一蕩地距黃河水次寫遠全賴溝渠深通葦柴方可依限出筏但營弁領銀興挑數衍塞責應委幹

員駐工監督取結驗報一向來運柴船載少致兵丁夾帶私柴應令委員在總匯處量行加載不增而運可速一運柴船脫幫停泊有改捆盜賣諸弊應照糧船例編號依幫銜尾沿河文武催償兩奏入 上嘉之九年六月奏陳江南河標四營請照河東例建營倉動支閒款銀六千兩採糧遇價貴時出借兵丁疏入報 聞十年九月疏報銅沛廳屬冰雹山對岸沙灘偪漕南趨河岸日坍漸近隄根正籌料加幫月隄八月中黃河大溜忽隨風掣入新刷河槽衝去沙灘直達尾閘冰雹山隄外水消挂淤隄工俱已停止節省工料不少誠 聖德感孚河神所致 上敕白鍾山虔誠致祭以申謝忱十一年二月御史楊開鼎劾白鍾山辦河務出納慳吝

任意駁減工程不固沿河查工有供應鋪設及家丁兵役人需索河員滋怨上年陳家浦缺七百餘丈止奏二十餘丈延兩月方興工築阜甯鹽城受累請旨嚴飭白鍾山當公忠體國痛改前非諭曰果如所奏應重治白鍾山之罪豈但嚴飭使之改過而已若楊開鼎或懷私妄奏或誤聽人言則亦有應得之罪若不查勘明白無以服眾人之心將來大臣等何以辦事著高斌帶楊開鼎前往會同尹繼善確查具奏閏三月高斌等覆奏所參白鍾山任意駁減需索供應諸款俱無確據惟陳家浦漫口衝刷與淹漫受害事屬有因致工員解體輿論不服白鍾山不宜仍任總河諭解任來京交部嚴加議處尋革職命發往江南河工效力五月

高斌奏埽壩規宜 上以白鍾山從前辦過工程多係不應興工
措處靡當令總河顧琮查明俱著白鍾山賠補七月 諭曰白鍾
山在總河任內辦理河工種種濫用應賠帑銀甚多查伊在京房
產所值不過數千金聞其宦資皆寄頓淮揚鹽商家代爲營運朕
降旨與吉慶令其訪察今據吉慶開報已有十萬之數巧宦欺人
暗飽私橐究不能不敗露也著尹繼善一一追出以補白鍾山應
賠之項十五年六月授直隸永定河道十八年九月江南銅山縣
張家馬路河溢 命白鍾山隨尙書舒赫德馳往協同辦理十一
月加按察使銜協辦南河事務十九年授河東河道總督二十年
四月署山東巡撫二十一年三月疏言曲阜縣知縣缺向由衍聖

公保舉每多瞻顧營私且邑中非其尊長卽係媼姪牽制狎玩在所不免請改爲在外揀選調補不必拘用孔氏族入下部議准令見任曲阜縣知縣孔傳松赴部以外省知縣另補 諭曰我國家尊崇先聖遠邁前朝追思駿業有加無已豈於此而有靳焉但與其循舊制而致瘵官有乖政體何如通變宜民俾吏舉其職民安其治於邑中黎庶孔氏族人均有裨益但見在世職知縣旣已卸事若歸部銓選不過恩及其身而止於朕心猶有未愜著加恩授爲世襲六品官仍令揀選充補用副朕重道崇儒至意十一月奏上以白鍾山堵築孫家集漫口迅速完工議敘加一級十二月奏濟甯南積水未消請緩開汶河大壩保護緯道民田咨江南疏濬

下游河道 上命白鍾山親往查辦南河文武各官均聽調遣二十二年正月調江南河道總督二月疏言近年有石林口漫溢張家馬路衝奪沙停河淤下流不暢漸成南高北窪之勢迨孫家集潰決河底益高 皇上軫念積水未消敕將荆山橋上下洩水河道挑深俾水涸民得播種查黃河受病總由水勢側注北岸衝刷溝槽惟有南北分籌南宜疏而北宜築築則支河不致奪溜疏則使有餘地水勢稍分庶徐郡可期奠安河東河臣張師載由荆山橋一路查勘於二月初至徐謹與面商陳管見三條一南岸長灘較北岸更險必將長灘偏溜生灣處挑成順勢其大灘橫互則挑引河導溜歸中兩岸隄工加高一北岸無隄漫水有梁家馬路徐

家莊等處間段支河數十道又黃家莊郭家堂等處間段有溝漫槽坡矮灘宜築土壩俾水勢平槽時收束以刷正河盛漲時平漫平消不致衝槽奪溜並將孫家集隄工加築寬厚於河身增土壩二三道以資重障一駱馬湖北受山東蒙陰諸山水西受微山湖水其尾閘在六塘河上游湖隄在在殘缺應修培捍禦奏入 命分任和衷辦理 上南巡 御製詩賜之曰司河稱最久自是悉防修真莫幸無事勉惟建遠謀況經益新淤此實塵深憂勸爾平成績紆子宵旰籌時工部侍郎夢麟奉 命馳勘荆山橋工程白鍾山同奏言見在丈估應挑工程自茶城至荆山橋下游王母山止河道縣長廣募夫役河員呼應不靈請 敕督撫派沿河銅豐

沛蕭陽宿靈虹睢邳十州縣印官來工分三十七段領帑興修從之工竣 賜詩曰南巡江國周遭歷不使河干負弩朝嘉爾導疏合優敘育因小節課臣僚尋議敘加一級六月奏甯夏河水陡長卽飛報下游防範立法甚善正陽關乃淮水上下關鍵請於大汛時委佐雜在彼查報並 敕兩江總督河南安徽巡撫令沿河州縣照甯夏水報例實力辦理 詔如所請八月尹繼善奏河口閘應增滾壩咨商白鍾山等籌辦 上慮往返耽延有妨工作 敕令白鍾山與夢麟尹繼善等分任責成同時並舉均於歲內告成以收實效十一月疏言上江諸水開放後皆歸安河道洪澤湖安河間段淤淺連年水患皆由於此見募漁船四五百伐蘆撈泥

俾尾閘一通上游皆有去路又勘歸仁隄下舊有涵洞穿入鮑家河達安河年久湮塞今據開濬分林子河一支則安河進水之地亦有所分河患可漸減奏入報 聞十二月疏言葦蕩營設濬船柳船石船運料定例三年小修五年大修八年拆造但未定修造時限未免遲延嗣後石船大修拆造定限四箇月小修三箇月濬船柳船大修拆造定限三箇月小修兩箇月派守備承修參將督修逾限議處未屆修期損壞照例分賠 從之是月各工告竣議敘加一級二十三年加太子少保二十六年乞休 上慰畱之尋卒 詔贈太子太保 賜祭葬如例諡莊恪

右 國史館本傳

白鍾山字毓秀號玉峰正藍旗漢軍雍正十三年總督河東河道更定夫役工價設立司泉佐雜乾隆四年漕督補熙請造十丈大船運河以水深四尺爲則鍾山謂牐河無源之水需雨而後泉旺泉旺而後河盈上牐閉而下牐啟則下牐倍深上牐倍淺各牐相距遠近不均水近者深則遠者必淺以人役水以水送舟必不能均深四尺侍郎趙殿最又請於館陶臨清各立衛河水則鍾山謂尺寸不足將衛輝民田渠牐盡閉致妨灌溉事旣難行尺寸苟足將官渠官牐盡閉來源頓息下流已逝運河之水亦立見消涸二者均屬非計議並寢勘辦荆山橋工消涸微山湖積水修復淮揚徐海鳳潁泗各州縣支幹河道歷任兩河四十餘年於河道情形

工程利弊熟悉周知奏疏數十餘上著有豫東宣防南河宣防等
錄卒諡莊恪

右小傳陸燿撰

國朝詩林類考卷之二

詩

張鉞

上卽位之元年粵西藩司張公以病乞休奉 旨準其回籍俟病痊赴部引見蓋自 世宗皇帝明目達聰於封疆大吏尤慎擇其賢才稱職者 今上以 先帝之心爲心軫恤舊臣未及引年猶望其瘳將進用之也越明年而公遂不起世皆高其行榮其遇而惜未竟其用云公諱鉞字左黃世爲淮陰人曾祖諱某贈某官祖諱某贈某官父諱睿康熙己未進士官刑部侍郎公年十三而喪母隨兩兄後泣血如成人事司寇公左右無違二十餘年如一日康熙乙酉舉於鄉越四年而司寇公卒於官哀毀有加居常誦其遺訓曰吾年逾七十未有涓埃足仰答 盛朝惟宅心平允以稱

明刑弼教至意并望吾子若孫繼此志也公率而行之終身罔敢
失墜服闋授行人司行人王寅 聖祖升遐 世宗將改元大赦
以公充閩省 詔使自京師至回數千餘里公知所過皆苦供億
銳意裁之閩省標兵例應執戟迎 詔者按名賚之還 朝擢刑
部山西司主事明年 命往貴州署貴陽府事又遷平越府又授
思州府又攝銅仁府又調黎平府擢貴西道先後在黔六年庚戌
擢廣西按察使又調貴州仍往廣西并署布政使明年遂實授往
來黔粵又六年丙辰 誥授通奉大夫卽 予告歸在平越時今
相國鄂公爲制府其平長砦也引公至隨所謀畫皆稱意遂題調
黎平黎平下接湖南旁連粵右苗夷皆蟠踞出入爲民患而古州

尤甚公密言於制府曰若屬雖獷悍仰惟吾 皇一視之仁而好
鎮撫之則皆 朝廷之版圖閭閻之赤子也今愚民不知服教畏
神久矣盍先之以勦制府遂委公軍務明年出師古州俘獲苗夷
眾欲斬以徇俘叩頭哀籲願率他砦來降自贖眾疑焉公遽釋其
縛與以酒食諭之曰 聖天子德威照臨無遠弗屆而屬婦子完
聚俯仰樂業以終天年伊誰之力今無故昏戾悍逆以干天誅不
及今改圖後悔有極耶皆涕泣領首曰然又曰卽今去魑結從漢
俗吾貰汝又皆歡呼響應曰諾因如言縱之歸自後投誠者踵相
接皆歸俘爲之導也初制府以古州地廣夷稠就近調粵西標兵
往其文武官弁亦有奉調至黔者兩省官弁多不相能公患之謂

曰吾等食祿於朝共襄王事黔粵一也何此疆爾界爲未幾有粵西臬司之命而官弁在古州者務益和衷各勤其官矣在行間凡三載或勦或撫動中機宜苗夷盡隸版圖遂城古州稱巨鎮云其司臬黔中也積案甚多公寢食俱廢權輕重慎出入心無躁獄無稽未數十日而積案俱澄於大獄尤所矜念曰司寇公之教也上官亦深知公治行凡有請悉從公未減其司藩粵西也潯梧二關及土司承襲陋規各千餘公悉屏除之凡官銀給散俱以原封兵餉及養廉及解庫銀斂散不踰刻典吏無所施其手建書院課士及貢院堂室傾圮葺舊更新公皆悉心辦治古州新定駐兵防禦粵西歲濟軍儲六萬餘石公亦輸費六千齎送曰吾前在黔備

悉從軍之苦今上以急公下以申吾私焉大理卿張謙素以公爲
才奉命撫黔道卒湖南公經紀其喪子某公亦器其能會先
帝有保舉之旨公卽署其名以進黎平府經歷許某公爲守時
亦以廉幹舉之今皆擢用稱職世以公爲知人公工書畫而不欲
以書畫名詩文皆天資絕出而不欲以詩文名至若居官政績播
紳里巷交口傳誦公又以爲臣子之常無足多者嗚呼之數者得
其一二皆足顯當時名後世公兼有之而退然常以自下豈非以
身居屏翰任天下之重持大體固應爾耶夫主臣一德自昔爲難
以先帝知人善任於公始終不渝而公矢之以廉慎濟之以臨
事而斷獲於上則險夷一節施於民則情法兩伸稽諸傳所稱

主聖臣良者夫何愧焉夫何愧焉嗚呼公雖未竟其用而其卓卓可紀者已見於前事矣公以乾隆三年正月日卒享年六十有六娶邱氏 誥封夫人子二長潮庚子科舉人合肥縣知縣次某候選府通判女一孫三維某先公與司寇公同舉於鄉及某癸未成進士讀卷又出司寇公門下而潮又某主試北闈所得士也通家三世故於公行事知之爲詳銘曰

七十而致政公歸早六年死生若夜旦秉哲在幾先民苗同一視王道自平平矜情非馭法曰敢求其全急公而卻餽曰義在則然爲臣與爲子公兩無憾焉誰歟秉筆者史館請垂編

右墓誌銘蔣汾功代某撰

國朝耆獻類徵初編卷百六十七目錄

疆臣十九

王蕃

閻堯熙

包括

納齊喀

安圖

高承爵

張連登

馮光裕

孫廷丞

孫詔

陳德榮

徐士林

補錄

盧詢

樓儼

張連登

國朝詩林卷之八十一

--	--	--	--	--	--	--	--	--	--

國朝耆獻類徵初編卷百六十七

通奉大夫前署江西巡撫江西布政使司布政使湘陰李桓輯
疆臣十九

王馨

王馨江蘇太倉州人康熙四十五年進士改庶吉士四十八年散
館授編修五十三年充河南副考官五十四年丁父憂五十七年
服闋補原官五十九年提督陝西學政雍正元年奉 旨畱任二
年遷司經局洗馬三年充會試同考官五月遷翰林院侍讀學士
充日講起居注官七月遷詹事府少詹事九月奉 命偕戶部郎
中尹繼善往廣東查審布政使官達按察使方願瑛受賄徇庇案

得實論罪如律旋奉 命署廣東布政使六年八月 召來京七年二月授直隸布政使六月奏各省藩庫俱設庫官一員專司啟閉并出納彈兌官秩雖微職掌甚重苟非廉靜謹飭之人保無句通庫吏輕短舞弊如見在直隸被參審擬之庫官龐汝霖其明驗也向例庫官俱由吏員銓選出身既卑人品不一查各省鹽場大使例由候選知縣州同州判縣丞內身家殷實者揀選補授臣竊謂庫官亦應照此例補用五年無過卽照原銜升轉以示鼓勵下部議如所請十三年四月調補山西布政使乾隆元年署廣東巡撫二年九月疏言粵東田畝高低不齊歲分兩次耕種六月早稻收後始栽晚稻今年中秋後廣潮肇三府屬之三水等十縣雨澤

稀少見在委員會同地方官逐一查勘被旱頃畝分數及貧民乏食用賑之處分析造冊題報所有應徵錢糧請緩催輸得 旨依議速行三年六月奏稱奉 旨令督撫藩臬各保道府臣於昨年七月抵任所屬道府尙未深知 上以署事已及一載未曾畱心察吏嚴飭之四年四月奏稱廣東開採銅礦陽春歸善曲江英德四縣見在各開龍口大抵每砂千斤可煉銅六七十斤至百餘斤不等合計每月出砂八九十萬斤可煉銅六萬餘斤其工丁所需食支雖繁見撥粵西買回之穀接濟令商人繳價歸項本地市價亦不致增昂至於撫恤商人約束工丁稽覈銅砂臣惟實力查察悉心調度得 旨允行五年因署巡撫任內徇庇開平縣知縣湯

萬熾審理縣民余隆光殺妻圖賴一案用刑不慎未曾劾辦經左都御史王安國奏參 諭來京以王安國署廣東巡撫事並命兩廣總督馬爾泰查訊屬實續查出王暮縱容家人趙大營私各款部議革職得 旨發往軍臺效力七年十二月 恩旨著回原籍十六年恭逢 南巡接 駕 賞給三品銜二十年在籍故

右 國史館本傳

王暮字孝徵太倉人戶部左侍郎原祁子康熙四十五年進士改清書庶吉士己丑授館職癸巳奉 旨養心殿行走甲午充河南鄉試主考官乙未丁外艱戊戌服闋補原官庚子冬提督陝西學政科試擢游得宜第一謂眾曰斯文也秋試亦當首選榜發游果

得解在陝西六年甲辰升洗馬丁未回京充會試同考官又充日
講起居注官升右庶子旋擢侍講學士七月升少詹事九月命
往廣東署布政使己酉春調直隸布政使時州縣新舊交代惟倉
穀爲難或前官預儲醜穀或後官延宕不收互詳聚訟暮稔其弊
使碾米交代以一米抵兩穀糶之平糶後以價貯庫秋成時新任
買補有司便焉兵餉舊例於四月初始領前月糧暮令於前月望
後發次月之糧營弁頌爲善政乙卯夏調任山西布政使丁巳入
覲擢任廣東巡撫時瓊州一郡編徵稅銀多缺額地方拘於考
成在地丁榔柯稅排門煙戶等項均攤賠派暮徹底查清奏免四
千餘兩以蘇民困廣東濱海颶風起潮溢爲災暮委賢員協辦軫

恤無使失所瓊州懸海外水土瘴毒莅茲土者偶有死亡道路遠
家口不能歸骸骨放殯謦請酌動存公銀兩給發路費洋船向有
閩貨之例俗尚奢靡犀珠磊落玩好炫目謦素無嗜好各商望風
卻走南海神廟載在祀典向惟有司官代往謦必親往祀之省城
粵秀書院諸生始通經學古適於實用庚申冬有忌而劾之者奉
旨回京至壬戌冬落職 命赴軍臺效力冰雪載道力疾而行
至第五臺奉 恩旨召還癸亥歸里十餘年辛未 南巡奉 旨
加三品職銜又三歲卒子述溶字雋驥雍正四年舉人和州州同
有惠政會歲饑奉檄查賑勞勩致卒於賑所孫鳳儀

右傳王昶撰

閻堯熙

公姓閻氏名堯熙字涑陽世籍山西太原徙居夏邑昆弟三皆弟
子員公其仲也伯叔以家貧舍儒就商公獨守一經日不再食不
變康熙丙子舉於鄉丙戌捷南宮越七歲令堯城堯邑濱滹沱常
以秋浸溢公竭貲築隄建木椿數千以捍其衝念易朽夾岸種柳
隄固水不爲患至今春夏之交鬱然成陰學士歌頌之治堯十一
年移南宮地要劇前令多詿誤署常見怪扁鎖室其旁公曰邪正
之分在吾方寸方寸邪則曖昧昏耗鬼蜮由生方寸正則青天白
日豈逢不若乎遂招鎖擴門就榻其中卒亦無怪未幾遷晉州牧
州瀕河河失故道蕩析民居公請設法安集免河患者請公謝扶

攜老稚相屬於道公曰 聖恩我何與令望 闕拜復念遠來人
給百錢以資裹糧頃之散錢十萬民益感激泣下曰真父母也會
怡親王奉使過晉耳熟公名奏循良第一除守青州時嘉興守缺
上以嘉難於青改守嘉嘉健訟豪猾陰把持良懦受魚肉數十
年不決民赴守訟批下縣或不理狡黠者益無忌獄繁興公始至
日判狀三百無不受理者民固異之比逮對簿自請息者二百餘
庭折數十各得其情去積年訴牒一空豪猾股栗竟歲不一陳詞
嘉人張某有姦如山皆欲甘心然嘆之莫敢發公廉得實杖殺之
一紹興老嫗糗糲來指屍而罵竝數其惡萬端初張暴於鄉或諫
阻張怒曰我何畏只畏閻王耳至是死眾以爲讖稱快郡殷於賦

正供漕糧其日糾紛里胥因緣爲奸民完如額官不知民亦不自知追呼無虛日而賦終缺官考下第以去公巡行清理民始知額歲完無逋屬邑海鹽潮汐擊塘工不就制府李公衛聽浮言欲開引河禦潮不知滷水入內河田畝皆傷非特壞廬舍糜帑金已也已入奏公微聞知力白其狀得不行營弁緝私鹽賣其梟妄持他人抵罪公言其誣制府惑於弁弗聽公三請制府怒責儕咎公公曰我不言是輕民命護一官也復與制府庭爭制府不能屈乃自勘釋獄愈賢公累遷湖北臬司臬司爲刑名之匯前司深文巧詆所屬重足而立日其堂曰閻羅殿公務生全不苛小人稱之曰佛再遷四川布政使蜀俗父子異產伯叔兄弟不相愛婦多外遇夫

知之不怪或亡得之亦不逐公曰禮義廉恥國之四維亡此何以治教化之行始學校乎因割俸廣學舍增膏火延善士爲山長歲時召見諸生與之抗禮士多榮之負笈滿成都康熙時兵燹未久人稀穀賤故滿兵願得銀雍正以後生聚多穀貴又願得穀或徇其意請於朝令民受銀購穀給兵事下前司聽囑如議上漢兵亦欲倣行公不可督兵爭之公曰滿兵例不出其城宇畫言語不與漢同代購猶爲有辭漢兵募自民間且其父子兄弟皆民也奚不自購而煩代購乎督兵語塞不能奪又議增滿兵滿兵向在京師雍正八年西域用兵分駐涼州及兵罷涼地小不能容謀徙成都公以提督都統例不並駐惟蜀俱在一城民已不堪忍

復增之以重民困乎議上制府心是之而未能堅持也必欲增富別城以居舊有城制容三千人駐千五百餘地占越歲久莫能知旗長知之故不言令遷民以築既卜地民惶懼號訴撫軍召公與計公得舊城圖籍指示撫軍曰城甚廣居者半增亦半適如其制安得他築以重擾民請爭之乃清侵地以居來者民得安堵公爲人質直面折不能容人之過賢則善遇之不賢直斥之雖大府不少假然宅衷光大語必至誠初交或怪伉厲久與處無不斂手推服其所擘畫動中機宜乾隆三年川東米貴州邑借帑購米平糶遠賈但聞價昂未聞官糶連艘雲集一夕賤州邑虧帑自數百至數千責償而成都官糶贏金二千例買穀貯社倉公曰官有虧有

國朝典章類考卷之二十一
二
羸羸不受利虧顧受害乎請破例以羸補虧得解公之量足以任
事而才足以濟之蓋如此年六十九卒於乾隆七年九月十三日
聞者莫不流涕子秉隨秉晉秉益秉升

九畹子曰成都太守王公時翔爲予言公初下車聞錢貴畫定之
既榜示王公謁公曰錢米隨時繩以官則有錢者匿不出售買錢
者指官相強市廛從此多事矣公欣然納之立毀榜其勇於從善
非有道者能之乎及歿予往哭之偕眾致賻公子稱公命不受謀
爲贖餽馬送之行亦不受嗟乎見利忘義人情類然安有餽之有
辭受之有名而卒不少動者耶一事而公之賢子之肖俱見矣

右傳劉紹攷撰

包括

包括浙江錢塘人康熙四十五年進士五十五年選四川長壽縣知縣游升刑部員外郎雍正四年授江蘇常州府知府九年升太通兵備道十一年調鹽驛道十二年以承辦銅斤寄信囑託戶部侍郎余兆晟將低潮銅斤混算好銅交庫部議褫職罪擬杖徒得旨杖徒之罪從寬准其折贖交與直隸總督李衛派修城工一處效力贖罪十三年 命赴部引見乾隆元年授山東登萊青道三年三月擢甘肅按察使十月奏稱甘肅原無佐貳之州縣印官公出遇有命案令典史先往驗明寫立傷單俟印官回日查驗通報又奏鄰封關提人犯限文到二十日拏解無故違限照事件遲

延例逾限不及一月者罰俸三箇月一年以上者罰俸一年聽信地保空文回覆者照匿犯不報例降三級調用均下部議行四年調江蘇按察使先是太倉州屬之崇明縣地當長江大海武職設有總兵文職僅有縣令又與通州接界居民互爭沙地迨雍正八年添設道員清釐沙地彈壓地方至是括奏稱漲出沙地在崇明之北通州之南崇人越海相爭該道駐劄崇明勢必越海剖斷徒滋奔馳拖累於彈壓本意終屬未協請將道署移駐通州既可就近清釐亦可遙制崇邑與總兵共爲犄角於海疆更有裨益從之五年三月升安徽布政使十一月 命署江西巡撫括具摺謝恩得 旨以實心行實政此爲治之要須終身服膺而無失也

又諭曰汝去時朕曾面訓汝若能身體力行何地不可爲耶但莫觀望自怠則以汝之才朕可保其勝任也六年二月疏稱江西民風樸陋民情澆漓夸詐者多在江浙連界之區強悍者尤屬閩楚接壤之郡羣趨小利每至忿爭惑於堪輿互相侵奪逞刀筆之技訟獄繁興恃族黨之眾打降兇殺則又通省之鋼習而一切政教號令無一定章程屬吏無所適從閭閻之疾苦扞格不通未免因陋就簡日漸廢弛臣見在隨事整飭確查利弊力圖鼓舞振興使地方日有起色 諭曰量力徐徐爲之不然徒有更張之名無整飭之實非徒無益而且有害也五月以宜春縣之太平關萍鄉縣之案山插嶺石灰營等關與湖廣連界玉山縣之屏風關與浙

江連界貴溪縣之昂山火燒等關與福建連界奏請分別修建添設營汛兵丁防守部議如所請七月疏稱江省開墾如在山巔水涯高低不齊或沙石閒雜坍塌漲不一及奇零閒土約在二畝以下免其升科二畝以上照例升科如可墾地畝在三五畝以上而故作數人開墾希免升科或將免升墾熟之田售賣他人私推別地正糧等弊請照欺隱田糧移址換段分別科罪如所請行八月疏稱知府一官經管倉穀庫銀嗣後新舊更替無論正署悉照州縣例限兩月交代造具冊結送道查明加結移司轉請咨部如逾定限亦卽移揭藩司詳請處分從之九月回安徽布政使任七年四月調山東布政使署理巡撫諭曰聞汝因罷巡撫而復原任

頗快快不自得凡事不肯實心擔當如此則是自取罪戾矣戒之
慎之時御史薛徵奏稱山東武定霑化等縣地處東偏偏近海口
時有盜賊出沒晝則扮作僧道貨郎夜則聚而爲盜民間不得安
處 上飭括上緊查辦尋以查無實據覆奏 諭曰此等事斷不
宜聽屬員息事之言以致釀成地方之患亟力爲之九月奏言東
省有泉之東平等十七州縣向設泉夫七百八十四名春夏秋三
季在本境疏泉栽柳冬月調赴濟甯協挑運河以時日而計則春
夏秋之疏泉栽柳爲常寒冬之從事畚鍤爲暫以力役而論則寒
冬之協挑運河爲重春夏秋之疏泉栽柳爲輕伊等名在官司食
支公項原不應聽其憊長畏暫避重就輕惟是泉夫本異河夫裹

糧遠役素非習諳轉雇代充益滋賠累請將距河寫遠之泰安等
十一州縣協挑泉夫五百七十四名改令沿河各州縣代爲雇募
其泉夫額支工食銀兩酌量扣減彙解河庫就近募夫泉夫止令
專司本地疏泉栽柳免其挑河至近河之滕嶧等六州縣泉夫二
百十名仍令協挑如所請行八年五月奏稱安東衛城旣歸併日
照請將該衛文武生童均歸日照考試衛城守備已裁請將日照
縣夾倉巡檢移駐衛城下部議行十月 召來京十二月得 旨
以京堂照例補用九年卒入祀常州名宦祠

右 國史館本傳

納齊喀

納齊喀姓布賽滿洲鑲白旗人副都統賽喀納子初官內閣中書
康熙四十五年十月隨大學士席哈納往湖廣鞫訊容美土司田
舜年私鑄擅殺罪狀還京轉典籍四十九年遷刑部主事五十二
年遷本部員外郎時皇太子允礽護衛德麟獲罪其父阿哈占任
福陵總管上命其自行拘禁德麟詐自縊死潛逃竄奉天將
軍塘保住以奏上命選才幹司員賞給納齊喀主事同舒琳往
膠州捕獲之德麟伏誅納齊喀議敘卽升尋授兵部郎中五十四
年辦事密本房五十七年任揚州權關監督期滿派往烏爾臺養
贍歸附之烏梁海扈魯特事竣回兵部任兼佐領六十一年十月

授山西布政使 世宗憲皇帝雍正元年正月擢湖北巡撫二年十二月疏言湖北州縣全食淮鹽近因生齒浩繁正慮食鹽不敷巴東縣與四川夔州府之巫山縣連界山峻路險商販罕至今縣北紙涪溪山中忽涌鹽泉試令煎熬日得鹽二千斤有奇計每歲可得七十萬餘斤請 敕部酌照淮鹽川鹽設引起課於 國計民生均有裨益事下部議令會同兩淮巡鹽御史詳酌以行三年二月疏言康熙五十九年截留漕米六萬石分發近水州縣貯倉備賑已閱五載紅朽堪虞請於青黃不接時平糶以裕民食俟秋成後計所糶米一石可易穀二石如歲豐穀賤尙有贏餘一並還倉積貯庶可經久疏上得 旨納齊喀奏請湖北各州縣所貯米

石易穀存倉以爲經久之計具見實心辦事殊爲可嘉尋以疾奏請解任 詔總督楊宗仁暫署巡撫納齊略乞假調養俟疾痊任事 遣太醫診視齋 賜珍藥及葷四斤五月卒年六十遺疏上得 旨納齊略簡任巡撫敬慎自持實心任事忽聞溘逝朕心深爲軫惻下所司議卹部議納齊略任巡撫未滿三年以致祭一次可否給半葬請 上命給全葬並 予諡勤恪

右 國史館本傳

安圖

安圖佟佳氏滿洲正藍旗人康熙四十六年由監生考充筆帖式五十八年遷戶部主事雍正四年遷員外郎八年遷郎中九年任坐糧廳十三年擢湖北布政使乾隆二年清查庫款冊內有雍正十一年江陵監利二縣民戶溢完墾荒銀一千二百七十餘兩懸貯縣庫奏請將銀買穀分貯三縣社倉聽民借放得旨嘉獎三年命署廣西巡撫四年三月疏言蘆洲坍漲靡常向例五年一丈爲期甚久恐狡猾之徒或移地換段或匿冊別名及捏造洲地名目互報成淤請嗣後令地方官隨時履勘造冊申詳屆五年清丈之期上司委員覆勘據實升除下部議行九月同兩廣總督馬

爾泰奏言右江總兵駐劄百色煙瘴最重請將鄰省附近之貴州安籠鎮及廣東右翼高州等鎮同本省之左江鎮俱定以年限輪調右江 上從之十一月奏粵西積貯倉穀見有一百五十餘萬石分存郡邑緩急有資惟民間素少蓋藏習於耗費復恃官倉例有糶借於新穀登場恣意賣與客販冀來年賤買官米見飭多方勸化俾資儲蓄 諭曰此雖探本之論然須行之以漸不可欲速也五年六月同總督馬爾泰提督譚行義奏報楚粵頑苗不法調兵剿捕 上以入奏遲延且別無經理之方皆切責之時湖南城步綏甯苗尚有廣西義甯縣妖匪李天寶妄言禍福聚眾斂錢安圖准楚省咨隨將首犯拏獲復被諸苗搶回經馬爾泰奏入 諭

以安圖所辦失宜傳旨申飭七月奏勦辦苗猺軍行事宜十七條
又奏泗城鎮安二府歸順一州自雍正十一年設學未設廩增額
缺今歲試三次請照例增設均下部議行是月 命來京七年復
任湖北布政使十年四月奏稱武職千把等弁因貪贓枉法及軍
務獲罪革職者任內有未完降罰案件應行追繳食過俸銀至因
公望誤革職者無論降罰案件多寡所有食過俸銀請免追繳
從之十一年湖北鹽道曹繩柱勒借虧空事覺以安圖濫行保薦
降三級調用尋奉 旨以布政使銜往鄂爾坤辦理糧餉十七年
回京十九年卒長子常青官禮部尚書次子邁拉遜官左都御史
自有傳

國史館本傳

右 國史館本傳

三

高承爵

公諱承爵字子懋別號一庵先世居山東之高密明萬厯中有諱
有者遷遼東之鐵嶺遂爲鐵嶺人有生良輔良輔生景時景時生
尙義從 世祖皇帝入關戡亂有功世襲二等阿達哈哈番公之
皇考也以公貴 贈光祿大夫光祿生子五人長曰天爵官江西
建昌府知府升兩淮鹽運使耿逆之亂抗節死 贈太僕寺卿諡
忠烈次曰膺爵曰錫爵公其第四子也次曰蔭爵高氏歷世隱德
不仕至光祿而大公之昆季皆位岳牧著聲績而公之功烈爲尤
顯公初以門蔭補蒙古都統七品筆帖式年雖少有幹略選授河
南衛輝府淇縣知縣遷西城兵馬司指揮出爲江南淮安府同知

管理邳睢靈璧河務升揚州知府康熙己巳 大駕南巡擢江蘇
按察司使晉福建布政司使到任三日 特命以都察院副都御
史巡撫安徽未十月 命巡撫廣東丁內艱歸服除 命分修南
河高家堰明年 南巡閱河復奉 命撫皖旋以事解任仍赴河
工又明年 南巡事得白尋 命督理靜海漳滏滹沱等處河務
公爲人精明強力臨事果斷不吐剛不茹柔不畏險難不避嫌怨
所至發奸擿伏興利除弊或他人選愞忍縮不敢出手者公應機
立赴莫爲持難若庖丁之於牛養叔之於射王良造父之於馬書
然沛然無不如志以此收民譽而亦以此結 主知至今論封疆
大臣之以才幹稱者必首及公也三藩畔渙淇當兩河之衝軍需

絡繹民困輸輓驕兵悍卒稍失意則撞搪叫呼官吏多竄匿公先
出庫帑採辦而後徵之民芻茭糗糧悉儲境上至卽給發檄出境
無有稽畱逗撓者其尤無狀者申憲以軍法從事莫敢齟齬民得
安堵而事益集民有訴其妻亡者三年矣莫得其主名公悉逮其
鄰里及常所與往來者閱視之良久指一人曰汝何敢匿某妻其
人色動叩頭曰某非匿亡者乃知匿亡者耳卽繫其人蹤跡之果
得匿亡者寘諸法民咸以爲神京師多大猾而指揮官卑制於御
史不得專決事豪右相率侮慢以爲常公受事之三日諸豪有挾
妓羣飲而譁呶者公命吏執之吏曰此諸豪恐及禍公曰無恐率
眾掩捕之無脫者公念此曹皆怙勢少遼緩之卽不得行吾意乃

目... 卷之二
三
祥目吏曰此皆白丁耶抑職員耶白丁無大罪職員當請黜革耳
頃之皆以白丁對卽予杖而逐之甫畢而憲符下業已杖亦無如
之何當是時諸豪大猾皆斂手避高指揮高指揮之名震輦下
邳睢歲有河患夏秋之交風雨暴作洪濤怒波擊蕩隄岸一壞則
萬姓魚鼈公呼召徒役輦土卷埽隨方捍禦而以身當其衝僚屬
切諫不聽隄卒以完論者比之王尊周甲富而懦王乙糾亡命劫
之書券而悉罟其貲甲訴之州不爲理以訴公或曰河官不宜與
民事公曰吾旣分治邳邳民卽吾民也民冤不得直官奚爲卒具
獄實王乙於法揚州例供草四百萬爲防河而揚方罹水災草價
騰躍費且十餘萬公請總河寬其徵至以去就爭之遂得請於時

元日有鶴來之瑞遂以來鶴名其堂而公廉能之聲播於遠邇達於畿甸 天子器其才遂有江蘇臬司之命公益勵精勤矢志平允以副 天子刑期無刑之意每當讞獄多所平反先是有私販鹽者以拒捕悉論大辟公親鞫之問防兵幾何曰二十七人犯盜幾何曰百餘人拒捕傷人乎曰無傷鹽犯三人公曰以百餘人拒二十七人兵不傷而反爲兵所傷何名拒捕哉論其魁餘悉減等楊氏父死而訟父妾與人私生女某月日送育嬰堂者復有要人持之公曰子當爲父隱父死而暴揚其私非情也且眞僞未可知一日以事至揚粹入育嬰堂檢其籍無某月日送女事其子覘知之遂囑院移其獄於藩司公曰治獄吾職也吾能越職而問錢

殺乎即日親鞫以籍爲左證其子詞屈遂伏罪欽犯賄解役佚去而解役亦逃拘其父訊之不承公飭吏密伺之有與其父相聞者執以來得一人公曰此卽解役也一訊而服人問其故公曰獄有五聽吾得其情耳無他術也粵東歲大饑公至卽發常平米賑之而後上聞上嘉之州縣舊派里民荷擔承應過客名曰過山夫役使勞苦公嚴其禁令自募糧役舊任里長因之侵蝕花戶輸十二於官而私其八更以奴隸畜之莫敢與抗公立按糧均役之法盡革其弊民大以爲便刑具舊用鐵梨木籐約其下而貫以鐵以是訊獄鮮全活者公命易以杉木麻約之而貫以竹頒其式於州縣至今用之舊制凡監斃三人止罪卽官而不及司獄公請與

均罪又請罪人配漳泉者得冬月發遣以免羈禁皆報可公在
粵凡舊政之不便於民者悉訪求其實大者奏聞小者檄罷聲生
勢長陽施陰設大約以剛決爲主而濟之以仁恕故民畏其威而
感其德去之日老幼扶攜遮道奔送自羊城抵梅嶺蓋千餘里不
絕也公凡兩治皖皆不久而去其治如在粵民至今思之初公自
揚州卽以才見知於上有清廉之褒親灑宸翰賜焉後遂疊
蒙恩賚非次拔擢中雖被誣而聖明洞鑒終始保全再委河
務軫念勞績眷注弗衰尙將有以用公而公以不起聞矣初公之
撫皖也以監臨當往江甯念太夫人年尊不忍離朝夕遂奉以行
江甯人榮之及再撫皖而太夫人已沒顧瞻堂宇涕泗潸然痛親

之不再至也公忠孝天植內行純備少負大志不屑執絻徵逐平生尙意氣重然諾讀書通大義每論古人成敗則抵掌擊節垂老猶手不釋卷好學其天性也公生於順治辛卯某月日卒於康熙己丑某月日年五十有九配楊氏繼配納拉氏俱 贈一品夫人子五人其偉庚辰科進士翰林院庶吉士其倫候選通判其健太學生其佳其人女七人孫一人公既卒之幾月其偉具狀來請銘銘曰

高世隱德發跡從龍公承其先實大聲宏始以才顯號能治劇弛張隨時導窾批卻於江於淮閩粵之交風行燦馳除莠蘇苗名徹九閩懋嘉乃績 六飛南幸疊荷 恩錫汝平水土克成厥功

無替前勞保其初終民有口碑史有載記揭於貞珉用告來嗣

右墓誌銘嚴虞惇撰

同身三本并下天新



天正八丁

天

張連登

撫軍氏張名連登陝西長安人康熙四十九年授湖北按察使會
值萬壽巡撫劉殿衡祝釐於武當山總督額倫特以湖南地畝
不清駐節長沙行文量公獨在省視事夏四月三日爲公覽揆辰
先四日日昃觴客於署西偏之揖青軒酒三巡門者來埒耳語公
起如廁俄而侍者傳言公腹痛命七郎主席少選又傳言疾稍可
行且出請坐客盡歡毋停爵旋命閉門毋出從者且有犒良久復
白曰公疾良已方理文書畢卽與諸君痛飲耳客皆屏息俟忽聞
傳鼓聲公已升聽事諸客乃問侍者曰何爲侍者曰曩者公稱疾
僞也適有僧自卓刀泉來上變屏人問之則云有王爾寅陶二者

國朝文獻通考卷之百一十一
嘯聚漢鎮備軍器私署文武將以公生日爲不軌以某有膂力遣
其黨李二李五等十六人突入寺脅之曰從我則貴不然死劍下
某佯喜飲之酒餽得其實今爛醉矣可速禽之公如其言密遣王
司馬渡江跡所在羣賊方酣寢邏者圍之排牆入大呼捉賊羣賊
驚起曰呀水發矣水發者方言消息漏也遂械其頸靡得脫者今
至矣於是四座聞言皆錯愕罷酒公驗問得諸囚反狀下之獄旋
出教曰反者某某也於眾人無與所得誓書愚民不無望名其中
然皆非其本心已災之矣汝等各高枕毋爲浮言所搖明神可鑒
予不食言是夕烏合者轉相告語各烏獸散晨起僚屬來謁公語
之故且曰昨倉卒時非不欲使諸君知之恐涉張皇敗乃公事故

乘深夜黨羽未集卒然禽之眾皆稱謝曰非所及也會報至長沙從官皆懼額曰張臬司在自能辦賊其報至武當也亦然越十餘日兩公馳歸見公卽勞之曰君不動聲色了此大事我兩人將入告得懋賞矣公曰不然此事上聞必下九卿議往返牽制動經年月疑者日眾轉相煽動恐致變生肘掖陸宣公云宥之以恩則日新者咸思歸命斷之以法則懷懼者姑務偷生良爲名言某昔守青州饑民攻城掠食惟禽其元凶二三人置之法餘悉不問四境以安況重臣得專制閩外乎不如勿煩 聖慮便宜從事令反側子自安儻遭吏議某不受一官以紓楚國之難敢過望耶兩公歎曰賢哉此盛德事人情所難而君能之此座不久屬君矣然此中

有姚道人者亦大憨也未獲柰何公曰搆之兩公曰何時可獲公
招指曰七日曰何速也公曰某比訊諸囚云其人肥而多鬚黑子
著面成塊可寸許毛叢生年五十上下詰其地則云景陵西鄉是
其舊游處已下檄縣官繪圖往緝矣計日可至已而果如公言公
乃推勘再三多所平反遂取其魁七人杖殺於黃龍山下之閱馬
廠餘皆區別處分或遣還鄉井多鄰省人也當是時父老子弟環
立如堵皆以手加額歡聲動地俄而上知之謂公從容應變動
合機宜可參禁密徵爲卿貳此事常甯段璫生嘗紀之文辭冗陋
予以公爲鄉邦偉人今且不能舉其姓氏因采段氏說而書之以
告鄉之士大夫稱撫軍者公於五十五年內升五十七年五月出

爲湖北巡撫云

右書事張澍撰

馮光裕 孫孔丞

乾隆五年閏六月巡撫湖南右副都御史馮公卒於官時湖南方有征調之役倚公才以辦軍事及遺疏入 上驚悼予卹典如禮孤子祁等以其冬奉公柩歸於鄉明年春走使至京師以狀乞予銘案狀公諱光裕字叔益世居山西振武衛今籍代州曾祖如京官廣東布政使祖雲驕官禮科給事中父壘官廣西南甯同知祖考皆 贈通奉大夫公爲人精敏強幹熟於經世之務雍正元年以舉人應薦赴邊知雲南大姚縣至則清逋賦卻土官餽遺未一年遷貴州銅仁府同知赴 闕引見時議取古州苗 上詢苗疆情形公謂苗人無知不宜盡殺宜隨機化導令歸版圖 上慰公

言復 諭有見當直陳公因奏言清浪平谿二衛隸湖南不如改
轄於黔爲便 上從其請比公在道卽擢思州知府又調永北知
府雲南諸府皆在金沙江南獨永北孤懸江外與蜀連界苗獠窟
其中有事則兩界交諉總督命公往勘公輕騎率十餘人抵境羣
獠從谷中譟而出挺刃相向眾懼欲走公曰走將安之因策馬直
前諭以利害諸獠環跪聽命各散去總督薦其才調麗江知府兼
理永北府事俄升雲南驛鹽道副使時東川烏蒙獠夷叛鎮兵逗
畱不進公請於總督夜馳至軍與鎮帥畫策進討平之旋擢按察
使東烏初定俘獲填委公虚心聽讞矜全者甚眾 上知公廉幹
特授貴州布政使古州苗叛丹江台拱諸砦皆警徵兵會勦公指

晝餽遲無愆期招徠流亡給以衣食難民復業又請蠲額徵錢糧以甯民困會 今皇帝嗣位得 諭旨連蠲三歲賦額黔境以甯乾隆二年入 覲返請免南籠安南二處鹽稅裁革婺州濯水二稅口部議格不行四年春奉 命巡撫湖南鎮筵紅苗亂公集兵攻之禽賊甚多不三月而奏捷 天子加恩議敘會疾作請假調治聞綏甯苗人句結粵徭謀作亂卽密咨兩粵總督豫籌協捕事已而疾劇遂不起拜遺疏言城綏兩邑憊於兵燹請蠲今年租公至死而不忘勤民如此生平自奉澹泊篤於親故急人之難治官遇事剖決如流無巨細悉身視之湖南壤錯黔粵直苗之蠢羽書旁午每至丙夜不少休愛公者頗引諸葛君食少事煩爲戒迄不

能改也先是弱冠時居南甯公喪毀瘠致痰癖卒以痰癖終生平
好書無所不窺舊柴門老樹村彙詩歌雜文雄駿有奇氣精六書
箋籒之學生於康熙二十三年得年五十有七夫人王氏子二長
祁翰林院編修次鄰舉人女五張甯禧王垂繹羅瑣齡范清洪孫
孝緒其坊也孫星五廷丞翰生廷正廷工廷立廷奎孫女三以夏六
月二十八日葬於燁旺村之東南原銘曰

漢軍名臣二馮爲倚世濟其美克奮歔歔損庵挺生亶明其志兵
律素淵邊岡攸寄黔山蟲蠹滇水泱泱心傾夔長歌冷竹王 天
子曰咨往撫南服用集乃勳鋒車其速橫戈草檄行藥聞颺以勤
王事以報 主知鬱彼新阡兆食其德澤流後昆功宗篤彌若堂

若封銘於幽宮凡百有位勛爾蓋忠

右墓誌銘彭啟豐撰

皇朝定鼎百餘年 列祖德澤洽海宇含齒戴髮之倫下逮昆蟲
草木無不與被仁厚之化熙然樂生而苗獫負性狼戾騃無所
知識閒乃撞搪跳躑於瘴鄉煙箐閒騷我邊吏其窟穴徧黔滇楚
南之境莅其土者非瞭悉形勢莫能得要領非具文武才用應機
立斷措施莫得其宜故 朝廷恆慎重其選故都御史馮公自筮
仕迄屢遷官皆在雲南貴州地已乃拜巡撫湖南之 命會城步
綏甯苗獫爲奸人所煽動廣西湖南發兵會剿部署方亟而公以
勞疾卒於位未竟厥用然公服官十有七年始終不出苗境屢遇

徵發決策具合機要昌黎韓氏所謂行事適機宜風采可畏愛者
公無愧焉公諱光裕字叔益自號損庵世山西振武衛人衛治代
州雍正二年衛省遂爲代人曾祖廣東布政使諱如京祖禮科給
事中諱雲驥考內閣中書歷廣西南甯府同知諱壘母田氏內閣
學士兼禮部侍郎諱喜霽女祖考皆以公貴 贈通奉大夫母
贈夫人雍正元年冬公由康熙辛卯鄉舉推擇赴雲南試知大姚
縣事所治多土司恆納賄命吏倚以恣奸利公至揮其餽迄去無
敢逞薦擢貴州銅仁府同知引 見得 召對時方議取古州苗
公謂髮鍊耳者流抑使就銜勒必不免蹶鬻草薶禽獮傷天地
和相機化導終不化外棄願需假歲月耳 憲皇帝領之復用公

言改清浪平溪二衛爲縣就近隸貴州公之受知自此始也尋擢知貴州思州府未任改知雲南永北府永北介金沙江外與四川犬牙錯前猺獠發交相誘以爲常公承制府檄往釐之猺阻險挺刃謀以嘗公從者怖欲竄公叱止之按轡前徐諭曰我太守也來撫爾眾俾世安業毋恐猺眾雖不解公語見公神色不動羅拜歎息散去僕夫迷失道翌日昧爽猺導以歸公則前挺刃向者也公從容按行增浪築永甯戍守歸報制府制府者今相國太保鄂公也奇公才奏改知麗江府尋薦擢雲南驛鹽道雍正八年八月東川烏蒙猺叛鎮將擁兵駐弓山觀望公齎制府軍符一晝夜馳七驛抵弓山畫策進勦發槍手百人護糧五百石入東爲鎮兵策應

國朝通志卷之二十一
三
掘拉江使烏苗不得合東川我兵由內地入撫海會威甯兵張翼
進東川以平晉雲南按察使閻三年擢貴州布政使十三年春古
州苗叛都江清江八寨丹江台拱新附苗蜂起響應焚劫凱里黃
平餘慶青溪 朝命六省大兵會勦公督餽餉先是內地民徒手
轉粟輒遇劫殺而熟苗承役官兵殺以冒功重運給資糧歸則無
所得食遞運當計里交卸督運者恐後期兼程進資糧無所加無
樂應募者公計往返期賦資直民予器械以自衛刻木符給熟苗
飭官兵毋敢殺民苗爭應募大兵十餘萬皆得宿飽兵旣罷殘黎
轉徙僅存無所棲止老弱枕藉道路公給草舍居之賦以衣食夏
大疫設局予方藥死者構而埋之凡復業二千餘萬戶黔省賦額

八萬八千兩米十五萬五千石有奇公謂兵燹徵調之餘非大沛
恩澤元氣不復奏上遇 今上登極 命二年皆勿徵又條奏增營
協集兵威禁妖巫又奏古州丹江諸苗勦絕竄死荒田空寨遠近
相望當募民居苗寨墾苗田增築城堡設屯置衛行保甲之法授
以降苗所入軍器農隙講肄戶以二壯丁計五六千戶可得勝兵
萬餘人聯絡營汛壯聲援而省餽餉久之布滿苗境可漸革苗俗
此久安計也得 旨允行置古州兵備道領屯事乾隆四年春
特旨擢副都御史巡撫湖南軍事鎮筸苗竊發公曰此姑息者釀
成之不大創且滋蔓亟會總督提督發兵不三月討平之明年四
月復有城步綏甯苗徭之警公先已臥疾數月力疾調軍爲進討

計厥晨猶校射拔補標將日晡疾革次日日加未遂卒閏六月七日也遺疏聞上震悼予祭葬如制初告警時或以小寇易之勦撫異議公決策進討公雖歿而逆苗次第就殲公精於吏事大姚賦不逾六千耗倍之積逋數萬無問多寡輒予杖徵不前公不取耗視負尤多者薄責之逋賦悉清民寄豪戶避重耗造偽券占田奸胥相表裏毀故籍公檢毀未盡者藏之按牒辨其偽歸田故主人服爲神其任鹽驛道鹽井久不治江水不滲入公修之產益饒驛夫不足供轉運役及平民公計役酬以直毀折者給耗鹽卹之其監錢局局二十五鑪歲鑄錢十萬一千餘貫前監者加鑄六萬餘貫滯不行公請減月鑄之數以償積虧鑄既減工食無所出

公以己資餽之鎡戶得食而官錢亦無滯更以其贏贍工役其爲
按察使治東川烏蒙俘七千人語不可通通事面謾莫能詰公集
各寨通事於使院隔別居之訊一人經數通事互譯無不得情者
裸姓名多相同公爲編次書年貌驗決得無誤省釋亦數千人承
檄治廣西李天保獄公曰愚民茹蔬誦佛非有異志特不當羣聚
耳治違令者數人大理亦有邪教從者千人按籍追攝多繫累公
焚其籍獄遂已公喜讀書好禮士大夫篤交誼葺貴山書院取諸
生文行優者肄業其中僻遠無從得書遣官之江南購經史羣籍
數千卷俾縱讀之丙辰 恩科鄉試巡撫有軍事公代之監臨越
事周敏士歸德焉公年五十有七配王氏 封夫人子男子二長

國朝一編卷之二十一
三
祁乾隆二年進士翰林院編修直 武英殿次鄴乾隆三年舉於
鄉女子五妯族詳墓誌中孫男五廷丞二品廕生廷立廷奎廷正
廷工公卒之明年夏六月二十有八日葬州煙旺村之東原祁來請書
隧道之石予惟公以勞卒官治績藏於有司於 國史當有傳爲
揭其大者俾刻於阡庶來者有考焉

右墓表汪山敦撰

按馮公諸孫名次誌表不符姑仍之待攷

馮廷丞

馮君均弼既卒之明年秋其子歲奉柩自楚北道京師將歸葬於
山西泣述其生平而請銘於珪珪早識均弼而先兄竹君與均弼
交最深不可解君馮姓諱廷丞曾祖諱維康熙戊辰進士官廣西

南甯府同知祖諱光裕康熙辛卯舉人官至湖南巡撫考諱祁乾隆丁巳進士翰林院編修妣劉淑人生子四君其長也君生而慧嶷幼從瑞金楊鴻臚方立游時鴻臚未第以詩古文詞相摩宰君已嶄然出頭角吐語驚人既而侍其父入都從山陰周蘭坡學士長發讀書證經史地形要害議事風發願爲有用之學錢塘周蒞岡學士玉章與蘭坡學士同直上書房奇君非常人以女妻焉君年弱冠方志於古不汲汲逐時趨三試不售以父望之切乃銳力攻舉子業壬申恩科舉於鄉君亟勤學苦心疾乃從方外游息氣內觀豁然元悟心精飛越魔怪百出燒之不爲動以神力超解曰此弄精魂也不竟其學初乾隆元年君以大父官貴州布政

使 覃恩給從二品廕生二十一年考列一等引 見奉 旨內
用補光祿寺署正歲戊寅編修公游浙卒於杭君既迎喪反葬盡
以遺產分諸弟於是貧甚服除補官遷大理寺寺丞擢刑部廣西
司員外郎廣東司郎中家益貧賃屋壁立斥與馬無薪裘資處之
淡然日治經史與名士切磋曰不固窮非士也惟勤於官治讞必
求其情輒有所平反見知於大司寇諸城劉文正公辛卯京察一
等明年出授浙江甯紹台道廉介自矢不爲詭婀甲午調福建臺
灣道臺灣斗絕海外民番雜隄官三歲更番不肖者漁利擾獄市
績甚不可爬梳君一刷之曰吾不爲也寮屬悚惕及君之時不敢
爲非巡道兼學政君曰不可以如隅易之親校甲乙士論翕然丙

申冬擢江西按察使渡海颺作舟膠於山若見檣端有神光莊嚴
者遂得出險既入 覲到官以失察妄人書籍事革職發軍臺效
力旋奉 恩旨贖罪 命往江南以同知用庚子 上南巡迎
駕準以道員捐復其在江南六年歷署常州淮安徐州三府河庫
蘇松督糧鹽巡松太四道事其在淮安也制府委以濬臨河集引
河君書徭工所官吏分寸不敢欺或罔以利不可則譏譴交作然
大吏之賢者以是益重君壬寅冬授分巡江甯鹽法道明年春擢
湖北按察使 陛見 上問官刑部時誰保汝以劉統勳對 上
曰學劉統勳最好君於是益感厲淬發思有以自見湖北獄善請
張君盡心釐之有楚蜀爭界事君盛夏行施南萬山中履勘平其

爭遂邁疾請解任竟不起四十九年甲辰十一月八日卒於署君
生雍正六年戊申九月某日年五十有七君有守有爲蹟而復振
將有所大造於斯民而不竟其施爲可惜也配周淑人子一茂乾
隆庚子舉人議敘八品京官女一適編修汾陽曹錫齡孫一衍緒
乾隆五十年乙巳十一月某日葬於代州煙旺村厥考之墓次銘
曰
句注之陽雲龍陰翳柯其骨冰雪心鬱奇騰上斬不駸歸復而升
理則湛

右墓誌銘朱珪撰

君諱廷丞字均弼其先畢公高之後食采馮城因而命氏世遠失

其譜系明成化中壽光馮盛以軍隸振武衛遂家代州五傳至明
期領鄉薦其族始顯 皇朝曰如京廣東布政使司左布政使子
曰雲驩禮科給事中爲君高祖曰壘南甯府同知爲君曾祖曰光
裕都察院右副都御史巡撫湖南爲君祖曰祁翰林院編修爲君
父馮氏以文學起家至君凡十一世立朝莅官咸有名績家法謹
嚴爲北方所重君旣冠舉於鄉乾隆二十一年由廕生授光祿寺
署正君儀觀溫雅造次必於禮法嘗引 見 上望其舉止喜曰
是舊家子弟丁父憂去官君自以有祿於朝乃盡以遺產與諸弟
而任其喪葬之事服闋補故官官閒少事因得肆意於學與大興
朱學士筠及其弟侍郎珪嘉定錢少詹事大昕青浦王副憲昶歛

程編修晉芳桐鄉汪舍人孟錫以名節相矜尙文章議論咸蘊藉有根柢其後諸人仕宦或顯或不顯天下稱名德焉君多識史事尤精於地理自禹貢以下川瀆異同都邑沿革口講手畫昭然如覩丹黃累篋老而益勤然不喜著書自娛而已差監通州本裕倉有善政旣受代吏人往來京師更十餘年參謁惟謹遷大理寺寺丞故事大理於三法司主平反刑部權日重大理不得舉其職君在官於罪名出入數有糾駁刑部諸司皆怒而大學士劉文正公總理刑部尙書獨心善焉踰年遷刑部廣西司員外郎旣謁文正文正傾心禮遇事無大小悉以咨之踰年遷廣東司郎中君公廉不受請託然用法持平多所矜恕是時文正方得政所奏請無不

嘗故君得行其志其後君由江西按察使入 覲大學士于文襄
公問君在刑部治狀君曰夫獄者愈求則愈深要在適中而止則
情法兩盡文襄嗟賞其言告諸司官以爲法出爲浙江甯紹台兵
備道兼海關監督歲造戰船采木於屬縣吏因以爲利君閱實其
木書之於策以次伐之吏無所容手潮犯蕭山君急裝立塘上曰
水至則死於此督吏民修防更三晝夜塘得不壞歲入有餘則以
舉其地之公事次則施諸三族之貧者通人名德禮接如不及故
交遊士咸得其欲而君被服如儒者不聽音樂終身無妾媵遷官
之日至無以治裝調福建分巡臺灣兵備道兼提督學政承黃教
亂後撫治雕敝務安靜不苛擾柵城三千七百丈以爲外衛數巡

麻縣供頓餽遺無所受嘗一夕卻金如意七列城歎服有吏職造船應支番銀二萬吏之子爲諸生其年當選拔貢生吏請無受直而貢其子卒不許遷江西按察使江西當江湖嶺嶠之濬地險而民瘠是以多盜君廣設鉤距得其主名將竟其事會王錫侯字貫獄起君坐失察革職發北路軍臺效力贖罪尋發江南以同知用尋署常州徐州淮安三府及蘇松常鎮太糧儲河庫鹽巡松太兵備四道率不數月代去常日勞皇無所得食而當官則清操彌厲同官或叩其所入輒權詞荅之終不以其守蓋人盡心民事尤急貧弱雖一日必舉其職時人以君好施而無所取清而不刻篤學勤政未嘗近名謂之三反當君管河庫日大學士誠謀英勇阿公

以閱河至見君深相器重使開臨河集引河剋期而竣比還朝
陳君忠實可任且言其淹恤由是補江南鹽法道踰月遷湖北按
察使荆門州知州某爲民所毆以抗糧聞君馳往撫定其眾究其
致衅始末乃坐倡首者而貸其餘人施南民以爭地相仇殺君履
行萬山中親定其界爲瘴氣所中重以飢勞舊疾遂作既歸猶冒
暑聽斷不少止踰秋浸劇請解官治疾甫報允而卒是爲乾隆五
十年十一月乙丑春秋五十有七貧不能具含殮妻子歸無所居
寄食京師士大夫知與不知莫不痛惜君長於撫御短於擊斷故
與同官多不相得而恆得民心嘗慕古爭臣守節死義昌言天下
事遇事激發引爲己任然久宦京朝隨牒平遷未有言責其後五

任司道上不能專制下不能親其民清勤自力無所表樹經世之學體國之忠生不竟其施沒不傳於後世其可哀也已君娶翰林院侍讀學士錢塘周玉章女 誥封淑人子歲候補八品小京官女適翰林院編修曹錫齡歲以君卒之次年十一月乙丑葬君於代州之煙望村禮也中自依有道迨茲一紀始則窮鳥投懷實蒙忘分既而縶縶從公共涉夷險凡所披陳無不意盡常恐朝露有期將使老母弱女累君高義而一辭祖道遠至撫棺遂以衰疾餘生哀述舊德天道人事其何可量銘曰

邈矣公高光我文昭畢分晉國馮佐秦朝允矣東陽其延十世夏德和龍亦雄四裔代州之顯當明末造縣祀二百自他有耀君生

而貴亦與憂俱保世守官尺寸不踰高柴用刑別人感惠汲孺閉
閣淮陽稱治君雖習吏澤不及民盛德在抱萬物知春在邦在家
日有籃簋何以飭之臣心如冰朝酣夜歌彼維何人乃速高位以
康其身此焉小心履冰集木鋸筭尺書蒼黃詔獄牽復有時交推
莫訴如彼敬通坎坷末路一材一藝百年千里聞名嚮風載矜載
喜生館死殯其歸如林外無德色內無勅心年裁中壽家亦屢空
完然白璧君子之躬百世有師清風不墜我無愧辭人惟墮淚

右神道碑汪中撰

國朝通志卷之二十一

三三

孫詔

方伯姓孫名詔字奉書號友石武威人康熙壬午舉人壬辰進士
選庶吉士武威自明季李銳登甲榜官汀州太守至方伯再成進
士故吾鄉人 國朝方伯爲甲科開先云方伯旣官庶吉士旋請
歸 世宗御極始解館改知縣性伉直不能事上官以故多所齟
齟久之 世宗有事 先陵 蹕經其邑大雪積 行宮門外數
寸故事凡宮門內外糞除之役實宮監司之宮監有所索於方伯
未之允也輒呼縣官來埽雪方伯擁篲以前謂宮監曰縣官爲
天子埽雪豈辱事耶偃僂埽雪不已宮監怒將羣集而毆之於是
方伯引其魁以出飭卑隸縛而加杖是時上官皆伺候宮門外聆

之震悚遂以其實聞且請罪世宗覽奏欣然曰此知縣好膽
宮監滋事不可赦著交所司治罪召見方伯慰勉者再無何擢
甯波知府旋遷甯紹台道轉兩浙鹽運使進江西按察使方伯以
朝廷嚮用方隆竭誠圖報尤慎於庶獄嘗曰吾不能必人之無
冤惟求己之無悔斯已矣既而晉湖北布政使未及離任卒於南
昌時雍正十有一年也始方伯守甯波兩浙累有逆案詔罷其
省春秋貢士特設觀風整俗使揚國家所以激厲之意而大中
丞奉天王公持節至浙警飭之者既諄且備旋與總督宮保尙書
彭城李公學使翰長交河王公交章上言浙人洗心滌慮痛自湔
除而復科一事猶未得聞以請也會方伯莅甯謂諸生以立品奉

公爲上而有倚託青衿不急國課作四民倡其罪尤甚約於試士時俾有司覈報苟有逋糧則停試俟其旣完得從有司具狀補錄里社不肖驟聞此令不能無怨而方伯弗爲之動已而學使行部至甯聞方伯所行善之且令行之通省是歲浙人課爲天下最先是世宗已嘉浙人自新之速及聞樂於輸將大喜遂準復科眾至是咸喻方伯之大有造於浙也比方伯卒鄞人全祖望述其事並爲之誄其詞曰西涼之域茂陵所開晉十六國繼翦蒿萊歷唐宋元頗稱乏才運際中天乃起其衰峩峩使君破荒而出如煉石手以補天闕花顛綾被三館矜式洊歷方面樹藩秉臬被名與位有如飄蓬唯茲令聞可以無窮吾家枌社桐鄉之東甘棠蔽芾我

國朝詩林卷之二十一
三
思名公祖望浙之聞人也於時流鮮所屈服而獨心折方伯若此
可知方伯之所爲治浙與浙人之感方伯也深矣又修復南宋六
陵於祠祀義士唐玉潛林白石外旁及王修竹鄭宗仁謝舉羽羅
誅且議毀楊璉真珈泰甯寺而瀦之其發潛誅奸修廢舉墜大抵
類此然其善政率皆就湮挹奎采錄所聞著之於篇不敢摭拾無
稽之言恐誣方伯也子爲璘舉人孫備進士備自有傳

右傳潘挹奎撰

陳德榮

陳德榮直隸安州人爲諸生時與博野尹會一切劇正學有經世之志康熙五十一年成進士六十一年授湖北枝江縣知縣修百里洲隄以息水患請除解餉入川雜派民無擾累雍正三年遷貴州黔西州知州丁父憂歸服闋命赴雲貴候補尋署貴州威甯府知府未幾威甯改州升大定爲府以德榮移焉烏蒙土司叛東川鎮雄附之上官檄德榮赴威甯防守城西陴傾圮聚民間米桶實土石絜丈餘上加雉堞不終日而功成賊離城三十里縱火牛光燭天德榮督士卒晝夜備禦賊不敢逼總兵哈元生援兵至賊乃遁尋丁母憂服除署江西廣饒九南道督潯陽大孤兩關宿弊

盡革乾隆元年擢貴州按察使疏言古州吏目葉封印江縣典史章秉惠均以疏脫重犯越獄題革覆准獨貴定縣典史倪永吉部覆照有獄官例止予虛革前後互異無以示勸懲且府司則有司獄州縣則有吏目典史若司獄爲專管獄官吏目典史爲兼管獄官是覈轉衙門有專管之員承審衙門反無專管之員於設官律例之本意均有未協請處分酌歸平允監獄照例責成 上是之飭部議行時苗疆新定方駐師興屯經略張廣泗以威重鎮服用法嚴峻二年貴陽大火德榮入見廣泗曰天意如此當設誠修省苗亦人耳可盡殺乎廣泗大感動申戒諸將吏如德榮言四年署布政使以黔地瘠薄宜勸民務本計疏言黔省山多水足可以疏

土成田惟小民艱覓工本不能變瘠爲腴至於山土荒棄更多流
民思墾輒多撓阻桑條肥沃亦不知蠶織之法非牧民之員爲之
經營勸率不能興利今就鄰省雇募種棉織布飼蠶紡績之人擇
地試種設局教習轉相倣效可以有成應將上游責成貴西道下
游責成貴東道屯軍責成古州道俾之因地制宜隨時設教則一
年必有規模三年漸見成效矣疏入下部議行六年又課民樹杉
本六萬株奏入 諭曰欣悅覽之蠶桑樹藝爲政之本所當時時
畱心教民務本足用之道均不外此七年貴筑貴陽開州威甯餘
慶施秉開報墾田至三萬六千畝種桑飼蠶俱有效復開野蠶山
場百餘所比戶機杼聲相聞德榮詳悉入奏 諭曰此等事論之

似迂行之甚難若果妥協辦理則實有益於農民者勉爲之前後
疏九上皆蒙 嘉獎復繕城垣恤流民給孤老益囚食修拓黌舍
進諸生勛以爲己之學自立志始士風爲之丕變十一年升安徽
布政使適鳳潁水災田廬漂沒急請發倉賑恤流移得以安集十
二年卒於官

右 國史館本傳

公姓陳氏先世浙江秀水人明永樂初遷安州五世祖始爲儒官
遂世其業祖若父皆舉乙科教授鄉邑連州比郡秀傑之士多從
遊公成童補博士弟子巽然出儕輩甫弱冠卽佐父爲諸弟師學
使者課試歷其曹者必公兄弟也而公自視缺然陰與博野尹元

孚思古處務檢身制事之學壬辰登進士年二十四座師爲趙公
松伍徐公蝶園皆器公榜下卽充武英殿纂修時滄洲陳公掌殿
中修書事嘗語余後進有守有爲者以公爲首故公詣余一見如
舊識初授湖北枝江令鄰省大府卽思得公守巖州劇郡旣典郡
卽思得公爲監司故論薦者如爭其以黔西州服闋引見世
宗憲皇帝卽命赴貴陽以牧守補用其守大定以江西巡撫薦遂
命補道府皆前此所罕見也公任官二十餘年皆在西南而勳績
尤著於滇黔其爲政急民之病如其私而務以殖其衣食爲本始
令枝江修百里洲隄除解餉入川雜派攝饒九道剷去潯陽大孤
兩關錮弊辨誣獄出無辜者七人未數月經略張公以貴州按察

使保奏方是時羣苗交煽軍旅四出古州姑盧朱洪文諸叛案以爲非公莫定也公至出入重輕咸稱其情眾心始安逾年春攝布政使黔地多山租少穀土兵餉半移調於鄰省民尤貧瘠公奏給工本築壩堰引山泉以治水田導以含洩涉揚之法貴筑貴陽開州威甯餘慶施秉閒不數年報墾升科者三萬六千餘畝課種桑募蠶師教蠶出署內所登繭於大興寺縑絲織作使豔其利闡野蠶山場百餘所比戶機杼聲相聞又以其閒大修城郭廟壇學舍廣置栖流所以收行旅之疾病者益囚食方冬寒恤老病鰥孤之無衣者親課諸生開以立志爲己之學立義學二十四於苗疆蓋惟公志廣而才足以達之故於艱難倥傯中庶政並興而曲得其

次序也其尤爲遠近所傳述者公始至貴陽委署威甯府踰年威甯改州大定改府會烏蒙土司謀叛東川鎮雄附之威甯爲夷獯出入綰要地仍命公馳赴威甯督州牧完守公至城西陴頽舉步可踰乃聚民間米桶實土石層累丈餘然後比次營築墉堞屹然羣夷縱火牛街鎮去城三十餘里火光燭天公言笑自如日夜爲守戰計賊不敢偏會哈元生兵至賊敗時鄂少保總制滇黔公其所舉任也常以此自喜知人之明張經略引公自助亦職此之由而余與尹元孚平生重公則在志行之不苟方威甯危急時公慮賊兵趨大理屬州牧陳嘉會分守大理執其手曰吾死於此分也但遺老母憂齋志窮泉矣及公陳臬於黔苗疆初定方輿屯以蹙

掘之將吏多欲以刻急見其能謂此異類勦絕不足惜也丁巳正月望省城大火公入見張經略曰天意如此當設誠修省雖羣苗亦人類也張公大爲感動以申戒承事者公之一於義理而不雜以世情如此昔滄洲政績惟著於郡縣與攝江蘇方伯時及踐大府河決武陟以死勤事而功不成海內惜之公之才識與滄洲相近而遭遇亦略同自爲三司天下皆望爲大府近十年矣大府多舉以自代而竟終於此然滄洲攝監司日淺又不若公之久於其任而實德及人良法垂於後世然則在公亦可以無恨矣公自黔調移安徽未一年會徐鳳水災民流於金陵地非公治也而竭俸賜編棚苫蓋布席以栖災黎重建陽明書院以實學開羣士其卒

也官吏士民皆爲嗚咽生平孝親友弟睦姍任恤仁於故舊僚友不可備書書其志事之卓卓者公諱德榮字廷彥號密山康熙辛卯科舉人 誥授通議大夫生於康熙二十八年正月十六日卒於乾隆十二年八月二十七日年五十有九曾祖諱所聞歲貢生祖諱泚順治庚子舉人父諱鶴齡康熙甲子舉人以公及仲弟德華累 贈通奉大夫曾祖妣潘氏姜氏張氏祖妣王氏吳氏妣鹿氏並 贈夫人娶辛氏浙江分水縣令禹奕女 誥封淑人子四人長策乾隆丙辰進士江南宜興縣知縣次筠雍正乙卯舉人候補內閣中書次筌乾隆甲子舉人皆辛夫人出次藩側室黃氏出女四人孫四人以某年月日葬於某鄉某原銘曰

古賢之生各有志事雖遇於時難滿其器與其遇隆而施則匱孰
若中閔用有未致公如金玉韞則有輝爭先欲覩衆心所希嘗然
當官藹然近人雨膏霑被物象皆新事至立剖光融如煜表裏洞
然蠹祛奸伏中經畏塗進退維谷國爾忘身如行平陸誰謂文儒
紉於武守持危濟變左宜右有信道不移行身無倚諤諤危言以
報知己獲上以誠師中有喜異類同仁德施無比海隅蒼生望公
秉鉞中朝良士佇眙 孔闕謂承天休如抱與鼓年未及耆忽焉
終古愛已遺民迹常見史無爲公悲公長不死

右墓誌銘方苞撰

徐士林

徐士林山東文登人康熙五十二年進士五十七年由教習授內閣中書雍正二年遷禮部主事四年遷員外郎五年授江南安慶府知府十年擢江蘇按察使十一年因知府任內失察私鑄部議降一級調用奉 旨降補汀漳道乾隆元年正月遷河南布政使十一月以父病請假旋丁憂三年 命署江蘇布政使士林以病母八旬且父柩未葬懇免 許之四年正月 上以江蘇巡撫許容請假省親 命士林卽由本籍前往以布政使護理巡撫印務士林復以母病篤不能暫離陳奏請俟母病稍愈自行奏 聞四月來京授蘇州布政使五年五月奏言資送流民原爲 國家軫

恤之恩卽不可無防維之法近湖廣資送山東流民經過兩江數
日內竟至三千有奇蜂擁江干恃眾逞刁有司受其需索商民畏
其糾擾臣愚以爲凡係真正災民或有田能耕或無田而佃皆素
能力穡時值春融亟宜資送復業其原無恆產情願在外傭工者
應聽自便至若素習手藝以及游惰無業漂泊日久者彼固非能
耕之人亦不盡被災之民應請槩停資送庶災民得行旅之資卽
刁民無聚眾之勢或謂無籍窮民恐流而爲匪終年搜查遞送不
休臣未聞不爲匪於本籍獨爲匪於鄰封者也亦未聞眞爲匪者
遞回原籍卽能務本力田而不復潛至鄰封者也安分則撫柔之
犯法則懲創之是在地方官處置得宜而已 上是其言下九卿

議行七月授江蘇巡撫先是湖北巡撫崔紀以湖廣舊食淮鹽自
雍正元年侍郎黃叔琳等議定價值遞年加增實爲民累疏請覈
減大學士等議令各督撫詳議而兩省督撫兩淮鹽政各持己見
屢議未定至是大學士等請 特簡大臣往會覈 詔令士林會
同新鹽臣準泰確覈定議士林議奏鹽爲民食所資貴固累民賤
亦累商今逐項確覈成本每引賤價以五兩三錢餘爲率貴價以
五兩七錢爲率商人計逐子母若令按本出售恐商力日黜轉運
不前民亦未便應請每引酌給餘息二三錢疏下部議成本定價
應如所請至餘息諒已攤入成本內毋庸酌給士林復奏商人牟
利而趨運不前亦斷無市價不長之前事鹽臣三保酌開成本每

引賤價六兩三錢餘貴價六兩五錢餘是成本內實有餘息也今
臣議定賤價五兩三錢餘是每引已減餘息一兩矣貴價五兩七
錢餘是每引已減餘息八錢矣臣僅議加息二三錢計售於民每
斤增不過以毫計利已微薄祇以商本饒裕常年通算積少成多
今不給餘息商情失望必生退阻況產價之貴腳價之增眾所共
見一無所利而令挾資千萬冒涉江湖則奸商得以藉口良商未
免力絀儻漢口運鹽不繼恐淮南因而楚民亦病也奉 旨照所
請行六年二月奏言上年徐海被水經臣題准賑濟見當播種春
麥無力貧民請酌借穀麥以資耕作沛縣被水尤甚請動藩庫餘
平銀兩買米接賑又奏江蘇社穀積貯無多上年秋成惟徐海一

隅被災餘俱豐稔臣戒諭牧令及時勸諭勿強派勿限數勿差役
滋擾並將社倉勸輸定例詳明曉諭見已報捐十餘萬石疏入
上嘉之四月以病請解任 優旨慰勉並 遣御醫診視五月奏
言淮北今歲被水甚早二麥無收急宜撫恤臣不敢拘泥成例已
先飭藩司撥銀賑濟俟查明成災分數再行具題得 旨如此辦
理甚副朕視民如傷之念六月復以病體日重心氣虛耗且母年
八十有三不能迎養朕違兩載寢食靡甯懇請給假得 旨俞允
九月行至淮安卒遺疏入 諭曰徐士林學問素裕忠孝性成因
母老遠離不受妻孥之養鞠躬盡瘁以致沈痾聞解組之時力疾
旋里以圖侍母臨終之際無一語及私勸朕以憂盛危明之心爲

久安長治之計此等良臣方資倚任乃今溘逝朕實切切含悲不能自已者也徐士林著入京師賢良祠以爲臣工勸應得卹典該部議奏請議祭葬如例其遺疏內奏故父之淮母鞠氏孝養祖父母臨病二十餘年歷久不懈懇 賜表揚應令本籍地方官查明題旌奉 旨允行九年十二月江蘇巡撫陳大受題准入祀蘇州名宦祠

右 國史館本傳

公諱士林字式儒號雨峯世居山東文登縣父農也公幼聞鄰兒讀書聲慕之跪太夫人膝前曰願送兒置村塾中許之遂舉康熙辛卯孝廉癸巳進士補中書遷刑部主事知安慶府再遷江蘇按

察使以失察私鑄左遷汀漳道漳俗鬪殺人捕之輒聚眾據山或請用兵公曰無庸命壯丁分扼要隘三日度其食且盡遣人深入誑以好語曰垂手出山者免如其言果逐隊出乃伏其仇於旁仇大呼曰爲首者某也立擒以徇眾驚散嗣後捕犯犯無據山者遷江蘇布政使丁父憂 詔奪情巡撫江蘇公不起服闋入都 天子問山東直隸麥收如何曰旱且萎問得雨如何曰雖雨無益問何以用人曰工獻納者雖敏非才昧是非者雖廉實蠹 上深然之補江蘇布政使尋遷巡撫未一年病病中念太夫人年高不能迎養三上疏乞歸 上許之行至淮安薨 天子震悼 命崇祀賢良壽五十有八公要路不通一刺而於鄉會師門惓惓不忘曰此

人生遇合之始也治獄如神任刑部時有二人伐木塞外木標乙斃有司訊結矣越三月乙弟以謀殺控甲甲逃公曰置當場死者之妻子不問而以三月後局外之人與獄乎甲逃懼累非懼罪也甲聞卽出獄果虛知安慶時宿松孀田氏事姑孝兄公利其產偪嫁之與羣匪竄焉婦刎於途誣以墜水公坐堂上見黑衣女子啾啾如有訴召兄公質之則毛髮浙灑口吐情實公深愧以鬼道設教而滿庭胥隸皆有見聞不能掩也凡讞決憲於轅垣絕人影射守令謁者具獄命判試其才教曰深文傷和姑息養奸戒之哉夫律例猶醫書本草也其情事萬端如病者之經絡虛實也不善用藥者殺人不善用律者如之性廉儉而絕不自矜賀長至節天寒

表禿霜與涕俱臬使包括以貂假公公披之如忘涕唾交揮家人
耳語曰此包公衣也公大慚謝過少頃論公事快揮灑如初聽訟
飢大呼點心家人供角黍且判且啖少頃髭頤盡赤蓋誤朱爲餽
糲筆管交下不能復辨晚坐白木榻一鐙熒然左右案可隱人手
批目覽雖除夕元辰勿輟幕下客憐之具美饌邀公公猛噉不問
是何名色其平素精神夢寐似仰唾涕知愛民憂國惟日不足而
已故於服食居處人以是供公以是受不容心於豐亦不容心於
儉也聞覺禪師來江南督撫將軍以下負鞬矢屈膝公長揖呼和
尙織造海保入獄五月猶狐裘公進葛衣大府訶之公曰罪雖重
於律五月不衣裘也如以爲嫌請劾臬使楚鹽不運 詔命會同

鹽政嚴議或勸讓鹽政主棄公笑曰問心公私耳何嫌之避請加
息以惠商時內外大臣噫媚不前而公章先上乃附紙尾以進公
子一人名朝亮生十四年而公薨妻張氏 誥闕

之驕用人先求其直章上人以比朱文端公云銘曰

昔湯文正爲政江南民化其儉苦節成甘後有繼者諄諄訓詞民
不能從且相警警隔五十年徐公至止宴滄浪亭五簋而已蘇城
翕然儉且中禮惟余小子憎人講學聞先生風恍然夢覺同言而
信信在言前同禱而應應在禱先至誠動物其中有天羊質虎皮
類然不然嗚呼徐公今無其倫來非戀爵去非要君險非矯俗仁
非市恩始於立身終於事親正色爲秋微笑爲春不愛公勤愛公

之醇不敬公清敬公之真爰爲公銘以示後人

右墓誌銘袁枚撰

三ノ人ノイニ

三ノ

國朝耆獻類徵初編卷百六十七補錄

疆臣十九

盧詢

古今之天下所恃以相維於不做者惟此忠孝之氣而文章事業則其表見者歷考前史如渤海潁川循良卓越矣而著作不彰嘉州蘇州輩風雅絕倫矣而治績不稱於後世則兼之者難也我郡伯盧公世以忠孝傳家太先生亨一公樹幟詞林嘉謨譙論顯燦人耳目及巡撫湖南清德著於當時豐功垂於奕世迄今讀長沙諸奏疏與悅安堂詩草忠孝至情溢於言外未嘗不慨然想見其爲人公爲亨一先生冢嗣幼承家訓不以門第驕人雖世襲軒冕

而布衣韋帶處之泰然故筮仕畿輔若交河若清苑若畿西捕盜
司馬以迄新安刺史所至興利除害卓卓著功業而確乎不拔之
操初終一致歲丙戌來守威楚郡當西迤衝要地瘠民貧日奔走
於車塵馬迹間且兵燹地震之餘瘡痍未息所期望於賢守者以
其能欽恤我殘黎無胥戕胥虐務德化而刑不黷也以其能念田
家作苦輕賦斂禁科派俾相安於耕鑿而父子甯也以其能輕車
減從卽往來差役不徇情面濫給夫馬柴草鄉總無由借事生風
以蠶食我下戶也以其能除計口授鹽之害捐月規減鹽價而窮
鄉僻壤陰受其賜也以其能矜商恤賈稅課從輕往來之行李不
解塗不嗟而市不擾也以其能取才生童而教誨之作育之建義

學修書院置義田俾爲肄業之需月課有資而蒙養攸賴也以其能維持風氣不借科歲兩試爲射利之媒情分不干而真才務拔也以其能重賓興大典捐清俸慨給各屬科舉并遺才亦霑其惠心公而澤溥也以其能念切痾瘵置義田於六屬以振困乏而孤寒不致歎於仳離也以其能協和同城將佐上不諂下不瀆兵民相安於無事而枹鼓不驚也以其能表正僚屬剛不吐柔不茹官箴肅而庶事康也以其能闡幽發微敦節孝崇正學黜異端明倫講讓躬行之化潛孚於鄉國也以其能聽訟明允寬不失於縱嚴不近於苛事至立判吏胥奉法惟謹案無畱牘獄無冤民也迺以我公拊循之一一皆有以愜其願用能使荒殘之黎庶喁喁向化

而治績迄於有成蔬食菜羹泰然自適雖古人懸魚瘞鹿之節何
多讓焉此尤德之基而敷政甯人之本也公餘則下筆千言立就
尤長於諷詠清俊雄健至操觚運筆鐵畫銀鈎風姿搖曳惟公忠
孝根於至性隱微獨知之地第恐一念稍疏一事偶忽無以報

聖朝簡昇之重隳家聲而遺先大中丞羞其植根者厚故發於文
章聲大而遠見於事業澤溥而悠要皆忠孝之誠所蓄而彰焉者
宜其名譽播於當路而閭閻佩德不忘也戊子夏督撫知公賢交
章特薦移守廣西以廣邊關重地鎖鑰非公不可報甫至闔郡蒼
黃莫措士罷業賈罷市工罷肆農輟耕於野各屬不期而集者數
千人環府衙而泣持土甃闔其門復將各城門掩閉羣聚相守時

聞嗟痛聲若嬰兒離慈母狀卽三營武士不遑甯處恐莫我有留
既而督撫檄方伯劉公別駕楊君縣令徐君星夜赴楚士民懼奪
我公誼聲徹通衢兩君再三安慰及得藩司檄述督撫念民情有
留公意不禁幡然喜曰公留矣公留矣越三日聞赴省士民擁公
車前抵會城擁街塞巷匍匐督撫轅門道旁觀者多歎息泣下兩
臺洞悉輿情以薦章去遠借寇一年復溫語遣歸是舉也於以見
直道在人心無殊三代居數月廣西 命下諸父老仰天浩歎聚
而言曰公飲冰三載心勞撫字惠我羣黎而與人之頌僅託空言
是諉嘉德於草莽也是佩德不忘而有違心也公嘗與賢士大夫
登高覽勝問民間疾苦晴嵐翠壁之下乃公所憩因謀諸紳士勒

石峨峯之陽以媿甘棠遺愛屬余紀其事余謂公之奇才偉績已見知於 聖天子行將膺不次之遷維屏維翰著績旂常垂休光而照後世片石之勒甯足爲公重矧公視天下民猶楚民譬諸膏雨潤物隨地而施不自以爲功民雖頌禱公何慰焉迺楚民之愛之深而慕之切惓惓不能已者蓋將謂炎荒萬里至於後人耳目所不及一睹茲石莫不低徊俯仰想流風餘烈頌美不衰俾聞風興起者紹芳規宏駿業績遺愛於無窮庶幾楚民厚幸哉庶幾楚民厚幸哉

右去思碑陳士驥撰

國朝耆獻類徵初編卷百六十七補錄

疆臣十九

樓儼

康熙四十六年 聖祖南巡儼獻織具圖詩詞 欽擢第一學士

孫愷似薦儼分纂詞譜有宋詞四聲二十八調考略白雲詞韻考略詞韻入聲考略皆可為詞學津梁

右金華詩錄張維屏錄

西浦曾駁正萬氏詞律百有餘條最中竅要

右湖海詩傳張維屏錄

按樓公字敬思號西浦浙江義烏人官江西按察使有養笠軒僅存

彙

國朝耆獻類徵初編卷百六十七補錄

疆臣十九

張連登

青州海岱奧區典斯郡者代多名賢而莫盛於宋韓范富歐陽當時所謂人傑也青州得其三范之功業歐之文章彪蔚一世然皆在太平無事之時齋莊閒靜坐鎮有餘矣富文忠公守青之日適當歲祲活饑民四十餘萬每自言過於作中書二十四考至今稱賢太守以德以功遂無有出富公右者越數百年而得我張公成陽世胄賦性倜儻自爲諸生已可以天下爲己任之槩及荷聖恩簡畀專城值國運熙洽風俗淳龐之日因循既久百務待人

公至而州邑長吏皆爲動色申明約束觀聽維新政事旁午迎刃而解凡所按駁使人神悚氣懾而一切持之以公心應之以虛己乃善善之意尤自悠然其長固已士歌於庠農安於野矣無何而淫潦浹歲平地皆成甌脫癸甲之間又復大暵彌望赤地斗粟千錢民掘草根割木皮雜糠覈噉之餓孳狼籍骨肉相食說者謂爲數百年未有之奇災公蒿目時躑如痛在己咨詢疾苦徧歷窮鄉采其形狀達諸撫軍披陳剴切無異監門之圖秦庭之哭撫軍卽據公移繕疏入告今日之民隱洞見 天澤旁流元元本本實公有以啟之也當公之告災而得請也荒政悉以爲己任講求利病絲理髮櫛不爽累黍視十四國之遺黎有如赤子念望救之急者

蒙陰沂水爲最待穀集而後發其不轉於溝壑者幾希矣莒庾儲粟近在鄰封欲借作振莒人難之公開陳反覆許以刻期補還公忠信之德久洽於民故咸樂從遂取七千石一日而徧四郊窮簷蔀屋始慶更生閒闕轉運皆單騎往促晨發宵征衝冒霜雨弗惜也倉廩甫完而安邱之事起饑民相對資身無策始以貸粟爲名浸假漸成剽略屯結倡和實繁有徒公聞而憂之文書屢下誥誠諄諄稍知斂迹終未革心公曰此非口舌之所能爭也會須一面諭之於是部署役夫屏當車馬星夜夙駕矣時則傳聞異辭一日數驚家人僚屬莫不惶懾且止之曰柰何以不訾之軀輕入危邦公毅然曰士人以身許國死生禍福已擲度外畏首畏尾事何

能濟絕裾而行不持戈戟不設兵衛按轡至境雙旌五馬約略如
常日及抵行衙以奪攘來告者纍纍絳標寸紙捕而訊之情重者
三人斃杖下次者五人囊三木以徇餘悉縱舍不問復呼父老子
弟告之曰災沴流行出自意外 天子之恩浩蕩靡涯痛我民之
失所也蠲免新舊賦稅七百萬有奇發廩發帑無虛日又恐地闊
難周遣官四百餘員分地養民起骨加肉從來未有草野蠢動欲
爲亂階是負 聖恩也不知 聖恩不忍負亦不敢負幸變不成
儻成而一鎮之兵辦之有餘朝發夕至汝輩族矣雖族猶被惡名
盍一熟思之眾股栗不能奮轉相告語且感且泣曰張公活我爲
亂者解散懼亂者帖枕矣時康熙四十二年十一月十九日也使

當日者需不先發怯不早斷傳呼響應滔天燎原其遺 廟堂之
憂不知何如也乃公不動聲色不事張皇談笑定之二東以甯非
平日德足鎮其搖撼誠足收其心脅威足讐其志氣烏能游刃有
餘如此哉此公禦變之才也若其平居優優敷政念士子失教則
新學宮爲弦誦之地官署就圯則葺廡宇爲聽政之所浚范泉以
存文正之舊蹟修松林書院以挹十二賢之高風造倉庾以儲侍
米粟則牢傑宏堅爲一省冠入官以來百廢具舉此其大者也憶
公始至日不暇給逾歲之後庭空若洗簾閣綈几攤書臨帖時作
吳詠聲山垣外閒命輕輿過佛廡與白髮老僧茶話而已然後知
公之才非一郡之所能盡也在昔汲長孺用發河內倉見賞人主

膠東相勞來不怠流民自占八萬餘口龔少卿解散渤海盜賊文
蜀郡好教化修起學宮成都市中此古循吏之規不難兼而有之
迺欲取其救災定變者與富文忠公絜長比大猶淺之乎測公矣
歲定青之諸生吏民欲刻文於石以示久遠屬筆於貞貞安邱人
也知其事爲詳故不辭而志之如右公諱連登字瀛洲陝西咸陽
人

右救災定變記張貞撰

國朝耆獻類徵初編卷百六十八目錄

疆臣二十

刁承祖

徐湛恩

蔡琦

白洵

方顯

李衛

張師載

胡文伯

補錄

方顯

國朝詩集卷之二十一

--	--	--	--	--	--	--	--	--	--

國朝耆獻類徵初編卷百六十八

通奉大夫前署江西巡撫江西布政使司布政使湘陰李桓輯

疆臣二十

刁承祖

乾隆己未秋七月十三日方伯刁公以疾卒於位公之子將奉喪北歸杖而泣拜曰不孝孤不天以鍾禍於我先大夫今將歸葬於鄉廡有日矣惟是墓中之刻以先大夫之辱寮友也敢託以不朽蓋公之來藩於粵在戊午之春同官幾二載余雖無文誼不得辭謹按公諱承祖字步武康熙己卯舉人乙未成進士始選陝之扶風世宗憲皇帝識公才特改江南上元縣遂以吏績最擢守太

平調鳳陽遷湖南糧驛道卽拜湖北按察使調江蘇旋晉河南布政使移浙江復移江西 今皇帝御極之二年迺莅廣東終今官此公歷仕之大凡也公在上元民有訟令自拘繫以聽鞠縣倉大樹有憑爲崇民競走其下公伐之姪祀遂絕上元爲都會首邑號最劇難治而公日夜治文書講求利弊苗疇而髮櫛之豪猾屏息其在太平兼視蕪湖榷商民便之在鳳陽曾一權泗州再權廬鳳道縮三印專一路而庶事就理湖南治長沙歲漕京師阻以洞庭長江每後期公至立約束信法禁武夫悍卒無不踧踖奉公命者其在江蘇頗久在湖北未數月在浙僅二十日耳欲有所振刷輿革而席不煖輒去然至今民謳思之其久者可知也癸丑河決陳

畱將齧開封諸使自出督塞之有欲坐其罪於濱河守令者公抗
言曰治河有專司釋彼罪此恐異日河上無任事人矣乃止其持
論切直棘棘不阿類如此在江西知畱務甫兩月而所部翕然吏
以無事其來藩於粵也粵山多田少歲偶歉市直踊貴公恐常平
不足給建議請發帑金十萬增糴倉穀民仰以濟濱海之地潮墜
沙成田多爲豪強大駟侵占其弊百出窮毗往往中其害訟牒如
山歷任不能釐正公選廉吏履畝親丈之不數月而清瓊南黎人
不識文字輕犯法公檄守令設館選士教以誦習詩書吏之來見
者反覆訓誡不少假顏色皆進而懼退而感久乃漸致於理也符
檄文告之下諸州揭諸鄉亭者莫不觀聽聳動思自克於善以副

公意蓋公外嚴而中恕待人以不欺故所至廩廩有聲如是公先世自明永樂初由興州始遷祁州遂爲直隸人選貢諱克俊者是爲曾王父出督學左忠烈公之門振廩勸分鄉里德之爲立祠私諡貞惠先生舉人諱包者是爲王父鏞戶著書講學河北東林諸賢所謂潛室先生者也私諡文孝耐無錫道南祠諸生諱再濂者是爲公考內行修謹私諡宣定先生王父及公考皆以公貴 贈如其官王母李氏于氏許氏四娶亦李氏皆 贈夫人公之妣曰杜氏 贈夫人山西黎城知縣應甲之女生四子公其次也配張氏 封夫人同里諸生勃然之女婦道母教稱於鄉黨子四錄甲午副榜鈞太學生安仁早卒錦戊午舉人出爲公弟興祖後孫三

世昌乙卯舉人世瞻太學生世暉孫女八曾孫女三公生康熙壬子閏七月初二日距其卒時春秋六十有八公性孝友篤於行義教猶子如己子先後登鄉書者四人廉介而儉雖踐顯貴階列二品而被服儒素旁無媵侍非賓燕不設杯杓私宅之內齋廚蕭然士大夫僅見者也墓在州之某鄉某原其歸也將卜日以窆銘曰豫章之材厥生厚地刁氏之德積累有自公起履之造家而貴旣熾旣昌後則孔臧闕辭幽堂其久有光

右墓誌銘沈大成撰

徐湛恩

徐湛恩字沛潢中山王徐達之後明季以關外都指揮家遼陽隸正藍旗漢軍由貢生改應武科中康熙五十四年武進士授侍衛執戟殿下賦詩稱 旨特改兵部郎中雍正元年升克甯道僉事嶧縣有湖墾荒地許貧民開墾勢家占爲己業私納其稅又各屬瀕湖草廠地歲徵草束備工料株累及於民田湛恩悉禁除之欽使勘閩河道求賄不應怒曰汝所司何庫曰四大庫南旺南陽蜀山馬場也擢山東按察使調廣西內升僉都御史復出爲河東河道副總督時魯橋以南至黃林莊歲苦淹決營建石隄捍禦湖陂運道獲安乾隆初升內閣學士兼禮部侍郎改直隸副總河被議

去職十五年復原官致仕二十年卒

右傳陸燿撰

蔡琦

公諱琦字魏公姓蔡氏奉天錦縣人由恩廕生爲戶部員外郎監
督寶泉局踰年監督中南倉遷刑部郎中出筦廣東太平橋稅務
宅父憂服除復補刑部郎中擢江南驛鹽道尋以母艱去任後補
四川永甯道升湖南按察使司按察使未行改授山東閱三載爲
康熙五十五年以疾卒於任年五十四越明年公之子永文等奉
柩歸葬於永平之某里彙狀其行求余志其壙公之始疾也亟思
解職爲文告以諭其士民自傷教化未行有志未逮義真語摯見
者聞者類感欷泣下迨疾之旣篤也惟惓惓以士民之仁讓未敦
爭奪扞網爲慮而無一語及於私其卒也東人巷哭又爲祠俎豆

之以致其思慕於無窮是可以知公之政矣公潔廉平恕有幹濟才不自耀自釋褐後財賦法令之職司內外涉歷殆徧所在皆有著見非苟然者始登仕版卽司錢穀慨積弊未釐不以脂膏自潤悉心稽覈不少懈巨姦宿蠹之胥無能試其故技同官交忌弗恤也由是有能吏聲韶關北遮梅嶺西截龍流南扼交廣之衝市舶所集權使歲一更得之者戚友相賀謂命達赴任惟恐後時既至惟恐及代然於權政情如也必與胥役爲緣而後可以大肥其橐胥役狎權使若偶人又必自飫其欲而乃以其餘及之以故商旅重困其不得已而冒瘴毒犯驚濤者數罹其虐窮於無可告訴公奉使至粵極意湔濯廉從二三人局之署內粗衣糲食刻苦倍

曹郎時以示倡率每晨躬至江濱閱往來賈人船以所至先後爲次驗其單報征如例不毫髮溢迅捷放行未嘗稽時刻宿弊一清至者絡繹向之眈眈恣搏噬者無慮數百十人皆短氣去之日蕭然襍被無長物爲前後稅使所未有其治郵傳離政與馴輯尙矻焚人悉持是道以峙其譽初公之官秋曹也講肄律例嫻熟以文無害爲堂長所器凡疑獄必屬鞫讞稱平反及廉訪山左人謂駕輕就熟正可自見其長公懼且戚曰此職難稱刑以弼教稍自用卽戾前哲哀矜勿喜之訓豈必武健嚴酷角而翼者始爲酷吏哉故每慮囚務以誠諭不爲鉤距之術而人自不忍負其意立榮恥而明防禁勸誡頻繁杜之於未然恆以教化不孚爲己恥此意齊

魯之人皆稔悉之又不僅遘疾時文告之辭悽惻動人已也公任部曹時大軍征鄂羅斯以大臣薦贊畫行間出塞有勞動天子知其能故屢屬以鉅任方將更大用之俾益宏其所施而二十餘年宦蹟所著猶未能滿其利濟之願是則斯民之不幸矣公先世從龍隸正白旗世有勳績祖襄敏公諱士英歷官漕運總督父毓華知四川遵義府皆有德澤及人公初配金夫人繼配楊夫人子男四人永文永清永甯永祚永文正白旗驍騎校永清恩蔭生永甯永祚俱國子生女子八人一適郎汝晉一許字師其餘未字孫一祝壽銘曰

助庸累葉燿燦碎匄匪席其寵克世其聲疑疑者藏盧龍之阜不

府辜功以昌厥後

右墓誌銘彭維新撰

四庫全書
卷之二

十

白洵

康熙丁酉歲余奉命典雲南鄉試既出闈頗咨訪地方官吏賢否在城文武官數十員而雲南人士同舌稱賢不受屬吏陋規者惟雲南府知府白君一人又八年余出撫廣西而白君先已爲其地按察使同事逾年用是益知君清重有德君子人也君尋被內召還京師明年余遷直隸總督又明年內轉工部方思與君晤言而君已退居於通州矣又四年爲雍正辛亥君年始六十有三遽以疾卒時五月二十有三日也君同懷兄大學士近薇公潢來請誌君墓嗚呼余旣知君其忍以不文辭哉君諱洵字直侯別字又蘇世居奉天之蓋平縣曾祖諱文達遷遼陽始隸饒白旗祖諱

承舉從 龍入關始居京師考諱允明仕至榮祿大夫都督僉事
駐防廣東參領自考以上三世並以君兄貴 誥贈光祿大夫文
華殿大學士兼兵部尚書君生而孝友忠信讀書通大義年二十
五歲任兵部筆帖式補廣西富川縣知縣富川多猺獞抗賦又時
出剽斂前官莫敢如何君至卽嚴爲勸諭曰不率且發兵捕治會
蒼梧道及平樂副將以佗事督兵道富川君具供張邀諸境上請
暫駐三日爲聲援自率健役十數人往捕梗法者曰大兵至矣能
聽我悉出首禍人宀可無洗諸猺獞咸恐如今因而撫之期年頑
俗盡革督撫奇其才保調南甯府宣化劇邑當交廣之衝左江鎮
道所駐劄水陸輻輳頗饒盛吏因以侵漁民困至不可支則諱而

亂君訶得其情悉去侵民法其尤甚者糧銀正額外兩加派數錢名曰附封首請勒石永禁民驚喜以服政化大彰秩滿遷福建漳州府同知未上以外艱歸服闋補廣西梧州府同知巡撫彭公鵬薦調思恩府時土司有爲亂者殺參將勢張甚總督飭總兵官往勦以君爲監紀總兵官巽慊莫能制勝君以計擒其魁兩月而事平擢雲南府知府首以廉率屬省會舊有十八行牙戶以通商賈奸僧數人欲奪其利賄昆明令請於巡撫總領諸行君獨持不可得止商人立石紀德焉督撫會疏薦升按察司副使分巡永昌道五十九年西藏用兵督辦軍需糗糒芻藁轉運絕徼數千里昕夕籌畫經年始還鬢髮白過半雍正元年 特旨遷廣西按察使明

年余至獨倚任君未幾布政使缺員委君併權其事廣西地方二千六百里藩臬兩司事無不統治法刑章益整以暇蓋君四任廣西民之情僞事之利弊興釐無不洞悉余嘗有所問無不知者知必言言必盡君所以裨余者多矣君齒未甚衰猶可以有爲而止於斯余所爲欷歔而太息也君娶錢氏火器營操練尉諱文龍女累封至淑人生子暎梧候選府同知女四人候選州同李英韻州府知府施士岡襲世職一等阿思哈尼哈番加一級拖沙喇哈番兼參領祖應樞臨桂縣丞張本闈其壻也側室王氏生子暎松一品廕生女一人許字宗人府八品筆帖式兼副佐領張玉孫男女各二人是歲八月十有二日君葬期也玉田縣亮水橋祖塋君

葬地也銘曰

西南之荒實惟粵與滇古所羈縻今神化以臻何以牧之維吏之
循君以廉明既武且文威信斯行周歷連縣任滇二粵四凡三十
餘年點蒼之山湘灘之川桐鄉愛君永矢弗諉此藏者委蛻弗禦
其神炎雲萬里永瞻斯原

右墓誌銘李紱撰

四庫全書

十

方顯

方顯湖南巴陵人康熙五十六年由歲貢生選授湘鄉縣教諭雍正二年升廣西恭城縣知縣四年超擢貴州鎮遠府知府六年七月丹江生苗不靖附近之清水江九股生苗亦未就撫按察使張廣泗督兵進攻丹江苗寨顯分遣土官土舍等招撫清水江生苗十六寨九股之台拱生苗數寨十二月丹江平顯復招撫清水江反號等生苗七寨九股之陶賴等生苗十三寨七年三月張廣泗以清水江南岸各寨生苗尙懷觀望檄顯同副將張尙謨帶領官兵查勘進至柳羅駐兵對臨南岸有公鵝柳利雞擺尾等寨苗眾渡江攻營顯等迎殺數十人加意固守旋隨張廣泗督兵進剿五

月事竣閏七月升貴東道九年升按察使十年巡撫張廣泗奏言
新闢苗疆內之九股一處寨分繁多苗情素悍又爲清水江丹江
適中扼要之區上年督臣鄂爾泰奏請於台拱地方設立營汛必
需熟諳之員方可倚藉料理今新升貴東道黃世文於此地形勢
並未閱歷是九股安營一事仍得方顯同辦庶乎有益除檄行方
顯暫緩赴臬司任卽公同鎮道等帶兵前往先將設營駐兵係爲
地方保固防護之意宣示明白嚴禁騷擾使苗人俱曉然安堵迅
將應立營基公同勘定俾大槩規模皆有條理然後將一切工程
暨善後諸務詳細講求交與該鎮道率同文武員弁逐爲措辦方
顯卽回省到任不過暫緩兩三月之期而苗疆安營要舉可期完

妥 從之十二年奏請於苗疆各鎮協營俱建 萬壽宮一座以
爲朝賀之地苗疆三年俸滿應升人員以升銜畱任再任三年准
其升轉均下部議行乾隆元年四月奏請各直省武闈鄉試於本
省州縣內調取科甲出身之員不必於別省調取五月丁母憂三
年服闋授四川布政使四年六月署理巡撫 諭曰朕觀汝一派
質實是以不次擢用 撫臣有撫臣之體若任氣褊狹不識大體
則不可也汝臨去時朕亦曾訓及此恐汝忘忽耳汝其勉之七月
四川沿邊之雜谷梭磨沃日大小金川革什咱等各土司互爭構
釁聚兵攻擊雜谷土司蒼旺梭磨土司勒爾悟與小金川分戶必
色滿土目納爾吉有舅甥之誼先是納爾吉嫁妹與沃日土司哈

爾吉爲婚因未謀之小金川土司湯鵬湯鵬怒其背已攻圍必色
滿寨落并及沃日雜谷土司懷忿從中搆毀前任總督黃廷桂將
納爾吉調令來省管畱化導乾隆三年納爾吉在省病卒雜谷梭
磨歸怒金川至是藉稱必色滿舊管六寨已被湯鵬鯨吞遂與沃
日連兵攻劫金川而遜克宗頭人雅南多亦與湯鵬有怨又革什
咱土司丹津羅爾布復與湯鵬之兄大金川色勒翁爲讎各乘隙
報復恣圖搶占湯鵬呈各土司狂逞懇請飭令歸巢顯委文武各
官前往化誨各土司遵將土兵退回復遣副將馬化正等於互爭
處所查明確實秉公剖斷務令彼此輸服各安住牧疏入報 聞
八月以考驗四川滿兵弓馬生疎奏請飭各省駐防都統時加訓

練 上嘉之九月奏言郭羅克賊番插什六架他等潛藏色利溝
遣兵圍捕副土司蒙柯庇護以致逃遁僅將賊番之幼子獻出見
已密札松潘鎮總兵潘紹周相機辦理務期根株悉盡以靖邊疆
得 旨此等事汝固應就近相機料理至總督乃通省大員亦應
與彼熟商彼諳練封疆之人自有處分也十月奏言雜谷梭磨土
司因與小金川互爭必色滿地方舊覺句結沃日等土司連兵攻
劫一案見在次第剖斷理應參處示警惟查雜谷梭磨吐番後裔
其巢穴卽李德裕旣取復棄之維州戶口約十萬餘金川緊接雜
谷戶口不過數萬雜谷素憚金川之強金川則畏雜谷之眾彼此
鉗制邊境又安固不可任其爭競亦不必強其和協也況沿邊多

生番畱之可資捍衛且從前川省有進剿之役調取士兵莫不如數遣發著有微勞又宜畱之以供調遣至其同類操戈原未敢干擾內地化誨亦尙凜遵是以姑緩參究乃議者謂當乘機將金川參革改土歸流非惟彈丸土司無裨尺寸且所給印信號紙一經追取卽成無管生番稍有違抗又費經營得旨此見甚是與督臣和衷共酌之又奏稱川省明末兵燹屠戮殆盡荷蒙我朝平定驅除賊寇各省移居來川者多失業無賴之徒以致奸頑叢集盜竊時聞其中更有一等惡棍名爲咽嚕子結連黨羽暗藏刀斧白晝搶奪乘夜竊劫人多受害臣嚴諭地方文武官設法嚴拏並稽查保甲整飭塘汛務期奸匪屏跡地方肅清得旨實力奉行

毋徒視爲虛文十二月借四川總督鄂彌達奏稱小金川土司湯鵬已將所占必色滿地方退交本寨其湯鵬番民占踞住牧者通數撤回至該地逃散番民寄居雜谷梭磨者諭令歸巢是雜谷梭磨小金川互爭之案業已歸結沃日土司與湯鵬所爭隴堡等五寨今將隴堡等三寨斷還沃日其美固等二寨斷歸湯鵬是沃日小金川互爭之案亦得歸結雅南多查係湯鵬所屬番目因被湯鵬凌虐拘禁伊子以致離叛今湯鵬遵示將伊子同所擄番民放還雅南多亦將所擄湯鵬番民退出願仍歸湯鵬管轄此川西各土司之情形也至川南之革什咱與川西大金川構爭經建昌道李學裕查剖附近大金川革什咱之各土司已出具不敢幫兵刁

峻印結革什咱亦凜遵法紀此川南各土司之情形也惟大金川
土司地接川南隸川西管轄山路險峻往返需時臣等飭催該文
武官迅速妥辦報 聞五年二月疏稱建昌道屬阿都土目祿氏
副土目賒喇管理遞年以來委屬恭順勤勞請援革職河東宣慰
司瞿氏之女安鳳英另授長官司之例將祿氏授以阿都正長官
司職銜賒喇授以阿都副長官職銜並頒給印信號紙 從之三
月借總督鄂彌達提督鄭文煥奏大金川土司色勒奔住居僻遠
在雪山之外與革什咱累世深讎互相劫奪革什咱又設轉經樓
一座時常誦經呪詛上年七月雜谷梭磨糾眾搶擄金川而革什
咱亦乘危攻擊以致彼此結怨愈深本年正月委建昌道李學裕

等前往化誨色勒奔稟請須革什咱拆去轉經樓願退還蓋古交
地方官求寬限一年隨開導革什咱令其安靜等候革什咱業已
悅服凜遵是川南川西互爭構兵各案俱已清結完竣報聞是
月四川提督鄭文煥奏署撫臣方顯爲人爽直坦白政治勤敏臣
等有應相知會者彼此悉心商推無不推誠共濟上以文煥所
奏甚屬可嘉且論亦甚正六月奏建昌道李學裕居心醇正才具
優長夔州府知府崔景俊人似歷練但賦性善柔行爲巧滑面加
訓飭隨即改正因其悛改姑從寬恕得旨如此不時查察屬員
抑且宥過錄長此誠得用人之要矣欣悅覽之先是四川巡撫碩
色以松潘等處爲川省極邊積儲尤爲緊要令本省各府州縣生

俊赴捐嗣按察使李如蘭又奏請令外省商賈人等一體報捐經部議令撫臣查明情形妥議具題顯稱川省地方外省商賈貿易之人實居大半令買本地之糧食卽充常平之倉儲價歸於民糧交於官上無不足下卽有餘非販運出境可比況各該處地方出產雜糧屢獲豐收土著農民儘敷糴食若按數收買源源上納足額而止斷不致有妨民食部議如所請七月升廣西巡撫九月諭曰四川提督鄭文煥奏稱巡撫方顯自四月以來染患目疾近又氣體虛弱見在調治方顯患病朕心深爲軫念四川路遠難以遣醫診視著傳旨令其在川加意調理俟病全愈時再赴廣西新任是月奏病愈迅赴廣西新任得旨汝急公之心甚切朕實嘉

之但亦應酌量身體不必勉強也十一月奏稱苗疆甫定抱病任
事見在趕辦要件將撫篆交藩司代理懇准回籍調理得 旨尋
常之事既有人代理汝可卽在任加意調理務期速痊以慰朕念
至苗疆緊要之事件汝仍應與譚行義和衷共理爲是六年正月
諭曰廣西巡撫方顯病目已久至今未愈粵省未必有善於療
治之人著太醫院挑選眼科一員馳驛前往醫治方顯著解任調
理或伊仍住廣西或欲卽歸本籍悉聽其便所差太醫著相隨診
治四月回籍奏請休致并令子方桂及時自效得 旨汝且加意
調攝不必以休致爲請汝子過一二年後可令其齋摺來京朕彼
時再降旨十二月卒子桂浙江甯紹台道緣事革職裔安仁縣教

諭孫應清山西雁平道應綸兩淮鹽運使

右 國史館本傳

方顯字周謨巴陵人康熙末由貢生任湘鄉教諭擢棊城知縣縣
蓮花山產銀羣不逞聚爲患顯設法解散之雍正初舉賢員超授
鎮遠知府值郡饑捐俸煮糜活民數萬民立碑頌德弗許總督鄂
爾泰奇其才檄理九股各苗顯詣峒曉譬投誠者十餘萬戶授貴
東道總理苗務平公鵝雞石等寨並請建城清水江以資控制尋
升貴州按察使仍兼理苗務九股台拱爲諸苗出入要地奉命
與總兵營新城而墨引羊翁等苗不利之結眾攻擾顯設奇焚其
兩寨苗益大至圍六十九日糧盡宰馬以食眾請潰圍出顯曰台

拱關係新疆台拱失守則古州清江諸寨皆煽動矣況苟免失臣
節脫奔損 國威設不濟有死之耳於是人人感奮已而援兵至
圍解因乘勢攻洗番招大小台雄各寨上善後事宜制府俱見施
行在任清釐積案廣順州民胡某等以枉繫爰書已定顯察其冤
豁死刑四人乾隆三年擢四川布政使尋升巡撫金川雜谷等土
司相仇殺諭以威德皆懾服罷兵值楚粵邊苗不靖調撫廣西至
則平服建城安營以次就理尋以病乞歸 命太醫院選員相隨
診視歸里病益篤六年十月卒於家

右述聞謚瑤錄

司馬文正公集

卷之三

李衛

李衛江蘇銅山人由捐納員外郎於康熙五十六年授兵部五十八年遷戶部郎中六十一年十月授直隸驛傳道未赴改雲南鹽驛道雍正元年管理銅廠二年擢布政使仍兼理鹽務上以李衛褊躁尙氣訓之曰近有人奏汝恃能放縱於督撫上司前粗率無禮操守亦不能純閒有巧取處若如此行爲則大負朕之倚任嗣後極宜謙恭持己和平接物川馬骨董之收受俱當檢點兩面欽用牌不可以已乎是皆小人逞志之態何須乃爾其克謹克慎毋忽尋衛以不避嫌怨奏諭曰不避嫌怨與使氣凌人驕慢無禮判然兩途弗相交涉汝宜勤修者惟涵養二字最爲切要務須

勉爲全人方不有負知遇殊恩書云習與性成若不痛自刻責未
易改除將來必以此受累後悔何及諄切訓誨實由朕衷有則改
之無則加勉當時刻自檢也三年授浙江巡撫 陞見時奏江南
朱家海決口 命衛便道至清江浦與河道總督齊蘇勒議河工
四年三月奏言遵 旨與齊蘇勒相見知決口已合龍因詢以此
番決口全河俱由朱家海歸洪澤湖恐沙淤墊湖底據稱勤淤懶
沙不能遠至洪澤湖當至上流三處小湖而止臣問三小湖旣與
洪澤相連又在上流乃大湖支派受水分洩之淵藪若墊高將來
洪澤蓄水漸少且由近及遠再遇水發仍填入湖堰勢陡且險尙
當畱蓄水處爲是伊云別無善法惟加防期不至決口臣又問治

河當借急湍之勢以濬洩下流疏通海口爲要抑或專顧衝決堅
牢工程爲主據稱海口緊要上年我於清口築壩留口甚狹令其
敵黃並借二水之勢將清江迤東河底刷深海口亦無阻滯臣觀
齊蘇勒操守學問甚優辦事不避勤苦但無好官相輔兼自負過
高不納眾言疏入報 聞六月奏言浙江戶口繁多米不敷食四
川產米甚多川江直抵湖廣盤運亦易請照兩淮買穀例於鹽政
歸公項內以十萬兩委員赴川置運俟青黃不接時分發米少州
縣減糶以濟民食歸還司庫原銀有餘爲修理城垣等用又請增
子母礮四十八位分給駐防滿漢兵選協領等員教習演放俱得
旨允行是月 命兼理兩浙鹽政七月疏言烏程縣屬之烏鎮

近接太湖易藏姦宄請將湖州府同知移駐十一月奏言竈丁課餉應歸竈地徵收如仁和場之仁和倉及許村等八場向有沿海灘蕩給丁樵刮卽以每丁應納之課攤於所給之地計畝徵收其仁和場之錢塘倉西路等九場北監場之峽門華嚴二倉黃巖等六場白沙岳頭二倉原無給丁蕩地者或暫令各丁照舊輸納其丁多蕩少者或於舊稅上加攤竈丁蕩戶俱有苦累須清查升漲抵補請將許村等場新升蕩地稅銀抵除前報暫攤並無地可攤之丁銀如續有漲坍蕩地照例增減又疏言浙省私販出沒之所海甯海鹽平湖桐鄉爲最而海甯之長安鎮乃其適中孔道請專設千總一兵百分巡隘口再撥撫標兵百千總一協緝各場官俱

係微員不能杜弊請以候選同知通判州縣等官分發各場專其責成俟有成效題請照原銜升用又疏言江南蘇松常鎮四府食鹽例銷浙引鎮江接壤兩淮僅隔一江私販易於偷渡致浙鹽壅滯請令常鎮道督同鎮江府海防同知京口將軍標副將鎮江城守參將嚴拏水陸私鹽仍禁官弁兵役勒捐俱下部議行五年二月奏修海甯縣浦兒兜草壩老鹽倉姚家堰草塘海鹽縣閩餘等字號石塘蕭山縣鎮湖庵王家池聞家堰一帶石塘錢塘縣午山一帶仁和縣總管廟前各坍塘十月又奏修海甯縣沿海東西塘俱從之十一月授浙江總督管巡撫事六年三月奏言浙江交界積窩惡賊查拏甚多頗有屢犯漏網大盜緣地連兩省每致影

射作弊如浙江究出夥賊姚二姚天生兩犯咨江南震澤縣提拏
 竟以替身起解為浙省押往認識之張德隆指破而此案經江南
 督臣范時繹畱審未得歸浙並究今查出徇庇首犯舉人金士吉
 等已質明有據請褫革嚴審並提齊江南所畱案犯窮究黨羽剪
 除巢穴以期靖盜安良得 旨嘉獎瀕海玉環山界連台州太平
 縣温州樂清縣周七百餘里有田千餘萬畝山畧平衍土性肥饒
 前浙閩總督滿保因地隔海汊防範難周屢禁開墾衛委員查勘
 見其田可耕各畧口潮水侵灌成灘者可煎鹽其要隘又可防緝
 洋匪奏請設兵增戍聽本省近地民取結往墾 上允所請至是
 條奏經理玉環山各事宜一請設玉環清軍餉捕同知一員將太

平縣界之禁門老峯南塘北塘芳杜東輿密溪洞林樂清縣界之盤石蒲岐黃大輿狀元輿茅埏等處俱歸管轄裁樂清縣驛丞改設巡檢聽同知差遣一玉環山田逐一丈明給太平樂清兩縣民入籍管業其附近玉環有願入籍耕種者准一體編入保甲所墾田卽於本年起科分上中下則納賦一按畝徵收本色其濱海潮溼地折穀收貯餘米許民運售溫台等處給票查驗毋得私販出洋一玉環可耕之田向有隄塘捍衛年久傾圮應聽民自行修建或借帑承修秋收還項一玉環設汛置官所需用多查各輿有捕魚船應給牌查驗其濱海鹽戶亦編入保甲併竈聚煎官收官賣所有魚鹽稅銀卽充各項公用俟經理完備後解歸藩司鹽政一

玉環立左右二營歸温州鎮轄設參將一守備二千總一把總四兵九百以左營爲陸路右營爲水師其弁兵卽裁盤石營水師將弁及原額兵並於太平樂清大荆等營就近分撥以符新置弁兵之數其舊隸黃巖盤石兩營防守之陸路並盤石營原管之洋面籍隸黃巖之洋汛俱玉環營轄下部議行五月以清查馬廠等事與將軍鄂彌達爭論具疏自辨 上諭以識見通達爲貴勿狹勿滯六月疏言鄞縣大嵩港灌民田數萬畝日久淤淺且無支河蓄水請疏通嵩港於港口建壩分濬支河於通海之橫山頭等處築土塘並石閘六又鎮海縣之靈巖大邱二鄉有浦口通流入海閘已圯廢應築塘修閘以資蓄洩又定海縣初名舟山曠田甚多不

無隱占應委員查丈清理並從之七月諭曰江南蘇松等處盜風不息巡撫陳時夏不能嚴拏懲治總督范時繹戢盜之才亦覺不足朕深爲廕念李衛於浙省盜案畱心緝捕不致漏網甚屬可嘉著將江蘇所屬七府五州一切盜案俱令李衛管理文武官聽其節制調遣尋疏言紹興府屬之上虞縣沿海田潮汐浸削坍沒五十餘畝業戶有賄納錢糧之累而縣屬之夏蓋湖周百餘里漲淤成田者已飭丈明許民自首認業請將坍田除額新墾升科庶額賦永清如所請行蘇松偪近海濱向受潮患廷議築松江石塘三千八百餘丈並將接段土塘盡易石上以江南督臣范時繹辦理未協令衛查議具奏衛赴工履勘覆奏松江海塘已築二

千四百餘丈不必拆改未築者應做浙江海鹽舊塘建築已築完者鱗次居中無庸更加高厚土塘附石塘後宜一例高厚每年派員歲修東灣自周公墩張家舍至倪家路俱距海甚近應先建築金山觜老土塘至東華家觜原報丈尺未確應依營造尺估計舊塘坍石旁築新塘疏入得旨依議仍令衛會同江南督撫稽查辦理是月奏言臣籍隸江南徐州族繁丁眾有堂弟李慎謹李信枝臣因其放縱不循理法行文淮徐道拏解來浙懲以家法圈禁在署族人交口騰謗甚有欲改姓氏爲加罪之地者臣除窩拏盜諸事獲罪於范時繹而奉命議河工又與齊蘇勒不無芥蒂皆臣本籍大吏恐因家事致心迹難以自明諭曰范時繹乃不足

置論之人齊蘇勒之有芥蒂大抵因前歲赴任中途相晤奉旨論
河時微啟弊端或係汝與接待之際禮貌疏慢所致其過不在齊
蘇勒也朕意舉凡此等形迹皆不必繫念人事參差不齊何能計
較纖悉無遺況審辨公私最爲不易儻向日於鄰里鄉黨間先存
曲嫌小憾則又當一論朕每言公中私私中公樞機正在於此其
中原委既不確知難以批論是非當否也十二月 上以衛畱心
營務凡江南軍政舉劾 命衛同范時繹等辦理是月 遣侍郎
王機彭維新往江南清查積欠錢糧亦令衛與聞七年四月加兵
部尚書銜尋疏請復設江南南匯縣下砂二場浙江黃巖縣杜瀆
場永嘉縣永嘉場場官各一裁江南金山衛浦東場官一又請增

設台州府屬之海門前所家子三江口新亭章安道頭江口等汛
礮臺巡船俱從之五月 陛見未及回任丁母憂 命在任守
制十月加太子少傅銜十二月疏言海甯海塘東至尖山西至翁
家埠縣互百里皆臨大海今南岸潮頭直射北面護沙刷洗無存
一線草塘不能禦全海潮勢請於西塘內自荆煦廟至草庵就舊
有草塘收進二三丈砌築石工東塘於陳文港小文前薛家壩及
二十里亭等處分築挑水盤頭大草壩五使水勢稍緩可引漲沙
漸聚其年遠塊石各塘酌量加高培厚下部議行先是衛 陛見
時奏清口之西 聖祖仁皇帝所建御壩今較短窄應加築 上
以詢河道總督孔毓珣則稱此壩遞年培築較原建丈尺已增至

是 特發毓珣原摺示衛衛奏臣並未規經其地失言咎實難辭
上訓諭之八年二月疏言嘉興秀水二縣舊有民捐義田餘租
學臣周清源題歸官徵備賑租有定額窮佃苦累並累及原捐之
後裔請豁免年久未完銀米將田分別歸社永免官徵又疏請移
甯波府同知駐鄞縣之大嵩海口四明驛驛丞駐鄞縣之甬東岑
溪司巡檢駐定海縣之岱山沈家門爲定海咽喉增設沈家壘巡
檢並 從之是時江甯有張雲如者以符咒惑人謀不軌衛遣弁
密緝得其黨甘風池陸回庵蔡思濟范龍友等私相煽誘狀令效
勦遊擊馬空北齋文提拏張雲如而范時繹及按察使馬世烜回
護按察咎又曾與雲如往來輾轉關查不解且賄空北稟飾衛具

疏劾之四月 命尙書李永升赴浙會鞫得實時繹解任世烜斬
監候空北杖流雲如及鳳池同菴思濟龍友各擬斬如律九年三
月條奏江南蘇州府營制事宜一胥閭二門五方雜處請增蘇州
城守營守備一把總二分汛駐防並移蘇州府經歷駐社壇一蘇
州舊設城守二營請將左營改爲中營以新設之守備爲左營將
泚墅關把總一外委把總一及原防兵歸併管轄以成三營一胥
閭門外應增水陸防汛請將提督塘撥兵百二十巡鹽兵二十壯
丁五十撥入左營酌分水陸駐防一泚墅關之東黃埭一帶向設
巡船二應給腰牌爲憑如無牌冒充巡役文武官嚴行查究一蘇
州染造青藍等布踰坊四百餘處踰匠不下萬人請設甲長坊長

互相稽查其踣匠著落包頭取結存案十一月奏修浙江海甯縣
鎮海塔前等處坦水海鹽縣南首三澗寨一帶險汛平湖縣獨山
東西石土各塘錢塘縣徐村梵村等處坍塌裂江塘並從之十年
閏五月署刑部尚書九月授直隸總督十月命節制直隸提督
等官十一年八月疏言獨石口邊城外河西請造偪水隄並東西
雁翅二道張家口邊城外舊有土隄請增高三尺改石壩九月疏
言直隸地方遼闊州縣事繁佐雜官應酌量增改請於故城縣鄭
家口景州龍華鎮河間縣景和鎮北魏村獻縣韓村南皮縣舊縣
鎮滄州孟村呂家橋鹽山縣楊二莊青縣杜林鎮天津縣葛沽西
沽等處各增設巡檢一東明縣杜勝集復設巡檢一又請移磁州

州判駐彭城鎮河間縣管河縣丞駐張名莊清河縣管河縣丞駐油坊鎮俱兼巡檢職銜下部議行是月衛疏參戶部尚書署步軍統領鄂爾奇壞法營私紊制擾民各款 詔革鄂爾奇職 命果親王偕侍郎莽鵠立海望等秉公審理尋訊得實請加倍治罪上以鄂爾奇係大學士鄂爾泰弟今鄂爾泰裨益政務甚多宥鄂爾奇罪衛議敘加一級十月疏言直隸百四十餘州縣守巡則有口北霸昌二道請復設大名道駐劄原治轄大名順德廣平三府其屬內河道工程悉歸管轄各河道向專管水利今請令清河道兼管保定正定二府並原分之直隸五州通水河道兼管通薊遵化三州三河武清寶坻甯河四縣及永平一府天津河道兼管天

津河間二府又請增設保定府同知一糧捕通判一駐保定天津府糧捕通判一分駐滄州十一月疏言易州泰甯山太平峪恭建萬年吉地山西廣昌縣之草橋店七村在內垣近障之中宜敬謹保護請改易州爲直隸州以保定府之涑水縣山西之廣昌縣隸之並將廣昌之草橋店七村改隸州界以肅拱衛十二年正月條奏運河事宜一直隸故城縣與山東德州衛武城縣毗連係運河東注轉灣之處向未築隄水發卽溢請以工代賑趨築土塘隄一直隸山東運河交界各州縣犬牙相錯遇命盜案件互相推諉請定地界撥換以專責成三月疏請將直隸晉州及州屬之無極藁城二縣定州屬之新樂縣俱隸正定府轄保定府之深澤縣隸

定州轄增設正定府平山縣洪子店巡檢一下部議 從之四月
諭曰近有人謂卿任性使氣動輒使口肆詈謹言之戒朕屢經諄
訓不啻再三丈夫立身行己於此等小節不能操持尙何進德修
業之可期後當竭力悛改時自檢點勤加從容涵養之功漸融粗
猛傲慢之習則謗毀不弭自消矣十一月疏言京師五城及巡捕
京營所管地方與州縣交錯人命案件未免彼此交接請將附近
京城地方酌定地數統歸五城及京營轄其附近州縣及外營交
錯地方俱改正歸併分晰界限使內外文武不至牽誘下部議行
乾隆元年三月疏言喜峯口外之八溝與喀喇沁接壤旗民事件
向歸理事通判管理後增設喀喇沁同知及承德州知州分理不

無牽制請將通判管轄之附近喀喇沁地方如八溝龍鬚門等汛旗民案件俱歸喀喇沁同知其餘汛屬旗人案件歸熱河同知民人案件歸承德州知州分管八溝通判請移駐蒙古四旗適中之土城子地方土城子及黃沽屯各增設巡檢司千總一馬兵十五步兵二十五白虎溝設把總一馬兵五步兵十郭家屯大閣兒各設把總一馬兵十步兵二十上黃旗設把總一馬兵十步兵二十俱聽通判管轄喀喇沁增設千總一馬兵十步兵二十聽八溝同知節制統歸河屯營兼轄至河屯營之下板城熱河之中關各設把總一馬兵十步兵二十俱歸河屯營參將管轄設承德州州同一改遷安驛丞爲巡檢以西河司巡檢駐鞍匠屯俱從之四月

兼管直隸總河先是直隸營田設觀察使二員督率稽查至是
上命裁觀察使 敕衛派道府大員兼理詳議具奏衛以營田數
處京外三十七州縣請交各州縣收管以專責成如本任事繁委
所屬佐貳協理本管知府暨直隸州知州就近稽查順天府屬營
田四路同知分轄通永霸昌天津清河大名五道各按所屬營田
統率經理督臣藩司不時考察如州縣實力督課著有成效准照
卓異例不論俸滿卽升怠忽者參處其豐順霸州天津永年新安
玉田文安大城磁州等州縣營田最廣缺出請於熟習水利各員
內揀選具題調補下部如所請行二年正月奏誠親王府護衛庫
克於安州民爭控淤池一案赴州囑託顯有指冒誑騙情弊 上

嘉其執法秉公 特賜四團龍服七月奏報盧溝橋良鄉固安永清東安等處水災 上命於天津北倉截漕五十萬石撥被水州縣以備賑恤三年四月奏言滄州青縣挑濬甌河占用旗民地畝其糧銀應請造冊開除並照濬武清縣筐兒港壓占地畝之例按畝給價部議 從之九月疏參直隸總河朱藻挾詐誤公貪劣各款又藻弟革職廣甯縣知縣蘅輒敢以私書挾制地方官干預賑務奏入 命尙書公訥親及尙書孫嘉淦會鞫得實革藻職擬杖流蘅擬杖十月衛卒 諭曰李衛才猷幹練實心辦事宣力封疆勇往直前無少瞻顧畿輔重地正資料理前聞患病准其解任調理特遣太醫診視頒賜葢藥冀其痊可今聞溘逝深爲悼惜應得

卹典察例具奏尋 賜祭葬如例諡敏達五年直隸總督孫嘉淦
奏請入祀直隸名宦祠得 旨俞允並 諭入祀賢良祠四十五
年三月 諭曰朕巡幸江浙臨莅杭州見西湖花神廟所塑神像
及後樓小像牌字俱書湖山神位其像雖有大小面貌相倣聞係
李衛在浙時自塑此像託名立廟是以後樓並有正夫人及左右
夫人像甚爲可異李衛於督撫中並非公正純臣在浙江無甚功
德於民間其仰借 皇考恩眷頗多任性驕縱之處設使此時尙
在猶當究治其愆豈可令其託名立廟永享祭祀所有廟中原像
著該督撫撤燬另塑湖神之像以昭信祀

右 國史館本傳

公姓李名衛字又玠明初以軍功起家襲錦衣衛由浙遷碭山公
伉健有氣入貲爲戶部郎司納粟事親王某屬每金千加平十兩
公不可強之則昇櫃置戶部東廂下署曰某王贏餘王大驚諭止
之王府歌者殺人公會刑部鞠刑部因王故欲爲道地公爭之急
同僚止公而公往益早 世宗心重之登極授雲南鹽驛道遷布
政使旋巡撫浙江康熙末年鹽法抗弊滇省有私壓短平諸色目
浙商浮費至十二萬州縣赤腳丁錢攤入田故有田者不占名籍
奉土豪爲甲長供奉如奴公一切禁督奏 湖屬浮糧又奏玉環
山乍浦近海請設參將同知鎮撫之北新關虧稅司權者患之公
奏以南關之贏抵北關之縮往來商大懽雍正四年遷總督節制

江南七府五州當是時浙省逆案屢發杭州汪景祺查嗣庭等以
誹謗伏誅而妖人曾靜又爲石門呂留良弟子 上震怒停浙人
禮部試將大創之賴公外嚴內寬教督於下開說於上致民俗丕
變 天心回和庚戌殿試前三名皆浙人公駢齋多力鼻孔中通
身長六尺二寸痘瘢如錢著頰上皆滿而白皙精采豐頤廣額腰
腹十圍善養威重每出繡衣袞袍乘八座露車去其帷壯士一人
高丈餘執大刀光明如雪扶輿而趨絳旗黃蓋犛槊葩瑤數十重
宛然雁行罔不整最後馬上鼓吹細樂鏗鏘三四里闔城老稚聞
制府進營爭奔趨觀目眩良久引咤始畢而提鑪香猶冉冉四
散性好武設勇健營募兵教之擊刺一切器仗加鮮明每霜天大

葛公披金甲執鐵如意登壇指揮先是東南武備遜西北而公自信過之屢請從征西戎又請長子星垣征楚滇諸苗然世宗終不許也公不甚識字而遇文人甚敬修浙江志建書院餼廩獨豐公餘坐南面召優俳人季麻子說漢唐雜事遇忠賢屈抑僉王肆志輒嗚咽憤罵拔劍擊撞聞鄞縣有王安石祠大怒嚴檄毀燒奏敕十三省督撫修古賢祠墓諸生入學者行肅拜禮許士女逢春秋節賽會迎神其姦惡則伐瀦其墳事雖不行海內皆嘉公之志凡文移奏章不過目聽人雜誦不可於意者嘍哨命改動中冓繁雖儒者文吏皆心折駭伏以爲天授疏西湖淤三十里增修祠廟植柳桃春時隄樹盡花水亭風臺金碧明耀公晡餐畢鳴騶出清

波門攜文案坐亭子灣辨治文武屬吏白事者就湖光山色閒稟請意旨判決如流七年 召署刑部尙書加太子太保未二月總督直隸故事直隸五總兵一提督與總督抗行公往悉受節制總河朱藻素侮張公首劾之滅死爲城旦春公負氣好勝遇權要人務出其上乃已當是時大將軍年羹堯河東總督田文鏡九門提督鄂爾奇管戶部果親王皆隆赫柄用而公輒彈劾搖撼之雖有排羣言 眷寵不少衰十三年八月 世宗崩公自知孤危獨立萬無全理入謁 梓宮跪伏大慟暈絕不能起 上知其意 召見慰之曰卿但努力報國 先帝雖崩自有朕在也 賜珊瑚朝

珠荷囊兩匣再 賜長子星垣武探花及第公意始安公尤長於
治盜凡盜之巢藪火伴訪知如繪臨期以一錦囊付將弁往如教
卽時擒獲所到處江湖千里如枕席行舟桴鼓不鳴不禁妓不擒
携藉不擾酒坊茶肆曰此盜綫也絕之則盜難蹤跡矣先是朱文
端公以醇儒治浙考於古頌婚喪宴會儀教民又禁鐙棚水嬉婦
女遊山民肩背資生及賣漿市餅家弛擔閉戶默默不得意公雖
受知於文端而爲政不相師一切聽從民便歌舞太平誘掖而張
皇之民喁喁太和愈卑賤者愈禱頌焉雍正十二年公總督保定
與戶部尙書海望同勘海塘至浙遠近村氓以爲公復來撫浙也
額手迎者蟻屯數十里歡聲殷天文端公聞之歎曰古人云觀徐

公言論不復以學問爲長斯言信矣公生時太夫人夢神僧授以異寶及卒病黃疸呿聲震屋瓦衙內牛馬皆吼應之同起同止如是者三晝夜氣乃絕年五十三諡敏達

論曰 世宗皇帝時才臣任封疆者田李並稱然世之人往往優李而劣田意頗疑之後讀 硃批上諭田文鏡奏禁銅法請民間有拋擲制錢者擬軍又奴婢首主人藏銅器者許脫籍治其主人之罪公奏禁銅法請官增價購有售者卽與值不問所由來亦不治藏者之罪是二疏者在 世宗俱未允行而兩人之見解心術判若天淵已可見矣公每劾權貴拜疏後卽鈔橐以示其人嗚呼壯哉

右傳袁枚撰

康熙末各省錢糧多虧 世宗詔清查天下震懾公總督浙江聞之詣內幕問策皆瞠不語公曰不請朝臣來 天子弗信朝臣至而督撫無權事敗矣宜速繕一疏極言浙省廢弛久誠得內大臣督治甚善但內臣初至未得要領臣身任地方需臣協理事裁辦疏成馳奏卽詐稱生日開筵受賀浙中七十二州縣無不麴至者公張燈陳百戲止而觴之召諸州縣至密室語曰清查使者至矣汝庫虧絲毫勿欺我我能救汝否者發露被誅勿我怨皆泣謝曰如公教歸皆覈冊密呈其無虧者具狀上亡何奏下許公協理清查大臣戶部尙書彭維新實來先至江南江南督撫不敢闌語一

聽彭所爲彭天資險鑿鉤考煩密民吏不堪州縣擬流斬監追者
無算畢到浙氣驕甚公迎見卽持 硃批示之曰朝廷許衛與聞
公勿如江南辨也彭氣沮稍稍禮下於公公置酒宴彭半巡執杯
歎曰凡共事者未有不爭者也某性癡好與人角屢蒙 上誨今
誓與公無爭而後可但不知如何而後可以無爭彭曰分縣而辦
何如公曰善呼侍者書州縣名若干揉小紙如豆髹盤盛與彭起
分拈之暗有徽記彭不知也其虧者歸公其無所虧者歸彭彭刻
苦舉較手握算至胼起卒無所得而公密將贓罰閒款鹽課贏餘
私攤抵矣故使人問曰有虧否何如彭曰無之彭問公公陽爲喜
出意外者而應曰亦無有也遂兩人同奏浙省無虧 世宗大悅

語人曰他人聞清查多憂愁獨李衛敢張鐙宴彼教督有素自信故也晉秩太子太保 賞賜無算各官俱加一級江南之人望如天上河東總督田文鏡柄用時忌公暗劾公 上不爲動田懼轉來結納伺公居太夫人喪遣人以厚賻弔公罵曰吾母雖餒不飲小人一勺水也麾使者於大門之外而投其名紙於溷中然性極服善一日坐堂上命吏胥田芳作奏請封五代田不可曰封典止三代無五代芳不能作此奏固命之對如前公大怒罵曰畜產例自我撫何干汝而逆我田遽起立勃然曰公大誤公怙 天子一時寵忘王章芳故曉公公當謝芳乃尋及其親何也且公爲人子孫封三代而猶未足芳亦人子孫未封一代而公以畜產寵秩之

何用心逆人道耶芳殊不服芳殊不服公素負氣忽公堂爲吏所折窘不知所爲強復怒曰便是我誤汝不服奈何曰公大人也芳小吏也豈特公言芳芳無如公何卽公杖死芳芳亦無如公何所可惜者大人之威能申於小吏而小吏之理殊直於大人耳言畢竟走出公默然顧左右亂以他語而罷是晚召芳芳疑公蓄怒將陰禍之入色如土公握其手笑曰汝有膽識而辱爲吏可惜吾貸汝千二百金納縣丞他日事上官亦以直道行之田泣謝得富平縣丞遷鳳翔令以賢聞

右逸事袁枚撰

張師載

張師載河南儀封人父伯行禮部尙書有傳師載由舉人承父廕
雍正六年授戶部員外郎八年遷郎中九年正月授江南揚州府
知府八月擢河庫道乾隆四年終養回籍七年補原官十年四月
擢江蘇按察使六月調江西疏言江西俗惑風水贛州南安尤甚
旣葬復掘洗骸以驗吉凶請依子孫毀棄祖父母父母屍律擬斬
並議鄰保扶同罪部議從之十一年內遷左通政十二年遷宗
人府府丞十三年七月擢倉場侍郎八月命往江南學習河務
十四年協辦江南河務十六年二月上南巡加頂帶一級三月
授安徽巡撫特敕伏秋大汛仍赴河南協同防護十八年八月

欽差尚書劉統勳總督策楞查辦河員虧帑誤工事奏上 命革
師載職畱於河工效力九月策楞奏參銅山小店浴淄徧隄根同
知李焯守備張寶疎防 諭李焯張寶卽於工次正法縛師載至
行刑處所視誅焯寶訖釋之二十一年放回籍二十二年二月
諭曰張師載從前協辦江南河務一切俱係高斌主持但身爲大
臣惟事附和以致玩工滋弊咎有難辭是以革職治罪旋經降旨
從寬完結念其人尚老實年未衰邁著赴京候旨酌量加恩錄用
尋授兵部侍郎七月遷漕運總督二十三年正月遷河東河道總
督 上南巡 賜以詩曰疏濬期嘉績修防董眾寮詎予惟使過
勵汝尙更調法在遵潘馴文甯藉鮑昭魚鼈全涸未舉趾待春潮

二月師載由荆山橋履勘至徐州會同江南總河白鍾山奏籌辦
河岸隄工三事 命分任和衷辦理疏詳鍾山傳先是河南商邱
六堡河勢由北折南偪塘勢甚危險每歲搶修費以萬計師載於
六堡對岸劉家樓至李家莊開分濶引渠三百餘丈河漸北徙事
聞 上嘉之山東微山湖居昭陽湖下游徐州無隄處漫水刷成
港槽奔溜灌湖議開伊河分洩師載奏伊河自韓莊過八閘至黃
林莊入運請開八閘月河以暢湖河下注之勢挑伊河壩口接長
兩岸雁翅壩以資吞吐又虞河身日高遇漲卽溢微山湖每患墊
溢請將孫家集溝槽未經堵處堆亂石滾壩盛漲則分洩以減水
勢歸槽則收束以刷河底使入湖之水有所搏節 詔可二十五

年疏言河工設立河兵堡夫河兵歲給銀米倍於堡夫且得拔補外委遞升千把總堡夫則別無寸進以致應募日稀伏思簽椿下埽堡夫最爲熟練河兵缺出與其募茫然未曉之人不若卽選精悍堡夫充補使之進身有階自必踴躍力作於修防益收實效得旨允行二十七年 上南巡再 賜詩曰去歲楊橋決予當咎匪卿從來不諉過正爾憫奔驚清白揚前列奠安觀後成修防溢勤奮勸此繫民生閏五月奏言陽武一帶隄工多係浮沙河水浸泡每患頽圯遇風浪更爲險要去年因河溢水逾隄頂灘面間段停淤臣按淤性膠黏凝結飭工員於臨河一面用淤包裹二三尺嗣後遇有土工依式增培可節每年鑲修費 上是之二十八年

卒遺疏至 諭曰張師載老成謹慎辦理河務宣力有年今患病
溘逝殊爲憫惻著加恩追贈太子太保所有應得卹典并著該部
察例具奏尋 賜祭葬如例諡愨敬

右 國史館本傳

河南儀封張氏清恪公諱伯行康熙朝仕歷江南福建巡撫洊擢
尚書以廉直名海內 聖祖仁皇帝嘗稱爲天下第一清官其仲
子師載字又渠號愚齋初得官 陛見 先帝指示宰臣曰此張
伯行子好司官 今上眷遇益隆每 召見輒詢及隨父任時事
天容溫霽 賞賜優渥公故以報 國活民爲心用是益感激
奮勉懼有玷缺爲名父羞乾隆甲申以東河督卒於位年六十有

九公由丁酉鄉舉得一品蔭補戶部員外郎雍正元年出授知揚州府值揚州歲饑散賑而高郵湖西之民緣被災分數稍輕不得與公行部至其地見道旁人多骨立待盡大驚召長吏詰責隨請於上官不待報而廩之凡活男婦數千口江都芒稻閘爲淮黃高寶諸河入江之關鍵所司貪商人餌惟知蓄水爲運鹽地藉口必奉鹺使令乃開會夏潦暴漲低田盡淹公訪知運鹽須水六七尺而既過其半遂單騎馳往督役啟開纔啟四板水暢出甚疾仍艤舟宿其旁明日田皆涸出然後走白鹺使使者大恚責公專公謝曰知府信有譽矣第拯溺不淹刻必預請而後行如此萬家煙火何後具文上大府請歸府轄許之芒稻閘之屬府啟閉自此始公

雖隋清恪公外任久晨夕唯讀父書及研精宋五子之學不與吏事尤於水利絕少見聞乃其出守初政卽已可觀如此故知才智由悃愾以出而其一生周歷中外顯職遂與河務相終始豈非冥冥中有意篤生爲 盛朝宣力者歟自知府遷秩兩任河庫道河庫掌管鑰不任功過向爲美官公以才爲前後督臣所倚信輒委辦險要大工以故於河務寔熟悉乾隆十年遷江蘇按察使未任調江西尋內遷右通政明年七月由宗人府丞擢倉場侍郎 命閱視天津河道旋以侍郎出副江南河督十有六年 上南巡接駕道授江安巡撫仍協理南河事明年秋充省試監臨在闈中而河溢二閘徐州被衝公與文定高公並褫職在工贖罪又二年

放歸丙子起爲兵部侍郎五月遷尙書總督漕務丁丑正月調今任時山東孫工決口賈船漕艘如泛大海中公冒風雪宿河岸燈熒熒達曙如此閱冬春疏築始完公嘗言河中水勢土性與江南異兩岸相距寬宜多挑引河以殺險土多浮沙宜厚培客土以實虛自此由濟甯治所抵開封歲往來如織而公心力亦瘁於是矣先是乾隆三年在河廬道任伯兄其病故原籍而王母太夫人王在堂遂剋期告養上官固爾不可前此雍正末河督文敏嵇公母卒蒙在任守制之命將具摺固請終喪眾以違旨獲罪爲疑公慨然進曰公父孝母節門望非常愚請之不力耳何禍之觸文敏謝曰謹受教其在江西歲無故遷葬之禁行連坐法薄俗竟革

撫江安二年多偏災皆據實上聞請恤全活甚眾痛懲匿名訐告時習以靖地方蓋資孝以事君者不敢惡於人因之宣德達情而澤流百姓亦固其所凡此皆清恪公之教也公平生治水方略所著書藏於家其隨時措置條理及一切治行已具諸城相國誌中而長君景渭之子承重裕穀及次君景沆又次後伯兄者曰琦復合辭遺信詣余句以崖略揭之碑銘曰

禹迹旣湮治河孔艱上策難行在漢已然或議棄地墳墟蕩焉匪徒眾譁於心奚安意惟深刷去沙是急廣開支港以通其塞於末求本此計猶得增庠培薄救時之爲爲之務實亦大有裨毋忽蟻穴庶屹金隄惟公任勞南北周遭保障千里通行萬艘清恪有訓

毫毛無競祇此俸錢無慚見 聖家風清白如秉繼震鬻產奉公
破家積行 帝鑒其誠謚曰愨敬爰 賜祭葬松楸輝映哀亦增
采善斯衍慶樹碣道旁永爲世鏡

右神道碑銘陳兆崙撰

張師載字又渠號愚齋儀封人禮部尙書伯行子也康熙丁酉科
舉人乾隆十五年同大學士高斌協理江南河務十八年徐州張
家馬路黃河漫溢褫職後復起爲河東總河二十一年以孫家集
漫口入湖爲害與運河道李清時共宿河干疏築並舉又以豫省
黃河工多暗險廣開引河挑土幫隄自此兩岸遙縷免受衝刷卒
諡愨敬著有改過齋文集讀書日鈔等書

右小傳陸燿撰
按張公又著有課子隨筆

司馬文正公集卷之二十一 張臣二十

同書名 庸考後形

三三三三

三三三

胡文伯

胡文伯山東海陽人由附貢生捐納訓導康熙五十八年選授濟南府學訓導雍正四年六月俸滿引見記名以州縣用九月授河南禹州知州十二月丁父憂七年服闋補直隸灤州知州乾隆元年升大名府同知旋調順天府東路同知二年丁母憂五年服闋補河閒府同知六年調南路同知八年遷天津府知府九年上以文伯謹慎有餘才幹不足天津見辦賑務恐未能勝任諭直隸總督高斌據實回奏尋奏胡文伯氣度局促但爲人質樸實心愛民頗有恟悞無華之意天津風俗浮靡以此表率似亦人地相宜至賑恤事宜皆司道等悉心經理文伯往來巡查頗著勤勞

日... 卷一百一十一
四
尙未至有貽誤報 聞十四年四月因失察屬員徇庇鄉紳侵奪
民利部議降調得 旨交與直隸總督以同知用九月借補磁州
知州十二月升江蘇常州府知府十八年揚徐各屬被水成災文
伯以熟悉賑務調揚州府十九年仍調常州府二十年擢江南蘇
松糧道二十七年 上以文伯歷任江省年久辦理公務奮勉出
力加按察使銜尋授江蘇按察使二十八年三月奏言命案內有
減等發落應追埋葬銀請將一年限改爲三箇月限滿勘明實不
能完者即將該犯發配無任逗畱隨取地鄰親族供結州縣官加
印結詳免免後查出隱匿屍親告發地鄰等照不應重律治罪加
結官罰俸一年五月奏言常人盜倉庫錢糧等物已得財者罪旣

改擬其不得財者律杖六十未免過輕請照得財擬軍例減一等擬杖徒部議均如所請旋升廣東布政使二十九年奏言粵東秋審向例司道豫期會覈實爲慎重而各省未能畫一請嗣後每年臬司覈辦秋審先期主臬陸續移咨在省司道虛衷會商不得臨期造冊移送視爲具文 從之三十二年奏言定例佐貳等官擅准詞狀降一級調用正印官不行詳查罰俸一年但例內未將有無致斃人命分析註明而印官查出揭報亦得免議往往佐貳官濫差拘訊致釀人命印官以一揭了事請嗣後佐雜擅受致釀人命將印官照防範不嚴例降一級畱任不得以補揭免議如印官規避處分匿不具報卽照諱命例革職至印官濫批致斃人命向

亦未有明文請照溺職例革職如州縣長懼處分隱匿濫批情節該管府州不查出揭參照徇庇例降三級調用並將不詳報題參之司道督撫降一級畱任下部議行三十三年正月調江蘇布政使七月 諭曰今日胡文伯奏到兩摺止係循例謝恩及沿途雨水情形並未將割辮匪犯見在如何設法緝拏及有無弋獲之處奏及殊屬非是藩臬大員准其專牘列奏者原爲地方要務得以隨時入告以備體察且可知其人畱心政務與否並非專令其奏報晴雨收成及撫拾一二錢穀刑名事件條列敷陳便可爲塞責也今江蘇見有用藥迷人偷割髮辮之事朕屢次降旨嚴切查辦胡文伯豈有不知該省目下被割之案多少若何匪犯有無就獲

及山東供出首夥各犯有無蹤跡文武各官是否認真躡緝地方
應行辦理事件孰有要於此者且其赴任所經之直隸山東各省
匪徒亦多蔓延胡文伯詎竟毫無聞見何漠然絕不動念竟無一
語置論乎可謂全不知事體輕重胡文伯著傳旨申飭所有緝匪
一案亦著一體實心查辦總之此事若果上下齊心併力務在徹
底搜擒匪犯豈有不卽就獲之理胡文伯設以爲緝犯非其專責
稍存推諉觀望之心則是自取罪戾矣尋部議失察各縣審理剪
辮處分胡文伯照例革職 上加恩寬免三十四年升安徽巡撫
三十五年五月兩江總督高晉以文伯與藩司范宜寶不相和洽
共事日久恐於吏治無益奏請量爲更調 上斥其非是 諭高

國朝通志卷之二十一
晉將胡文伯范宜賓二人居官心蹟究係如何果係誰是誰非秉
公據實覆奏尋奏胡文伯性急無私其駁正藩司誤處並非苛求
范宜賓任事努力尙欠熟諳每因巡撫指駁退有後言實有不合
得旨如此則曲在范宜賓矣時安徽蝗蝻成災諭曰前據胡
文伯奏稱宿州境內蝻子萌動於五月二十六日親往搜捕當於
摺內批令俟淨盡後速行奏聞昨於本月十九日以胡文伯范宜
賓俱往宿州一帶捕蝗復諭該撫將見在已未撲滅情形速奏今
據永德奏稱閏五月初十日歸德府毗連宿州之永城縣謝家莊
有蝗自東南飛落地內又相距永城一百三十里之宿州秦家湖
並相距八十里之宿州孚立集又有蝗蝻飛躍等語是宿州一帶

之蝗蝻不但未能淨盡並已長翅飛躍胡文伯等在彼督捕爲時已久何以仍致長發蔓延且該撫等自到宿州以後並未將見在情形據實具奏殊不可解著胡文伯一面率屬實力搜捕毋令稍有畱遺並將不行出力之員嚴行查奏仍一面將已未撲滅情形迅速由驛奏聞毋再遲延干咎六月文伯奏請將捕蝗懈緩之署宿州知州張夢班等分別革職拏問 諭曰張夢班等已交部嚴察議奏至另摺所稱前因蝻孽尙未飛騰遠去地方官皆督夫撲捕未經奏參是誠何言甚屬非是地方偶有蝻孽萌生或由先期雨澤稀少更值天氣炎熱勢難禳其必無朕亦何嘗因一經生蝻遠科有司之罪司民牧者平時自當悉心體察防於未然及生發

之初卽力爲設法搜捕原可不畱遺孽以人力勝之果其捕除迅速方當交部優敘以示獎勸若始事旣已玩延寢至飛颺滋蔓漸益孽生其爲貽害田禾將復何所底止是以捕蝗定例綦嚴朕於玩視民瘼之劣員從不敢稍爲寬貸而於捕治蝗蝻之實政亦不容稍有稽延且蝗蝻自初生以至跳躍俱有蹤跡可尋縱使長翅飛騰究不離旁近地面安能遠越百餘里外成羣停集卽或疆壤毗連偶然飛入地方官亦當上緊集夫撲滅保衛農田若意存畛域藉口鄰封以致耽延日久其與本境滋長者何異況飛蝗所起之地遺孽必不能盡絕原難掩人耳目是辦理捕蝗之事祇應就見有蝗蝻處所視地方官用力不用力以定功罪不必更問起自

何方若置見在而不論轉欲究所從來徒使黠猾之吏以蝗不出境苟幸無事爲得計誰復肯及時力捕盡心民事乎是胡文伯失察生蝗之處分尙輕而爲劣員文過之情節較重胡文伯著交部嚴議七月 諭曰胡文伯前於撲捕蝗蝻一事布政使范宜賓欲自行前往屢稟不准亦不卽自赴督辦又觀望數日見范宜賓自去查捕始行奏明親往希圖塞責因令明白回奏今據覆奏以辦理密案遲延爲辭伊回任二十餘日有何要件耽延似此玩視民瘼豈能復勝巡撫之任胡文伯著卽降補湖南布政使尋部議革職 上加恩補授廣西按察使仍革職畱任九月以泗州衛軍屯地有飛蝗守備諱匿不報來安縣有飛蝗知縣不上緊撲捕該管

知府轉出具淨盡甘結經范宜賓奏參 諭曰胡文伯前爲該省
巡撫彼時尚未卸事所屬州縣既有飛蝗並不選派誠實妥幹大
員分投盡力嚴查致各員得以匿飾數月之久胡文伯著交部嚴
議尋照部議革職三十六年文伯迎 鑿山東 上以其精力尙
未就衰前在直隸年久 命發往直隸以同知用三十七年補廣
平府同知三十八年 諭曰胡文伯年近八旬念其居官尙無大
過著加恩賞給按察使銜休致回籍四十三年卒子其章官貴州
鎮遠縣知縣廷章官四川夔州府知府雲章官湖南茶陵州州判

右 國史館本傳

國朝耆獻類徵初編卷百六十八補錄

疆臣二十

方顯

公姓方氏諱顯字周謨號敬齋湖南巴陵人方氏自元明以來世有名賢公曾祖某祖某父某比三世不仕祖父以公貴 贈如其官公少孤母許太夫人督之學嚴至既長以歲貢生任湘鄉縣學教諭稍遷廣西恭城縣知縣公爲人英達沈毅自少讀書慨然有志於經世之學而好古兵法雍正四年 詔諸行省舉賢能之吏天吏知其才薦擢貴州鎮遠府知府當是時鄂文端公總督雲貴始建議開苗疆改土官歸流雲南東川烏蒙鎮雄諸土府既皆內

屬然貴州苗自若其故所謂貴州苗者其南曰古州曰八寨西南曰丹江東北曰九股清水江九股清水江際鎮遠而丹江際凱里八寨際都勻古州際黎平參錯萬山之中阻險而羣居地方三千里眾數十萬於是黎平知府張廣泗建請開貴州苗鄂文端公善其策未卽許而獨檄公至雲南問狀公對以爲貴州生苗獷悍者居大半無所統轄楚粵行旅之往來皆阻苗疆迂道而後達苗又益時出剽掠爲商旅患中國奸民觸法捕之急則逃入苗中無敢問者吏民咸以爲苦其內則弱肉強食相噬齧雖彼民亦自苦之誠及今宜爲計請苗區固峻險然泉甘而土沃有丹砂水銀木棉花木竹箭金鐵之饒清水江西通黃平平越東走湖南廣西今誠

以威德撫而有之漢苗良楛之民攝然壹安其所舟楫達於四遠財賚流行華夷富樂 國家大安此百世之利也鄂文端公曰是則然然子度苗果可開否其難易若何曰無難易惟其人而已又問勦與撫宜孰施曰二者宜並施之第撫先而勦後既勦則尋撫之耳因條上平苗便宜十六事文端公深韙之於是始奏開貴州苗改流如雲南矣文端公檄張廣泗招撫古州丹江八寨諸苗而九股清水江苗以屬公是歲雍正五年也明年公以三月至梁上四月至挨磨者磨八月至柏枝坪披心腹布德威順風首塗苗民悅喜訖十二月而九股及清水江南北九十有二寨一皆撫定先是施秉有劫盜匿台拱在農二寨副將張禹謨捕不得至是禹謨

率師次柏枝坪二寨既就撫矣禹謨追其舊惡謀因兵威屠之二寨懼棄寨逃林谷將爲變公聞之曰如此苗人人自危矣大局且以壞持不可遂獨馳一騎抵二寨寨皆空無人公則宿寨中犁旦張蓋出令從者一人前導繞林谷疾呼曰鎮遠府來活汝卽今汝疾出苗民爭出擁馬首驚問公曰無恐速歸寨汝曹就撫卽良民天子必不殺良民苗拜且泣曰公活我活我公乃坐石上相與語如平生歡并詢所疾苦苗又益喜且拜曰公仁人也遂相率歸寨公益宿台拱寨中者三日而諭以縛獻施秉盜無不聽命者明年二月反號董敖柳受柳利諸寨皆相繼就撫又討平公驚寨之爲亂者諸苗以次稍稍定鄂文端公乃始奏請置貴東道控苗疆以

又補其處仍畱守清江而張廣泗亦平古州八寨大小丹江又與
公同平九股以功至貴州巡撫頃之難呼黨諸寨畔復往擊明年
平之九股清水江諸苗悉平矣鄂文端公以古州苗畔檄與君偕
者古州鎮總兵蘇大有往而命公總統清江公務文武官吏一聽
節制於是申軍令誓將士毋掠毋淫毋侵欺善良毋踐果穀苗民
以忿爭來愬爲處其曲直皆悅服以去乃益築城郭建官廨治礮
臺營房苗民競來助役勞以酒食益驩欣鼓舞趨事逮九年三月
而諸工役竣公出徇清水江巡視塘汛黔楚商船千帆箕張雲翔
上下苗民攜老扶幼聚江干臨望或稽首馬前以果蔬菜茹獻者
繼屬於道不絕觀者動色相詫以爲開闢以來所未有也公至誠

遇物不爲藩蔽故所至人人信屬其在兵忠勇激發而志守堅決
臨利害不可奪敏於事機所策慮輒當成敗公鷺之變率諸寨圍
我師於柳羅張禹謨欲走公不可旣巡撫張廣泗來解柳羅之圍
議以爲公鷺首亂宜置諸黨專攻之公謂不若先散諸黨從其策
而公鷺果以孤立敗將擊公鷺霖雨江盛漲欲渡無所得舟公夜
選銳卒善游者數十人乘大霧往奪苗舟以濟進擊連破遂平之
討雞呼黨也以計招誘苗酋計包辛等八人至則并斬之以徇而
雞呼黨以破逮其後台拱之變事尤危則尤賴公力台拱者最苗
中扼要地也苗平初議增置一營爲防禦當是時鄂文端公旣以
入 覲畱京師拜大學士矣高文良公其倬來代文端任而公亦

晉貴州按察使明年張廣泗復調甯遠副將軍去巡撫元展成來
權貴州而苗方新集遠建城於台拱九股苗故習劫奪久弗便也
其年秋羊翁烏羅桃賴諸寨倡爲變九股諸苗寨皆附焉公方以
增兵建城畱台拱未行九月七日未明賊大至公先訶得狀與總
兵趙文英嚴爲備賊至擊走之進破羊翁寨越數日賊復夜至公
以兵寡令人焚兩炷香手之爲若火繩狀者以疑賊走之於是賊
乃踞排略以困我師排略者台拱之咽喉援軍及饋運所由也是時
台拱官軍僅二千五百人苗眾且數萬扼險而守援兵再至再失
移自賊始攻或欲棄台拱走公拒之及圍久糗糧皆盡迫冬寒益
凍餒眾洶洶不自保會得制府檄令退師就糧下秉文武集帳中

密議莫能決公忿發言曰黔苗全局安危繫台拱一舉足盡動搖矣且卽出台拱下秉能必至乎徒損 國威失臣節奚益因拔所佩刀示諸公曰事急則某死此耳吾不能棄此走也已而軍中微有聞知其事者公乃召將士爲具陳利害且激以忠義聞者莫不感動於是總兵霍昇方以兵趨援台拱未及至賊奪我後山樵路絕公夜出奇兵奪以還而賊益至事且急公鞭馬直前趨賊或止公以文吏不可前公曰前亦死不前坐困亦死等死耳眾聞益殊死奮擊大敗賊軍乘勝遂拔烏孟井底二寨取其米穀以餉飢軍亦會霍昇兵克大關躍入台拱兵並出衷擊之賊大潰走凡堅守六十九日而台拱之圍解於是諸軍大集進擊諸寨皆破殄最後

提督哈元生至攻蓮花聖悍苗大克之而九股苗復定當是時微公扼台拱制其樞黔中幾且殆自鄂文端公既定雲南繼開貴州苗疆發議於張廣泗而決策於公卒終始其事出萬死以保全局崎嶇前後七年而事集乾隆元年丁母憂去官服除遷四川布政使尋擢巡撫大小金川雜谷諸土司相仇殺公遣人諭之諸土司惴公威事壹解而議者欲遂乘此令改流如滇黔公具疏力陳不可乃止始公旣平貴州苗自爲平苗紀略述其事因論馭苗之宜無事毋激有事毋諱大事毋畏小事毋張未幾而苗疆吏果以徵糧不善致羣苗怨畔濯征三載然後克之及乾隆中葉討伐大小金川先後用兵八年糜帑金七千萬窮極勞費而事乃定世以此

推公之明大體習邊事非人所能及也五年以楚粵邊苗不靖調
廣西巡撫逾時辦治六年謝病歸薨於里第公之調廣西 上聞
公疾 詔且畱四川毋行而公已就道既至屢降 溫詔慰諭
遣太醫視疾及薨 天子震悼官其次子爲知縣公內行肫摯服
官所至有惠政事多不具初至鎮遠時有寺僧爲神所怒謂賢太
守至臥不起承事痛誅責之鎮遠人書之府志以爲異台拱之圍
樵采旣絕軍中掘草木根以爨入四五尺所見黑土類煤投以火
則皆熱眾咸拜曰天也二事人尤忘稱之傳爲神公子四人鶴中
書科中書桂舉人官至浙江甯紹台道龍安仁縣教諭麟歲貢生
女二人皆適士族孫十三人曾元無慮數十人皆能取科第仕宦

有聞於時光緒中來孫湖北補用道任武昌知府曰大湜者以請
公事具載 國史而世或不能盡知乃請爲家傳藏之宗祏以詔
後世子孫且以誌其鄉里於是爲論著公事之大者俾後之人有
考焉

張裕釗曰有苗自唐虞之盛不能臣及我 世廟任鄂文端舉生
民以來之蠻區一變革之豈不偉哉方事之殷中外動色相駭羣
疑交訐今觀公及鄂文端所相問答語然後知天下事無不可圖
者所難惟得其人耳然予嘗睹世所謂賢者能者遭時之艱則一
以不可爲愁謝之仙仙兢兢補綴苟焉以偷一日之安顧不知其
後之伊胡底也烏乎亦獨何哉亦獨何哉

右家傳張裕釗撰

國朝雍正中西南夷改土歸流鄂文端實肩其任願文端初撫雲南僅改東川烏蒙鎮雄三土府後擢總制未議及黔苗也主此議者實惟巴陵方公蓋在事六載幾身殉而後底績其造福於黔民功豈在文端下哉公諱顯字周謨敬齋其自號也由歲貢授湘鄉教諭卓薦除恭城知縣縣境蓮花山礦徒聚眾稔亂公至以兵法部勒鄉勇驅散之雍正四年 詔舉賢良布政使黃公叔琬以公應遂擢授鎮遠知府黔本苗疆自鎮遠以南黎平以西都勻以東廣西柳慶以北皆生苗也近黎平者曰古州近都勻者曰八寨近凱里者曰丹江近鎮遠者曰九股曰清水江地廣袤三千里戶口

十餘萬不隸職方以剽劫爲業民苦之會文端奏改雲南土府黎平守張公廣泗遂建議開黔疆文端耳公名檄調赴滇問苗疆應否開闢狀公力陳利害而歸其本於得人問勦撫孰先則曰二者不可偏廢宜先撫後勦勦平後仍歸於撫耳上事宜十六則曰別長頑審先後禁騷擾耐繁難防逸截戒姑息宥脅從除漢奸檄軍器編戶口輕錢糧簡條約設重兵建城垣分塘汛疏河道各爲之說甚備文端聽之乃檄張公招撫古州丹江等處而以九股清江台拱諸生苗屬公六年二月公躬莅清江之梁上宣布天子威德苗羅拜曰我等苦強暴久矣不圖今日得見漢官威儀就撫十六寨旣而挨磨等八寨歸誠清江北岸略定矣八月公至九股招

撫羊翁世蓋等四十一寨先是施秉縣屬被劫盜匿台拱在農二寨中副將張禹謨捕之不能得恨甚至是欲屠之二寨懼誅逃謀煽亂爲緩死計公力止禹謨而單騎入二寨寨空無人則止宿詰旦張蓋出寨門使周呼曰鎮遠太守來救汝曹命寨苗稍稍出公曰爾曹旣受撫卽屬良民 聖朝無戮良民理速攜家歸寨毋自取禍也苗拜且泣曰公實生我公下馬坐石上與談家常事且詢疾苦苗大懼又羅拜曰公仁人也願公世世子孫如公仁乃相率歸寨公宿台拱寨三日命縛獻劫犯乃歸九月招撫反號等七寨十二月撫董敖及九股之陶賴等十三寨而靖江南岸略定矣然苗性兇頑南岸甚於北其公鷲雞擺尾諸寨尙眈眈思逞也七年

二月公及禹謨帥師駐北岸於是南岸之柳受柳利羊遠岑松等寨亦就撫三月十五日公薦苗忽糾黨渡江來犯公擊走之復結雞擺尾柳利白索等二十餘寨來攻遂圍營禹謨欲潰圍出公堅不可時張公廣泗已擢黔撫四月帥師來援圍遂解計被圍二十七日矣公建議先散公薦之黨遣人詣各寨諭以順逆禍福皆瓦解公薦勢遂孤從逆者惟雞擺尾一寨耳五月公從撫軍渡江南勦水漲無舟楫夜大霧公遣壯士潛奪苗舟十餘艘自上游濟馬兵蹋浪繼之已而月出苗悉銳來拒我兵已自上游擊敗其前鋒苗潰歸寨遂火之時猶未旦也明日雞擺尾來犯又大敗之於是董兜等寨來投誠前附逆各寨皆悔罪求生且縛漢奸曾文登來

獻斬以徇六月南岸四十餘寨酋皆來歃血公諭以天威不可
犯且開通清水江舟路使財貨流通原爲苗民興久遠之利皆稽
首角崩去乃雇苗船百餘艘從清水江下駛至湖南黔陽縣境之
洪江購米鹽餉軍所過大小苗寨老幼婦女皆聚觀謂估舶連檣
從來所未見也文端奏設貴東道詔以公任之仍駐清江十一
月雞呼黨諸寨謀劫營雞擺尾寨酋來告變問何爲來告則頓首
曰官軍獲我婦女必令幃置別室善視之就撫後悉賜還公恩若
此我等不忍從逆矣賊果至敗之公察知倡逆者計包辛安干州
等數十人也會包辛假就撫來軍訶伺公縱其出入凡三反安干
州等亦至乃出不意悉斬以祭旗遂領兵擣賊寨苗不虞官軍至

也方奉鬼師鳴鉦跳神槍擊之鬼師立斃苗大潰遂破雞呼黨寨
於是東庫黨宜天腊等寨並呼號乞命繳軍械如山乃築城建公
廨造礮臺苗爭來助役九年冬擢貴州按察使仍留駐台拱時文
端入閣高文良其倬代之十年秋公同總兵趙文英帥師建台拱
廳城羊翁烏羅陶賴等寨恐防其出掠也乃結南世羊甲墨引等
寨謀抗拒丹江之高坡雞溝等寨附之惟台拱在農二寨不從且
上變告公設伏以待賊至大敗之然營兵止二千人苗眾數萬勢
不敵或請退屯下秉或請退槁貢寨濟師圍再舉公曰棄師是棄
地也必固守然坐困亦非策宜先勦倡亂之羊翁以奪其氣明日
力戰破之排略者我軍餉道也公分兵二百駐之敗賊來攻公遣

將赴援既却賊遂撤排略兵回台拱日暮苗踞險斷歸路文英躬
往策應漏三下始得歸方文英出援時賊乘虛來犯公嚴守不得
逞乃踞排略干翁諸險隘以困我軍元撫軍展成檄游擊馬似龍
羅資袞來援抵排略遇伏潰資袞死之是日公遣游擊章奇相出
兵接應亦中伏把總王朝傑死之糧且盡遂殺馬以食鎮遠守劉
洵等來問策公命召台拱在農二寨日接濟糧畜倍值與之然不
敷軍食乃命人日賦米一合牛馬肉一片公與文英洵皆日不再
食也亡何苗欲攻二寨二寨不敢來公出不意攻拔世蓋等寨獲
米穀牛羊於是二寨復來交易十月游擊王友文馬騏等先後至
干翁止焉副將楊馥獨前進中槍死師潰似龍退保干翁友文騏

中道被圍絕食三日夜半從間道突歸死傷殆半苗益張適高制
軍檄至令退屯下秉就糧公曰台拱動則清江入寨丹江古州諸
苗皆鼎沸不可收拾矣且奔潰損國威苟免失臣節今日之事
惟有固守不濟則自刃耳乃取檄藏之戒曰敢洩者斬居亡何軍
士有所聞竊竊私語擬散走公拔所佩刀與泐等誓死守會文英
至以軍情告公曰眾知退兵之利不知其害也詰且諭將士曰汝
曹忍飢寒堅守已五十日良苦但苗眾我寡干翁一線路紆折於
懸巖峭壁閒退則人無鬪志苗乘之自相踣藉無噍類矣且國
家養兵原用以戰守卽幸退出而失地必誅不死於苗而死於法
等死耳與其坐法死曷若堅守死況堅守未必死耶眾感悟會云

撫軍飛檄至戒勿移屯且曰堅守三日援至矣人心益定時署提督霍昇兼程來援十一月二日台拱在農二寨忽報賊已破下秉其烏孟井底二寨皆從逆矣公急發兵攻烏孟井底以通樵路至則賊壘已成不能拔樵採路絕公命掘草樹根以供炊爨有黑土如煤試以火輒然眾驚爲神助十一日公復選壯士隨守備李啟榮從絕嶮處攀蘿拊葛肘跖並行凡十餘里繞出烏孟井底後賊驚潰遂奪其壘援賊急來爭大營出救之公鞭馬直前或挽之曰公主帥也勿衝鋒公曰大丈夫死耳遂突陣諸將恐失公殊死戰與啟榮夾擊遂破二寨取米穀以歸時援兵二萬已自下秉抵干翁尋奪大關十五日五鼓合戰解圍自九月初六至是凡六十九

日矣尋掃平陶賴等六十餘寨十一年春提督哈元生勦平桃天
等等寨餘寨悉降九股平六月公回臬司任平反廣順州胡姓獄
出死罪四人乾隆元年條奏各直省文武鄉試請調本省牧令中
科日起家者充同考官無庸向鄰省調取部議 從之著爲令居
無何內艱歸乾隆三年起補四川布政使尋晉巡撫兼署提督事
蜀界連吐番有大小金川雜谷等土司相仇殺邊境騷然公遣官
馳檄開諭之各酋皆誓伏議者遂請改土歸流如滇黔故事公疏
陳不可 高宗手詔褒納事遂寢調撫廣西以目疾請告 溫旨
許之並遣太醫院官來視疾年六十有五卒於家公之學貫穿經
史兼通孫吳韜略在軍置死生度外戡定苗疆世但知爲文端功

豈知出公本謀且躬歷險艱實始終其事可謂能發能收者矣公
既以平苗立功金川土司之役宜樂於從事顧獨疏寢其事後八
年大軍征金川調張公廣泗爲川督進剿不利大學士公訥親繼
之並坐失機死賴傅文忠岳襄壯蕝其事迨小金川復叛阿文成
福文襄討平之前後用兵八年糜帑七千萬用此見老謀深識若
預知後事之艱且鉅也者益信開闢苗疆公實權衡於天時人事
之必然而豈傲倖一試者所可同年語哉公所著有奏疏及平苗
紀略祀府縣鄉賢祠

右事略李元度撰

國朝耆獻類徵初編卷百六十九目錄

疆臣二十一

蘇昌

郭一裕

宜思恭

邵基

晏斯盛

盧焯

圖書集成醫部全錄
卷四十四
十一

--	--	--	--	--	--	--	--	--	--

國朝書獻類徵初編卷百六十九

通奉大夫前署江西巡撫江西布政使司布政使湘陰李桓輯
疆臣二十一

蘇昌

蘇昌滿洲正藍旗人姓伊爾根覺羅氏祖滿丕官都統自有傳父
蘇保襲雲騎尉康熙五十九年蘇昌由監生考取內閣中書雍正
七年遷侍讀十二年遷浙江道監察御史乾隆元年命巡察吉
林等處二年七月奏請於黑龍江船廠各設理事通判得旨允
行又言船廠將軍衙門及所屬甯古塔三姓白都納阿爾楚哈刑
名案件向俱船廠理刑司審理皆本處旗員通清漢文諳律例者

甚少審擬罪名多與律例不符輾轉駁詰案內干連人犯監禁日久非愼重刑名之意請揀在京員外郎主事各一筆帖式二往辦事 詔下部議船廠旗民詞訟有通判專管其理刑司員外郎無庸增惟主事由京選補筆帖式由該處選補三年襲世管佐領尋轉禮科給事中四年巡視西城六年正月署廣西按察使七月調署安徽按察使七年實授十年五月丁憂回旗仍在御史上行走十二月補工科給事中十一年正月擢奉天府府尹六月奉天各屬被水蘇昌條奏辦賑三事一奉天向來辦賑因乏公項腳價無出並不於四鄉設廠各屬幅員遼闊村民赴城領賑往返數百里情殊可憫請照例分貯米石於四鄉適中之地腳價動正項覈銷

一辦賑胥吏飯食紙筆之費因無項可動不無賠墊請酌州縣大小定其名數按日給費令不得借口需索一委員勘災監賑酌給盤費並跟役飯食儻有通同侵欺等弊嚴參治罪 諭曰所議尙屬可行而實力稽查妥協辦理則汝一人之責也勉之九月奏請查游民三事一山海關迤北至喜峯口一帶邊牆缺處游民冒險繞越請咨直隸總督古北口提督巡防奉天沿西一帶交錦州副都統率該府加謹巡查一內地游民出古北喜峯等口由入溝塔子溝繞入奉天境內請令總督提督轉飭塔子溝通判河屯協副將實力巡查一奉天之南金復雄蓋四城與山東登萊二府相對商船私載民人勢所不免奉天甲丁散居屯莊輪班赴城供差似

難坐守海濱各口又無墩堡請飭商船俱於有官兵處停泊上岸
以便稽查如無引票卽遞回原籍下部議行十四年擢廣東巡撫
十六年署兩廣總督初廣西巡撫舒輅奏於思陵土州沿邊種竹
竹以杜私越嗣土目頭人等乘勢侵夷地夷人不甘土目遽以夷
人拔竹毀牆捏報蘇昌檄道府查明押令頭人歸所侵地因奏言
鎮安太平南甯等府沿邊二千餘里處處界連交趾無論種竹難
徧設辦理稍疏必致轉滋事端請通查及早更正疏入 上以舒
輅輕率舉行下部察議又奏言廣東承辦柘木案內各員覈減長
支銀三萬六千八百兩有奇前經奏明勒追不能完者各上司分
賠但分賠人員有無從著追者請再均派攤賠 諭曰蘇昌此奏

非是分賠之例原專爲侵貪之員虧蝕正帑上司不早爲舉察是以責令分賠以專其責成耳覈減長支已非侵貪可比卽謂其不能實力稽查估報不行覈實亦應令賠所應賠本分而止若又將同賠案內他人應賠之分均攤代賠於情理殊未允協且既有他人攤賠將併應賠之員俱稱無力完繳徒使案牘紛繁輾轉攤派徒失政體而亦毫無裨益前因粵西張永熹一案曾經明晰曉諭今蘇昌仍有此奏或他省尙有似此辦理者著通行傳諭知之十八年正月以協拏增城逆匪王亮臣不力 諭停其議敘八月奏言瓊州爲海外瘠區貧民生計維艱查有可墾荒地二百五十餘頃請招民開墾免其升科 詔如所請十一月 命來京候旨十

九年授吏部侍郎二十年署戶部侍郎二十二年兼署工部侍郎
二十四年五月署工部尙書九月授湖廣總督二十五年疏言辰
州協兵每月額支米三斗每石折銀六錢前經督臣孫嘉淦以六
錢不能買一石題准將停運黔米二萬石派給提標等十四標營
辰州協每兵得米一石四斗又每秋預給來年一季米銀餘仍支
折色自行買食查辰州偏苗疆山多田少米價素昂兵丁歲支米
一石四斗及預給一季米銀僅供半年口糧其餘額支折色銀每
斗六分一月之銀不敷半月之米請借朋扣銀一千五百兩差員
往常德買運存俟次年本色支完後按名搭放照原買價於餉銀
內扣還仍將此銀永遠存留按年買運源源接濟得 旨如所議

行時在籍御史孫紹基指稱與臬司沈作朋同官撞騙婪贓蘇昌
奏參抵罪並請 敕部嚴定回籍之員與督撫有司彼此交結處
分部議均定爲降三級調用二十六年四月疏言湖北徵收漕耗
除支給旗丁食米餘俱照時價易銀撥充咸甯等縣不敷水腳及
養廉公用查各官養廉見有額定耗羨稅銀五十萬有盈無縮其
不敷水腳亦有各屬所贖水腳銀六千餘兩撥給不須此項耗米
變價湖北通省額穀僅五十二萬餘石續又增買賑穀四十萬石
較他省爲少且界連江浙每多撥運協濟若將此項耗米存貯各
州縣附入常平額穀內則通省歲可增二萬七千石倉貯漸裕
詔如所請是月蘇昌密奏巡撫周琬情性乖張奏事多倒提年月

揜飾已過 上調蘇昌爲兩廣總督 命新任湖廣總督愛必達
秉公體察愛必達尋奏琬遇事偏執有意與蘇昌掣肘並匿災徇
庇劣員 詔革職赴巴里坤效力二十七年疏言潮州溪河經海
陽揭陽普甯三縣爲閩粵衝衢奸匪剽掠爲害請於海陽縣屬之
鰲門山揭陽縣屬之方坑楓口竹橋各設一汛兵八名以四名防
汛四名配船查緝並撥原防普甯縣外委一員移駐適中之楓口
汛往來督巡下部議行二十八年七月疏參碣石鎮總兵王陳榮
貪黷敗檢得 旨革職論罪如律十月加太子太保二十九年正
月疏言廣東社倉穀前經督臣李侍堯等酌議額貯在五千金以
上者所餘息穀照廣西例變價解貯備賑不及五千金者餘息併入

額穀內部議准行臣查廣東社穀捐自民間與廣西出自常平餘
息者不同且廣東產米不敷民食社穀自宜多貯以補常平不足
若因額貯過多卽將息穀變價遇歲歉再買給賑是糶於穀賤之
時而糶於穀貴之日一石原價不能得五六斗見糧且赴司領銀
往市易穀跋涉實多未便請嗣後息穀不拘額數統存州縣備賑
免其變價解繳庶積穀日見充盈疏入 詔如所請六月調閩浙
總督先是蘇昌以廣東鹽運使王槩列計典卓薦而槩於督糧道
任內浮收倉穀虧帑婪贓至是爲廣東巡撫明山所劾御史羅暹
春因劾蘇昌在粵年久不能及早舉發非年老糊涂卽有意瞻徇
况近在同城豈真一無見聞不劾反舉不公不明豈復堪節制海

疆 諭曰此奏是失察之咎蘇昌實不能辭至節制海疆乃出自
朕簡用非御史所當言羅暹春著飭行蘇昌明白回奏八月 諭
曰前御史羅暹春參劾蘇昌保舉運使王槩一摺在蘇昌於屬員
虧帑既漫無覺察又登之卓薦自有應得之咎言官據實指參乃
職所應爾是以批發諭旨初不以爲非是特其摺內有若非年老
糊塗卽屬有意瞻徇措詞忿激幾於唾罵其意若有必欲甘心於
蘇昌者蹤跡殊爲可怪昨閱刑部審擬廣東參革知縣劉紹汜一
摺該犯既係與羅暹春江西同鄉而蘇昌又卽參處該犯之總督
其爲藉詞潛行報復實啟黨援朋比之風不可不悉心體究創懲
以防流弊因諭刑部堂官悉心查訊今據奏到羅暹春與劉紹汜

雖無瞻徇實跡然該御史具摺參劾不卽於蘇昌失察原案發鈔之時又不於劉紹汜審擬已經定案之後該御史亦自稱形跡之間百喙莫辨等語此等以鄉情各酬私怨其事本無實證豈對簿駁詰遽有輸情吐露然亦不致因此卽革職審問也封疆大吏果有罔上行私確據臺垣自應據實糾彈顧立言亦自有體中外大臣皆經朕簡用苟其事不干大戾卽朕亦不遽加以斥罵御史雖欲自著風力亦豈得以年老大臣盡斥之爲糊塗且前如來保今如尹繼善傅森陳宏謀諸臣屢經敷歷其齒安得不老而生平奉職無愆豈遂一例槩以衰庸肆爲詆訕可乎明季科道惡習立幟分門借敢言之號行傾險之謀假公濟私無所不至爲害甚大我

朝百餘年來整綱飭紀朝政肅清斷不容有營私搏擊之人復得稍萌故智但遏邪防弊持之不可不堅今羅暹春之奏其爲劉紹汜而發本非有證佐可質而任意詬毀已情見乎詞且不先不後之閒自供亦無容置喙此而陽爲不知於人心政事所關非細羅暹春著交部嚴加議處是月蘇昌覆奏自請嚴議並下部議得旨蘇昌降五級從寬畱任羅暹春從寬免革職加恩以主事用三十年 上南巡 御製詩賜之曰楚粵會軍績浙閩茲撫封外中久敷歷聲望益春容早是心如水應知壽比松自當隨蹕輦奕葉本從龍三十一年臺灣淡水廳屬熾亮莊民爲生番焚殺五十餘人同知李浚原詳報不實蘇昌奏參革職檄按察使余文儀往會

臺灣鎮派兵嚴緝並條奏安戢事宜五款一偏近番界之零星住戶悉遷附大莊一民莊酌撥弁兵移駐捍衛一近山各莊建望樓嚴守望一禁墾界外荒埔免越界滋衅一清查熟番產業民人不得侵占得旨如所議行三十三年來京 陛見 命在紫禁城內騎馬尋卒 賜祭葬如例諡恪勤子富綱見任雲貴總督

右 國史館本傳

蘇昌督粵時其屬縣有巨室橫斃人母反誣其子毆死者其案久具旬決本已下昌疑其冤復親鞫之得其實乃上疏自劾 純皇帝獎諭之因將縣令抵法亦當時督撫之罕能者秉節鉞者宜效法焉

右錄宗室昭棟撰

郭一裕

郭一裕湖北天門人寄籍漢陽康熙五十九年由監生捐納知縣
雍正二年選江南清河縣知縣旋丁母憂五年服闋選山西平陸
縣知縣十月調安邑縣十一月升平定直隸州知州乾隆二年遷
太原府知府尋升河東道八年擢河東鹽運使十五年調兩淮鹽
運使十六年升江蘇布政使十八年京口減撥運京船隻 命一
裕將如何變價解京足敷成造之處詳細妥辦尋疏稱京口戰船
九十二隻議裁二十四隻請於艍犁船內派減八隻沙船內派減
十四隻唬船內派減二隻但戰船不適於民用價值無幾請將見
減之船撥抵京口各營輪造船艍犁船八隻蘇狼提漕京口各標

內應造沙唬船十六隻扣出價值解至直隸歸款 上嘉之十九年四月 命署山東巡撫八月奏東省節年民借倉穀請兼收雜糧俟明春先行出糶秋後易穀還倉得 旨允行九月疏稱東平所與東平州駐劄同城東平州既改隸泰安府而東平所仍屬兗州府體制未協應改歸泰安府管轄又蘭山縣之元宵屯坐落泗水縣境亦應改隸泗水縣管轄 從之十一月奏前任登州鎮總兵顧春以登州之廟島孤懸海中洋船往來悉於此住泊且地處扼要酌議添建營房使弁兵攜眷同居以資巡防臣適因閱看營伍赴沿海一帶詳加履勘廟島距登州水程五十里海船過此設遇風濤可以停泊若值風浪恬靜則揚帆徑過緣該地非人煙稠

集之區亦非馬頭貿易之地且各省商船出口既給有印票進口又須查驗稽察已爲嚴密似不必於避風之廟島建造官廳派撥官兵又多一層盤詰致滋擾累部議如所請二十年二月以張秋鎮分隸陽穀壽張東阿三縣商賈輻輳去縣稍遠地方官耳目難周請將兗州府管糧通判遷移張秋緝拏匪類稽查保甲除命盜等案及情關重大者解縣審理餘俱就近聽斷下部議行四月赴閩官兵過境一裕同布政使阿爾泰先至交界處所接應卽隨第一起官兵同至前途查看橋梁道路奏入 諭曰此次赴閩官兵原係尋常駐防非征調可比何必另爲修治橋路況東省德州一帶乃南北行旅大道豈因過此數百兵丁一切橋梁卽須修治看

來該撫所奏不過沿外省地方官陋習侈口鋪張以見其盡心籌畫及至辦理之時究屬有名無實此豈實心任事之道郭一裕著傳旨申飭六月調署雲南巡撫十月疏稱滇省夷多漢少蠻獠性愚而直漢人狡黠者每欺之見飭吏訪查盡法痛處至屬員表率惟知府最重容細心體察分別奏聞奉諭所見可謂得要領矣當實力妥爲之二十一年二月實授雲南巡撫六月偕署總督愛必達奏緬王長子因貴家讎殺窮蹙無歸帶領頭目人等至木邦所屬之蠻弄寨居住其地與滇省鎮康孟定耿馬地界毗連見飭各土司嚴加防範毋使竄入內地報聞二十二年六月奏參總督恆文令屬員買金短發金價巡閱營伍沿途縱容家人收受

屬員門禮等款 命刑部尙書劉統勳會同貴州巡撫定長審訊
得實奏入禱恆文職 諭曰郭一裕奏參恆文買金等事屬實但
閱供詞內稱購金情節實緣欲購備方物進貢商之郭一裕據云
滇省惟金較貴重我擬製金手鑪四箇進貢因令標員明柱向巡
撫衙門領取鑪樣購金製備等語臣工貢獻前會屢經降旨槩行
禁止卽督撫所貢方物不過茗柑食品等物以備賞賜或遇國家
大慶閒有進書畫玩器慶祝者酌畱一二亦以通上下之情而已
從未有以金器進貢者使恆文果有金器進到亦必申飭發回況
內府何所不有豈藉此斐斐金器爲耶而乃藉詞勒派屬員短價
冀圖餘潤以致誼傳闔省殊玷官箴然既有以進貢爲口實者嗣

後各省督撫除食品外槩不得絲毫貢獻違者以違制論至恆文歷任封疆豈尙惜於是理其在公正大臣一聞郭一裕進貢金鑪之語卽應據實奏參乃不惟不奏更尤而效之反被所欺是何愚之甚耶但郭一裕旣以進貢金器懇懇總督隨以購金奏參是復何心此雖恆文一面之詞亦不得不根究明悉著劉統勳定長將此情節逐一秉公研訊七月諭曰恆文身爲總督乃藉貢獻爲名縱其慾壑見據查出贓私累累應俟各案審明按律治罪至郭一裕先以貢金懇懇恆文並呈示式樣後見闔省謫傳乃先發制人冀立身於不敗迹其所供行險取巧情狀一一畢露伊本屬小器前於山東巡撫任內陛見時曾面奏臣家計本足自給且久歷

外任願進銀一萬兩爲工程用朕聽之駭然深斥其非因一時未
得其人未卽更易今觀其先購金置鑄備進其病根深錮是以隨
處發露耳且其購金亦委之司道卽云照數發價而以司道大員
供督撫私役闡省趨風成何政體國家設官分職之義固如是乎
郭一裕深負封疆之寄著解任來京候旨外人無知者或謂恆文
係滿洲郭一裕以漢人奏參滿洲是以兩敗俱傷此則鄙謬大不
知朕心朕自登極以來滿漢從無歧視此案審定時必辦理至公
至當允愜眾心況從前 皇祖時張伯行糾劾噶禮經大臣審訊
誣坐張伯行 皇祖察知其實重治噶禮之罪而張伯行任用如
故此家法也但郭一裕爲人非張伯行比耳九月 上以恆文令

屬員買金短發金價及巡查營伍縱容家人勒索門禮等款俱屬
確實 賜恆文自盡 諭曰郭一裕人本庸鄙到任後惟以聲色
貨利殖產營運爲事深忝封疆之任但其在官尙不至如恆文之
狼籍同一購金而發價並未短扣郭一裕著革職從寬發往軍臺
效力以爲大吏鄙瑣者戒尋呈請贖罪經部議駁十一月 諭曰
恆文之罪實由郭一裕舉發尙屬彼善於此郭一裕前在部呈請
贖罪未准然恐將來各省督撫或有簞簞不飭而同官中以事相
干涉懼於已有礙轉不據實入告將無由舉發其何以明國憲而
儆官邪耶郭一裕著加恩准其納贖二十六年 賞三品職銜二
十七年正月授河南按察使閏五月巡撫胡寶瑯奏稱一裕精神

耗竭辦事遲鈍問以刑名要件亦多不能記憶 命以原品休致
三十三年卒子德溥貴州正安州吏目德瀄江西鉛山縣胡坊巡
檢

右 國史館本傳

國朝文獻通考卷之四十八

三

宜思恭

公自牧茶陵與敝邑切近侯旬之蔭覃及湘南嗣兩爲公屬吏受知最深及公被誣去位 天子命予攝其事余爲料檢其遺牒稽覈其治迹益歎公之天資醇厚被服造次必於儒者簡易近人而人自忌之非公之過也天下枉者惡直邪者醜正從古而然而陰鷲險狠者多中人於不意公之遭遇非人固然其無足怪而予又承公餘燄未息之後故其患難略同而其知公也乃益深戊戌之夏公邀 聖朝賜環之典昇公豫藩卽晉公寧撫前此惹苴之謗不辨白白無何出山未久德星遽實人於是思我 皇上嚮用之殷所以保全之至而惜公之未究厥用也今將歸窆於東壩之原

其嗣君廷棟來乞予銘以予能言公之行予是以不獲以固陋辭
謹按公諱思恭字允肅別自號省庵襄平人其先公以佐命勳撫
軍八閩世襲一等阿思哈尼哈番公爲任子雅嗜讀書平居手不
釋卷初以蔭授楚南之茶陵州下車勤恤民隱課農桑禁私派嚴
保甲立義學教養並行至今茶民德之以秩滿遷工部虞衡員外
郎出爲邢襄太守雖兼轄九邑而撫字常如一體地有河患三日
漳曰子牙曰安定 當宁憂之每遣大臣經理其役然營度贊畫
必與公俱功以克奏其自爲疏鑿者則本部牛尾一河灌溉之所
永利者也時安溪相國李公巡撫畿南屢疏薦之是以 宸衷簡
在超擢直隸守道旋陟江蘇藩司兩任皆錢穀筦鑰羣僚弁冕公

悉心釐剔裕國富民不減劉士安之風雖惇大和平而正己直行
不媚上官氣節矯然爲方伯之時予承乏金陵再守吳郡公不以
予爲不才引與同事若芝蘭之臭味無有差池蓋其性情有相合
者康熙四十六七兩年江南水旱頻仍迅詳入 告邀 恩蠲賑
公則躬督屬員實心實惠普暨窮簷所謂來旬來宣公可無愧矣
然而民愛之益篤人忌之益深適兩江大吏至嫉公耿介又以要
求不遂以那帑奏劾欽差部院大臣往按其事獄成幾至不測矣
賴 聖明洞鑒特貰其罪放歸田里丁酉之秋 天子思念舊勞
復加顧問公奏對稱 旨廷臣又交薦公居官廉潔愈見前參之
誣乃復畀公以維藩之任往尹天中公感激 殊恩益自刻勵豫

國朝通志卷之二十一
省重耗累民下車首爲禁革瀕河州縣秋水泛溢勘不成災公自捐橐賑之新設駐防官兵一切營造公與楊大中丞竭力鳩工不以擾民其頒布條教有但知有君上不知有情面但知有百姓不知有官吏等語斯亦可見其爲政之體要也已莅任半載百度具舉 天子知公可大用遂 予節鉞巡撫廣西廣西地瘠民貧內雜猺獞外控土司號爲難治公至懷柔綏輯威惠著聞 上諭十六條教化之先資也公爲之逐條講解摘引律例演繹成書飭有司不時宣講剴切詳明由之感悟遷改者甚眾又設華掌書院誘進秀良其畱意教化類如此其陳奏土屬事宜皆關安攘要領故嘉謨入告而 上輒報可治粵載餘吏畏民懷風行草偃不事鉤

距人自不欺四境肅然枹鼓稀鳴大都以德化民正柳仲郢所謂
郡邑之治惠養爲本者也公爲人廉平寬簡不立崖岸終身無疾
言遽色而綜理庶務詳慎周密 皇上兩次南巡一切供億竭誠
祇候 天顏喜悅 錫賚有加又 御書箴白堂以 賜公書萱日
松年以 賜公之母公之得君如此其至故奪情於江藩起用於
廢吏非爲其有民功而然與然而公之得君也不以爲喜其失歡
於上司也不以爲戚前呵後擁也不以爲誼門羅徑苔也不以爲
寂脩然泰然寵辱不驚其殆庶幾乎古之學道君子矣公生於順
治十五年九月初十日丑時卒於康熙五十九年六月二十四日
寅時得年六十有三元配夫人趙氏繼室夫人張氏子四人長廷

棟候選同知次廷樞候選知州次廷桂次廷栻其才具皆能繼公
之志世其家者乃爲之銘銘曰

魯有三黜楚有三已喜愠不形爲道之以鳳凰爲聖王之瑞而鴟
梟惡其不類已然射工沙蜮有時滅跡而德輝反因之以蔚起公
其安斯吉兆以其神靈而宜爾孫子

右墓誌銘陳鵬年撰

邵基

邵基浙江鄞縣人康熙六十年進士改庶吉士雍正三年授編修六年二月改福建道監察御史十月巡視中城八年掌河南道事九年十月遷戶科給事中尋命在上書房行走十二月擢鴻臚寺少卿十年五月遷光祿寺少卿閏五月遷通政司右參議六月充江西鄉試正考官尋轉左參議十月奉旨江西主考聲名好下部議敘加一級十一月遷右通政十二月擢國子監祭酒仍兼右通政十一年充經筵講官遷都察院左僉都御史兼國子監祭酒十二年遷右副都御史尋擢吏部右侍郎十三年正月充皇清文穎館副總裁七月充江南鄉試正考官十月疏言上司以教誨

屬員爲先不宜存心苛刻屬員以稟承上司爲正不可立意乖張
乃見有強梗屬員多懷詐僞輒欲先發制人往往上司參本未到
而揭帖已至該衙門據揭陳奏彼此質審虛誣者不過按本律治
罪而上司以無端受累請嗣後上司有恃勢抑勒屬員受屈難伸
者仍許直揭部科其自知難免糾參而巧圖反噬者於本罪外加
誣揭之罪從重科斷下部議行尋轉吏部左侍郎兼翰林院掌院
學士乾隆元年充會試副考官八月充順天鄉試副考官九月充
博學鴻詞閣卷官十月授江蘇巡撫十二月奉 命會勘毛城鋪
引河事宜二年二月疏言江蘇各屬濱江近河海湖交錯全資水
利濟民向有官挑民挑之分如運道官河及湖海疏濬要道自當

發帑官修其支河汊港灌田蓄水之區向皆民力疏濬者亦宜仍循舊例乃查從前節費皆派民濬近奉禁止悉請官帑似非執中無弊均難永著章程況沿海河道潮汐往來清進濁出淤沙易積民挑則隨淤隨濬可以不時興工若一槩官挑則慮保固賠修必致遲延壅塞除將江都甘泉丹徒丹陽運河動支公銀挑濬外其凡關糧艘往來及江河湖海專資通洩之處請卽於河庫藩庫匣庫項下查照往例估修至於支河汊港雖通舟楫原爲灌溉田疇而設仍聽地方官於農隙時順從民願俾得及時疏濬修築圩岸其運鹽河亦宜聽其疏濬庶水利永興公私兩益部議從之四月上諭江蘇巡撫邵基在上書房行走數年資性聰明頗曉世

務朕深知其爲人料彼亦必知朕之用人理政自當小心奉公乃自到任以來題補官員不能無私如臬司戴永椿知府王喬林石杰皆其同鄉道員李梅賓盧見會皆其同年今又將革職通判王延熙請署通州知州張同請署淮安府知府王延熙又伊之同鄉而張同卽大學士張廷王之姪也督撫薦舉人才乃封疆第一要務卽循例保題尙當稍避嫌疑況越格題升題補而可任意行之乎觀邵基意中竟以朕之待彼深信不疑而爲此舉動不知檢束是朕知邵基而邵基不知朕矣可傳旨嚴行申飭是月疏言淮揚徐海通五屬額設孤貧原編有銀無米江蘇松常鎮五屬原編有銀有米歲支數目迥異應請均給有餘者以充公餉兵糧不足者

於地丁內撥折再原編恤米隨漕起徵必待冬季方有本款支放而春夏秋三季向將倉穀借給冬徵歸補州縣視爲可緩不無懸宕請將本年恤米竟於常平倉項下開銷而本年額徵者畱待次年支放庶無告窮民皆得及時養贍下部議行先是前撫臣高其倬以州縣新舊交代相沿蒙混推諉請定章程部覆令確查定例分晰妥議至是基臚款陳奏一存櫃銀封限三日內前官委員監視拆收詳報其倉穀錢糧限一月先行盤兌至續交銀米等項仍許後任接收統於正限內彙報除應存外凡應解者接任官代解一應交銀如有贏餘據實報出或花戶完納偶錯查明歸正至俸工養廉等項前官未及支銷者確覈給還不得槩作贏餘混報一

承追錢糧虧空侵那賊罪贖銀代賠分賠等項先將存庫銀錢存倉租息米穀收清次查交存官物有無抵換盜賣倉穀有無霉變短少遵照定限冊報一民欠錢糧前官捏欠經承無有不知經承捏欠花戶豈可擔認應該未完總數令經承確查如有侵蝕限一月內首認著追無則取結存案一採買續交米石以報明運到之日起勒限五日盤收儻未足數又無存價則係虧空覈實參追至倉穀五萬石展限一月二萬五千石展限半月仍照舊例遵行一出借倉項如前官暨各役私借捏冒剋扣不實等弊指名詳參一倉穀果有泥沙攙雜止須搗揚潔淨監盤官三面驗看毋得勒交一存櫃存庫號箱及存倉廢口各冊新官到任前官將簡明總冊

卽日移交其檔簿串根冊籍以及詞訟文冊限半月移交新官務
將冊卷追比齊全儻諉前任移交未全遲延坐誤卽將新任職名
請參一城垣新修及原係保固者應交代結報其修整後儻有坍
塌應勒令修補其或坍塌已多自行捐修者如工未竣將所修丈
尺造入交盤接任續修其工程浩大者見有通案委勘議修將坍
塌修理丈尺移交毋庸出具保固印結一交代之時委員推諉不
到以致遲延或有通同徇隱徇袒苛累等情指名揭參一新舊交
代全在知府秉公督催儻輾轉苛求不能依限交代許州縣官據
實通詳祇參知府若別有徇私抑勒等弊從重參處一承辦修造
事務動用錢糧題咨報部續奉覈減駁追者俱應本案完結或未

經報部或已詳上司或前官並未申詳者應於交代限內清楚有
則補交歸款無則題參虧空疏入部議皆如所請又言江蘇各衛
屯田科徵田額雖與民田不同而徵耗銀並無互異蘇太等衛向
以耗羨抵養廉者已屬多寡不均自乾隆元年酌減耗銀後愈覺
不敷請將蘇州鎮江淮安大河揚州五衛事繁者仍照例歲給養
廉五百兩其太倉鎮海金山儀徵徐州五衛稍簡者歲給養廉四
百兩除收屯折耗羨外不敷之銀自乾隆元年爲始俱於司庫耗
羨動支下部議行八月卒於任遺疏入得 旨邵基簡任江蘇巡
撫正資料理昨聞患病特遣御醫馳驛前往調治冀其痊可今聞
溘逝深爲軫惻著該督等委員經紀其喪送回本籍應得卹典察

例具奏尋 賜祭葬如例三十年 欽賜基孫洪爲舉人

石 國史館本傳

同里吏部侍郎邵公與予家相隔勵一湖水其贈公兄弟與先君兄弟爲文字交予十四歲爲諸生猶及肩隨公未幾公貴丙辰南宮之役爲予座主然公仍以故人之禮待予初公嘗欲薦予入詞館尋爲今太傅相國福公所先而止後有讒予於太傅者公急以告予令釋言焉予卒不自白太傅亦未嘗信其讒而公之爲予則盡矣是年公卽出填撫江蘇未及期而卒公子鐸於大葬時屬予以挺道之文予以在憂中廢業請俟除服爲之而公子又卒其可悲也夫公以康熙辛丑進士改庶常授編修再改御史巡視京西

復入爲御史改給事中侍直 皇子書房副鴻臚遂參匭司改祭
酒侍經筵仍副匭司再遷副都御史侍直南書房爲少宰兼院長
累主文字之任公素小心謹畏雅不喜馳騫聲氣及其出入禁廷
尤凜凜以溫室之樹爲諱而世之趨公者累及門而被辭以是遭
眾怨卽有諒公者要不過以爲漢石建一流耳及其持節填撫諫
言三上毅然義形於色雖古之稱骨鯁者莫能加焉則甚矣知人
之難也公之將赴江蘇也所部方祲於是樂善好施之例出公力
爭之以爲天下方傳 皇上新政首罷捐例今之所請是開捐而
巧更其名也此例一開罷捐成虛論矣周官荒政十二未聞乞靈
於貲卽以振之也 上瞿然是之亟命停止而計臣深不以爲然

乃復行予竊歎以爲公自是失內援矣河督議開毛城鋪以洩水
淮揚士大夫官於京者公疏爭之不得臺省爭之則下吏九卿亦
有爭之者不得最後直督彭城李敏達公力爭之幾勝而復絀公
陸辭 詔與江督漕督共相視會議以聞江督等皆與河督議合
獨公以爲不可江左大吏遂莫與公諧者會劾蘇州守白嶸已下
吏河督反請釋而用之而公益不自得公又言蘇俗汰侈無度請
禁止伶人之宣淫者勿令流播 上國世皆迂而莫之是也公自
以累年侍直素得豫親臣之列實心報效而不知事之難徑行未
幾竟奉 嚴旨以所薦吏非同年則同鄉爲有阿私公之平昔以
不肖徇其故舊得罪於人天下莫不聞及旣爲大府屬城守令相

望不能揜其同年同鄉之善者亦勢也而乃坐是得咎公亦不敢辨也公素羸至是積勞乃得疾 天子終眷公馳令太醫診視并令公子南歸侍疾而公已不起遺奏至京 賜卹如制并 諭江左大吏助其喪公之在蘇日淺既爲同事者所牽制跋前疐後有戒心故其所設施不能十一昔人之論姚崇以爲不過積穀作米把纜放船之人嗚呼是不知任事之苦者也方公盛時妻不衣帛旁無姬侍客至魚菽蕭然多擬之三公布被之故習及 諭祭使者至門隘巷不足以容肩輿則步以入矮屋不足以容廣筵則畢事於簷溜之下人始信之公子既不永年瑩瑩一孫王夫人親抱持之夫人向予速前諾予不敢有溢詞亦不敢沒其實也公諱基

其字學陟世爲浙之甯波府鄞縣南社壇人生於康熙某年某月某日卒於乾隆某年某月某日曾祖某祖某父某三世皆以公貴贈如公官娶王氏封夫人子鐸子同年生翰林院檢討孫某葬於西山之某峯其銘曰

曾是魯男子目爲登徒三人一口市虎非誣我作斯文足以慰冥魂

右神道碑銘全祖望撰

吾邑邵學陟先生基爲康雍乾三朝近臣久以卿貳參匭司先後侍直兩書房出撫江蘇方貴盛時人多議其矯廉及卒諭祭使者至門巷隘則步以入屋矮則畢事於簷滴之下中外知交始歎

公貞操不可及公子檢討鐸早卒孫洪官至禮部侍郎克繩祖誥
清恐人知

右紀聞陳康祺撰

晏斯盛

晏斯盛江西新喻人康熙五十九年舉鄉試第一名六十年成進士改翰林院庶吉士雍正元年授檢討五年擢山西道監察御史巡視東城六年八月奏八旗巡役每以查拏僭越爲名借端肆橫臣乘馬入城並未令人導引祇因隨行一騎偶然驚突前行前鋒兵丁遽將臣拘至營房及該管大臣問明始行放回似此巡查不實臣不敢以事涉己身隱忍緘默 上嘉之治兵丁及該管官員等罪九月奏言各省州縣設立社倉原爲通濟豐歉之用嗣後貧民不遇荒歉借領倉穀者每石收息穀十升遇小歉不取其息以廣惠濟窮黎之意 從之九年提督貴州學政十年 命仍畱任

尋遷鴻臚寺少卿乾隆元年二月授安徽布政使七月奏請嗣後各省地方水旱災傷督撫一面題報一面遴委大員親至該處率屬酌量情形先發倉穀賑濟仍於四十五日限內題明加賑賑竣造冊題銷至應免錢糧數目於請賑日起再扣限兩月造報題達並令有漕督撫確勘或應分年帶徵或按分數蠲免請旨遵行再災荒減免錢糧卽將丁銀統入地糧銀內覈算蠲免其勘報成災田地都圖里甲花名俱飭州縣另造一冊存案俟次年麥熟另行設櫃啟徵仍於完票內分析填明並請次年麥熟後只令催徵舊欠其當年錢糧九月後再行催徵若被災較重之處有延至深冬方得雨雪及積水方退必待次年春夏始得播種秋禾者地方

官確查造冊詳報督撫題請緩至秋成催徵以紓民力至經徵各官於考成冊內扣除分數統於年限案內造報查覈得旨允行三年奏豁雍正十三年潛山縣屬水衝沙壓地畝三頃有奇應徵銀米三年疏稱安省地方被災廣貯倉貯不敷賑糶請將本省不被災州縣漕米截留備賑俱從之四年三月奏上司衙門書吏係承辦屬員申詳案件之人如有拜謁屬員不行舉報及上司不嚴行約束者分別議處上是之六月奏安省上年秋旱見在採買接濟但江北向多游食之人每遇歉歲輕去其鄉惟寓賑於工人必爭趨查江北鳳潁二府以睢水爲經廬江一府以巢湖爲緯他如六安州舊有隄堰滁泗等屬亦多溪壑槩行及時修濬請照

淮揚水利動帑興工 上從其議五年三月奏豁太湖縣虛報水田一十五頃有奇額賦尋丁父艱回籍七年四月擢山東巡撫先是東省有老瓜賊糾眾劫掠前撫臣朱定元奏請於大道通衢令汛兵徹夜遊巡斯盛以賊情狡獪大道巡守既嚴保無逞其故智移於僻路害人更或假爲僧道技流潛伏村落請於偏區僻壤查有墩汛者一體巡查如無墩汛之地應令各該州縣派委佐雜帶領民壯鄉保分地巡察又前撫臣於通省州縣內選委八員名曰分統分拏盜賊復委巡道三員以爲總統考覈情勤復委知府數員以爲兼統稽查捕役又遴選捕盜同知通判四散查拏斯盛奏府州縣官均有地方之責庶務紛繁在所部內詰奸禁暴職分當

爲不容稍諉若於所部外併責之實屬鞭長莫及請將所委州縣分統之任歸併委巡之同知通判將知府分統之任歸併統轄之員庶事體不致紛歧而府縣等官仍令專任巡緝如知有匪徒潛匿別境亦許差捕密拏若委巡官役生事擾民立即揭參至察緝而外尤莫重於保甲應專責州縣密查並知府督率務使比戶有稽逐保無隱匪徒一入卽行舉首一切宵小可期禁絕又奏邪教惑民最爲世道人心之害欲正人心必先息邪說而邪說之最易煽惑鄉愚者莫如册立教會佯修善事此倡彼和日傳日廣大爲風教之害若盡法深求則株連蔓延恐生事端請將册教授徒及爲首之犯嚴拏究擬其被誘入教者量予責懲如有自行出首者

照律免究仍令地方官不時查察勤加化誨 上均是之九月奏
萊州府屬被水歉收糧價日昂且地處海濱不通江廣若任商販
米出海必致民食維艱更恐將來匱乏自應暫時禁止 諭曰此
不過屬員爲一邑一郡之說汝等封疆大吏不可存遏糴之心也
若果無米可販彼百姓自不販運矣何待汝等之禁乎十月疏稱
兗州府屬被水災民今雖得賑僅資目前餬口必須先期採買麥
種俟播種時借給至兗沂等屬本境內見有被水災黎而時屆隆
冬江省饑民復紛紛來集不惟一邑倉糧有限且恐滋事應將被
水最重之魚臺滕縣各畱養二百名以次之金鄉濟甯嶧縣各畱
養三百名其餘州縣俱畱養五百名如畱養已足卽令該州縣給

以口糧移送鄰邑鄰邑數盈移送未盈之鄰邑統俟春融資送回籍 上嘉之 命實力辦理八年二月疏稱青州府屬新設滿營添兵二千餘名大小男婦不下萬餘口歲需米一萬七千六十石有奇原於府貯穀內按月支給扣價存庫秋收買還惟是青州僻處偏隅產米無多買補未便請於附近青州之有漕縣內改徵運京黑豆一項量撥一萬七千石仍徵粟米運往青州兵精青州爲產豆之鄉卽將青州穀價於本省買豆補數依限隨漕起運 上從之三月調湖北巡撫八月奏湖北見存穀數僅三十一萬五千餘石應乘秋成價平在本省民有餘糧之所分途購買得 旨所見甚是九年正月遷戶部侍郎仍留巡撫任奏楚省催徵錢糧每

鄉每里各有里書冊書盤踞鄉曲包攬侵收飛灑詭寄需索冊費等弊嗣後抗頑之戶臨限無完令該管官照例查比卽山區寫遠亦分佐貳就近徵比無使蠹役藉端弊柄 諭曰汝在湖廣年餘惟此事尙辦理得宜耳九月以奏報糧價遲緩 申飭之十二月偕總督鄂爾達奏湖北舊有待撥直隸米二十萬石今年直隸豐收無須接濟楚北年穀全登亦無需用之處惟浙江先後被水恐來歲青黃不接之際米價易騰請酌撥十萬石以備賑糶之需 上是之十年正月 諭曰京師錢價增長民用不便朕深爲廛念諭廷臣悉心計議上冬伊等議得數條試行京師數月以來錢價漸減民間稱便外省錢價昂貴比比皆然可將京師所議各款內

摘取數條寄外省如有鼓鑄地方之督撫密爲商酌斯盛奏銅鋪
四散開設銷燬自所不免應照京師例派佐雜武弁督兵役常川
查禁責十家互相稽察並令各鋪將出入數目逐日登記按月呈
報又向來州縣多將平糶錢存俟秋成買穀應令隨發隨收卽於
廠旁設局令商民持銀兌換報 聞尋又奏錢法關係民用甚重
謹就本省情形酌陳事宜一奸民私剪錢邊案破纍纍亟宜及時
嚴禁此外沙板錘邊及鉛鐵等錢均宜相機查禁一民間質當多
係零星不能禁其使錢惟價在三五兩以上者當卽本色取贖在
二兩以上者亦照本色交還一糶買糧食令漢口等鎮自二三
石以上四川湖南等省大小各船自成石以上用銀交易關汛嚴

查除日用盤費外不准攜帶多錢奏入下大學士等議行尋以母老請終養回籍十七年卒

右 國史館本傳

新喻晏先生諱斯盛字一齋進士官至巡撫著楚蒙山房易經解十六卷凡分學易初津二卷易翼宗六卷易翼說八卷學易初津爲全書之宗旨謂今所傳圖書乃大衍之數因大傳之言而圖之不取河洛奇偶之說所見最確又謂辭占不遺彖詞而不取卦變互體之說則盡廢漢易之古法未免主持稍過易翼宗以經文爲主而割十翼散附於句下意在以經解經頗傷破碎又每爻之首畫一全卦而開以一動爻亦自我作古易翼說全解十翼而先繫

辭次說卦次序卦次雜卦次彖傳次文言次象傳非古非今更不知所據何本然不廢象數而不爲方技術數之曲說不廢義理而不爲理氣心性之空談在近日說易之家猶可云篤實近理焉又註禹貢八卷

右學案唐鑑輯

匡章曰凡類有不希

表

盧焯

盧焯漢軍鑲黃旗人四世祖國志以軍功 賜二等輕車都尉投
世管佐領康熙六十年焯由監生援例選授直隸武邑縣知縣雍
正六年解餉入都 世宗憲皇帝特賜召對卽選安徽亳州直隸
州知州七年授山東東昌府知府九年擢督糧道尋調河南南汝
道十年授按察使十一年遷布政使十二年擢福建巡撫 賞戴
花翎十三年疏言福建鄉試向例臺灣另編字號額中一名今臺
屬五學人文日盛請將臺字號加中一名 從之十月奏臨河被
水州縣勘不成災 諭曰被水各屬雖不成災仍須加意賑恤毋
使小民失所此等賑恤事件務須一有水旱立即賑恤然後民得

實惠若待奏報後俟朕批諭然後奉行則無及矣朕之此諭亦所以戒爾等於將來也乾隆元年二月奏閩省同知通判額徵屯糧其地坐落各州縣兼有隔府隔州隔省者請將福州等處屯田查明坐落州縣有田歸民耕而仍列故軍老戶者卽令更正的名分歸州縣徵收下部議行又奏州縣養廉宜按年全支以資辦公上是之三月奏閩省寺田向係四分租給僧六分租歸官僧人應收之租官爲代徵僧人應納之糧向佃追比佃深受其累請將租穀徵糧全歸僧收僧納每畝徵銀二錢從之五月奏清丈建陽地畝諭曰汝奏總是虛詞若云查丈無累於民而且有益則民之願查丈吾從未之聞也若云查丈非爲加賦則官賠公費之用

何爲而有此舉卽云民待查丈豁除則民何以反畏查丈如水火
哉總之汝初爲加賦起見今又以豁除掩非一存觀望之心所謂
無一而可此案朕不必批如何辦理其與總督郝玉麟秉公同辦
可也十一月奏邵武縣之永安所屯田每畝徵米四斗三升五合
有奇霞浦縣之福甯衛屯田每畝徵米三斗三升有奇又每畝徵
修倉銀一分三釐糧額實爲過重請照中則屯田例每畝徵米二
斗其多徵之米並福甯衛應徵修倉銀兩槩予豁免二年四月奏
閩省山海之區溪流暴漲坍塌靡常產去糧存不免賠累今據閩
縣侯官等縣造報額缺田地共五百四十三頃四十畝有奇無徵
銀米從前或官爲墊完或按戶賠輸請自乾隆二年爲始均予豁

免閩九月奏閩省不知蠶績近加勸導並移撥浙江湖州蠶民十戶到閩教以育蠶繅絲之法著有成效所有來閩之各蠶戶請量給田畝養贍三年三月奏閩省城河潮沙易壅雍正十三年奏請開濬從未議修僅設犁船四隻日久朽壞請另造小船四隻每船水手二名每年修船一次其修造及工食等費俱於存公銀內開銷又奏閩清上杭武平三縣解省兵米請照福州之例折收銀兩給兵五月奏泉州府屬同安縣鋪遞廈門公文凡浙省閩省興化泉州二府由康方等鋪接遞曲折遲滯請照武職塘汛之例於下尾等處設立塘汛程途徑直近速七月奏閩省船廠分修金門左右營戰船向例於金門海塘鎮標各遊擊內選派一員監督其漳

廠分修水師提標五營南澳鎮標左營銅山營戰船卽派水師提標中營參將監督今水師提標中左二營戰船既經改歸廈門請將泉廠承修之船就近歸水師提標中營參將監督漳廠承修之船就近歸水師提標左營遊擊監督八月奏閩省納粟捐監事宜請就各府廳州縣大小酌定穀石分別捐貯惟臺灣一府素稱產穀之區倉貯充裕毋庸議捐所有臺灣生俊情願報捐者令取具本籍供結送司轉飭泉防廳收納其駐防旗人及在閩年久已經入籍者亦准一體捐納又奏遵旨查明田少丁多之平和永安清流三縣額徵丁銀共一萬一千四百八十兩有奇應照乾隆二年該省南平縣之例每田銀一兩勻徵二錢計減免銀七千兩有

奇俱如所請行九月調浙江巡撫兼管鹽政十二月奏浙江鹽法
道庫錢糧請照巡撫盤查藩庫之例責令該鹽政查盤如巡撫兼
管鹽政卽令查盤虧則題參足則出結報部如扶同隱匿發覺一
併議處四年正月奏仁和海甯二縣設有草塘歲搶銀兩今水勢
日南漲沙縣互塘在平陸無藉搶修應行停止又奏嘉興七縣錢
糧每畝一錢一分七釐至八分三釐不等漕米每畝自一斗三升
八合至一斗一合不等加以漕截耗羨並地蕩等銀賦重與湖屬
同今湖屬旣蒙酌減十分之二請將嘉屬一體酌減二月奏漕截
銀兩向例十月開徵限兩月全完未免期促請嗣後二月隨同
地丁銀徵收卽於秋徵後先儘漕截支給如停運折徵將實徵之

數解部三月以貯備鹽斤每當出易之時腳費甚重取償食戶商民並受其累奏請停止俱從之四月奏陳鹽務事宜一每場各發官秤以杜侵扣一禁止奸商射利昂價短秤一飭各州縣嚴拏大梟至肩挑小販槩從輕減一嚴查鹽捕私借巡查滋擾等弊一禁兵獲私鹽刑嚇取供捏報邀功一通飭場員催徵場課毋許任意刑比其滾單團差名色嚴行禁革亦不許竈戶怠煎誤課一西路場竈舍向係臨時添建趕煎掣後拆毀請令畱同正竈一體煎配一修葺各場周圍牆垣一查拏奸商不拘引課私運開買後通梟買私抵補一銷引定上中下三等賞罰得旨所奏各條皆汝分內應辦之事汝先有過刻之名茲到浙後看來事事有從寬沽

名之念夫過猶不及不及猶過莫若執兩用中之妙也汝其誌之
五月奏杭州紹興嘉興松江四所二十五場每場額設鹽大使一
員協辦一員今查該員祇有稽煎緝私督課之責一員足以料理
請將協辦之員裁撤又奏浙江海甯縣塘工向來潮水衝激藉草
塘盤頭挑溜今水勢南遷漲沙日遠請將普兒橋馬牧港戴家石
橋秧田廟賣魚橋小墳前鄭九皋門前白牆門廿里亭九座改築
石塘六月奏台州温州等處鹽場經領帑銀收買竈鹽支放解存
各款按年造冊題銷然未定盤查章程請自乾隆三年爲始每年
歲底截數責令文武各官迭爲盤查俱下部議行九月奏浙江海
塘爲七郡保障 皇上軫念民生建築魚鱗大石塘工向由海運

石料直達工所今漲沙一望無垠石船不能擁塘不能不熟籌挽
運之法勘得尖山迤東海鹽縣境內舊有河形可達海甯縣而海
甯縣之東西土備塘內外從前取土築塘已挖成河形可達仁和
之范家木橋等處若循故道一律深通不獨石料可運一應柴草
木植皆可轉運且可溉灌田疇鹽艘亦通行不滯十一月請於西
路三江曹娥橫浦青龍嵩玉等六場各添鹽場大使一員崇明並
設鹽大使專員俱如所請行五年奏請動銀十萬兩前赴滇省採
買銅斤運浙鼓鑄部議以所買銅斤與運京銅鉛有無阻礙應令
盧焯會同雲貴總督慶復布政使張允隨妥議具題到日再議
諭日浙省錢價昂貴必因錢文缺少民間需用孔急是以盧焯有

赴滇買銅之請事屬可行著慶復張允隨盧焯等一面奏聞俾得早資鼓鑄以利民用不必俟具題交議多稽時日也閏六月奏浙江長興蕭山二縣原額取進文童二十名見在人文加盛請照府學額例每縣取進二十五名九月奏新設浦東龍頭玉泉三場鹽大使請各照字樣給予印記至西路分設一場擬以黃灣命名三江分設一場擬以東江命名曹娥分設一場擬以金山命名新設崇明巡鹽一場擬以崇明巡鹽大使命名以上四員請一體給予印記其原未建署之黃灣金山二場請確估建造從之十一月諭曰盧焯自調任浙江以來其所設施未見有切要於地方之事一味沽名邀譽欲以取悅於人如舉報鄉賢名宦絡繹不絕他

省未有如此之多者伊前任閩省過於刻薄近日行事又多因循
前後迥異判若兩人至浙江海塘已漲沙數十里何況石塘且請
停草塘歲修卽係盧焯之奏今又會奏改建石塘則其心無定見
惟是揣摩又彰明較著矣著傳旨嚴行申飭六年三月左都御史
劉吳龍疏參盧焯營私受賄有准理嘉興府桐鄉縣汪姓分家一
案該府楊景震收受銀三萬兩轉送盧焯銀五萬兩經督臣德沛
檄委嘉湖道呂守會查訪該府劣蹟盧焯一聞消息懼事發于己
星夜出本將楊景震題參又參湖州府烏程縣革職道員費謙流
輕言誣姦一案幕客得銀五百兩聽其賄囑顛倒是非又運判員
缺嘉興縣知縣閻沛年親送盧焯銀二千兩卽爲題升凡委署州

縣俱有餽送以缺之大小爲數之多寡請 旨密查 上諭吳龍
曰朕以至誠待臣下不意大臣中竟有如此者亦朕之誠不能感
格眾人耳曷勝愧憤朕知卿必不附會此奏以枉入人罪亦必不
姑息養奸而違道干譽卿其勉之若有實據一面奏聞一面具本
嚴參六月 諭曰浙江巡撫盧焯著解任所有奏參情節著總督
德沛副都統旺扎爾逐一查審具奏其巡撫印務著德沛兼理七
月盧焯奏養濟院向無稽查亦無上司責成請飭州縣逐一嚴查
將額內外孤貧分造二冊出具印結由府加結轉送上司備查每
年遇盤查時令該管道府親攜原冊赴院點驗或年貌不符冒濫
給糧者該管官降一級調用道府不行查驗者罰俸一年該管官

縱役冒領吞蝕者革職道府不行查出者降一級調用儻道府徇情容隱者照徇庇例降三級調用又奏陳社倉捐穀獎勵之法請自三十石至一百五十石者題給八品頂帶千石以上者酌量議敘捐輸雜糧亦循例獎勵部議俱從之尋德沛等查審盧焯贓款得實諭軍機大臣等曰盧焯贓私纍纍卽汪姓一案焚贓已至五萬兩之多其餘受賄之處不一而足因查伊京中所有家資封貯備抵乃僅止萬金則其情性狡猾巧於隱藏可知可寄信德沛旺扎爾務將盧焯任所私藏逐細查勘毋令隱匿或寄頓他處亦必一一查明勿使遺漏八月德沛旺扎爾奏盧焯受賄營私一案狡飾支吾供詞閃爍請革職刑訊上從之十一月德沛等奏

盧焯案內原任山西布政使呂守曾畏罪自盡 諭曰此汝等辦理不妥之所致也德沛又奏會審盧焯案有百姓數百人誼言求釋盧巡撫推倒副都統衙門鼓亭柵門 諭曰此固刁民滋事亦汝等辦理不妥所致且朕早知汝等必有此激出事故也可早爲結案耳七年四月德沛等奏訊明盧焯楊景震俱依不枉法贓律擬絞監候秋後處決得 旨依議八年三月刑部具題已革浙江巡撫盧焯其不枉法贓銀於限內全完應照例減等發落 命發往軍臺效力十六年 聖駕南巡閱視海地 諭令回京二十年授鴻臚寺少卿尋 命署理西安巡撫二十一年十一月調署湖北巡撫以陳宏謀爲西安巡撫先是焯未奉調署 諭旨適有六

百里部文至西安銜列巡撫陳焯以事關要務卽拆閱乃命馱載歸化城米石由西安轉運金川以濟軍需之用焯以陝省有採買積貯米石可就近先撥歸化城雖屬產米之處關係晉省邊儲馱運到西安路旣遠而費又重遂一面委員解送一面奏明並請擅行之罪諭曰據盧焯奏接奉廷寄新任巡撫陳宏謀諭旨二道卽一面先行籌辦一面專差齎遞等語所辦甚合機宜封疆大臣本不當存彼此之見若以已經調任遂謂與己無涉或拘泥以爲非所當與皆非實心任事之道盧焯能知大體實屬可嘉至所奏糧餉旣就陝省見貯倉穀內動撥無庸歸化城等處運補旣省腳費且於晉省邊儲有益亦得緩急輕重之宜盧焯以京卿署

理撫篆至陝後未見有所作爲因軍需事重恐不勝任故改調湖北今以辦理此事觀之尙克副委任著加恩實授湖北巡撫二十二年六月 諭曰今日召對西安布政使劉藻據奏盧焯在西安巡撫任內遇有進貢方物祇量給薄值實皆派辦及調任湖北向借庫銀一千兩未曾應付等語盧焯乃獲罪廢斥之員朕念伊尙係舊人加恩錄用不意其不知悛改尙復如此深負朕恩著革職發往巴里坤效力贖罪二十六年 諭令回京三十二年卒

右 國史館本傳

盧大中丞旣歿之二年將卜兆於懷柔縣之西鄉其孤崧再拜奉狀泣請余言以志壙余素慚鼻鄙今老矣筆墨益荒焉能作銘惟

是公歷任所至多與余前後相繼或鄰邦接壤公之造福地方平
日心切企佩雖自知不文不宜默而無言也按狀公諱焯字光植
號淡亭籍本山東益都後隸奉天鎮黃旗公生而穎異落落具遠
志覽經史爲有用之學由直隸武邑令遷江南亳州知州擢山東
東昌府署登萊道再補糧道升河南按察使旋升藩司晉撫福建
特賜孔雀花翎紅絨結頂皆異數也調撫浙江緣事被逮效力
軍臺 召歸授鴻臚寺少卿擢署陝西巡撫調湖北巡撫再獲譴
出塞從軍巴里坤數載 恩予賜環其初令武邑時火耗尙未歸
公巧取者借名節規以自豐公輕徭薄賦杜絕苞苴嘗曰取於民
以媚人吾不爲也舊有均徭錢按田派斂以供差務及有事乃按

里派夫均徭有定而差無定歷任相沿公曰無定者官之遇有限者民之膏取其資又役其力如吾民何卽爲禁革邑有大莊頭把持公務欺陵小民公詳治渠魁隨事懲警民始知有官法邑爲賊藪響馬四出公廉得巢穴獲巨窩十數家獲盜四十餘人境賴以清亳州俗尙械鬪有白帽黨鐵帽黨車椽尖刀各黨名目回民尤甚有號大王者兇很異常相習成風公來牧是州嚴法禁緝痛加懲治所稱大王者幾斃杖下眾皆斂跡所獲積匪懲一警百城野肅清亳多私鑄公察其向習私鑄者十七家曉以法律毀其器具互保爲農及數年後經九門提督番役緝獲究追歷任有司皆已獲譴各犯堅供公任內因禁嚴不能私鑄後於某年乃又私鑄公

獨免議山東有營員出外訪事之舉一時訪犯充斥囹圄事無實據公守東昌逐一審訊分別究結監獄爲之一清運河水漲田多被淹一線岸隄正在危險公查下流可以容水開將潰之官隄洩異漲之河流以救民田其已淹者嗷嗷待哺爭先逃徙公請動官帑給賑撫綏上官以違例難之公毅然力任數日後河水乃落民免逃竄荷蒙 聖恩差大臣賑恤鄰邑徧地飢民呼號惟公治境安靜無事復築護城長隄以資捍衛至今隄尚鞏固也公陳臬河南精於鞫獄不事刑求平反冤獄三十餘案豫境南河遷徙無定河灘寬廣兩岸居民爭占爲業歲有告爭屢成大獄公爲履勘定斷漲則升科灘則豁除從前積案一清永無爭執民咸安業其撫

閩也建甯一府賦額有缺於四境民田按畝攤納民心惶惶公甫
入境先請勘丈隨查知明代賦額滄桑之變歲久難稽勘丈之舉
擾累實甚備陳實情荷蒙 聖主殊恩免其勘丈仍照原額輸納
濱海產鹽之地久荷 聖恩準令近場之貧難老幼零星賣鹽資
生有夥販拒捕逃匿山中不敢出者方議發兵剿捕公知其畏罪
而逃遣官開諭緝捕到案得實首犯伏法結案閩省多樹旗惡習
歷照逆案捕究公曰未然而先樹旗以揚名半係藉端仇陷廉而
究之其情立破自後樹旗之惡風漸息大小姓之糾結互相仇陷
聚眾械鬪分別懲究民心平服 上賜扁曰文瀾學海調撫浙江
尖山壩工爲浙省屏障日久就傾度築未成公請復築工料悉照

民價兵夫匠役給以飯食不時犒賞大工獲成迄今賴之 御製
碑文有曰尖山壩工上廬 先帝焦勞今封疆大吏不日告成用
慰朕心碑在尖山觀音廟中減浮糧免米稅減鹽價以惠民廣學
額以勸士除世船之積弊革官價買物之陋規浙人實受其惠適
有費李氏之案牽連被逮入京浙人垂涕護送不能阻止幾成大
獄自是謫赴塞外數載恭逢 皇上南巡江浙閱視海塘知公於
塘工甚著勞績擢授鴻臚少卿復 念公久歷外任練達署任陝
撫值準噶爾之役兵過西安籌糧運雇夫馬於公不誤於民無累
調署湖北余繼其後尙未接任奉文將山西歸化城米由西安轉
運軍前公計道遠多費請以陝西採買積貯之米就近先行撥運

奉 旨嘉獎謂深得大臣敬事之道隨實授湖北巡撫及余抵陝任查所籌辦皆及時要務任內甄別屬員極其公當余皆接續而推行之公抵湖北修隄堦之要政破私徵之積弊惜爲時未久至今楚人猶有餘思焉公先後所歷諸任閱數十年竭力宣猷裨益地方政績丕著而愛惜士類優獎人才所在皆然於武邑則有觀津錄亳州則有亭牧政略山東則有典守山東錄河南則有秉臬中州錄福建浙江則有撫閩略撫浙略皆已備載而就余所稔知其有關於 國體民瘼多官場所視爲不必辦者於此見公有膽有識婆心實力上不肯負 君父下不肯負士民中不肯負平昔素志固終始而如一也至公家系始末詳家乘及行述中茲不具

述云公生於康熙癸酉年十月十三日未時歿於乾隆丁亥年閏
七月十三日寅時享年七十有五以今戊子年十月歸窆於三台
山以德配周夫人副室崔宜人耐周夫人故名家子婉婉柔嘉逮
事姑邢太夫人曲得其歡心康熙甲戌年三月十八日卯時生乾
隆甲子年六月初一日辰時卒享年五十有一 誥封夫人崔宜
人亦和順有婦德無嫡庶如己出康熙辛巳年十一月初三日戌
時生乾隆甲戌年八月初二日亥時卒享年五十有四以子崧貴 誥
贈宜人俱先公卒子五人長山廕生任工部營繕司主事周夫人
出先卒次崧副貢生歷任江西蓮花廳同知攝袁州府事次嶠候
補縣尉並崔宜人出次嶠次岫俱幼並副室譚孺人出女子六孫

男九長承重銘仁河南睢州吏目次銘義江南奉賢縣尉次銘禮
分發縣尉次銘智業儒並山出次銘寬幼嶠出次銘剛銘健俱幼
崧出次銘裕嶠出曾孫五銘曰

書美釐東詩稱補六 賦降星精穆穆沕沕約以自衡二簋用損虛
中不盈屢躓而穩內行克修室家之壺曰同窳空幽光合瞬元氣
下蟠鬱茲隱矣懿此靈邱頌棊知本

右墓誌銘陳宏謀撰

按盧公九孫原文缺一人名

乾隆四年兵部右侍郎盧公巡撫浙江枚乞假歸娶謁公於南衙
一見如舊相識矜寵甚盛次年枚官京師聞公被劾 天子命內
大臣旺扎爾往按其事獄兩月不具浙之氓呼呶罷市纂公於頌

築所是至吳山神廟中供備糗粢盛者如牆而進所過處婦女呼
冤跼足數萬人赴制府軍門擊鼓保爾制府德公據實奏聞天
子知公無罪而又不欲長黔首之刁風也遣戍軍臺一時朝野駭
公能得民枚亦疑公果何術以致之後四十餘年公子崧以貞石
永建來索銘幽之文讀其狀方知公自縣令至任封疆忠勤惠愛
終始一貫以故誠能動物應如胥蠻初非違道干譽之所能襲取
於須臾宜備書之扞部民之思爲大臣之式謹按公諱焯字光植
號漢亭奉天鑲黃旗人先代從龍世襲恩蔭祖崇興官江西布政
使父承倫官大理寺少卿公生而岐嶷粲粲有才以功業自期初
知武邑縣縣有均徭錢供差費而遇差仍按里派夫公革除之有

家莊頭倚勢陵民公大創之有巨盜四十餘家公勦絕之遷知
亳州州俗好鬪有白帽鐵帽諸黨公禽其魁餘黨解散擢知東昌
府署登萊青道實授河南南汝道遷按察布政兩使巡撫福建
今上元年調浙江落職再起授鴻臚寺少卿巡撫陝西再落職
命往巴里坤哈密協理軍需事竣還家年七十五薨公伉爽而和
與眾語姝姝然不衣自暖然義之所在赴若江河之決武邑災公
開倉賑饑東昌災公放隄水入運河飭各屬開倉賑饑俱不待報
請便宜行事浙江海塘恃尖山爲保障壩工屢圯公親臨築成
上喜 御製碑文以 賜西陲用兵湖北奉部檄運歸化城米往軍
前公慮道遠費重奏請以陝西采買者就近先撥 上嘉之謂深

得大臣敬事之道當田文鏡總督河東時政尙苛嚴司道以上莫敢撓其鋒東昌一郡所訪至二十餘案囚纍纍獄不能容公到登時判遣囹圄爲空田心銜之卒亦無如何也公爲政大槩以膽決濟其仁心福建前任撫臣奏建甯田糧較明季少十之五六部議按畝均攤公奏請先丈量而後酌增 上許之丈無虛浮其事遂寢鹽販拒捕有登山者總督某欲用兵公止之而密遣官禽獲首犯分別杖懲卽時案結豫省黃河遷徙無常兩岸爭地訟牒債興公曉以漲則升科坍則豁免一言而訟息湖州費氏大族也有兄公某訟其弟妻李氏之姦公不忍以曖昧事污人名節爲平反之竟以此獲譴然有識者觀公之過知公之仁公揚休玉色軒軒霞

國朝三才集卷之二十一
三
舉長鬚飄然望而知爲公輔從武邑運餉入都年才強仕 世宗
召見卽 賜飯 賜豐貂墨刻香珠等物捧至殿外又喚入 命
開寫年庚具奏嗚呼公日後麾旄擁鉞垂三十年皆由此時 特
達之知然以縣令微員薦引無人而 簡在帝心一至於此雖公
之儀狀奏對必有異乎尋常者而卽此可想見 世宗之聖德如
天求賢若渴矣遭逢之盛至今聞者猶爲泣下所著有觀津錄牧
毫政略秉臬中州錄撫閩撫浙略數十卷配周氏以 覃恩誥封
夫人副室崔氏以子貴 誥封宜人皆以己丑年四月合葬於拱
極山之高原禮也子五人長山蔭工部主事次崧官衛輝太守次
嶠次嶠次岫女六人孫九人銘曰

屋漏在上知者在下 主恩易邀民口難借髦髦盧公氣如春夏弊
絕吏瞿樂興人化鏡磨愈皎衣涅不緇屢起屢蹟未竟其施人爲
公惜公獨迢然委運任化知我者天天眷良臣令終壽考樹蔭幽
宮鶴歸華表

右神道碑袁枚撰

國家封疆大臣自州縣起者親民深得民最甚其以封疆自任者
果爲國家樹久長之計究能以得民得 君越海邦也治海塘先治
海甯州尖山江東行海西上蹙於尖山勢不敵則海挾江逆入尖
山壩竇挑海水南下刷行龕赭山根南益灘北益漲海患永息顧
跨海築危隄三百餘丈天險極人力絕厥惟中丞盧公成之公撫

越越人愛戴有訐弟妻者公矜惜名節以微行誤訪平反之被劾
內大臣旺扎爾出按治獻兩月未具突越民呼喚罷市竟篡奪公
昇置吳山神廟供餽糗如牆求保留者數萬人走督轅擊鼓公訶
不散乃夜逃歸頌繫所 上聞知公無罪狀而懲越民非法戍公
軍臺八年 上早知公昔以武邑令 召見一日三見 命書年庚
奏御故邀大用後辛未年 聖駕南巡幸尖山徘徊觀海水飛揚
堅隄橫截空際親讀 御製碑文有曰尖山壩工上廔 先帝宵
旰焦勞封疆大吏不數月告成用慰朕心因慨然遐想念公勞績
召還京授鴻臚卿歷撫秦楚以功名令終按狀公姓盧氏諱焯
字光植一字漢亭籍本山東益都先世從龍隸奉天鎮黃旗世襲

子爵祖崇興江西按察使考承綸嘉興府知府妣王太夫人公少力學不屑章句隨父任通達政事以勳裔除武邑令遷亳州知州擢東昌府知府登萊青道山東糧道南汝光道遷河南按察使布政使巡撫福建浙江陝西湖北配周夫人葬拱極山高原子五人山蔭工部主事崧兩浙江南鹽法道次嶠次岫次岫女六人孫九人公治武邑火耗尙未歸公公歸之民曰今自矢矣焉能媚人取之徭賦並減邑大莊頭把持官民詳治以法覆盜窩十數家擒盜四十餘名槌斃一空散亳州白帽鐵帽黨斃其魁絕州境私鑄後九門提督嚴讞獨公免議公守東昌適田文鏡總督山東尙苛猛營官四出訪犯充罔罔各屬皆逢迎爲暴公訊無辜立釋田憾之

不能動搖郡大水爲疏通運河築護城長隄動帑賑恤 上遣大
臣閱視山東東郡獨安田愧服田飭開墾公獨抗爭陳臬河南平
反失出入三百餘案河流屢徙民輒占佃報灘構訟爲定南北岸
升坍漲報例闖賦多缺額建甯爲尤較明季少十五六每灘畝辦
賦吏胥緣爲奸公文定之州郡稟鹽梟樹旗督臣欲發兵公曰未
叛先樹旗仇陷也宜緝緝之果得罪人杭嘉湖甯紹有浮糧爲覈
裁他若廣學額免米稅禁官價絕船票法至百吏心周四民將自
陝赴楚籌準噶爾糧運奉文將山西歸化米由陝運軍公計道遠
費鉅輒以陝存貯米撥運仍採買歸款咸有大經濟設施不苟爲
且夕塗飾而長策奇功尤以尖山壩工爲第一公早受 上知歷

次 召見奏對稱 旨子崧前後引 見均有 溫旨獎公甲寅
撫閩 特賜花翎兩旬內 召見十八次時同大學士鄂公爾泰
張公廷玉直隸總督李公衛浙閩總督郝公玉麟朝暮入直侍宴
上喜顧諸公曰君臣一堂直如家人父子 賞賚駢蕃載公 圓
明園恭紀錄其得君如此自州縣至封疆到官出境吏民塞途婦
暨頌歎多私祀公者 上繇此益重公其得民如此而 上聖仁
神武於大臣功過絲毫不假貸事白輒原諒追惜眷弗衰公丁卯
撫楚適陝藩司亦調楚入 見奏公短發土貢值遂 敕效力巴
里坤旋調赴哈密辦糧餉辦蘭州軍需事竣調回京 上方嚮用
公公疾甚乾隆丁亥七月終於家春秋七十有五 上聞軫惜

賞還原官文集政績諸書及前後賜件公之感激涕零沒齒不忘以策其子孫也有以夫公有觀津錄牧毫政略秉臬中州錄撫閩略撫浙略及公子崧所製行狀崧觀察杭州請星垣綜覈據實爲公神道碑

右神道碑呂星垣撰

國朝耆獻類徵初編卷百七十目錄

疆臣二十二

王恕

孫國璽

李渭

彭人瑛

顧琮

張廷枚

諾岷

姜穎新

張若震

國朝耆獻類徵初編卷百七十

通奉大夫前署江西巡撫江西布政使司布政使湘陰李桓輯

疆臣二十二

王恕

王恕四川銅梁人康熙六十年進士改庶吉士雍正元年三月吏部以員外郎缺人奏請咨行翰林院揀選庶吉士引見補用恕與焉尋補吏部員外郎升郎中十月充貴州鄉試正考官二年充會試同考官尋授廣西道監察御史轉兵科給事中九年擢江南江安糧道乾隆元年升廣東按察使二年奏請崖州營參將守備等官照煙瘴文職例二年報滿更換升用從之四年升布政使

五年五月署福建巡撫 諭曰勉力務一實字勿徒粉飾外觀封疆大吏尤宜擴充識見不可自立無過之地遂謂可以保祿全身也十月奏稱臣任事數月於閩省官方民俗積儲兵防數大事並已講求得其大略凡屬員進謁者察言觀色其居心立品俱已略悉未經接見者復行文諮以地方利弊既可知通省之情形卽以驗各員之才識俟諮訪既周卽當詳加甄別庶舉劾得公勸懲自倍漳泉素稱刁悍仇劫成風雖屬強暴之囂陵亦由牧令之疲茶往往一事而懸案數年因之訟棍肆行吏胥舞法臣已嚴諭地方官勤爲聽斷力行整刷上游諸郡接壤江粵山郡棚民多容奸匪亦行查防範務使棚靜民安閩俗向來華靡自督臣德沛首以儉

樸化民漸見去華崇實臣更當協恭倡導助成化理闔省常平倉
穀乾隆四年歲底盤查共實存一百三十四萬餘石又新收捐監
穀十五萬石臣檄委道府切實盤查至海疆重地彈壓宜嚴近者
漁船之聯保關口之稽察頗爲嚴密報 聞六年二月奏言臺灣
各縣最稱難治欲求能勝臺灣之任者不得不於繁缺知縣內揀
選而繁劇之區其於徵收分數承追虧空各項處分在所不免嗣
後請調臺官員任內雖有經徵承追參展各案而其才猷練達人
地相宜准予題調疏入得 旨照此定例則不可隨本奏請則可
耳又奏稱上年閩省早稻豐收 特頒諭旨令地方大吏畱心籌
畫凡可積之於官藏之於民者多方經畫以實倉儲臣敬奉 恩

綸廣行宣布士庶紛紛具呈請輸社穀今報收各鄉社穀向俱借
儲寺廟民房未設倉屋出納不便臣酌於四鄉村鎮適中處分建
倉房工費卽於社穀內撥充俟將來續收補項至積之於官惟在
常平收糴臣查閩省常平及捐監穀見在其實存一百四十八萬
餘石採買尙可少緩報 聞先是崇安縣屬有荒田一千二百五
十一頃雖載賦役全書實無可墾之土雍正七年部行清查分別
限墾知縣不行查覆惟將原額內約舉三分之一捏報可墾田照
例限年墾復迨初限次限屆期俱仍捏報墾復並無段落土名冊
籍亦無墾戶姓名住址所有兩次徵銀二千二百二兩零加徵本
色米三百六十石俱係灑派音納至是恕以無田浮賦奏請豁免

又疏請豁除閩縣雍正七年加徵無著學租銀五百三十二兩零均如所請行四月奏請前任福建總督高其倬入祀賢良祠上以恕欲盡厚於前官爲己身將來援例邀恩張本嚴飭之五月偕浙閩總督德沛奏稱臺屬歉收米價驟長前據粵省督撫咨稱潮州府屬倉儲充盈可濟鄰省今移咨粵省檄飭潮屬存倉穀內就近撥運六萬石赴臺平糶如臺屬秋收照數買穀運粵備豐歉不齊卽將穀價解粵買補部議如所請七月奏稱閩省多屬山田層疊高下如同梯形以坵而論均屬零星彼此合算方成畝數嗣後民間開墾無論水田旱田總以零星曠土不及一畝與雖及一畝而係地角山頭不相毗連者免其升科其有經界聯絡者一畝以

上仍照例分別水旱年限升科 從之九月實授福建巡撫十月
奏閩省鄉試第一名舉人邱鵬飛以武生五經中式人心不服請
覆試得 旨邱鵬飛送至京師覆試七年三月奏言江蘇藩司安
凝密陳近年辦賑情形一摺奉 旨此摺著鈔錄俟各省督撫奏
事之便寄去閱看臣細看摺內所陳事理竊惟辦災之法有三曰
賑曰糶曰借此三者實心辦理則皆歸實濟而有益於民奉行不
善則徒以長刁而有害於政以賑而論今地方有司皆於倉猝查
報之時而分極貧次貧之戶一有分別便啟弊端里甲於此酬恩
怨肯役於此得上下而奸民之冀幸而生觖望者更不待言矣蓋
民之貧富易辨而民之極次難分如以有田爲次貧無田爲極貧

則一遇旱澇顆粒皆無有田與無田同也如以家室完聚爲次貧孤苦伶仃爲極貧則無從得食相守忍飢完聚與伶仃同也與其倉猝分別爲開爭競之門莫如一視同仁而絕覬覦之望臣愚以爲初賑似應一例散給加賑再行分別庶辦理旣易並可以杜爭端此賑務之當熟籌者其一以糶而論定例每米一石減時價一錢俾小民升斗易求而牙商居奇無望最爲接濟良法乃地方官每多混請過減價值儻上司輕聽准行勢必希圖多糶規利者雲集誼囂且米價太賤商販不前因而奸民藉端滋事臣請嗣後平糶不許地方官混請過減價值仍照定例斟酌辦理使實在災民得霑升斗之惠而棍徒閹戶難行冒濫之奸庶糶以濟賑乃於地

方有益此平糶之當熟籌者又其一以借而論動公家之銀而爲百姓謀其有無通其匱乏此卽周官恤貧之遺法誠 聖世惠民之善政也然使辦理未協則官民交累假如荒年田土實在無力耕種者地方官借給籽種猶可穫時卽償若告貸銀米以給口食則必計其能還而後與之狡黠之徒遂謂官有偏私不免架控造謗甚且爭鬧滋事有司不得已略爲變通而無力還官差拘徵比民無安息是借貸一事始則借不能徧奸民因爭鬧而犯刑繼則還不能清災黎迫迫呼而更困名爲利民實以病民矣且年久不清蒙 恩豁免而帑項終歸無著又於經費大有關係也臣愚以爲與其借而無償莫如賑而不借此借貸之當熟籌者又其一疏

入報 聞是月因前在廣東按察使任內承辦白大年姦情一案
刪改供詞下部議處部議降調 命來京候旨 上密詢王恕居
官賢否於閩浙總督策楞又 召見新任福建巡撫劉於義 命
抵任後確察據實奏聞四月策楞奏稱王恕老成持重心地平和
於吏治民生汲汲講求惟識力不能堅定於急圖報效之中有優
柔沽名之習至操守實爲廉潔七月劉於義奏言訪得王恕操守
廉潔屬員百姓俱稱其安靜和平絕無擾累之處惟一切俱聽督
臣德沛主使所以諸事不能振作甚覺罷軟 上謂兩奏皆屬至
公之論尋授浙江布政使九月以前充福建鄉試監臨官失察邱
鵬飛倩弟作文中式部議降一級調用 上加恩改爲畱任十一

月卒子汝嘉汝璧汝嘉翰林院檢討

右 國史館本傳按王公字中安
著有樓山詩集

孫國璽

孫國璽漢軍正白旗人康熙六十年進士雍正元年揀發河南以知縣用補鄆陵縣知縣遷禹州知州四年八月擢開封府知府特命專摺奏事九月調浙江杭州府知府六年二月擢福建汀漳道十月調臺灣道國璽疏言臺灣諸臣例不挈眷臣母止臣一子孀居苦節衰老龍鍾見居漳郡乞准臣每歲內渡省視一二次仍卽馳赴任所奏入 上嘉之卽調驛鹽道七年閏七月遷按察使十月擢山東布政使先是國璽自漳州赴任途次有持署浙江巡撫蔡仕舫名簡挽國璽轉託學政程元章關預試事者國璽叱之不以 聞至是事覺 上責之曰凡爲臣子者惟當勉一公誠事

事無欺無隱與君上一德一心爲要朕觀汝可成大器所以不次擢用諒汝必不負朕也然每遇與汝共事之同寅上司等偶一言及未有不稱道汝者朕少涉疑料汝必由俯仰浮沈取悅甘譽之所致今果然矣朕深爲寒心如蔡仕舫挽汝轉託程元章一事在他人尙不肖欺隱而據實奏聞於朕不知孫國璽具何肺腑竟能隱忍而欺朕似此不明大義不別重輕卑陋鄉愿小人之形態豈能受朕知遇之人物耶殊大失朕期望矣國璽尋奏臣愚昧前因業經面叱竝告知程元章未及奏參實非畏懼蔡仕舫敢爲欺隱諭另疏題參並 敕蔡仕舫明白回奏尋下部議仕舫降一級調用九年四月授國璽大理寺少卿旋署浙江布政使十月署河

東副總河十年十月以河東總督田文鏡患病 命國璽協辦十
一月署河南巡撫十一年七月擢左副都御史九月暫署江蘇巡
撫十一月署吏部侍郎乾隆元年擢兵部侍郎三年四月授安徽
巡撫八月疏言安徽蕪湖鳳陽兩關蕪湖關不征米稅鳳陽關因
毗連江廣販運者多以故按數收課此向例也臣按本年被旱之
鳳滁六泗等府州距鳳陽爲近請將米穀課稅自本年八月至明
歲正月照蕪湖關例免其征收商賈趨利若鶩勢必踊躍轉輸似
與民食更爲通融充裕得 旨所奏甚是寬征之期應相其情形
何必限以正月耶十月疏言本年江南鄉試輸臣監臨應試舉子
萬七千六百有奇入場不遵條約爭先鬪捷不聽唱名搜檢給卷

後任意遊行多搶號板東西誼譁至第三場給題紙因人眾紙多印刷不及分給稍遲輒課集至公堂下經臣再三勸諭立刻補給始各歸號舍夫讀書以養氣爲先似此飛揚凌競士風不馴已可槩見及收卷各官以違式卷呈請貼出多係正草不全或塗改卷面姓名或正草全無公然題詩於後或於卷末列寫稟訴之語昔人云士先器識而後文藝器識既卑雖有文藝亦不足觀此皆由教官平時漫無檢束以致士子倚恃青衿挾制官長習以爲常至三年大比乃進身之階全無敬慎顧忌之心卽俸列科名 朝廷亦安所用之乞 敕下學臣行令各學教官督率訓諭務使修文砥行共相剴切至鄉試之期學臣詳慎遴選分別去取毋使挂名

士籍之徒濫竽徒滋誼競嗣後如不遵 功令擾亂場規本生懲
革外將本學教官嚴行參處庶頽風可挽士習可端奏入 上以
國璽據實直陳不避嫌怨下部議敘 予紀錄四年卒 賜祭葬
如例

右 國史館本傳

國身者用其有元赤
名正十一

ノ

李渭

公諱渭字萊涯號素園姓李氏先世爲潞安府長子人明永樂間諱禍者始遷高邑五世祖五倫東昌府通判生三子長標明武英殿大學士兼戶部尙書諡文節次模爲公高祖贈奉政大夫曾祖士劭淮海兵備道祖伸進士韶州府推官改知河南永甯縣 贈通奉大夫考兆齡知福建閩清縣 封中憲大夫 贈通奉大夫生五子公居長公自少力學尤熟於史好窮其治亂盛衰之故爲人篤茂伉直勇於任事其內行修其居官視民疾苦如身被創目被刺於去害興利如嗜欲辛丑成進士授中書科中書舍人司寇勵公薦授刑部主事雍正二年司寇高公勵公應 詔舉公能勝

道府之任授岳州府知府時上方整飭吏治欲周知天下利弊特許公具密摺得非時達以知府得此誠異數而河南大僚已側目不半載假浮語被劾事旋白起武昌府同知未履任丁母憂服闋起授嘉定府知府適有冤獄公力爭致失上臺意幾及禍公曰吾官可棄殺人媚人不爲也旣而事卒以有濟犍爲張某以姦殺定讞公疑之請檢尸無一傷立釋之重慶水災主者撫卹未善制府委公馳往冒風雨徧歷賑給所活多而公於此感寒致永抱骸患丁父憂歸服闋授彰德府知府時撫軍雅公方分選幹捕緝盜議立總捕以統之公得檄極陳不可雅公曰余令方行府縣遵奉恐後李守獨直陳所見規我此賢太守也遂重器公郡舊有萬金

渠源出善應山環府城入洹河灌田一千數百頃久廢公履訪遺蹟濬治倍加支河撫軍爲勒石紀之渠流所及歲以有收漳河爲南北孔道舊設草橋於臨漳道回遠公捐金爲長橋於豐樂鎮行旅便之武安班某被殺誣坐其族弟公一訊立釋之林縣富戶毆殺人厚賂尸屬以病死報公委員檢尸骸骨盡碎富戶伏辜撫軍謂公治行最十府八年以卓異薦遷山東鹽運使奉部飭議增東運鹽引公持議不可詳院奏寢十二年東省大災撫軍委君勘至益都等數州縣被災甚餓殍滿道而有司已報不成災公據實請賑撫軍以已入告難之公爭至再至三乃曰旣格於例 皇上聖明乞具奏災狀請以借作賑異日免追必蒙聽許撫軍從之得報

可公自二月至四月目擊凶災慮無以救遂致劇疾口喃喃作語門外饑民如蟻哀哀就斃柰何語日夜不休侍者曰上臺已發賑矣公張目曰果否對曰信公少息已復語如故如是者半月乃痊十三年遷山東按察使持獄平嘗曰歐公云求其生而不得近日俗吏移易獄詞朦上何求生不得之有不思生者倖矣如死者何此婦寺仁非持法之正尋遷安徽布政使旋調山東布政使爲政持大體不吝出納使有司得展布不輕揭一官亦不爲煦煦熱有所不可卽平日所心許者訓斥不少假亦無宿於心者中丞鄂公楊公皆稱爲老成長者初公爲嘉定府請 訓同列數人 世宗獨謂公曰汝乃實心辦事人也授安徽後摺請詣闕請 訓

上批不必來京常以實心行實政勝於請訓是公以實心受知世宗受知今上爲不世之遇行大用而遽以疾卒矣年七十乾隆十九年六月十五日以疾卒於官公至性孝友閩清公罷官後家日落次子淮癸卯進士選翰林院庶吉士三子湯候補知縣相繼天四子浚孝廉爲歷城令坐虧空被劾常感歎無聊公於諸弟事一身任之不令老人經意弟浚旣已虧帑論死繫獄時浚未有子公一子經芳年十四乃謂其王夫人曰吾弟儻無生路有司究家屬將及老人可柰何吾欲取吾子嗣之以當承追之累卽追贖諒不至死若勿過慮王夫人方病臥未及荅公卽出以秋審迫馳入京行至南宮去家百里夜得噩夢疑夫人有變心動旋計一至

家儻遇變必不能卽出吾弟生死關忍不問耶遣一僮持廿金歸
阡遂趨至京已幸得緩決乃馳回則王夫人一棺在殯矣噫嘻以
兄弟急難至妻死不顧不及一訣難矣已得嘉定府則密囑泐曰
爾第稱有貨在兄所乞咨追可也公在川得東省咨則詳請歲以
養廉扣償未幾蒙 恩豁免乃釋歸泐歸性豪侈公歲以數百金
資之泐至官所多所取用公弗之禁幼弟冲少孤育於公旣長爲
援例得兵馬司副指揮選授東城公仍歲予三百金以勵其操旣
得卓薦遷雙流縣復爲償積逋資其行孤姪縉芳公以子阡爲諸
生屢試不遇則爲援例爲學博士而公自奉極菲中年喪其室不
蓄婢妾所至獨處斗室如老僧官署內寢皆弟姪家口居之衣敝

食糲無所擇獨嗜書至老簿書暇輒手一帙居官數十年未置寸
土一椽不爲意平生急人患難有大僚驟獲重譴其人與公非素
厚籍沒後舉家寒餓將北歸公慨然曰雷霆不測自是 國法然
吾司其土忍坐視其立轉溝中爲道殣乎密令有司周之內外食
飲衣裘臥具麤備令勿言貲所自出其人承命措置約千金受者
及遠近聞者皆歎是人高義而公終不自言沒之日賴眾人之賻
得孤櫬歸里公配王氏 贈夫人於雍正九年八月九日先公歿
葬於高邑縣西五百村先塋子一經芳庚午科舉人孫男二曉昕
經芳篤行好學克承其家風將以三十年月日合葬於王夫人之
冢來請銘余與公同榜進士又同官河南公在山東余主濟南滌

源講席朝夕見及臨其喪其忍以辭銘曰

俗趨機巧誰則誠獨矢實心 帝知名拯溺救焚保赤嬰出入簡
聽持法平廓乎洞達絕府城赴義如鶩勇不驚脊令急難瓶罍傾
於家則瘠於道盈吾銘幽宮垂世型

右墓誌銘沈起元撰

彭人瑛

公諱人瑛字山公號鐵庵其先世自河南遷山西聞喜縣八世祖某再遷安邑今爲安邑人祖某父某皆縣諸生 贈通議大夫公自少通敏能文章三十遊京師問學於同鄉先達之門其文益醇以肆閒爲歌詩天真爛然流譽連輦下顧不能隨人俯仰落落有以自守見炙手熏灼爭名競進心獨恥之然不立崖岸挹之沖如也中康熙辛丑進士年幾五十矣進士例隸教習館有課試公不樂徑歸安邑公所厚善在京師者懼其見軋屢書促之行不顧也雍正丙午謁選得廣東增城令引 見奏對 天語褒異遂有易州之命時方經度 秦陵公召易父老宣告以 天子仁聖 闕

臣等奉命出使... 卷一百一十一
三
坐所在必有曠恩因見使者陳一切便宜口說指畫往復詳劄使
者見其誠開顏聽納唯恐其言之不得盡也其後入告採公所
言甚多世宗皇帝特發帑金十數萬贍給當徙之家大工肇興民
遷如歸恩施霽霈超邁千古至於職司守土區畫拊循安民定
遷公有力焉易賦耗重公始減五之二罷里正薪炭之供革煙稅
之不在官者民歡曰大夫生我以治績考最擢保定知府保定統
城二十簿書填委兼他郡疑獄被檄讞定決遣如流咸得其情護
臬司篆雪冤理滯積案一清時方旱而雨制府毘陵唐公謂人曰
彭護司平反所致也其見愛重如此彭城李公以才守特薦遷巡
清河道副使再以治績考最升湖南按察使入請訓旨有 硃

批上諭豐貂端硯之賜湖南介洞庭桂嶺之間其西南皆夷蠻雜處以幹駟文網操縱爲治則往往有事公益刻厲清苦而持法寬平見屬吏勸戒如父兄子弟破觚斲雕人亦安之巡撫三韓高公前爲使者聽公陳便宜者也雅相識公久懷念田園以高公故不忍言去而藩臬 陛見命下公賦詩誌慶旣入 覲得 旨還任至新鄭疾革遂不起年六十有四公家世以耕讀爲業進退有所事事淡於宦情不皦皦立節槩而表裏潔清其所受知諸公無攀聯於先故其後亦不肖阿徇媚悅意所不合抗詞力爭得請而後已公頎然長身平素寡言自可外貌若不拘檢而其中堅確如白黑涇渭之不易可謂篤信守道君子矣公之子植太學蔭生有文

行既排纘公行事爲狀而余獨以其不求而達介而不忤爲可以風世也爰爲之傳後有論而錄之者毋亦有採焉

贊曰吾友張閣公之言曰吾平生僚友中未有如彭公之知我也凡有事相與熟計議而罷行之其不可公與我更持之更其之渣滓芥蒂不畱胸臆嘗論事使院中公默而退退見公爲說利病甚悉吾問之公曰國家之體當有先後且某豈敢信言之果是而輒掩人於廷又況公賢者哉吾是以思公嘗有愧於公也吾友言如是以公之任事直節履和執謙不爲物先嗚呼君子哉

右傳汪應銓撰

顧琮

顧琮滿洲鑲黃旗人姓伊爾根覺羅氏祖顧八代禮部尙書 贈
太師諡文端有傳父顧儼歷官副都統顧琮由監生修算法議敘
康熙六十一年授吏部員外郎雍正三年七月授戶部郎中十二
月遷監察御史四年五月巡視長蘆鹽政九月奏稱州縣於私鹽
案每監斃人命請嗣後除大夥與販照例審結其餘易給之案延
至四月外一案監斃三人一年監斃三案者照司獄監斃例議處
下部議 從之十一月授坐糧廳八年遷太僕寺卿九年授霸州
營田觀察使十一年正月協理直隸總河二月遷太常寺卿七月
署直隸總督八月授直隸總河十二年四月奏報永定河口深通

上流始得暢注入淀近因淤正議挑濬仰蒙 天賜引河二十餘里顯著嘉祥 諭曰朕因畿輔河渠關係重大時時軫念今於河臣籌議疏通之地仰蒙 天賜引河自然開刷不勞民力順軌安流河神福佑羣生功用顯著應虔誠展祀以答靈貺十月疏言直隸向無額設囚糧多致飢斃請一體准設以廣 皇仁得 旨允十二月疏言直隸河道繁多廳員應改撥就近管轄再於要處酌增河員通永道屬增糧河通判一駐薊州管京東諸河竝備運船清河道屬滹沱河經正定保定河間三府順德府同知難以防範撥歸正定府通判兼管東鹿縣有滹沱新工增主簿一滹龍河匯滋河等水入白洋淀增管河通判一駐祁州蠡縣增縣丞一祁

州增州同一分管本州及博野兩處民工大名道屬魏縣增縣丞
一分防漳河順天府屬牯牛新河與永定河南岸咫尺撥歸永定
道轄霸州係牯牛下口仍令清河道轄涿州北房山等處山水小
河竝無隄防就近歸霸昌道兼理天津道屬三角淀長淀等河增
通判一駐王慶坨武清縣增縣丞一東安縣增主簿一歸通判轄
泊河通判所管清河縣運河二十里故城縣河道十六里撥河間
府同知轄天津同知所管南皮縣運河撥歸通判管理靜海縣唐
官屯千總所管運河隄岸錯入靜海青縣南皮滄州境內改分隸
州縣管理其千總令督河兵淺夫毋庸裁汰至天津清河二道向
無搶修物料請照通永二道例酌工程險易預採大名道無

國朝通志卷之二十一
歲修銀應於清河道庫撥用臣標左營黃崖汛右營西儀汛俱距
河遠竝無河務應改隸天津鎮標轄南運河潮河一帶營非臣標
所轄汛報稽遲應將天津鎮標安陵汛歸臣標轄竝於永定北運
河兵內選熟練樁埽者數名教習南運河淺夫歸唐官屯千總轄
潮河上游增外委把總各一駐北口白河上游增外委把總一駐
石塘路永定河上游增外委把總一駐水關下部議行乾隆元年
正月署江蘇巡撫六月奏海塘善後事宜一松江土塘自上海迤
西連寶山縣境甚卑弱其舊寶山一段更頂衝宜加幫迅築一寶
山對江墩急宜接築土塘見在塘形陡削者俱加高寬一寶山護
城圩係民自築併入歲修估培一塘岸壓占民田免額徵錢糧一

塘路縣長請增海防道一駐松太適中地專管一通潮小港泥沙
易積令道員以時修濬下九卿議行九月疏言常平倉穀例存七
糶三從前糶價見未買補又被水偏災須賑若穀賤方買恐來歲
青黃不接無穀可糶請令各州縣遵新例於鄰境產穀州縣買補
儻鄰境亦係款收卽委員赴江西湖廣採買下部議行十月丁父
憂回旗二年三月協辦吏部尙書事七月永定隄決 命顧琮往
同總督李衛等搶修八月署河道總督三年正月授朱藻爲總河
顧琮仍同辦理時畿輔西南諸水匯於東西兩淀淤墊漫溢爲患
顧琮奏設袋船撈泥委三角淀通判清河同知司其事經大學士
鄂爾泰竝李衛朱藻等詳酌議行十月授顧琮河道總督五年四

月疏陳青縣之興濟滄州之捷地兩減河善後事宜一兩減河均以岐口海河爲歸宿連年河尾淤高不能驟達應疏尾閘均於李連濱家口會通直接岐口俾無阻塞一上半截隄偪河身單薄可危應各就南北岸展築遙隄再擇隄身單薄險要處幫築坦坡卽於河底取土開挖深寬一下半截隄宜相地勢截成拉沙俱使河水由此漫入以緩水勢兼肥地畝一兩處閘口俟河水歸漕設板下閘使下游窪地涸出可種麥一多設涵洞減河水落時將兩岸積水放入掘開中間土埂流通歸海一壓占地已給價出糧將隄內灘地令民佃種收租作搶修費六年六月疏言河閒縣縣丞跨管子牙河東西兩隄百二十里巡防維艱請將東岸隄歸駐河東

之景和鎮巡檢兼管老漳等河亦就近歸地河鎮巡檢兼管祁河
通判改設於子牙河將青縣靜海子牙河主簿文安大成兩縣縣
丞主簿霸州州判所管隄工均隸該通判其祁河通判原管河工
改隸清河同知俱議行八月題銷永定河修築銀 諭曰前顧琮
題報漫工疏內曾稱專管官竝不加意搶護及請開銷竟不著落
各員分賠明係有心徇庇此項銀俱著顧琮賠補尋裁直隸總河
缺 命回京候旨十二月授漕運總督七年十月奏漕務十條一
嚴禁胥役捐勒竝受兌弁兵刁索一各幫旗丁俱令長運不得仍
前逐年僉換一江西湖廣等幫由長江至儀徵例不定限浙江幫
在大江之南每藉風色遲延應咨督撫嚴催出境一各幫頭次過

淮卽委桑園遊擊僱行二次過淮糧道僱行通幫告竣臣循例督催北上一江南山東河道淺阻處預爲挑挖一漕丁遇閘壩卽停泊至兩省交界因弁兵不能越催更多逗遛委標員催僱毋許遲誤一黃河北至臺莊臨清北與直隸交界處汛遠兵稀酌添淨汛接催一飭各閘啟閉得宜閘員不得託詞蓄水稽畱一江廣幫船遠涉長江多帶木植護船至內河船重難行令酌定水大至臺莊南水小至揚州卸賣一漕船抵通卸還查販米卸乏之幫將副丁應得餘米銀存二給七俾回空不致拮据 上是之下部議行十一月奏獲劫鹽船匪徒竝於安東山陽各汛遠處暫增淨汛六撥兵防察 上嘉其畱心經理十年六月疏請於貓兒窩以下馬莊

集衝遷阜河以上曹家店各建石閘一束上游之水不致直瀉無餘竝將駱馬湖入運處改從阜河以上之軀車頭地方建閘挑渠引水濟運十字河之竹絡壩當開放後黃水湍激橫截運河糧船提溜頗難應於竹谿壩下之束黃壩迤東接隄堵截別開河頭接入舊有蘇家閘開河閘南濬河一道越黃入運 從之十一年閏三月署江南河道總督九月回本任十二年九月浙閩總督喀爾吉善劾浙江巡撫常安貪婪各款 命同大學士高斌往訊卽授顧琮浙江巡撫嗣又 命大學士訥親前往會審皆實論罪如律十三年部議顧琮承審常安案不能按款窮究擬革職奉 旨從寬畱任尋調河東總河十七年正月疏言運隄向無堡房兵夫遊

國朝通志卷之百一十
巡雨夜難以棲止有名無實請照黃河例每二里建堡房一共四百座撥司庫充公耗羨項興造每年酌給歲修銀十八年四月同巡撫蔣炳合疏言陽武五堡民埵竝十二堡大隄因雨沁黃竝漲以致漫溢見在搶築斷流上游進水地方亦趕緊攔河築小壩又五堡外地勢極窪灘水匯聚急應疏通去路見於壩東開引渠灘水至此循民埵東去漫入灘地以分水勢奏入俱報 聞十九年二月因江南總河任內浮費河工銀部議革職 諭來京候旨十二月卒

右 國史館本傳

顧琮字用方姓覺羅氏滿洲正白旗人祖八代有奇力能挽十二

石弓折節讀書兼通文史以廕生從信郡王征李定國追至永昌
大敗之又從趙將軍良棟征雲南奪取銀定山發礮擊賊賊魁吳
世璠自殺其僞將軍某以城降功成賞精奇尼哈番父顧儼襲世
職生公公天性岐嶷習兵農書算不屑章句之學 聖祖開算學
館公得與焉議敘得吏部員外郎 世宗登極稽覈財賦開會攷
館以公領職有書吏行賄某官某官首之於總理局務怡親王王
命公審理吏狡抵公笞之同官忌公者誣公欲殺吏以滅口王疑
公亦受賄遂奏劾公交刑部一並嚴訊吏證公無絲毫染公得無
罪而怡邸意終不愜不爲請開復未幾奉 世宗特旨起授戶部
銀庫郎中出爲河南觀風整俗使當是時有奏豫省歲荒者 世

宗命山東運米十萬石爲賑濟總督田文鏡諱災以爲歲熟民無
需米仍令運官帶回公爭曰此時民未必不需米就使不需然既
已運來畱存州縣倉中亦有備無患之義若仍令運回則運腳船
費例不准銷地方官賠累無力仍取諸民民何以堪且王者有分
土無分民豫省官民卽山東官民爲臣子者當同心共濟不必自
分區域粉飾太平以希恩寵田滋不悅密奏公倨傲氣陵其上意
蔑其下 世宗問公公曰觀察爲欽差官與督撫平行無所爲上
也司道府州隸於督撫非觀察屬吏無所爲下也旣無上下臣何
陵蔑之有 世宗笑曰奏卿者田文鏡也毋乃爲爭米事忤汝乎
公上疏力言務培本根持大體不屑承順風旨嘗奏開捐非善政

永宜停止洋洋千言又嘗入朝天旱多風上有憂勤之旨公徐曰洪範云蒙時風若今風色過厲慮朝臣有蒙蔽君父者上爲之動容公於友朋風義尤敦篤任山東總河時前任完顏偉奉召來京未行而病篤意欲出署調養公力止之曰君之母妻兒女俱先回京病中左右無人吾與君同事君父卽兄弟也弟尙在兄何憂凡一切湯藥便旋事皆公親自料理完公氣息纔屬猶戀戀呼公公應聲而至不頃刻離完公歿後事宜公一力周旋護送還其里第後巡漕御史伊靈阿在寓亦病臨死歎曰有願大人在茲吾死何憂公亦典質衣物爲治其喪如送完公時公雖剛正孤寡百折不回有願鐵牛之稱而性耽花竹左右侍立校尉千總皆清

俊少年浙江總督李衛氣出入上而最敬公見侍者而尤之問此輩可使戰乎公笑曰蘭陵王貌美戰則戴銅面具入陣矣公不信可遣公帳下健兒與角力及交手皆應聲而倒又多製髹漆盤盛佳硯良墨聞屬吏能詩文者輒手贈之其風趣如此公官至七省總漕內權吏部尙書年七十而薨

論曰乾隆七年余改翰林官出宰江南拜辭首相鄂文端公問及當代諸名臣如尹望山楊江陰諸公公意俱不滿但云汝到江南有一真君子不爲利動不爲威懼守其道生死不移者可交也問何人曰顧某我此時不必通書汝見時但道是我門下士渠必異目相視及到淮見公於總河署中果如舊相識臨別求公教誨公

曰君聰明任君行去但要大處錯不得可緊記老夫語真儒者之言然公信古太過有限田一疏要均民間貧富與廷臣力爭意非不善卒亦不能行云

右傳袁枚撰

顧侍御用方窮時喪耦十有一年弗娶既得仕納徵於李氏會先帝之喪踰歲弗親迎或詫焉其官適罷曰吾貧未能也既而起家爲戶部郎中擢御史掌長蘆鹽政歲賜數千金詫者滋多曰吾迫公事未暇也其娶以雍正三年冬十有一月望後一日推其心蓋謂三年中不宜有空月也問焉而不自禲不以人之所不能者愧人又其厚也先帝始崩守官者各次其守余次於佛舍將

歸語二三君子曰在禮公等居倚廬宜再期今旬未三終歸至家
止於外不入室焉其可也聞者皆變色易容蓋俗之偷以禮爲徒
觀眾人之耳目也久矣古之人事君猶事父也謂制以義而不敢
違是薄於德於禮虛者也若用方者其明於禮意乎傳其事與言
俾事君者有省焉

右表微方苞撰

張廷枚

張廷枚字卜臣漢軍人由世襲佐領內務府員外郎出管蘇州滸墅關稅務累官福建布政使有春暉堂詩鈔

八旗通志春暉堂詩鈔張廷枚撰嘗奉命出使朝鮮國齋所賜空青石於其國王故卷後有紀行諸作所敘外國景物事實頗足資博覽焉

袁枚隨園詩話云廷枚有瓶花絕句云垂簾莫放西風入畱取塞香在草堂吾鄉詩人沈方舟主於其家遺橐在焉張三使高麗各有詩紀事杭堇浦贈云一參羽獵長楊乘三繪宣和奉使圖

右 熙朝雅頌集鐵保錄

諾岷

諾岷姓納喇氏滿洲正藍旗人先世居輝發祖恩國泰以習漢書
應天聰八年禮部試 賜舉人崇德元年入內祕書院辦事順治
元年授禮部理事官八年擢禮部侍郎洊陟本部尙書十三年四
月 上以六部堂官不能實心辦理各予降革恩國泰於典禮未
協降三級畱任十五年十二月罷康熙八年八月復任工部尙書
尋調禮部十年正月以原品致仕十二年九月卒 予祭葬如例
父那敏康熙十八年授三等侍衛二十四年授佐領雍正二年授
額外副都統尋署鑲白旗事五月授正白旗滿洲副都統六月遷
鑲黃旗滿洲都統十一年八月卒諾岷由筆帖式授戶部主事遷

本部員外郎中雍正元年三月擢內閣學士兼署工部侍郎四月授山西巡撫七月疏言山西連遭荒歉兼以虧空纍纍臣奉命賑卹饑饉查補虧空但州縣任非其人恐民困方甦者又致擾累錢糧方清者復被那移請 敕部揀選賢能官二十員發晉補用九月又請揀發三十員俱蒙 俞允十二月疏言州縣錢糧屢經盤查一時難窮底裏見查出虧空尤甚者指名奏參其餘各州縣須通行調任令將倉庫互相盤查方能徹底澄清又言前任巡撫德音奏無抵虧空各員均革職畱任奈不行補完益增虧空應同見查出虧空各員請革職者一併勒令離任嚴審查追俱如所請行又疏言山西各營官兵不敷月糧例係折給自行采買奈連

歲歉收今夏米價更昂應照時價酌議夏秋二季米價太原蒲州大同各營每石折給銀一兩二錢平陽汾州各營一兩五錢右衛虎口各營一兩一錢暫增數月糧價官民大有裨益部議駁特旨允行二年三月疏言太原平陽二府所轄州縣居通省三分之一地方遼闊經年不能周其地是以從前虧空知州毫無覺察今細查輿圖莫若照直隸州之制分轄請將太原府屬之樂平盂縣壽陽分隸平定州定襄靜樂分隸忻州五臺崞縣繁峙分隸代州河曲興縣分隸保德州平陽府屬之臨晉榮河萬泉猗氏分隸蒲州安邑夏縣平樂芮城垣曲分隸解州太平襄臨稷山河津分隸絳州蒲縣甯鄉分隸吉州大甯汾西永和分隸隰州一經分理則

太原平陽所隸州縣各止十一地近則易周糧少則易覈不惟虧
空之弊可杜卽刑名詞訟亦簡而易理至直隸州各有倉庫向無
專責恐致侵那請將蒲州解州吉州隰州錢糧就近令河東
道盤查平定忻州代州保德州錢糧令雁平道盤查其舊設之澤
州遼州沁州錢糧令糧驛道盤查如通同隱匿失察照議處知府
例處分又言山西掌印都司專督屯糧兼轄衛所今衛所議裁錢
糧刑名原屬布按二司兼理請將該都司首領經歷裁汰均如所
請行直省各官向無養廉州縣俱徵收火耗藉資日用上司所需
卽取給州縣貪吏以此藉口上司曲爲容隱弊竇滋多至是請岷
奏請將山西一年所得耗銀提解司庫除抵補無著虧空外分給

各官養廉而山西布政使高成齡復請山西之例通行直省 上以別除積弊必更定法耗羨必宜歸公養廉須有定額 詔總理王大臣九卿集議會各省皆以次奏請議遂定是舉也 上獨申睿斷因時制宜擢行萬世良法以諾岷首發其議 諭獎其通權達變於國計民生均有裨益三年正月以病乞假 命解任回旗調理先是貝子允禔以罪發往西甯其眷屬過山西從人擅毆生員諾岷奏請提審并請將貝子允禔 敕交宗人府嚴查治罪後任巡撫伊都立審奏貝子允禔護衛烏雅圖等在平定州擅毆生員應請按律治罪得 旨此案內有太監李大成爲允禔首領太監豈有不知此事之理諾岷審時以李大成患病竟爲脫卸遽行

發回諾岷係滿都護屬下之人滿都護與允禎比鄰而居原屬同黨似有瞻徇強爲掩飾諾岷大負朕恩伊都立疏忽殊甚仍著伊都立將李大成審出實情具奏嗣經伊都立嚴審李大成毆生員事屬實前審時李大成諉以患病不知諾岷卽未曾根究其瞻徇開脫屬實交部嚴加議處部議革職十二年九月故

右 國史館本傳

姜穎新

按狀公姓姜氏諱穎新字文庸始居江南之華亭既遷如皋祖君裕考擴原皆以公貴 贈通議大夫公少而英敏爲文縱橫跼跋卓有奇氣弱冠補博士弟子傾其曹康熙□□以禮記魁省試雍正癸卯復魁禮闈引 見太和殿 天子選授庶常外復記十七人名公與焉以練習掌故纂修大清會典居一歲十七人者復召試公以一等授編修明年改刑科給事中發舒言事無所避懼又明年出爲直隸天津河道又明年轉通永河道是時 天子力嚮治垂意北河防以親王董之公兩居北河要害工與不常舊河善淤徙新河開塞無定處司事者難其成公日服布衣裹餼糧晝

夜巡行隄岸樹坊堰以資蓄洩不避寒暑煩溽之苦經晝開導動
中機宜所治河日有功親王廉其能登諸薦剡 天子嘉之數
召見慰問旋擢直隸提刑按察使直隸畿輔重地案牘填委吏枉
民冤達 宸聽最邇公躬自檢校諸奸彙蝟集爲剖決立盡或
天子有大疑獄降密敕付令審讞無弗援情按律稱 上意焉時
同事尙刻覈公獨慈祥著聲平反矜愼不以得情自喜每盛暑嚴
寒諸囚狼籍宛轉公爲搆和濟堂俾偃息其中覆以亭蓋周以棉
席病則親其醫藥以迄公之任古制按察使責先察吏吏治則刑
清公甫莅事首訪守令僚佐治狀能者削牘薦之否則諄迪訓誡
不率者挂之彈章河道兼轄漕政問俗所利苦而平亭之贏餘悉

輸諸少府甘儉素親民疾苦下邑有水旱災捐俸錢數百萬賑之
如肥鄉等縣所存活甚眾修葺楊忠愍諸公祠風聲所樹義感黎
庶壬子以疾告歸奉堂上歡色養交至建家祠購祭田置義倉三
黨姍戚無不飽其德者公生於康熙乙卯六月十日卒於乾隆丙
辰正月十八日年六十有二配黃氏繼郝氏子男五人孫男六人

銘曰

於維先生儁朗天植辟紀之甌鄭之瓚橫而售之爲邦國式循臬
陸兮河防平謹犴狴兮 國典飭於維先生仁且直高山嶙峋淮
水淵淪我勒堅珉以風子若孫毋忝其人

右墓誌銘夏之蓉撰

Handwritten text and markings in the right margin, including a small rectangular box.

115

張若震

張若震江南桐城人大學士張廷玉之姪雍正元年 欽賜舉人
六年授浙江天台縣知縣七年升嘉興府同知八年擢台州府知
府十年遷鹽驛道十二年超擢布政使條陳海塘修防事宜及清
釐各屬南漕積欠均得 旨允行七月 諭曰浙江鹽務漸不如
前若不畱心整頓必致廢弛難理程元章力量僅能勉強辦理巡
撫事務不能兼理鹽政浙江布政使張若震年力精壯實心任事
從前鹽道任內曾經諳練其辦理亦屬妥協著伊兼管鹽政印務
凡地方文武官弁有關涉鹽務者准其舉劾若有作弊掣肘者卽
著糾參乾隆元年奏辭鹽政養廉克公旋以藩司事繁任重力難

兼顧請解鹽政任 諭曰兩浙鹽務自來廢弛自李衛爲浙江總督以來畱心整理諸事妥協及李衛離浙程元章接任其性辦事迂懦鹽政漸不如前是以 皇考諭令布政使張若震兼管前據張若震奏稱藩司之職經管通省錢糧頭緒繁多難以兼顧鹽務且緝私全賴官弁協力未免呼應不靈恐誤公事等語張若震准解鹽政之任俾得專心職守二年二月入 覲扈 駕至易州恭謁 秦陵 召見行在諭以不必入京俟 山陵禮成卽回本任八月疏請各省歉收酌定遇糴處分下九卿議行四年奏各省衛守備千總請照山東各省例改歸知府管轄五年奏浙省地丁錢糧存畱項下支放官俸役食向以錢一銀九搭放造報實屬虛捏

請嗣後統以銀數開銷不必作錢均下部議行六年奏浙省沿海
腹裏地方尙有新漲沙塗堪以開墾緣民竈夾雜往往貧民墾種
竈戶出而紛爭是以觀望不前請無論民竈俱准開墾以呈報在
先爲定給與印照註冊存案得 旨俞允七年正月奏請歸養
諭曰汝奏固屬應行但巡撫新任汝不便復換俟秋冬閒再奏七
月復申前請 諭曰張若震以母老多病屢請終養惟情詞懇切
准回籍養親尋丁母憂十二年服闋十四年授甘肅布政使奏甘
省岷州西和秦州秦安禮縣成縣河州等州縣節年額徵存倉餘
糧共二十四萬石有奇見無別項支用除常平倉糧應仍舊積貯
外其西和秦安成禮四縣餘糧應各畱一萬五千石岷州畱二萬

石秦州畱四萬石河州畱三萬石餘均變價解司以備豫買滿兵糧草及撥充兵餉之用嗣後每歲額徵及估兵食之外總按額畱之數存貯餘於每年三四月閒變舊存新儻值歉收毋庸變解報聞十五年調河南布政使十六年調西安布政使十月奏請陝省墩臺營房照上下兩江之例酌定歲修銀數交兵丁自行修補汛弁查勘不固者懲革賠修其歲需修費令各州縣於額設公費內按二八月移交汛弁轉給兵丁修理如所請行十七年三月奏請定原籍呈報丁憂之例凡見任官之父母在籍病故者家屬呈報及地方官詳撫咨部俱以五日爲限庶該員不得遲隱而應題應選之缺亦無稽滯下部議行七月奏甘省地方遼闊窮民多就

山澤謀生恐有奸匪煽惑愚民請豫爲稽防其闕久封禁山場不許奸民捏端開墾 上聽之十八年擢湖北巡撫二十年奏荊州府屬江陵監利二縣濱江田廬全賴隄垸保障該二縣地方遼闊均止縣丞一員隄務難周應分員督辦所有江陵縣隄工請自松滋縣上古牆一帶令虎渡司巡檢管理襄江直路一帶令潭灣司巡檢管理其荆江北岸等處仍歸縣丞管理監利縣隄工自北大興垸起至永豐垸令分鹽司巡檢管理自蓮花垸至吉老垸令朱家河巡檢管理均如所請行又偕總督碩色奏浙江撫臣周人驥咨稱浙省歉收選商赴江漢採買恐湖北漢北地方江浙商人同時採買米價日昂楚人亦受食貴之累請將十八年楚北常平倉

加貯穀四十萬石分飭各屬碾米運至漢口委員設局聽浙省官商買運 上嘉之二十一年卒

右 國史館本傳

國朝書獻類徵初編卷百七十一目錄

疆臣二十三

王士任

嚴有禧

碩色

唐綏祖

元展成

李如蘭

喀爾吉善

子定長
孫鄂雲布

國朝書獻類徵初編卷百七十一目錄

--	--	--	--	--	--	--	--	--	--

154-456

國朝耆獻類徵初編卷百七十一

通奉大夫前署江西巡撫江西布政使司布政使湘陰李桓輯

疆臣二十三

王士任

王士任山東威海衛人雍正元年進士由主事累官至福建鹽驛
道乾隆元年正月 命署福建布政使旋實授二年奏閩省正音
教職應將浙江江西兩省人員撤回卽於本省就教舉貢內慎選
得 旨允行三年奏閩省米價昂貴請將本年兵糧一十二萬八
千餘石聽民完納一半本色一半折色准一石徵收銀一兩其不
敷兵米於臺穀及監穀內動碾支給其折價銀兩解司庫買補還

國朝書牘卷之二十一
項下部議行九月署福建巡撫四年六月劾福安縣知縣蕭荃違
例杖責生員請革職與劣生一併嚴審 諭曰 皇考當日優待
士子原有不可擅加笞杖之 恩旨朕御極以來諭令士子免充
襍差有因欠糧褫革者完納之後准其開復蓋以膠庠多士讀書
明理諒能恪遵法紀爲庶民坊表是以格外優待之也今王士任
所參生員郭向高等恃衿包抗率眾挾制敢將文廟黌門乘夜塗
黑此等均係青衿中之敗類爲國法所不容乃該撫遽請將知縣
革職與劣生一同審擬是縣令官長之去畱劣生竟可操其權柄
將挾制刁風日以滋長縣令必有不能約束士子之勢於人心風
俗大有關係著大學士九卿會議具奏尋議生員偶有過愆只應

戒飭者地方官不得擅行杖責至肆行不法等事應令地方官查
拏申詳黜革如地方官挾私妄報查出參處 上從之並著爲令
七月奏閩省府廳州縣定捐監穀一百萬石以備緩急若於不通
舟楫之地再行買貯恐本省穀石不敷轉妨民食請於不通水次
州縣俟原定足額之後再按大小中制增捐監穀買貯以五千四
千三千石爲定下部議行九月奏臺灣錢價昂貴兵丁所領餉銀
不敷換用請於省城開設鼓鑄運赴臺地搭放官兵月餉以紓一
時之困又奏閩省咨取浙省蠶民分給閩縣侯官永福三縣教蠶
樹桑所出繭絲以一分賞蠶民以二分歸公各蠶民計口授糧俾
資養贍前因巡撫盧焯有給田佃種之議其應支口糧遂於乾隆

三年夏季停止今蠶民等以耕桑不能兼顧不願受產仍求頒給口糧俟五年後閩人熟習蠶事其願回籍者酌給路費欲留閩者酌給田地均如所請行十二月劾漳州府知府王德純受閩縣冒考武童贓銀五百兩又於汀州爭祠地案內索借銀六千兩上命御史朱續暉往按之五年閩浙總督德沛整頓閩省餽送惡習劾士任納賄婪贓訊證明確前後列款糾參諭曰此等蕩開除檢之輩若不參劾何以警下僚王士任著革職御史朱續暉復奏稱奉命到閩審理王德純一案士任不願覆審始用好言懇求繼用危言挾制及至會審多方阻撓王德純係前任總督郝玉麟保奏之員玉麟囑其不可審實故於前初發六款交伊審明時審

後未經奏明此次會彙既定又卽日飛遞蘇州寄與玉麟閱看其在閩數年品望操守甚劣畏臣聞知密遣心腹於臣行至清湖地方暗伴臣行防閑甚密臣細觀其爲人機詐居心巧僞成性旣虧節而趨利復藉案以營私豈堪封疆重任奏入 諭曰王士任由福建道員朕屢加擢用至巡撫重任伊稍有人心自當潔己奉公感激圖報乃蕩檢踰閑婪贓作弊朕初不意其負恩一至於此昨據德沛列款奏參已降旨革職交德沛等嚴審定擬今觀朱續暉所奏則王士任之喪心病狂小人情態畢露矣七年發往軍臺效力十一年故

右 國史館本傳

嚴有禧

公姓嚴氏諱有禧字厚載常熟人明大學士文靖公七世孫也曾祖熊縣學生祖虞惇一甲二名進士授編修終太僕寺少卿父鑿增貢生宗學教習公初名繩德年十六補縣學生太僕公時爲大理寺副手書勉曰易曰厚德載物今字汝厚載入則孝出則弟言忠信行篤敬所以厚其德也康熙五十九年年二十七以今名中順天鄉舉雍正元年會試被放 特恩賜進士六年選河南涉縣知縣河東總督田公文鏡爲政嚴明屬吏望風懾憚公強直敢任事議論明決數見褒異自以不習吏事請改教諭田公曰汝豈久爲令者顧涉小未展驥足勉之勿萌他意八年調署洛陽值西邊

用兵羽檄旁午隨方應接事無廢滯田公益親任之逾格舉薦明年遷山東直隸濱州知州是時田公與山東巡撫岳公潛不相能欲求其不職狀故奏公爲濱州使察動靜公至見岳公長者久之竟無所白曰吾豈能譖人以求進乎於是田公以公負己大怒請讓相繼將劾公會病卒乃免濱州仍歲大水公到官三日單騎循歷所屬按視災口開倉賑給撫恤勤備十一年遷萊州府知府聽斷明審辨析疑似誣枉獲伸廢阻蔽欺咸見糾摘政號清嚴法制有不便於民者具以因革所宜列上兩院究徹利病言多見從今上乾隆三年擢公登萊青道前時胥役奉命參訪外事因廣興譏搆迫脇州縣恣取賕賂公至禁絕其事有踵故私出者聽州縣

捕治循行界內簡省徵發所至晏然五年調糧儲道母憂去官其
冬復遭父喪八年服滿補湖南岳常澧道民隄湖旁涸陂爲田水
勢屈遏往往決溢而民利壅闢請者相繼兩院下公勘狀公言此
皆遊食好事之徒歆誘愚魯恣爲科斂與胥役表裏分畝分金及
至衝決告災求賑復爲奸利因條上其弊圍湖之議遂格澧民蕭
六表素兇邪告所怨劉太玉譚如山有逆謀諸生車禹殿等名在
告中湖南提督聞知遂捕繫生等會將肄兵於澧民譎言兵至相
率驚竄公察所告非實竝爲伸雪縱遣而馳書帥府止其肄兵澧
民乃安十一年調鹽驛道十三年擢河南按察使十五年冬調貴
州禁制兵役不得侵凌苗民刑具違制被刑者多斃督令重造如

制十七年以疾解職二十二年疾平復爲河南按察使明年調湖
南公素持風裁容止威重及居憲司綱紀肅然與兩院平議庶政
進退屬吏正色諍辨無所回撓而讞鞫之際更務矜恕嘗以愚獷
之徒置對鹵莽輕入重辟多爲開示律文引就生地或施嚴刑而
色更和霽虚心測論常恐枉縱人皆憚其剛而服其平二十七年
坐前在河南失察屬吏贓降二級用至京師待銓明年春以疾還
鄉里公少貧困及仕居處廉約歷官三十餘年家無贏貲平生不
妄取與時人目爲纖嗇然敦重氣類僚屬戚故死喪孤貧多所賑
贍家居矜厲風槩州里敬事三十一年四月五日卒年七十有三
娶許氏 封淑人子二人榕照福建鹽課大使竣鑛國子監生孫

二人明年二月十九日葬苑山新塋銘曰

苑山之麓釣渚之濱蔚乎松楸嚴公之墳嗚呼嚴公邦之憲臣文
靖七葉太僕之孫世澤孔延大闕高門禮官升名天子所甄游
歷寧守剛明恪勤累總外臺濟威以仁直道堂官恭職庇民旣老
歸來規矩人倫奄歎凋落懷風靡因耿耿遺言託我斯文拂管瀟
翰出涕霑巾嗚呼邈矣公其古人

右墓誌銘邵齊燾撰

國朝詩林卷之二十一

下

碩色

碩色滿洲正黃旗人姓烏雅氏雍正元年由候補小京官授戶部主事尋遷員外郎五年擢西安按察使兼河東鹽政六年疏言河東鹽池向例撥額引羨餘銀五千兩歲修渠堰而池牆不入歲修請於添設餘引羨餘內歲撥六千兩以三千兩歲修池牆以三千兩貯運庫爲五年大修用此等工程不同不能兼理請揀附近州縣五六員監修疏入下部議行七年 上命偕提督岳鍾琪往西安鞠逆犯曾靜之徒張熙詭名投書案得實九卿擬罪如律八年遷西安布政使十一年擢陝西巡撫乾隆二年調四川巡撫九月碩色疏報川省陋例相沿火耗羨餘外餘百兩提解六錢名曰平

餘充各衙門公用 諭曰川省耗羨向因公用不敷每兩完銀二錢五分朕御極以來加惠閭閻減去一錢止存一五之數欲使民力寬餘受國家休養之澤也今據碩色奏不勝駭異火耗報官原以杜貪官汙吏之風若耗外仍聽其提解非小民又添一交納之項乎一項如此別項可知一省如此他省可知朕思此等浮多之費取之商民層層剝削其數必不止此難免地方擾累著碩色永行革除以杜官吏借端需索之弊儻公用有必不可少之項著於存公耗羨內支給報銷三年碩色同川陝總督查郎阿提督王進昌合疏言郭羅克番人數年來結隊行劫向設把總一兵二十不能防範請於附近標協酌委都司守備一員領千把總各一兵二

百按年輪班駐劄彈壓廷議如所請又條奏駐防郭羅克事宜一
運郭羅克軍糈道路崎嶇腳價不敷請一夫負米五斗每站給價
一錢口糧按季運交營員支放每石耗米三升作正報銷一松潘
至郭羅克二十二站皆屬番地軍糈委於佐雜不無可慮應派千
把總一輪班押運一出口馬步兵工給馱馬一例折銀八兩每鞍
屈折銀六錢五分均於松潘廳庫支給一郭羅克霜雪不時自守
備以下須製皮衣請守備一員借銀一百兩千把總二每員四十
兩外委千把總二每員十二兩馬兵十八每名六兩步兵一百八
十每名四兩亦於松潘廳庫動支部議皆如所請四年調山東巡
撫五年六月諭曰朕五月閒聞山東郟城至蒙陰俱成赤地上

年被災地方官不實心辦理人民逃往鄰省者甚多以致拋荒故
土未成耕種兩月來碩色未將雨水情形奏聞巡撫身任封疆應
辦之事孰有大於此者特降旨詢問之據碩色奏郟城蘭山蒙陰
三縣連歲歉收是以流移獨多經臣奏明招徠回籍者三千二百
餘口而郟城一縣其收貧民一百七十戶大小五百八十口俱已
安插接濟並未拋荒故土至收成分數郟城高阜地畝確有七分
低窪地畝有八九分蒙陰高阜地畝確有七分低窪地畝確有八
分今時雨疊降秋禾徧野並成赤地之說毫無確據等語朕覽所
奏稍慰廬念今據左都御史陳世倌奏稱山東沂州府一帶數百
里上年先旱後水二麥俱未播種流民散至湖廣江西者將及萬

入湖廣送回饑民經過江甯揚州竟有搶奪之事及到山東碩色並不賑恤且以上年開報收成六分本年尚在徵比錢糧等語陳世倌此奏與碩色前奏迥然不同地方水旱災荒撫綏安輯乃封疆大吏之責碩色稍有人心何致粉飾蒙蔽至此著兵部侍郎阿里衮僉都御史朱必堦馳驛詳勘務期秉公據實不許絲毫瞻顧如有災荒應辦事宜一面辦理一面奏聞閏六月阿里衮疏稱臣等查勘沂州一帶雖非赤地二麥收成不過二三分至四五分而止六月前並未停徵碩色奏殊失實七月 上以碩色才識不能開闢不宜大省前在四川地方情形尙係熟習調四川巡撫七年疏言重慶渝關木稅水漲則木筏順流而下一歲可得數年之木

涸則已伐者積於深溝淺壑不能到渝自乾隆二年部臣議以五千兩爲歲額三年四年缺額三百餘兩經收各員屢以無力賠補爲請三年水漲木多原額贏餘至三千八百餘兩議全解贏餘請免額缺而部臣終格於行懇 恩豁免疏入 詔如所請八年調河南巡撫九月碩色子穆克德官光祿寺署正以民人爭地事寄字家奴囑其照應事覺碩色奏請革審 諭曰碩色因伊子干預外事據實奏參其屬可嘉此事尚在未行碩色自必嚴束其子不致滋事穆克德萬革職交與伊父收管其餘人等亦著碩色就近外結下部議敘尋加一級十一月疏言前撫臣雅爾圖以豫民不知撙節酌爲高糧法與社倉一體出借每石亦收息一斗以五升

爲修倉鋪墊用以五升爲原寄之人遇水旱聽領本爲借行之未
久有空報寄數穀不入倉者有呈報數多交倉無幾者有旋寄旋
領勉強輸納者有名無實請停勸寄專行社倉之法疏入 上是
之又言豫省存留漕穀勸捐社倉自乾隆元年至七年借出未還
者二十三萬四千四百餘石向以災歉年分帶徵仰懇 聖恩免
息止徵本穀 詔如所請先是戶部尙書訥親侍郎梁詩正請裁
雍正二年後續添新兵碩色議南陽鎮屬右營兵五十汝甯營兵
五十二歸德營兵四十二陝州營兵五十二信陽營兵三十五應
裁汰餘新兵一百七十名留資保衛河北鎮屬募新兵五百一十
三已裁四百五十二借存開封營六十一名差繁兵少應留供差

防下部議行時河南按察使王丕烈疏稱河南地產小鹽四十斤以下照肩挑貿易負米度日之例不必禁四十斤以上許本地籬筐挑賣外販者禁碩色議豫省鹽土煎淋卽成土鹽礮土硝土之底亦成土鹽名曰小鹽弛其禁則官鹽壅滯奸商轉借引行私且產無定所出無定時未便招商辦課若必稽查老少分別本境外境則巡緝者非誣卽縱請嗣後小鹽止許食用不能煎販照例禁爲便部議如所請十一月疏言豫省社穀責成正副社長請於息穀十升內酌畱一升以爲正副社長雜項之用疏入 上是之十二月碩色疏參河南學政汪士鋁試文童拔取搢紳子弟試武童不較馬箭止射步箭一士論不服 命戶部侍郎雅爾圖會審視

士鐸職十三年三月山東巡撫方觀承疏請北五省勸輸義倉
命碩色議囚言社倉外吏立義倉分捐穀石仍止此數若儘捐義
倉則社倉虛設且社倉散於春斂於秋緩急可貸民猶樂從義倉
但以備賑取甲散乙小民心存爾我不能奉行轉滋勒捐仍行社
倉爲便得 旨如議十月擢兩廣總督十四年八月碩色疏參左
江鎮總兵楊剛交結田州土官岑宜棟違例放債 上命褫剛職
擬罪如律十五年正月調雲貴總督七月廣東總督陳大受奏參
碩色任兩廣總督時徇庇糧驛道明福婪贓各款 上以碩色素
性柔懦諸事含糊屬員劣蹟一無覺察殊屬疏縱交部嚴加議處
尋鑄三級雷任十六年間五月碩色疏報刑訊布政使宮爾勸多

收銅斤案 上申諭曰碩色等奏到辦理宮爾勸一案甚屬舛謬前此傳諭令其嚴行查辦者因該督等奏宮爾勸先於出署之日暗行寄頓夫藩臬大員而懷行詐鬼蜮伎倆則其侵欺屬實是以有卽加刑訊不足惜之諭並非論實與不實必當夾訊也宮爾勸如果在廠多收銅斤婪賊肥己則有廠內歲入可以徹底清查而囊筐亦必豐盛如不過沿習陋規及家人私收加秤則漁利甚微與郭振儀案等耳今據供只收歸公養廉路耗銅斤俱已報解充公而其任所原籍資產僅止此數已大槩可知何用加之夾訊乎且奏內稱嚴加刑訊又稱刑訊再三茹刑不承徒辦成刻酷之形意謂奉旨刑訊無論虛實不敢不加之三木究之外省辦事祇應

虛名雖滿紙張皇焉知非以套夾塞責轉使無知之輩謂將布政
使用刑嚴訊乃因查追家產滋傳聞竊議之端碩色等如此辦理
甚屬不知輕重著嚴加申飭此案宮爾勸究屬有無入己著再秉
公詳晰分別另行定擬具奏尋宮爾勸以故縱侵盜錢糧杖流如
律六月疏言茂隆廠工丁聚至二三萬人勢必流而爲匪宜籌漸
次解散之法其出入隘口卽在騰越雲龍州等處從此許入不許
出禁其續往則廠民漸少邊防得以甯謐疏入廷議如所請七月
疏言滇省各標鎮協營內設官隊爲頭目爲一隊之長向本名糧
外多食步守糧半分名曰火糧並有占全分者雍正十一年督臣
尹繼善請仍給隊目火糧半分所食空糧改養餘兵以充營伍部

議以名糧不宜虛占槩令招補餘丁尹繼善復以隊長當差需費令給餘丁糧一分卽其子弟年未及歲亦准充補迨後日久弊生兵目成丁子弟不願充補餘丁其充補餘丁者自八九歲至十二三歲不等於執械差操委屬有名無實請將滇省餘丁三千二百餘名裁汰仍按原請名糧額數先儘隊目精壯子弟充補如隊目無子弟親屬卽挑選招募補足原額於營伍汛防大有裨益疏入廷議如所請二十一年調湖廣總督二十四年九月卒於任 賜祭葬如例

右 國史館本傳

唐綏祖

唐綏祖江蘇江都人雍正元年由舉人授河南封邱縣知縣二年因生員罷考解任審明開復三年補虞城縣知縣五年遷歸德府知府六年六月遷山東濟東秦武道九月遷山東鹽運使七年遷山東按察使十一年三月召來京以對品京堂用八月授太常寺少卿十二年三月奏裁犧牲所滿所副一增漢所副一從之乾隆元年七月疏言學政選拔貢生率委任教官舊例選拔務在廩生文行兼優今則附生及三等生員槩許入選但取身家殷實服飾鮮明儀容修偉士論遂有三種取士之說請 敕選人品端方學問優長不得委任教官以開奔競部議 從之三年四月稽

查左翼宗學六月授廣西按察使六年正月署廣西布政使十二月奏言官員赴任文憑粵西向例附便差齎送嗣因各省文冊造報過遲吏部行令按季專差齎送廣西往返萬里每季兩人齎送需費數百金無從支給請將繳憑文冊封入巡撫本箱交在京提塘官親投部科部議 允通行各省七年十一月實授九年四月廣西巡撫楊錫紱奏綏祖體虛多疾請酌調內地 上素悉二人不和 諭錫紱所奏不公七月署任巡撫託庸奏參綏祖擅動庫項假公漁利縱屬營私 敕革職交託庸審理具奏時錫紱 陛見來京 上詢知託庸所參各款綏祖曾稟知巡撫通融辦理 詔交兩廣總督策楞秉公審理十年策楞覆奏綏祖向係最有擔當

者僚屬多怨忌之上年託庸署理巡撫來廣西時正值綏祖 陛
見赴京乘閒媒孽託庸初任封疆遽爲題參後知事皆因公又奉
旨改歸督臣承審慮及審虛遂搜羅款蹟以實原參得 旨皆
公論十一年正月策楞奏所參擅動庫項各款事皆因公歷經詳
報督撫並有先行奏明之案其勒索巧取等款均屬子虛惟託屬
員代購人邊屬寶應照不謹例革職疏入報 聞先是廣西銅礦
二八抽課餘銅官買每百斤給價六兩八錢綏祖請增價十三兩
零託庸旣劾綏祖因奏改三七抽課餘銅聽商自售試辦八月不
能有濟請仍加二抽課而官買餘銅價增至十六兩二錢 敕下
部議革託庸職詳託庸傳四月授綏祖山東按察使九月授浙江

布政使十二年六月奏言御史湯聘奏請嚴禁囤當米穀絲棉部
議允行惟是杭嘉湖民以養蠶爲事官糧及一切日用皆藉此立
辦聞遇絲客未至需用孔亟向典質銀價長贖回另售起息甚微
儻槩禁質當富者尙可待價貧者當新絲初出正值官糧追呼奸
牙短估售則虧本畱則無措是欲禁囤積而牙當反得遂其居奇
臣請除大賈囤積仍實力查禁外如有在數十斤內照當衣物例
分別多寡行息庶商民兩便奏入 命告撫臣酌中妥爲之十月
浙江巡撫常安參綏祖徇私狂悖 諭曰常安奏參唐綏祖各款
尙非贓私狼籍可比而亟挂彈章一似不可姑容者安知非常安
先聞被劾之信因疑喀爾吉善訪伊劣蹟必由唐綏祖開送故撫

拾傾陷欲使兩敗俱傷以洩憤耶但既有此奏不可不詳究唐綏
祖著解任所參各款及有名人犯交高斌會同顧琮察審定擬十
二月高斌等奏所參全虛應開復十三年三月授山東布政使十
月遷江西巡撫十四年四月疏言楚蜀江流匯於九江府城正當
其衝向築護城石礮撥費修治今北岸陡漲沙洲民請承業升科
但聽民承業必將築埂修圍江流受其迫束勢必直趨南岸府城
虞有衝齧請將新洲存爲官洲水盛任其漫流衝復舊泓儻壅聚
成洲卽於北岸挑引河俾江水分流以殺其勢南岸石礮不致受
衝八月奏沔陽州魏蔡二河中包二十七垸爲內湖外江宣洩要
區請於河口設石閘一因時啟閉聽民興修疏入均報 聞是月

調湖北巡撫暫署湖廣總督十六年正月湖廣總督永興布政使
嚴瑞龍先後以綏祖巧詐營私累商肥橐列款糾參得旨革職
交新任總督阿里衮審擬三月阿里衮以嚴瑞龍賊私奏參命
河南巡撫鄂容安赴楚會鞠尋奏綏祖並無得贓分贓惟縱容鋪
頭私買銅鉛添鑄屬實部議革職議上諭曰永興嚴瑞龍等奏
參唐綏祖摺內有婪索邱鑑贓銀數至鉅萬一款情罪最爲重大
乃係此案關鍵今既審無實據則嚴瑞龍之愆愆永興駕詞誣捏
永興之輕信嚴瑞龍率入彈章之處按律自應分別反坐總因唐
綏祖生平居心巧詐器量不能容人嚴瑞龍私意恐爲其所制而
適值永興之易被其愚是以多方聳動成此大案著該撫將旨內

情節分別定擬永興嚴瑞龍罪狀奏聞唐綏祖焚索屬虛失察之罪本輕所有原封家產著查明給還來京候旨酌量加恩錄用六月授山西按察使十七年五月奏介休縣屬張蘭鎮離縣治遠商賈輻輳縣令辦理竭蹶靜樂縣固鎮戶口眾多民風較淳應請將固鎮舊設巡檢移駐張蘭所有介休東鄉郝家堡大小田堡南賈北賈等村撥令就近管轄定爲要缺揀選調補 命下山西巡撫議請奏覆應如綏祖議 從之十八年十月授西安布政使十九年九月卒於官

右 國史館本傳

方伯唐君以疾卒於官喪既歸葬有日矣其子展衡倚衡抱其父

行狀行五百里叩門請曰先人執友四十年來零落殆盡閣下知先人深其爲謔之余不敢辭曰

君諱綏祖字孺懷號莪村先世自海陵徙居江都曰虞佐由歲進士知開化縣高祖考也曰明獻鴻臚寺丞曾祖考也曰之日名諸生祖考也曰之天以貢生知廣東靈山縣事本生祖考也曰詩績學篤行以候銓司訓終爲鄉里推重考也司訓公子六人皆有文名掇巍科都顯職君行第六幼穎悟過人司訓公鍾愛尤甚隨侍館塾學業日進先後執親喪哀毀骨立時兩棺在室家人不戒於火君從煙燄中躍出抱棺跪哭火爲之熄人謂至孝所感丁酉登賢書試南宮不利就選授河南封邱令邑距省近民多挂名上游胥

役停牟鄉愚廉致於法會河決中牟邑大隄卑薄君酌議每田百畝出夫一計工受直劣生某倡率抗阻脅眾罷市以制大吏得其狀置首惡於法數調劇邑皆有治行除歸德府在任三載每遇疑獄必得其情眾咸稱爲神擢濟東監司調鹽運使尋授山東臬司定鹽價恤龜戶革供應清理積欠按年區別入奏邀 恩旨寬免捕巨盜十五人盡置於法境內肅清庚戌秋濟兗東曹四府被水災重之處饑民聚輒數十人見瓶罌有粟者攫之有司律以強劫凡百餘案君極陳情於撫軍岳公得輕減全活數千人癸丑補太常少卿隨 駕謁 山陵贊襄大典禮成晉階一級戊午六月補廣西臬司在任二載民無冤獄時義甯桑江逆苗爲患境內戒嚴

巡撫召寮屬密議欲遷城外居民爲堅壁清野計居民難之君後
至卽正色言大兵卽日壓境苗雖猖獗焉敢薄我城下稍涉張皇
示之弱且先自擾眾深然之民得安枕苗果敗散設計剷除凡所
建議悉中機宜有 旨褒嘉加軍功階一級卒西擢廣西藩司陡
河歲久壅塞奏請動帑金疏濬採礦銅商工本不敷奏請添價又
奏請添州縣養廉又酌給微員回籍路費時君方入 覲署撫以
風聞敗事裁劾歲餘得白丙寅秋補山東臬司尋擢浙江藩司復
被劾經欽差大臣審白旋補山東藩司力請於中丞阿公運奉天
米接濟登萊青三府民無乏食戊辰十月補授江西巡撫明年調
湖北巡撫兼署總督印務所屬僚佐見君察覈嚴明交相傾軋得

旨昭雪卽蒙 召還京師塗次拜 命晉臬凡二載清理滯獄
千有餘案平反十數事癸酉十月補授西安藩司會城數萬家向
資龍首通濟二渠以資汲引自故道久湮民苦掘井味鹹莅任後
卽訪輿情開濬故道居民便之又奏請修興安隄工自此得免黃
洋諸河漲溢大兵勦撫準夷軍分兩路關中爲軍需總匯凡安臺
備餉君悉心擘畫夜分不寐口不言勞未幾得疾不起君性極孝
友操守清白能文章輒爲政事所掩與人交不設城府而疾惡稍
嚴易罹毀謗屢蒙 聖心洞燭矜全得以功名終君生於康熙二
十五年十二月十五日終於乾隆十九年九月初三日享年六十
有九子三人展衡國學生候選州同知倚衡舉人江西南安府知

府秉衡廕生候選八品小京官先卒配吳氏初封淑人後贈
夫人欵望族高淳司訓居揆女孫真州教授鼎元女年十八歸於
君事舅姑以孝聞當大事盡哀時家計中落夫人性甘淡薄勸君
折節讀書君任封邱時邑被水夫人抵任所過村墟見多漂沒者
至署卽語君曰令有家室民無屋廬柰何明日卽請緩徵出陳穀
以賑君在豫以幹濟稱鄰郡公事大吏輒倚任焉兼篆至纍纍而
內政悉夫人莫不井井君疎於財所至之處不名一錢戚友嘗至
至多鞅鞅失望夫人脫簪珥以濟曰甯使子女少一衣節一食毋
使旅人失所也訓子女甚嚴和於妯娌隨君幾十年致問餽遺往
來不絕族黨中貧乏者預列其姓氏置針箱中奉祿所入量爲分

寄歲以爲常夫人生於康熙庚午八月卒於雍正癸丑十一月年四十四歲某年月日其子合葬於某都某鄉銘曰

爲政者與其不諒於斯民也甯不諒於同官不諒於同官而民實諒之則自有公道者存 聖明鑒之與人誦之生也何榮政善民安久乃勿荷沒也宜銘邗之水流湯湯兮唐君爲政澤孔長兮臨其穴若斧堂兮配溫淑而俯藏兮詒子孫其熾昌兮

右墓誌銘錢陳羣撰

惟唐氏世居海陵再遷揚郡唐公季如知靈山縣鼎革時輸金贖兵中子女天祐有德大昌厥宗再傳生公公行六諱綏祖字孺懷號莪村諸昆歷翰林觀察司馬諸官而先生官尤尊舉康熙丁酉

科宰封邱受知河東總督田文鏡從縣令遷歸德守濟東道山東按察使田以苛廉聞天下而公又精神淵著修下而馮人望見畏之以故其事者爭相構嫉凡四落職三對簿沒產頌繫勢洶洶疑不能再脫而公卒無恙卒起用以官壽終知封邱時兩漁戶報盜失一袴一斧公疑之拘漁戶往勘漁戶卽盜也柘城盜供火伴某公疑之命侍者易衣就質盜指曰是也公大笑鞠之乃爲役所教並盜非是守歸德時濰縣民羅二被殺妻張氏訴賀某仇害獄已具矣公廉得張與叔姦手絞其夫賀得釋聊城民傅世友攜兒摘棗傷臥道旁過者詢之曰俺兒聲終氣絕人縛其兒鳴官獄已具矣公廉得樹主所毆呼俺兒者戀其子也兒免極刑爲山東按察

使時郊城某殺人詭家奴自縊獄已具矣公疑券新鞫他奴死者
故石匠非奴也毆非縊也冤始雪爲廣西布政使時粵西桑江苗
叛撫軍獲僞軍師黃某議遣官招安公不可曰彼若執官而欲易
其軍師奈何遂進兵旣而謀者言苗已張繩待矣撫軍欲遷外城
民爲堅壁清野計公不可曰苗不薄會城也若遷民而示之弱將
薄城矣 從之苗果平公雖出田公門而遇事不阿江南災田奏
運穀助賑夸東省之豐也公密奏東省亦災穀宜蠲 世宗疑公
負田恩沽名命白衣領職漕粟江南會雲貴總督尹公繼善入
覲奏山東災重於江南事得釋入爲太常寺少卿 今上登極出
爲廣西按察使尋遷布政使公在山東時劾濟南知府金允彝後

金弟榮爲桂林同知構公於撫軍伺公入 覲劾公公歸官罷家
籍沒矣 天子命廣東總督策楞往訊事得釋起用爲浙江布政
使浙撫常安匿災公爭之常爲總督喀爾吉善所劾疑公反劾公
公官罷家籍沒矣 天子命大學士訥親總河高斌往訊事得釋
起用爲江西巡撫調湖北湖北布政使嚴瑞龍老而眊公不禮焉
嚴構公於總督永興劾公公官罷家又籍沒矣 天子命河南巡
撫鄂容安往訊事得釋起用爲西安布政使未二年薨年七十嗚
呼非公清節無虧百務有條必不能行險衢如康達至於再至於
三循環終身而无咎非生遇 聖明亦不能太陽麗空沈冥必雪
然公能知人用人能得人死力在朝卿貳在外岳牧州郡其賢者

有意氣者靡不通編紵敘慤懃窶人子苟有才必折節下之噓枯
吹生悱惻肫摯未幾所目色提挈輩雲蒸豹變百不失一雖日者
筮人皆自愧不及而公亦頗以能相士爲己任枚弱冠試鴻詞下
第落魄長安天大風雨雪衣縑單衣謁公於順治門里第公與語
奇之次日屬今學士朱公佩蓮來欲妻以女枚以聘定辭而公憐
之益甚每過必賜食且撫孟曰毋寒乎每暑必賜浴且以指攬盆
曰湯未溫宜少待是時公爲太常卿朱公亦未第事隔二十三年
至今枚爲人言猶泣下公葬邗江某原夫人吳氏祔焉子三人長
展衡官同知次倚衡官南安知府再次秉衡蔭生銘曰
誤海爲深疑山必險鬪者嘖嘖使公屯蹇公曰聽焉禮義不愆福

自天祐禍爲道遣人望巨航忽沈忽漾誰知舟子其心蕩蕩人驚
寶鏡忽涅忽磨惟其如斯光乃益多坐如舒雁行必圈豚言無枝
葉腹有精神以人事君可謂大臣而況其才揮忽紛綸謂余不信
視此銘文

右神道碑袁枚撰

元展成

元展成直隸靜海人由歲貢生捐納知州雍正元年選授雲南阿迷州知州四年遷麗江府知府五年遷糧儲道六年擢按察使七年調廣西按察使八年遷廣西布政使十年擢貴州巡撫十一年七月奏黔省新闢苗疆設立重鎮宜豫籌積貯查古州之都江河直達廣西轉運甚便請將廣西潯州沿河倉儲撥穀五萬石運赴古州建倉分貯下部議行十二年疏言冊亨羅斛兩州同雖係佐雜均有錢糧命盜專責與州縣略同永豐州吏目及南籠府經歷亦處煙瘴請將四缺均照苗疆之例三年俸滿卽予升用 從之十三年五月苗叛擾黃平州 上以黃平偏近苗疆設兵較少倉

卒無備 命事竣將元展成交部嚴議六月以清平縣知縣邱仲
照守城不力平越縣知縣楊興道承辦軍裝糧運飾詞推諉均奏
請革職 上以展成未請將該革員治罪顯係徇庇復下部嚴議
八月 高宗純皇帝御極 命湖廣總督張廣泗爲經略督勦逆
苗 諭曰元展成身爲巡撫所在地方不能撫綏得宜耽玩公事
輕視民命甚負 皇考倚任之恩著革職拏解來京乾隆元年九
月刑部問擬遣戍 諭曰元展成本屬中材適值地方難辦之事
兼之文武不和諸凡掣肘遂至蒼黃錯亂莫展一籌雖有應得之
罪尙有可原之情其治罪之處著加恩寬免尋起爲山西按察使
二年擢甘肅巡撫三年二月奏甘肅藩庫有平餘銀兩歲不過千

條金幣日滿司於放兵餉各項內零星翦配湊足三千之數既失
政幣並滋弊端嗣後令將平餘實數報部卽以此項畱充書院費
用得 旨允行十一月奏蘭州係省會之地請將臨洮府知府及
附府之狄道縣移駐蘭州改爲蘭州府阜蘭縣原駐蘭州知州移
駐狄道改爲狄道州蘭州原轄之金縣河州渭源各州縣俱隸首
府其經歷州判吏目典史等官各隨原屬之府州縣移駐下部議
行十二月甯夏地震先經總督查卹阿奏 聞 命侍郎班第馳
往會勘展成績經奏入 上以報災遲延嚴飭之四年五月奏安
西鎮卜隆吉等處屯田向撥屯兵耕種糧石分收給作口糧於折
餉銀內扣除後以借製行裝銀未完因在折餉項下四季攤扣上

季各營屯田被災請將平分糧石除支領春餉按扣一季外餘限以兩年分作七季扣清 從之六年四月奏甘省地處邊陲凡山頭地角沙磧之區獲利甚微應聽民種植永免升科其平原曠野官興水利或民間自出公費引灌認墾者應照例六年起科如開墾尙未及年地有沙灘准報免如所請行六月御史李愷奏參甘肅各州縣匪災 命會同總督尹繼善查勘得實革展成職發軍臺效力尋自請捐修直隸滄州城工 上允之釋還八年 諭曰元展成原係獲罪之人朕宥罪錄用畀以甘肅巡撫重任伊不思感激報效聲名狼籍復被糾參經審明革職治罪朕從寬發往臺站效力又因伊情願修整滄州城工是以准其回籍辦理豈意伊

巧卸臺差回家後借稱變產任意耽延以致工程貽誤卽所變家
資多歸私用情罪甚屬可惡著都統富昌查伊家產變價入官元
展成卽著該都統收管俟城工告竣再行請旨九年故子克莊工
部員外郎克中福建延邵道

右 國史館本傳

日本書紀卷之二十一

表

李如蘭

公諱如蘭字長芳先世由山東臨清州徙山西榆次之聶邨既又徙李邨公就外傅後乃居於省城公爲諸生十有二年初仕補澤州訓導居教職十有一年時世宗初例改主簿以奏對稱旨受聖天子特知遂除高郵州知州復蒙殊恩賜御書墨刻三卷及貂皮藥香等物州當南北水驛孔道多差徭胥吏因緣爲奸設夫頭四人臨時充以流勾所過邨市索酒食擾居民而歲斂民間數千金以出夫役爲名公至禁絕黜胥吏之爲民蠹者清塵案之未理者民於是樂公之政爲州九月擢紹興府知府歷江甯府知府分巡廬鳳潁泗六滁和兵備道雲南分守糧儲道四川按察

使 今上登極晉授通議大夫祖諱登山考諱寶 誥贈如公官
妣皆淑人八年轉江西按察使尋晉官四川布政使公明而有守
所到察民疾苦先其急者除之江甯人民稠雜豪右連結胥吏分
地域爲害公悉得其實命捕之至杖殺數人而將軍所轄兵素隕
目眦視不知所忌公豫請於將軍及繩以法咸懼伏莫敢縱肆四
川例處流蔡聽其擇便往往羣聚都會之地民畏其黠且悍也公
條奏請以打箭鑪松潘衛會理茂二州爲安插定所成都華陽爲
附省縣舊以領銀納米給合城之兵準田科之公言其所苦於
巡撫得上陳均之近州縣凡善政類若此者不一蓋公當 盛朝
以實心爲 國家矜恤人民有所施設咸得行其志又惓惓以儲

士爲念於江甯則鍾山書院於蜀則錦江書院聘師置弟子恆親與講論無異在教職日也其仁及於民雖細必爲之周慮高郵地卑下城西卽甃社湖漕渠貫湖畔湖浩渺無際冬月冰忽合客舟凍於湖之中央惟坐待食盡公思之用小船二剖竹聯而合結其底行冰上俾得登岸至今民以爲法公嘗單騎行見水側白骨暴露詢之率貧民無地營葬公乃購高原以畀民故公之去高郵時民送公出百里外猶哭於道公智勇過人方爲廬鳳道也懷遠至壽州湖港交通互相纏縻自明之季盜所巢窟晝則離散捕魚夜伺客舟過蠶聚而蟻合公欲得其渠首乃乘大舟溯流而上至暮果遇數盜獲一人餘逸去夜半望見林莽間火光復有小船繞大

舟行數次公獨端坐舟中明日歸盜遂盡得誅數人因畫地定界
某地至某地若干船船有編號增塘汛兼立保甲稽查由是百有
餘年之害頓息公生於康熙二十三年十二月十五日至乾隆十
二年九月五日卒於官享年六十有四娶曹氏少公三歲年十六
歸公是歲公始爲諸生前七年公年十三而母張太夫人歿大母
季太夫人繼母劉太夫人皆以夫人孝謹嫺禮儀愛之無間公授
徒夫人則勤女工用佐空乏其後在高郵製葛衫一領逮八十後
猶完好雖宜澣不假侍婢手子若孫以請曰若輩未知愛惜立敝
矣裏衣皆自裁製夫人識大體性寬慈常若無所忤謂見己是而
人非此家庭不親睦之端端多起於婦人故生平未嘗道家庭短

長夫人以子天培官兵備道永祺及冢孫履謙皆官知府時時諭
子孫宜勉守先人之訓蓋公之晚年嘗爲家訓數則所言事君行
己之要道咸生平得之踐履者是以夫人每提撕焉前 誥封淑
人乾隆十六年 皇太后慈壽六旬 誥封夫人後公二十七年
甲午五月五日卒享年八十有八子五長雲鵬候選州同知次天
培卒未進士廣西左江兵備道次永祺甲子舉人四川敘州府知
府次思訓次念祖優貢生候選訓導女子子六孫九曾孫八人曹
夫人卒之明年某月某日崩公合葬於某縣某鄉某原先葬公子
以公暨夫人行狀來請銘銘曰
民之有疾莫或問之公灼見之有鵠有鴟旣翔以嬉公來勿遲惟

聖天子公則是使惠民不怠涂水之谷瀆湖之曲公生嶽嶽載錫之祺允爲女儀寡怒多怡啟厥後昆爲芝爲鶴用荅公勳鉞之識之永勿替之奕世嗣之

右墓誌銘戴震撰

文昭與陽曲李公仲子觀察君天培同乾隆三年舉人宦跡參差不獲以年家子禮謁見公及來公鄉公已不可作矣得觀察君所爲述因略識公之爲人彊敏能任事而一本於仁厚使方伯連率皆如公則宇下之民尙安有失所者乎於是輒次第其事爲家傳以備異日史官之采擇公姓李氏諱如蘭字長芳先世由山東臨清州遷山西之榆次曾祖諱傑人稱長者祖諱登山考諱寶與其

弟璽又遷居會城故遂爲陽曲人公少爲叔父所器年十九補學
博士弟子員試輒高等而不獲舉於鄉叔父助貴令入太學循例
得澤州儒學訓導公是時以暇日於民生利病吏治得失之故已
熟究之矣世宗初年以例當改主簿與同輩三十六人入見
奏對獨稱旨徑授江南高郵州知州州當水驛孔道使舟往來
用夫牽挽以四人爲之長歲斂民間數千金爲顧募費官吏因以
爲利所募夫率流勾水次居民受其擾公至禁絕科斂擇其便令
可飲食宿止單騎上下巡歷弊遂絕州西蠶社湖驟凍合有客舟
膠湖中無可爲計公用小舟二剖竹編聯其底行冰上如轉輪遂
得濟今皆用其法在州僅九月積案悉清吏無所容奸擢浙江紹

興府知府 世宗廉知公高郵之政特換江甯府知府使仍在江
南總督以公熟河務先署知淮安府稽覈一切工程數月事皆辦
始莅本任江甯無賴子恃拳勇結死黨以害民號曰喇子公縛其
首惡數人斃杖下餘黨始戢同坂有將軍所屬兵素縱恣不畏吏
公請於將軍有犯者悉繩以一切之法於是嚙暗相戒不敢肆經
兩考遷分巡廬鳳兵備道兼推正陽關嚴禁苛索而稅益裕自懷
遠至壽州數百里間湖陂瀟漫向爲盜藪商民苦之公欲絕其患
駕大舸僞若過客者伏健役舟中抵暮有數盜援纜而上縛其一
役請急歸否則患且不測公曰此去人家遠歸安得至且示之怯
益非計泊舟不行令眾人皆寢息獨燃二巨燭危坐夜半見火光

隱約林莽間又聞岸上人語切切復有數十小舟劃波下上窺公舟寂若無人者卒疑怪不敢動旦發有跪而請者謂昨所縛者良民公命並縛之以歸具得盜首從主名及窟穴誅其魁數人盜皆陽以漁爲業公令漁船各限以地界悉編記一二數及誰某在其地劫掠者卽坐之又增塘汛責保甲嗣是行旅過者始不爲畏途改雲南督糧道晉四川按察司使初至懼重辟者以數百計公一一平處常達旦不休訖無畱獄向發配人犯任自便以故殷阜之區往往羣聚滋事公上言請以打箭鑪松潘二廳茂會理二州等邊地處之又奏秋審人犯定以期限軍流加等不入於死竊賊問罪不計人數皆一一報可嘗刊決獄近事比以爲問刑之準其

命盜等案牽連婦女者樂免逮有疫者皆給予善藥囚得免瘐死
在川六年調江西未幾授四川布政司使蜀人聞公來歡迎載道
公首重農桑以足其衣食舉鄉飲旌善良以示之勸重倉儲使緩
急有所資鉛銅就地開採以省遠運滇粵之勞費乾隆九年水十
一年饑以經理得所民樂更生而城郭倉庾之被水衝塌微爛者
不以爲吏過吏亦不至於困成都華陽兩縣民向領銀輸屯兵糧
準田科之下戶亦不免公言於大府均之近州縣公所到卹災興
學皆有善政而無若江南四川之在任久故其事爲尤著會瞻對
金川相繼用兵公督率饋餉無乏與然常惴惴慮不免悉索驛騷
之累日夜焦勞馴至於大病以乾隆十二年九月五日卒官年六

十有四階通議大夫父祖兩世 誥贈如公官妣皆淑人娶曹氏
少公三歲 封淑人逮事祖姑繼姑以孝謹聞在高郵製葛衣一
領迨八十猶完衣率手自澣以嫗婢鹵莽爲之易敝也子及孫旣
仕宦時時以公遺訓訓焉卒後公二十七年是爲乾隆三十九年
五月五日也子天培旣貴遇 覃恩贈公通奉大夫 封曹氏夫
人子男五雲鵬候選州同知天培進士歷官廣西左江兵備道永
祺舉人今四川成都府知府思訓念祖優貢生候選儒學訓導女
六劉充智趙泰賈毓寶馮郁黃景緯閻秉升其壻也孫九履謙廣
西潯州府知府由豫以潤附貢生知臨國子監生德申縣學生兆
恩之烜錫璉鳴臯曾孫十一葬於太原縣許丹村之原

盧文弨曰才者德之用也有仁民利物之念而澤不下究功效不見於後世者才詘也公之仁政彰彰若此非才之能充其德者乎世宗早識拔之於未試之初今上復委任之於已效之日遭時遇主位躋通顯設施之大宜已然公當爲學博士時已不錄錄嘗署陽城教諭民怨其令甚聚數千人郊外謀搗竿爲亂公聞變卽夜馳往諭使解散絕口不言功向使公終爲小官亦必有以善其職決不至墮廢昔呂新吾著明職一編自公卿以至庶司百執事莫不有職莫不當盡其職公之於職可謂盡矣漢之黃霸唐之韋丹其後皆至顯官而史列之於循吏舉所重也今之操史筆者儻亦用斯比也有不以公爲循卓之選者乎

右家傳虛文昭撰

國朝書目大員後乃編
卷五十二
疆臣二十三
三

喀爾吉善 子定長 孫鄂雲布

喀爾吉善滿洲正黃旗人姓伊爾根覺羅氏祖喀齊蘭官副都統有傳父凱音布初襲其祖克宜福所遺三等輕車都尉世職康熙十年授御史兼世管佐領二十六年擢光祿寺卿累遷吏部侍郎三十一年改漢軍正黃旗副都統三十三年調滿洲正黃旗副都統三十九年授禮部侍郎 命偕學士碩穆布赴廣東查審雷瓊道成泰慎遊擊詹伯身擾黎激變事得實論罪如律四十年擢戶部尚書四十五年調吏部尚書四十七年以老病致仕雍正元年卒 賜祭葬如例喀爾吉善降襲騎都尉授上駟院員外郎充濟寧關監督雍正元年正月遷郎中三月調工部仍兼上駟院行走

五年襲世管佐領七年以前偕通政使留保會鞠廣東署知州楊以甯勒索耗穀案誤擬罪部議革職得旨從寬畱任尋予開復八年擢兵部額外侍郎九年授左侍郎十年充八旗通志館副總裁十三年三月以驗馬不實議革職畱任六月詔革任九月往盛京收糧乾隆元年三月奉旨仍畱任佐領五月以廢員引見命管理圓明園八旗兵丁九月復往盛京收糧十二月奏言向來八旗臺站兵二八月於中江與朝鮮人貿易每減價勒買牛或借索海葦請嚴禁諭曰朕思八旗臺站官兵有看守巡查之責原無暇貿易且不諳貿易之事嗣後著改令內地商民與朝鮮貿易中江稅官實力稽查務均平交易毋得勒措滋擾三年五

月擢內閣學士七月遷戶部左侍郎協辦步軍統領衙門刑名事務十二月調吏部左侍郎四年兼管三庫事務五年閏六月授山西巡撫六年正月疏言晉省各屬自理贓贖銀兩未有詳報上司者亦有因公動用無案可稽者請令按季冊報二月又言汾水經太原府城西舊有土隄卑薄每夏山水驟發城郭堪虞應培堅厚並於頂衝處隨時搶護 詔均如所請三月疏劾布政使薩哈諒貪婪及學政喀爾欽納賄營私各款 命侍郎楊嗣璘往會鞠得實論罪如律 諭曰此二案朕先有訪聞降旨詢問喀爾吉善不能隱匿始行奏參著該部嚴議尋部議革職 上念其到任未久 詔從寬畱任八月疏言晉省偶遇水旱米價輒騰貴請令各屬

照時價及時平買 從之九月疏劾河東鹽政白起圖貪鄙婪索
白起圖亦以喀爾吉善挾私誣參奏辨 命副都統塞楞額往鞫
論白起圖罪如律十二月疏言煤爲兵民日用必需口外更資禦
寒歸化城等處駐滿洲兵商民輳集附近無薪可採請多開煤窯
仍禁內地煤出口杜帶禁物之弊下部議行七年三月疏言歸化
城上默特蒙古不諳耕種以地典給民人生計窘迫請將民人所
輸銀徵解將軍分給蒙古用度如尙有可耕地一體招民墾種大
學士等議行十二月調安徽巡撫八年三月調山東巡撫六月疏
言本年東省雨澤愆期秋成失望民人多外出謀生而鄰省貧民
亦有轉入東省覓食者請飭地方官勸令各回故土以待本處自

有之恩 諭曰所見甚爲得體各省督撫須當畱心於平居無事之時委曲開導使知敦本務實力田逢年若輕棄其鄉則本業拋荒失所依倚卽國家收養資送亦不得已之計非可恃爲長策也七月又言濟武東三府屬遇旱濟東有漕運又有府倉及臨德二倉存穀緩急可相通惟武定無倉請於登萊二府倉撥運接濟九月又言倉糧買補貴有權衡濟武東三府屬見辦災賑倉穀請暫停買還其豐收價平處令及時買補 上嘉是之九年二月疏言春月糧價騰貴貧民艱食請酌量減糶三月又言東省兵米例係按季本折兼支春季青黃不接米價昂貴兵支折色秋收米價平減轉支本色請以春秋二季本折更換又德州海豐惠民樂陵各

州縣應修城工以代賑及時舉行四月又言濟武二屬麥秋復被旱災見雖賑借糶三者兼行而繼此亦宜廣籌請飭各州縣於豐收之曹沂等府採買接濟並請於豫省沿河州縣麥收豐稔處量爲採買運貯五月請於司庫借支一季餉銀給濟武營兵於冬季爲始分四季扣還以紓兵困均得旨嘉允先是有直隸藁城知縣高對者山東人請試開臨淄卽墨平陰泰安沂費滕嶧等縣山場銀銅鉛鐵各礦事下山東巡撫勘奏至是喀爾吉善奏言東省拱衛神京礦洞久經封禁其地跨四府八縣形勢遠近聯屬開採殊多未便且利之所在眾必共趨恐濟武災區沂曹盜藪別生事端應照舊封禁上遵其言十年二月諭曰前因外省兵糧

缺出惟馬枋係督撫提鎮親行拔補至步糧則由營員驗放往往徇情市恩臨行收錄虛糜糧餉降旨令直省督撫提鎮親自驗放今據喀爾吉善奏稱東省各營募布星羅散處十郡若槩送提鎮衙門考拔不惟道路跋涉且恐久懸名缺請嗣後將臣標所屬一營登州鎮屬濟南城守一營及附近省城之大小營汛遇有兵丁缺出臣俱親加考拔其登寬鎮臣均照此辦理至副將乃武職大員其同城本營及附近營汛之兵丁亦卽飭令該將慎重選拔秉公驗放仍造冊呈報批鎮於按年巡視各營時照冊查對此奏亦屬有見著照所請行并通諭各省督撫提鎮知之十二月以幕友吳芳猷等選廣東縣丞疏請留東補用爲御史張孝捏所糾

諭曰張孝捏奏稱喀爾吉善身爲大臣嫌疑俱不必避則當咨部
銓選何必竟以畱東奏請而於吳芳猷掣選廣東遠省始起辦公
需人之見難免規避此奏亦是吳芳猷著仍補廣東原缺十一年
九月遷閩浙總督十一月 命開復前革職畱任案十二年五月
疏言臺灣漢民流寓日衆匪類肆竊更有闖棍惡徒恣行不法請
嗣後竊案計賊在徒罪以下並眷屬在臺者初犯刺臂責懲交屬
收管再犯則刺面按律治罪並眷屬逐回內地安置其闖棍擾害
地方者審明治罪無論有無眷屬槩行逐回仍行知原籍地方官
交保鄰族正管束不許私渡過臺六月又言臺灣地狹民稠奸僞
百出請自本年五月爲始定限一年在臺民人迎取家眷及的屬

欲往就養者確查給照過臺仍飭內外汛口員弁詳察逾限不准
給照 詔均如所請尋偕巡撫陳大受合疏言閩省倉穀出陳易
新不難於出糶而難於買補春夏碾米給兵秋冬民間碾米完納
官又易穀補倉事多周折不若卽令糧戶交穀官民兩便 從之
七月議覆浙江處州總兵苗國琮儲材備用一疏言閩浙戰船桅
木非巨材不可若如國琮所奏於無稅官山種樹令地方官培養
則須先發工本未免糜帑且必百十餘年始中繩墨恐日久稽查
匪易不若許民自種納課種樹之初得收花息成材之後仍給價
值民視爲己業培護自勤在官不費經營而良材可獲實用下部
議行九月疏劾浙江巡撫常安貪婪各款卽 命大學士訥親往

鞠得實論罪如律十三年四月 諭曰閩浙總督喀爾吉善鎮靜
和平練習吏治其奏參常安一事不以同官稍爲隱護公直可嘉
乃督撫中所少者斯實不負朕倚任之意著加太子少保十四年
二月偕巡撫潘思榘條奏海防三事一內地民往來外洋勾結滋
事應令保甲族長於編查門牌時將戶內所有往販外洋之人或
爲舵水或爲客商逐一登明儻久客不歸及候來候去形迹可疑
並外番人往來其家卽報明詳究一洋船舵水等給照時應逐名
親驗卽客商跟役亦親驗取結至出口如有更易許船戶呈明守
口各員於總照內填註不能遠赴原籍取結者卽取具行保及同
船客商甘結俟入口時驗明原照方准回籍一洋船回棹之六七

八九等月及出行之十二正二三等月責沿海汛弁兵丁晝夜巡查渡載外洋人貨者以私越論 諭實力行之又言福甯府屬之甯海縣舊有東湖地勢平衍與海相通宋元泊明失修臣諭守令等察形勢土性淳士民輸貲合築撥爲世業以出資輕重定分地多寡隄成酌定期限照例分別升科雖國家增賦無多民人實有依賴 諭曰勸課農桑興修水利正務本之圖也欣悅覽之十五年加兵部尙書銜十六年三月 上南巡 恩免江南積逋二百餘萬而浙省向無逋欠亦 特蠲本年正賦三十萬兩 獎賜喀爾吉善詩曰巡吳於越便中過恐誤農桑候正和完賦自緣民俗美不須重勉善催科七月疏言浙省温台一帶被旱儲積空虛應

自開撥運臺穀接濟但重洋往返需日一面先撥廈門廳及莆田
縣倉由廈門乘南風運往所撥臺灣穀廈門就近歸還至臺灣備
貯穀亦應及時以補無俟溫台解還糶價卽先借款於秋成收買
得旨嘉允十七年二月以浙江巡撫永貴辦賑乖謬喀爾吉善
不能匡正且附和部議革職詔從寬畱任七月又以失察司庫
吏侵冒帑項議革任仍詔免十月奏年老懇回京供職溫諭
慰問又奏閩省產米穀少向來採買俱預先公平給價與各省買
自市集徒昂市價者不同本年豐稔宜收買儲備請將見存倉穀
不足五分者買足卽已足五分而本地穀價平減亦動支原存糶
價買補又聞甯山險就近通融撥運無庸赴鄰省採買上是之

十八年正月以督掄福建漳州奸民蔡榮祖等迅合機宜 諭部
議敘加一級十九年四月加太子太保閏四月條奏更改浙省海
塘六事一南北兩岸工程各不相及海防道員宜裁北岸仁和甯
海海鹽平湖四縣塘工歸杭嘉湖道轄南岸蕭山山陰會稽三縣
塘工歸甯紹台道轄各增養廉銀五百兩一海防同知通判宜更
定分管之界北岸土石柴塘鞏固無事興築八仙石至戴家石橋
歸東防同知戴家石橋至談仙嶺歸西防同知談仙嶺至江南金
山界歸乍浦同知統聽杭嘉湖道轄南岸塘工向係紹興府通判
兼管究非專責應將北岸通判改爲南塘移駐紹興府之三江城
聽甯紹台道轄一塘兵宜改堡夫海防營額兵一千內有僅諳修

防不習技藝者應挑四百名作爲堡夫照南河例在堡看守堡房及錢糧於裁撤兵餉內動撥一裁撤之兵宜分撥杭乍兩營海防額兵一千內既改堡夫四百再將諳曉技藝者撥入杭協城守營二百諳曉水務者撥入乍浦水師營一百餘均裁汰或歸農或補附近各營缺額一杭乍兩營宜增設備弁杭協城守營僅一都司應將海防左營守備改爲杭協城守營中軍守備乍浦水師應分左右兩營將原設守備改爲左營海防右營守備改爲乍浦左營其千把總外委各員分別酌撥一官兵裁贖經費宜歸併塘工備用海塘每年額設引費萬餘兩備歲修不敷仍題動正項今官兵既撤節省各項銀兩應歸入海塘經費項下遇有工程無須復動

正項部議 從之先是 上以八旗生齒日繁 恩許京城漢軍人等改歸民籍各謀生計各省駐防漢軍一體准行所遺缺卽派京城滿洲兵往補 命喀爾吉善會同福州將軍新村籌議七月 會奏應辦事宜六條一願爲民之漢軍無論世族閒散准入民籍一願爲民而別無生計惟借糧餉贍養者分派近省綠營坐補糧缺一漢軍甲兵儘馬甲先改一半以便滿洲兵坐補一漢軍原住房屋均酌給新派滿洲兵一漢軍水師兵令滿洲兵漸次學習頂補一派出京城滿洲兵應分次分路行走又言福州駐防兵旣改滿洲則協參防校等缺應改用滿洲人員請於八旗滿洲見任佐領以下等官及隨旗世職內揀發來閩與漢軍人員交代任事大

國朝書林典故卷一百一十一
學士等議行二十一年以查審前任浙江巡撫鄂樂舜勒派鹽商
銀一案論擬失實部議革職 詔寬免尋奏浙江省海塘爲杭嘉
紹三府田廬攸關年來水勢南趨北塘鞏固南岸紹興所屬尤險
請於朱家樓楊樹下一帶照海甯魚鱗條石等塘建石塘四百丈
其平穩處接築土塘二十丈塘後幫築土戩以護塘身其原有之
土塘及鑲修之柴塘畱資外護不致頻修糜費如所請行二十二
年二月 上南巡時喀爾吉善子定長任貴州巡撫 賜喀爾吉
善詩曰海疆澤國久聲騰坐鎮宣風嘉汝能連帥威儀今陶侃一
家父子昔韓宏行春惠化吾方覽作兩平章民久稱供頓何須事
華飾山川韶秀此邦勝七月 諭曰喀爾吉善奏見患痘疾不能

視事將闕防暫交將軍新柱護理披閱之下深爲軫念著太醫院
派外科一員令伊子員外郎定敏帶同馳驛前往診視並加賞人
蔘一斤以爲藥餌之用仍傳諭喀爾吉善伊年老患病不妨寬以
時日從容調理全愈後再行視事不必遽請解任副朕優眷至意
是月喀爾吉善卒遺疏入 諭曰閩浙總督喀爾吉善品行端重
練達老成久任封疆勤勞懋著前聞偶患熱疽特命伊子定敏同
御醫馳驛前往診視並賜蔘餌以冀速痊乃計程尙未到閩遽爾
溘逝朕心深切軫悼喀爾吉善著入祀賢良祠以昭眷念賢臣之
意應得卹典該部察例具奏尋 賜祭葬如例諡莊恪長子定長
由監生於雍正十三年授內閣中書乾隆三年遷侍讀五年襲世

管佐領九年授江南徐州府知府十二年遷淮徐道十三年遷山東按察使十四年遷陝西布政使十五年擢安徽巡撫十六年調廣西巡撫十七年調山西巡撫十八年二月調署貴州巡撫九月實授十一月條奏武科不許本省文武官員子弟頂食名糧應試又奏見經調任湖廣總督永常條奏鄰省會哨事宜奉 旨籌議臣查貴州與鄰省聯界幽僻之地苗夷環處從前未加兵威若與鄰省酌辦會哨雖不必張皇其事而苗性多猜難保無別生事端應請停止大學士等均議如所請十二月疏劾提督丁士傑以書囑調知縣馬中驥 上嘉定長據實陳奏持正得體降士傑廣西左江鎮總兵十九年九月請以節省棚馬公費銀交地方官平價

買穀借給撫標兩營兵以資接濟又言黎平府屬之古州城東北江水泛漲爲患乾隆九年城北已築石隄而城東未及興舉請接築報 聞二十年四月題請原任黔西州知州黃秉忠入祀名宦諭曰定長此本甚屬錯謬黃秉忠乃黃廷桂之父計其宦黔以來六十餘載該州士民親見之者尙餘幾人今日之合詞呈請豈出輿情公論且果有遺愛在人何以久未題達明係因黃廷桂見任總督且又與伊貴州連界瞻徇市恩耳定長著嚴加議處尋議降二級調用 詔革職從寬留任二十一年疏言本年雲南廠運銅愆期黔省積銅見足供鑄通融籌辦請將上年所買滇銅五十萬斤停運來黔先儘解京備用得 旨嘉允二十二年二月上

南巡定長請入 覲 命便道至浙江省其父喀爾吉善 賜詩
曰迎鑾當入覲述職並甯親此意原嘉爾推恩詎一人西南門戶
固禮樂獐苗新撫遠惟安靜庶因福及民五月 諭偕尙書劉統
勳往鞠雲貴總督恆文勒屬員買金短價及縱容家人收門禮一
案得實論罪如律卽署雲貴總督六月調山西巡撫未赴任尋丁
父憂十一月授副都統銜 命赴西路軍營督辦屯田二十三年
以委員擒賊未獲部議革職 命以見在品級仍畱屯所辦事二
十五年補兵部右侍郎二十六年授福建巡撫二十七年疏言常
平額穀例原借糶兼行應於青黃不接時先儘積貯最久之穀定
價出糶秋成買補農民願借者聽 詔如所請二十九年三月請

移泉州府西倉同知駐就近之石獅街又言新例禁絲出洋絲價
低昂總視蠶事豐嗇徒禁出洋無益請照舊弛禁 從之七年以
提督黃仕簡奏參總督巡撫收受廈門洋行規禮事解任尋 諭
日前以此案關係督撫婪索多贓因命舒赫德等前往查辦今所
奏既無確據定長發價購物亦沿習舊例初無不可輕貸之處著
從寬仍畱原任十月疏言閩省常平倉穀較他省數本充裕而遞
年收捐監穀額貯益增見值平糶時請以積存溢穀遇應行買補
各邑一水可達者通融抵補不必糶價解司 上嘉允之三十一
年二月遷湖廣總督十月疏言緝匪惟在地方官文武員弁認真
畱意申明賞罰楚省各屬見派眼目不下七十餘名徒多無益應

槩撤回 上是其言先是湖南桂陽州民侯七郎毆斃大功服兄
侯嶽添知州張宏燧誤以七郎之親兄學添爲正兇按察使宮兆
麟駁審宏燧護原招稟辨布政使赫昇額力庇宏燧讞久不決至
是事發 命侍郎期成額往會定長嚴鞫得宏燧及赫昇額執拗
黨庇狀均請革職 上以赫昇額身任藩司命案非其專責何以
偏袒宏燧必別有結交情弊諭再研鞫三十二年正月究出前任
巡撫李因培與赫昇額曾授意宏燧爲己革武陵縣知縣馮其柘
彌補虧缺事因培赫昇額宏燧其柘均擬斬如律二月部議定長
失察應革任 詔免四月疏言雲南見在用兵需人造船廷議於
湖南水師營內選送查向來水師營船係雇工成造今雲南需船

孔亟若僅於水師營內選送恐有貽誤見飛飭洞庭協及岳州營
儘數發往仍於巴陵覓諳練工匠續送六月以濫用竹篔送過境
兵役議革任仍 詔免三十三年卒 諭部議卹三十四年署總
督高晉奏荊州副都統石亮老病請勒休 諭曰石亮衰庸戀棧
已非一日定長在任時豈竟毫無聞見而一味姑容徇庇其膜視
公務不問可知前此朕念其平日尙屬勤慎降旨加恩予卹今觀
其開葺若此卹典應卽敕部停止使封疆大臣知不實心奉公之
咎雖身後已邀寬典亦當亟行追正以示懲創定長長子台布襲
騎都尉職曾任乾清門侍衛次子台斐音見官山海關副都統

右 國史館本傳

鄂雲布

鄂雲布伊爾根覺羅氏正黃旗滿洲人祖喀爾吉善官至閩浙總督自有傳鄂雲布由官學生考取繙譯筆帖式乾隆四十四年補步軍統領衙門筆帖式四十七年授主事四十八年升員外郎五十一年京察一等五十二年授陝西道御史五十四年調京畿道御史五十七年遷戶科給事中五十九年調工科掌印給事中六十年京察一等記名嘉慶元年二月授陝西漢中府知府是月諭曰新授漢中府知府鄂雲布係喀爾吉善之孫定長之姪家風具在人亦明白著卽升授甘肅西甯道八年擢安徽按察使九年調江蘇按察使十年閏六月遷江蘇布政使九月江蘇學政莫晉

奏鄂雲布玩公護短蘇州藩司有因解學租銀兩催提未解回護
書吏舞弊 命兩江總督鐵保查奏十一月鐵保奏查鄂雲布批
解學租實無遲誤惟於莫晉初次催提時因庫存不敷不先申覆
實屬疏忽應將鄂雲布交部察議 上寬之十二月以失察蒙宿
匪徒余連徐茂修等滋事部議降二級調用 上念其到任未久
改爲降三級畱任十一年四月以江蘇按察使任內失察所屬地
方細溺多命案部議降二級調用奉 旨改爲降三級畱任九月
護理安徽巡撫十二月以安徽按察使任內失察阜陽縣丞問統
傷斃命案會讞失入部議降二級調用得 旨改爲革職畱任十
三年二月以委署首郡知府與尙未到任之安徽巡撫董教增札

商 諭曰鄂雲布在皖年久屬員賢否自得稔悉與隔省巡撫馳
札遠商殊屬非是鄂雲布身任大員乃於公務心存推諉著傳旨
申飭三月奏嘉慶七年宿州賊匪滋擾經前督臣費淳撫臣阿林
保請於該州之南平寨添設撫民同知將澮河以南之刑名錢穀
事件歸同知管轄 諭部議准在案查南平集週圍三四里添建
城垣倉庫監獄占甲氏房不少況澮河以南之糧戶亦有田在澮
河以北今需兩處分輸亦未能稱便該處設立同知原爲專司緝
捕起見請將南平同知定爲鳳穎二府捕盜同知責令專司緝捕
其刑名錢糧仍歸宿州管理毋庸添設倉庫監獄城垣下部議行
五月奏宿州護城壕隄縣互八九里建自前明今因年久失修水

道不通設遇黃水驟至在在堪虞應將壕隄二工同時挑築以資捍衛 上如所請行九月安徽省秋讞緩決各案經刑部改情實者十起 諭曰該省刑名重案問擬失出至十起之多實屬有心寬縱兇徒不矜良善非尋常失出可比該護撫及承辦之員咎有應得著傳旨嚴飭仍交部加等議處尋議降一級調用 上從寬畱任十四年五月擢貴州巡撫九月奉 恩旨開復降三級畱任二案十二月 上以鄂雲布年老著來京另候簡用旋因交卸起程太速奉 旨交部嚴加議處部議革職 上加恩以六品筆帖式用十六年三月 賞給藍翎侍衛爲葉爾羌辦事大臣七月卒于多賚前任廣東惠潮嘉道多歡太僕寺候補主事

右 國史館本傳

三

國朝耆獻類徵初編卷百七十二目錄

疆臣二十四

開泰

潘思榘

李錫素

吳士端

孫紹武

常鈞

阿思哈

舒輅

周人驥

國朝耆獻類徵初編卷百七十二

通奉大夫前署江西巡撫江西布政使司布政使湘陰李桓輯
疆臣二十四

開泰

開泰滿洲正黃旗人姓烏雅雍正二年進士改庶吉士五年授編
修充陝西鄉試副考官九年九月充日講起居注官十一月遷侍
講因侍班錯誤 敕黜翰林在乾清門行走十二年仍授編修乾
隆元年遷國子監司業充江西鄉試副考官二年提督湖北學政
四年調安徽學政八年正月遷祭酒 命稽察右翼覺羅學旋提
督江蘇學政二月擢內閣學士六月授兵部右侍郎仍畱學政任

十年七月充經筵講官十一月授湖北巡撫十一年七月疏言社倉較常平尤近於民弊亦易滋湖北社倉穀麥五十二萬餘石散在村莊恐多虧缺委員徧查又滋擾累應飭道府按季巡查所至便卽抽驗如有侵那責社長勒追將失察州縣揭報庶不至有名無實得旨嘉獎十月調江西巡撫十三年調湖南巡撫十四年三月疏言臣接部咨各省常平倉穀以雍正年間舊額爲準湖南溢額穀五十五萬餘石令糶價提貯司庫臣查雍正年間舊額貯七十萬餘石湖南素稱產米年穀順成各縣舊額原不慮匱乏而網繆未雨先事應圖查乾隆三年撥運福建四年撥運江蘇二年至八年各省赴湖南採買通計一百七十五萬有奇若將溢額穀

盡糶遇本省需用及鄰省糶撥必至倉儲缺額買補非易 諭曰
可謂畱心積貯湖南既屬產米之鄉則多貯以資鄰省實惠更爲
有益但不必再加如此則得矣十五年九月有壽掄元者詐稱南
河候補同知赴永州採買河工木植布政使孫灝諭永州府協同
照料尋得其假冒狀開奏以孫灝未奉公文遽發諭帖殊爲未諳
具奏 諭曰壽掄元情詞閃爍又無本地咨文其爲游棍誑騙無
疑孫灝不卽行拏究乃混給諭帖令地方官照料及其蹤跡漸露
始行訪拏明係孫灝初顧情面後恐牽涉方行查究就此情節開
奏理應指參乃但稱未諳故爲寬其詞說孫灝係開泰門生其曲
徇情私巧爲庇護不問可知此等伎倆焉能逃朕洞鑒開泰孫灝

俱交部嚴加議處以爲師生黨比者戒議上 詔革職畱任十二
月調貴州巡撫十八年六月疏言古州新疆歸化設屯募軍每戶
名授上田六畝或中田八畝下田十畝安屯之初原足供一家口
食今食指日多將來戶口愈增旣無田可加又別無安置之處生
計愈難查新疆營汛額兵較廣向例屯戶不准入營然以額設營
糧養屯戶事屬兩得嗣後願食營糧者一體挑兵屯軍缺卽於本
屯及別屯子弟內揀補其革退屯兵皆逐回原籍免致窮迫滋事
得 旨獎其辦理得宜九月授湖廣總督十九年四月加太子少
傅二十年四月調四川總督二十二年五月疏言夔州府屬石碛
司東接楚省南北及西與忠州之彭水萬豐等縣犬牙相錯廣數

百里請移夔州同知駐石碛經理錢糧詞訟並移駐萬縣布郭里
巡檢以資差遣得 旨允行二十三年四月金川與革布什咱搆
釁圖其吉地官寨開泰同提督岳鍾璜檄游擊楊青都司夏尙德
等分駐章谷泰甯相機排解令鄂克什雜谷土司赴援革布什咱
綽斯甲布攻金川金川退至丹東遁去旋復圍攻丹東吉地革布
什咱土司色楞敦多布奔泰甯求援開泰復檄各土司出兵相助
調雜谷土練千以五百同梭磨等土兵駐丹壩五百同明正木坪
等土兵駐章谷泰甯調黎雅峨邊兵二百赴打箭鑪彈壓諭金川
酋郎卡卽撤兵 諭曰向來番目相攻原可不必繩以內地官法
此次金川與革布什咱興兵搆怨原不過因結親起衅情形本與

蠻觸無殊惟開泰分撥土練彈壓打箭鑪等處一節未甚明晰該地係通藏之道如止巢穴中自相劫掠於打箭鑪有何干涉但開泰岳鍾璜素非好事之人其所陳奏慮其偏於息事斷不致過於張皇果使該酋之意不在革布什咱將爲邊圉滋擾伊等別有訪聞蹤跡必須徹底辦理具實速奏候朕另行降旨五月疏報章谷土千戶巴旺土司會革布什咱敗金川及附金川之布拉克底土舍兵金川番焚所占吉地官寨遁全復革布什咱地畱綽斯甲布明正土司兵分駐之送色楞敦多布歸寨 諭曰金川所據革布什咱官寨既經明正綽斯甲布等土司全行奪回可見番民挾仇攻擊之事原所應有殊不必以內地官法繩之該處文武果能曉

諭約束可以甯輯固爲甚善不則惟有以番攻番之一策惟須靜鎮以處之耳七月加太子太保二十四年十月以松潘鎮總兵楊朝棟年近七十恐難勝任見赴京 陛見其優劣自在洞鑿與岳鍾璜合疏以 聞 諭曰此奏甚爲有意取巧督提職司節制各鎮松潘尤近邊要缺該總兵平日果否勝任應畱心體察具實奏聞方見實心整頓乃於該總兵赴京前亟先爲此奏聞明係從前瞻徇姑容今當陛見在卽其衰庸之態難逃洞鑿故爲合詞入告計圖卸責此等伎倆卽朕臨御之初亦不易輕售况欲嘗試於閔事二十餘年之後耶開泰在督提中原屬可任之人何以竟爲此奏殊不可解著交部嚴加議處部議革職 詔從寬畱任二十六

年四月奏報金川酋退還侵占丹壩土司地九土司亦撤兵二十七年二月奏土司承襲例取鄰封土司甘結金川酋莎羅奔死姪郎卡應襲素與鄰封革布什咱綽斯甲布小金川不和毋庸取結諭曰開泰等奏金川襲封土司毋庸取具鄰封土司甘結意在直捷簡便所見亦是然不爲郎卡等明白宣諭恐郎卡不知懷恩轉疑開泰等有意遷就一似徇其所請竟不待各處甘結者然或致漸生驕縱殊非控馭之道開泰岳鍾璜卽曉諭郎卡等謂鄰近土司與爾素有嫌隙若因承襲之初照例取結伊等定不樂從今據爾懇求免其輾轉取結以示嘉惠之意但襲職後或忘恩滋事在鄰近諸部斷不能相安而封疆大臣亦斷不肖爲此稍貸方足

令其傲惕於體制亦爲允協十一月奏金川占據丹壩土司瑪讓
地方綽斯甲布土司往援金川退據山梁嚴檄詰責郎卡復令守
備溫欽等馳往查辦 諭曰開泰等奏郎卡滋擾丹壩見飭守備
溫欽等語一摺未免先事預存調停之見於辦事機宜未能領會
該督等前於乾隆二十三年奏金川與革布什咱有結親構釁之
事明正綽斯甲布兩路進攻屢經傳諭不必懲以官法惟有以蠻
攻蠻之一策或令綽斯甲布小金川分據其地而彼時開泰岳鍾
璜不能體悉朕旨未免意存姑息但取解紛了事以致養成驕縱
此時郎卡初爲土司卽已垂涎丹壩其明驗也殊不知此種狼子
野心卽使目前詰責認罪又安能保其永遠受約安靜乎土司內

如革布什咱丹壩等類其力之強弱雖殊然皆可借此以爲郎卡之敵如果因抗仗攻擊竟將郎卡剿滅豈非策之最善者著傳諭開泰等斷不可有先事部署官兵協力仗助之計致涉張皇所有鄰近士兵旣集或卽協力剿除分有其地正可聽其各自爲計番境轉可相安儻各土司不能併力剿除而郎卡仍怙惡不悛有必須另行辦理者則亦非該督提等以川省綠營官兵所能任其事開泰臨時據實奏聞候朕酌辦此時只須靜以聽之不可調派紛紜徒擾番人觀聽也二十八年六月奏言九土司五月同時並舉綽斯甲布小金川兵分三路進攻丹壩梭磨卓克采從噶克兵擊敗金川奪取凱立葉山梁石卡革布什咱兵攻取洛爾察地方巴

暗土兵殺布拉克底哨探兵臣鼓勵各土兵互爲聲援伺隙攻取
諭曰開泰等奏九土司攻打金川所辦未得覈實開泰向於郎
卡遣人赴省時每許進見常加撫慰而隱縱綽斯甲布等攻擊在
郎卡素性狡黠此等行爲豈能掩其耳目甚非天朝開示誠信駕
馭番夷之道郎卡既於綽斯甲布等屢肆欺凌眾土司合力報復
原不爲過督臣旣聞其事惟應明白宣示綽斯甲布等以郎卡旣
得罪於眾土司爾等悉銳往攻儻能剿滅其巢亦免爾等後患但
不必官兵援應而於郎卡來人嚴爲拒絕且切諭以爾旣結怨鄰
境誰肯甘心爲爾蠶食必將連集各寨奮力復讐此亦爾所自取
我等斷不肯曲爲庇護如此則郎卡旣不敢恃以逞強而綽斯甲

布等亦可洩其積忿於事理方爲兩得乃開泰旣用請以籠絡耶
卡復隱爲援助各土司殊失控制大體尋得 旨開泰庸懦無能
種種謬誤深負簡任著革職復賞給頭等待衛前往伊犁辦事十
月卒

右 國史館本傳

潘思渠

潘思渠江南陽湖人雍正二年進士改庶吉士三年挑選分發刑部學習六年補主事累遷郎中八年授廣東南雄府知府十三年遷海南道乾隆二年調糧驛道四年遷按察使六年疏言廣東有狼黎猺三種狼人世居高涼爲高州府茂名縣地今附民籍讀書應試者多猺人亦輸稅歸誠設猺童義學爲訓課黎人僻處海南之瓊州府情更樸實第以不識字畫數目往往爲土豪欺擾查瓊州府屬惟文昌縣無黎瓊山澄邁臨高會同樂會五縣黎人尙少崖儋萬陵水昌化感恩定安七州縣黎人最多生黎居深山餘多與民錯居非苗猺別居尙寨與民人不相往來者比向與民貿易

語言相習並有通曉官音者更非苗獠語言不同者比請於崖僑等七州縣照獠童例設義學擇師教誨能通文義者許應試部議從之七年遷浙江布政使八年六月疏言常平倉米穀春發秋斂奉行已久但收成有遲早所謂青黃不接期難槩論有司不揆緩急甫交春令紛紛開糶徒爲牙行囤積吏胥侵漁小民未霑實惠及屆青黃不接每至動糶逾額且減價過多博市井一時之譽不顧將來買價不敷迨秋成歸補非存價觀望冀省耗折卽抑派爭買致昂市價應請按時酌辦甯紹台金衢嚴溫處八府俱四月開倉糶借兼行杭嘉湖三府六月發糶價平卽止毋容逾額多糶致虛倉貯總期出糶以時民食有濟 諭曰所奏俱悉因時制宜

實力爲之九年六月疏言農政水利爲先浙省土狹民稠全賴溪湖之水容蓄灌溉而民間墾占甚多如餘杭之南湖會稽之鑑湖上虞之夏蓋湖餘姚之汝仇湖慈谿之慈湖向稱巨浸今已彌望田疇由地方官稽查不力地棍勾通縣胥一報墾卽濫准升科且墾地勢處低窪并將舊隄開私行損壞貽害農田非細請嗣後報墾田地飭地方官親勘如果非官湖無礙水利方准升科如占湖爲田卽剷除禁止查勘不實嚴定處分仍令每歲農隙親勘湖隄如有私墾者責令挑復按律治罪庶不至水道日狹於旱澇有防大學士等議行七月疏報衛嚴等屬猝被水災臣稟詳督撫動項撫恤諭曰此等事正汝地方官切已要務必毋濫毋遺以期實

惠及民耳思桀尋疏陳給發籽本並分別加賑狀 諭曰今歲浙省辦災巡撫常安有諱災之意實難爲汝也十年十月疏言定例紳衿非公事不得干謁地方官惟在籍候選之吏員由胥吏出身素無學術一經役滿考職每恃符生事在通都大邑尙知斂戢若偏僻州縣搢紳寥寥伊等自附冠裳私謁地方官包攬干求丞簿典史視爲同氣益相交結鄉民無知遇事涉公庭卽浼剖分料理伊等昔充吏書衙門情熟欺詐招搖無所不至請凡考職吏員在籍止戴頂帽不許僭穿補服干謁地方官違者照違制律治罪並嚴禁地方官與之往來部議如所請行十一年授安徽巡撫奏鳳陽潁州泗州被災得 旨加賑十二年六月疏陳調濟災區三事

一勸課農桑以警游惰鳳穎一帶之民情窳成習臣上年徧歷查勘時當冬月水退二麥雖已播種而人工不知耨鋤培壅所過村莊林木甚稀蔬圃甚少臣諄諭各守令將歷年論旨勸課各條摘錄勸導并令州縣官隨地督察或藝桑麻或植蔬菜審土之所宜凡可佐小民日食柴薪之用者悉令試種勤者獎之不率者戒之卽以地方民情之勤惰定有司勸課之優劣一疏濬溝洫以備旱潦鳳穎地分三等一爲岡地最高一爲湖地稍低一爲灣地最下灣地連大河水發難施人力湖地則外仰中低積潦爲湖下流濬渠疏洩卽可涸出栽種岡地水雖不及而絕少溝池交秋缺雨卽苦曠乾間有傍山麓爲陂塘蓄水灌田者如壽州之安豐塘懷

遠縣之郭陂塘鳳陽縣之六塘均應及時修築臣思上年賑濟動帑百餘萬金若於平時酌動數百金陸續修築就一州一邑一鄉一村之水利規畫經理則民間減一分荒歉卽多一分收成而朝廷亦省二分帑金縱遇偏災亦可以工代賑一舉兩得一稽覈流移以正風俗鳳穎民風樂於轉徙豐年秋成事畢二麥已種輒攜家外出春熟方歸一遇災歉俟地方官勘給賑票輒量畱一二人在家領賑餘悉潛往鄰境希圖資給口糧劣俗相傳在家領賑爲大糧在外畱養爲小糧沿途資送爲行糧至有一家領三糧者本業拋荒人無固志地方官過於姑息遇流民不加區別槩予資送卽小有生事亦寬容不究惟送令出境幸免無事狡黠者遂成羣

結黨多索口糧僻遠鄉村強乞滋擾臣思地方水旱偏災時所恆有嗣後應查明實係災民方准資送藉端生事者究懲 諭曰此乃固本之務歷來安省巡撫無有言及此者朕觀此奏甚嘉悅焉勉力妥爲之以俟汝三年之成也九月調福建巡撫十一月思桀奏將安徽學田囚田義田三項照江蘇免學租之例蠲免疏下軍機大臣查議以江蘇並無蠲學租例今思桀並未及陳奏先行扣免且遲至十一月始有此請邀譽取巧應將蠲項著思桀賠補所引之例仍令明白回奏思桀尋具疏引罪 諭曰潘思桀回奏學田免租一摺理屈詞窮支吾掩飾伊自奉命調任福建以後惟事干譽以博人之去思辦理諸事不似從前伊奏請交部嚴處著免

其交部直隸應修城工甚多著那蘇圖照陳宏謀之例指定一處令潘思桀出貲修理效力贖罪以爲巧於邀譽之戒閩省兵悍民驕巡撫乃封疆表率若此一味沽名何以澄清整肅著傳諭潘思桀令其洗心滌慮痛改積習如仍不實心必加重懲愆之尋罰修涿州城工十三年閏七月疏言閩省錢糧自乾隆元年至十一年積欠十餘萬兩見在設法清釐查賠納之糧因從前田業授受時業戶不及推糧過割致田去糧存或貪得多價減則出售比及子孫並不知產售何人田坐何處力難賠墊漸至逃亡又屯糧歸縣徵收冊籍混淆糧多隱漏若不及早清查歷年積欠難完將來逋欠無底查糧從田出既有賠糧之戶卽有無糧之田豈可得業者

任其脫漏無業者代其追比印官果能確查的戶責令推收承納務使糧歸於田民欠自有著落 上是其言十四年二月疏言臣清查積欠細加釐剔知刁民得以拖欠之故一在屯田戶名不清一在寺田租賦不一屯糧一項原係衛所徵收順治十五年裁衛所歸廳員管轄雖名軍戶實係民耕乾隆元年因廳員追比不前經前撫臣盧焯題明歸坐落州縣徵收更正名冊詎刁民意存朦混仍列故軍姓名致難催比應確查的名覈實更正寺田一項始自明季管業之人僧民夾雜半屬民買僧田一經追比或稱寺廢僧逃或稱租額過重藉詞拖欠應分析查明將實係寺廢僧逃者通詳立案官爲經理不復派累里中 諭妥協實力爲之五月疏

言福州府城外西湖爲東晉郡守嚴高所開週二十餘里建閘蓄
水溉田數萬畝歲久淤墊幾成平陸臣相度勸導於上年十一月
鳩工至正月告竣築隄千三百餘丈建閘二水已深通足資蓄洩
又福清縣所轄郎官港法海埔俱有海灘淤地可墾爲田向因築
塍費重兼患土豪阻撓致棄自然之利臣親勘招墾築隄法海埔
可得地千三百餘畝郎官港可得地八百餘畝俟隄竣覆丈循例
升科 諭曰勸課耕農務民之本也十七年卒 諭曰潘思渠簡
任巡撫實心黽勉今患病溘逝深爲軫惜著照江蘇巡撫徐士林
之例入祀京師賢良祠以示優卹其遺摺內所請將封典貽贈之
處著加恩賞給一品封典所有應得卹典亦加恩照一品之例賞

給尋 賜祭葬如例諡敏惠

右 國史館本傳

特贈光祿大夫巡撫福建副都御史敏惠潘公葬在常州陽湖縣定東鄉姚官巷之原今大學士同郡劉公實爲文以藏諸墓初公之薨 天子眷念封疆勞績 特于祭葬易名晉階列祀賢良用一品例 恩封三世粵自癸酉公葬至今乙酉十有三年 聖駕南巡必蒙 恩遣大臣卽家致祭優渥之典在古希邁茲將有事墓隧之刻公之子振瑩振煥來告曰以墓前石相累此先大夫易簀之言也今者三拜 盛典尤賁泉壤凡所以樹墓上而垂來葉者不可再緩敢申遺命以請余辱交公久感臨沒之屬又以賢嗣

之勿忍忘也乃不辭謹爲序其實而繫以銘序曰公諱思桀字絜
方別號補堂常州陽湖人其先出宋武惠公有判常州而卒官者
爲繼周公始占籍宜興明洪武初徙郡城曾祖諱毓靈曾祖妣吳
氏祖諱禹謨祖妣沈氏考諱滋漸天長學諸生妣陸氏潘在郡城
者累世隱不顯後以公貴自祖以下皆 贈如其官妣皆 贈夫
人公勤學慨然有志於用世蚤歲食餼雍正癸卯舉於鄉甲辰成
進士選庶吉士明年改刑部陝西司主事丁家艱歸起復補主事
升貴州司員外郎充己酉順天鄉試庚戌會試同考官轉見審司
郎中出守廣東之南雄考最擢海南兵備道調糧驛道就拜按察
使遷浙江布政使奉 命巡撫安徽移鎮福建居五年薨於位此

公之所履也公性敏決明法律練習吏事力持大體而汲汲以宣
朝廷德意經國澤民爲務故所至辦治而輿望歸之其在西曹
獄常至夜分飢則探懷餅淪水而食每隨尙書入奏事先帝
嘉之在南雄大水將敗城公禱神危橋俎未徹而橋崩露宿埠坵
督吏卒縛笮濟溺者在瓊深入五指山安輯黎眾劾一帥一守之
殘瓊人者泊乘粵臬飭綱紀端風俗捕貪蠹鉏豪猾所部肅然而
理冤獄尤多會久旱奸民數百爲羣入市強取米公時方疾起坐
堂皇立捕數十人至痛杖荷校以徇守藩時甲子浙東大水壞田
廬漂人畜無算公出臨錢塘江收流棺瘞浮尸發運銀粟分往賑
恤其秋蕭山民洶洶渡江公曰民飢當哺鬪則亂民也嚴懲之自

是迄麥登無一人敢譁者其撫安徽也當河決淮淝之後鳳潁泗
皆災公前後請發庫廩百萬有奇拜疏親行督賑冒風渡洪澤湖
舟幾覆不爲動歸奏調劑三事曰課農桑疏溝洫稽流移其言溝
洫尤切得旨俞允將次第舉行而拜移閩之命行矣閩爲嚴
疆庶政繁委民情囂獷相尙以鬪訟盜匪數起公廉得其主名髮
櫛而草薶之晝見官屬夜披案牘早則步禱潦則按恤又以農隙
巡行海防周閱戰艦朔望入書院與諸生講說經藝如是者歲以
爲常勞積疾作而不少止也在閩四年餘一朝京師六蒙召對
中外知上倚任益專早晚期公之枋用矣公之所莅以水利爲
農田本嘗欲大治餘杭之南湖上虞之夏蓋湖壽州之安豐塘上

江之滄澗淝茨沙灘諸河繪圖商功皇然爲斯民綢繆牖戶計
皆以離局中輟惟修築甯德之東湖開良田萬畝復福州之西湖
溉其旁數千頃幸得竣居恆與客言嘗引以爲憾也公爲人厚重
寡言笑未嘗見喜愠之色臨大事能斷恤吏民若一體處公務若
營其家愛士育才惟恐不及於世閒嗜好泊如也故臯復之夕賓
哭於館吏哭於次士哭於塾民哭於塗卒哭於伍其感人之心如
此夫以 天子之嚮用海內之慕仰喁喁者方跂以爲相而公齒
位遽訖於是豈修短之數不繫於人耶公治諸經尤邃於易獨能
探荀虞之旨嘗謂後世知有漢學者賴李鼎祚易解存耳自建節
卽不攜眷之官公餘日閱注疏及徐氏經解箋釋塗乙出入一童

抱畢牘自隨有得卽疏之每語學者曰學必求有用凡象緯方輿
厯算鐘律水利農政何事不當畱心又曰士君子當以砥行立身
爲要若詞章撰著抑末耳故自去翰林益講求經濟實學雖以成
之蕪陋一鐙熒熒相與考訂論辨反復如老書生其虛懷好學有
古人所難者公生於康熙三十四年正月十九日歿於乾隆十七
年二月十七日享年五十有八配陸氏 封夫人子二長振瑩見
署來安知縣次振煥太學生來速文者也俱陸夫人出女一適同
里錢郁側室沈氏出撫女二一適江陰曹姓一適江都許式紹孫
一松筠邑諸生公起寒素幼從師讀書嘗至市易薪米或遇雨雪
衣履盡溼逮後通籍洗手奉公終身非其賓客食不重肉衣或澣

紹丁卯以院撫監臨江南鄉試日進供給視舊減過半鄉人榮公而彌佩其清節也公之它行具詳劉公所作墓志中余惟就素所稔知者書之竊歎公之長德鉅望中年奄逝未究其用世之志爲天下惜也銘曰

晉陵之墟厥生偉人蓄極迺宜其祉宜蕃烈烈潘公爲時名臣原本六籍蔚爲經綸清勤果恪立朝當官于皖于浙于粵于閩甘棠蔽芾謳頌在民公之守郡召信杜詩公之建節韓滉孔殘天子之毗儒者之師台輔之望方鎮之規胡奪之年未究其施瞻彼峴山今古同悲迹公所行無媿三立觀之門內克諧而翕中外嫺黨亦睦以輯不遺簪履不寒車笠推其惻怛仁煦幽蟄掩骼埋骸

萬鬼感泣緬公之存任兼股肱逮公之逝禮備良榮 天子省方
三荷 寵靈 龍章牲帛崇于大丞刻詩豐碑惟覈斯徵于子孫
孫善繼善承

右神道碑沈大成撰

陽湖潘先生諱思榘字補堂進士官至巡撫著周易淺釋四卷皆
卽卦變之法以求象而卽象以明理每卦皆注自某卦來謂之時
來蓋易道廣大無所不該其中陰陽變化宛轉關生亦具有陰陽
相通之理故漢之虞翻諸家皆有是說而程子朱子亦闡明是理
雖非易之本義要亦易之所有也前有白瀛序稱先生點勘通志
堂所刊易解四十二家竭畢生之力以成此書比其沒也力疾屬

草尙闕乾坤二卦未注遂以絕筆故此本所說惟六十二卦其彖
傳象傳則以用注疏本附經附釋而文言繫辭說卦序卦雜卦則
未之及蓋主理者多發揮十翼主象主數者多研索卦爻其宗派
然也後有林迪光跋述先生之言曰彖多言象而變在其中爻多
言變而象在其中不明時來不知卦之來處不求爻變不知卦之
去處爻無所不包舊說一槩講入身心政治上去遺卻許多道理
不如就其淺處說而深處亦可通也足括是書之旨矣又有鼇峯
講義四卷

右學案唐鑑輯

154-580

李錫秦

李錫秦江蘇寶山人雍正六年由舉人選廣西羅城縣知縣七年遷全州知州八年升鬱林直隸州知州十三年遷太平府知府乾隆四年擢右江道五年宜山縣土蠻滋事總督馬爾泰派錫秦偕遊擊楊剛統領漢土官兵三千餘名分路進剿獲首從各犯羅扶養等九十七名蠻境悉平 上嘉之下部議敘六年署按察使七年七月以前用兵蠻匪節省輓運夫役工費銀一萬有奇若開除報銷將來邊境用兵卽援以爲例請存貯二千兩於司庫以補本案軍需額外支用不能開銷之項再撥四千兩發交新設龍勝通判儘數買穀建倉積貯以備賑恤餘酌發積穀較少之州縣買穀

國朝通志卷一百一十二
貯倉具稟署巡撫楊錫紱錫紱以聞上從之降旨褒獎十一月實授十一年奏參巡撫託庸辦事偏刻上密諭總督策楞確查尋託庸以參劾布政使唐綏祖失實革職上以布政使鄂昌署巡撫錫秦遷布政使十二年五月鄂昌因大計自陳舉錫秦自代諭曰上年託庸革職因一時不得其人卽用鄂昌署理巡撫而用李錫秦爲布政使適李錫秦在京朕召見時伊痛貶託庸之劣而盛稱鄂昌居官之優今鄂昌卽舉李錫秦自代其能免黨同朋庇之嫌乎嗣自今諸臣其克勉進賢之誼勿假公以濟私九月奏廣西地處上游頻年憂旱請做照江南龍骨車之式製用水車以資灌溉得旨允行十七年擢巡撫十八年四月奏南甯府

四十八屬土司俗多侈靡僭越無等請將會典律例所載五品以下官員應用服色各條頒發遵行 從之十一月奏各直省設立巡檢分駐各鄉以佐州縣官耳目所不及宜駐劄本管及扼要地方查廣西灌陽蒼梧宜山遷江柳城來賓象州等州縣所屬十一巡檢以衙署傾圮久與州縣官同城居住殊失設官本意請及時修建俾各駐原設地方又有地處偏隅難資控馭者請將懷集縣武城鄉巡檢移駐鳳凰觀永淳縣武羅鄉巡檢駐甘棠墟南里鄉巡檢駐小黎墟羅城縣莫離鎮巡檢駐和睦墟武緣縣高井寨巡檢駐羅墟下部議行十九年五月奏義甯縣屬安鑑里等處田畝屢經被水查該處向有老河一道可資宣洩今老河壅塞別衝新

河一復衝支河一水勢橫流難以抵禦請將老河挑濬並於決口處堅築堰壩使老河流通報 聞十月以病解任旋卒

右 國史館本傳

先生名錫秦字瞻仲號硯農由胡莊徙居南翔以金山衛籍中雍正甲辰順天鄉試充武英殿纂修議敘以知縣用任羅城縣知縣屢平劇盜及土蠻逆苗知鬱林州時勸墾曠土至三萬六千餘畝地故無溪澗至是石穴中忽涌泉丈餘灌溉不竭爲建瑞泉祠事 聞 賜御書惠潤田功額歷官至廣西巡撫卒 賜祭葬祀廣西名宦祠著有義甯紀略

右練川名人畫象小傳程祖慶撰

毛刺史大瀛曰中丞幼就鄰塾前一夕主人夢一黑虎繞堂柱事
與韓蘄王相類少負異才長通韜略練習騎射戈矛超距之技宦
遊粵西不避艱險冒矢石勦平猺峒諸峒古之名將不是過也

右錄程祖慶輯

11111111

VI

吳士端

國家優禮文學之臣奕世弗替而身膺異數所至宣上德意益光前美者余於槩亭吳公見之公諱士端字季方槩亭其號也先世本休甯和邨人曾祖諱道任始遷吳中祖諱璉卜居於長洲之閭邱坊考諱廷楨字山掄學者稱爲南邨先生登丙子賢書以詞賦受知仁廟癸未成進士入詞館歷官左春坊左諭德公少穎異淹雅博通未弱冠補蘇州府學博士弟子文望蔚然屢試未售時南邨方領書局公省侍入都康熙五十四年南邨卒於官內府總管奉命來視喪并錄見在京邸之子遂以公名聞特命服闋入武英殿行走預修韻府拾遺子史精華書成授順天玉田縣知

縣定例生員議敘授縣尉得縣令蓋出 特恩實雍正二年也四
年擢授永平府知府并割順天之豐潤玉田屬焉十一年升霸昌
道旋調浙江温處道乾隆十三年補授陝西按察使十六年遷甘
肅布政使調貴州二十二年降補四川按察使逾年復遷本省布
政使前後四十餘年仰受 三朝知遇之恩自諸生位至方伯人
咸謂由南邨學行上結 九重所致而公歷官政績撫循百姓下
不能欺又豈不以才德趾美用克輝映後先哉初任玉田頻被水
患公疏濬有法賑恤多方怡賢親王承 命履勘民遮道焚香謂
活我者矣侯又時有無賴子僞稱怡邸所遣騷擾郵傳公詢知其
詐以計拘畱密陳怡邸大爲王所稱賞觀察温處值温郡歲歉石

米四兩公請暫開海禁舶至價平百姓歌之其在陝西有赴川京
兵中夜爲人所傷公廉得綠營兵丁某開誠諭之一訊而服甘肅
庫吏盤踞作奸下車之始立置於法闔署肅然四川咽嚕之患相
習恬然公掩捕鞠治不遺餘力設立科條著爲永例蓋上之委
任久益堅而公之圖報晚彌篤生平廉介自守不名一錢旣望誤
左遷假歸里第又以賄項鬻產徙居經史巷在林下十年享壽八
十有三而卒嗚呼公於出處之際大節較然庶幾能世其家者矣
公四歲失恃稍長爲館甥於姑之夫封奉直大夫雲南白鹽井
提舉濱臣江公賴以學成名立及侍南邨京邸遭際累朝厚恩
官漸通顯夙昔一餐之惠報之惟恐不至於長養成就者尤加意

焉自公之祖考皆 贈如公官祖妣鄭氏妣周氏沈氏皆 贈夫
 人公配江夫人性行淑慎亦享壽至八十有四累受 封誥如例
 側室周碩人公以康熙三十年又七月二十八日生乾隆三十八
 年十月二十一日卒江夫人以康熙三十一年二月初五日生乾
 隆四十年九月二十二日卒越四十四年十二月初十日合葬於
 長洲縣八都上十七圖大黃字圩之新阡禮也子男四長秉衡先
 卒次秉珩皆江夫人出次秉英次秉清殤側室周碩人出女五一
 適陳樹華一適唐文椿一適唐文杞一許字蔣元爾未行卒一適
 方求泰孫男七秉衡出者鏊鏞鑑秉珩出者雲錦秉英出者文鏡
 文銑文鈺孫女九俱適士族秉衡第四女余子婦也故得其家世

事實尤詳至公之嘉言懿行治績政聲具行狀中不殫述詮次其
大者誌之并係以銘銘曰

昔公報政入 覲於京我維後進拜公於庭神采昱如言論肅如
勛以名義其風穆如迨公歸田我亦外遷尺書往復每戒腥膻公
沒六載我組我解庶幾息壤不辱不殆名德之後實生偉人公繼
文學鬱爲經綸維公前後萬民有口世載顯融 主德之厚有歸
者墳青墟之原琢詞幽石以詔來昆

右墓誌銘陸燿撰

國朝文獻通考卷之九十一

三十一

孫紹武

乾隆十三年春三月貴州巡撫都御史涿鹿孫公卒訃至滇鳳孫
爲位哭於館舍越一月乘傳會其喪哭之於貴陽使院翌日爲制
府祭則又哭焉翌日爲滇之藩臬監司祭則又哭焉翌日鳳孫自
以瓣香酌醴爲奠乃更拊膺長號伏地而不能起既復次孤子匍
匐稽顙投行述一篇屬銘其壙中之石鳳孫執賤不誅貴幼不誅
長之義固以辭孤子固以請曰府君遇子厚子亦深知府君此事
不可以屬他人且孤之高祖中丞公墓誌乃出傳山人手其弗以
位重也審矣鳳孫無以應泣然流涕慨然握管詮次而謹誌之公
姓孫氏諱紹武字緯文蓮渚其號也世爲山東黃縣人明季始家

遼東曾祖諱某從 世祖章皇帝入關歷官甯夏巡撫祖諱某內
弘文院中書舍人考諱某陝西延安府知府仕蹟具載家乘公生
而英偉卓犖八九歲時局量異於常兒嘗有立功異域垂名竹帛
之想延安公方屯田塞上公畱官署讀書經史之餘聞及孫吳兵
法一覽輒得其要弱冠舉業成以父病不應試走塞上侍疾三年
得無恙效力屯田議敘當補縣令時 國家頻歲有事西藏延安
公寶司輓運既竣事而疾大作勢甚危殆公奉湯藥衣不解帶者
三月有神僧來治之良已延安公既以老解組公日進甘旨承色
笑泊然無仕進意久之家益落幾不自存雍正三年乃從嚴命謁
選得黔之印江俗故健訟號難治公鋤其強梗去其宿弊人以大

和居二年調開泰今川陝總督宮保清河公由思州調守黎平傾
蓋如平生歡慷慨論天下事以忠義相廟切當是時芋河溪苗不
靖日肆劫掠苦吾民公與清河公請於上官率鄉兵往剿賊竄謬
衝結黨抗拒會黔楚粵三省兵繼至乃大戰於陸蕩山賊據山梁
矢石雨下我師幾不支清河公與公約曰今日當以死報國卽敗
毋相救公笑而諾之麾兵殊死戰遂奪其險賊勢瓦解斬獲無算
謬衝平調玉屏治如印江擢知獨山州丁父艱擗踊泣血以幼嘗
後其伯父仁化公例不得奔喪則益哀痛不欲生延安通帑數萬
金追呼甚急公宦橐蕭然然不忍獨累其弟請於中丞肩其半會
有恩旨得豁免八年都江苗叛督撫授公土兵八百爲先驅大

兵未集眾寡不敵公設奇兵勝之升銅仁府同知乃畱都江辦軍是時苗眾粗定公謂宜駐重兵盡殲其魁而後已論者以爲過未幾果復叛公按兵堅壁候東作時乃進苗人大恐頓首請命公曉以禍福撫以恩信都江之苗至於今無患居三年調台拱同知而古州之變作公身處重圍相機守禦日夜拊循其民眾志以固四閱月而圍始解方逆苗將遲時公廉得其狀馳白上官不信及苗據蓮花坵請分兵兩路一由台拱一由邛水入弓清江東西夾擊擣其中堅則彼首尾不相顧而我有扼吭拊背之勢當局者不能用至是苗燄日張遠近蜂起攻城陷邑全省騷然 皇帝御極之初 特詔今川陝總督宮保清河公以兩湖總制經略苗疆清河

公甫入境卽檄公計事授偏師經理入寨一路會大兵進攻牛皮
箐所向克捷犁庭掃穴蓋非公之參贊帷幄效指臂於清河公弗
克成此廓清摧陷之功非清河公之推心置腹深知而重倚公公
亦無以展其智力也事定題授都勻府知府苗疆善後之事一以
委公於是跋履崎嶇相度形勢安地設堡招募屯軍閱兩載而規
畫始備乾隆三年冬聞太夫人訃哀毀如前幸 恩例出繼子得
回籍治喪卽日就道家居八月葬事裁畢尋被 召見仍以黔省
知府用補黎平未之任從清河公經理城綏叛苗明年又奉檄平
永從之亂題署古州兵備道鎮撫三年民苗綏靖十年春以實授
引 見奏對稱 旨擢貴州按察使視事五月晉布政使又五月

而拜黔撫之 命公仕黔二十餘年徧歷苗疆凡山川之險隘苗
性之清悍無不洞晰於中前後用兵數次大抵經清河公指授故
能料敵如神善設方略 天子既付清河公以西陲之事以爲黔
南半壁非公不辦而公亦自以責無可諉蚤作夜思爲久遠又安
之計居頃之間大金川逆酋猖獗清河公左右乏助措置頗掣肘
公泣而言曰我於 朝廷於知己俱不可坐視即日馳奏請行而
中旨已命大司馬班公往督軍務寢公奏公志不得伸日悒悒
西望猶冀有後 命趣家人治行裝與僚友賓客言輒及更替事
當食與寢意未嘗不在西川也如是者半月痰疾忽作倉卒竟不
救 上聞悼惜入之 敕禮官議卹典假使公不卽逝 朝廷終

必用公西陲以速奏蕩平之績然使向者朝奏夕可則擐甲西行之日卽隕星玉帳之時是又若有天意於其閒而不必爲公搃腕者矣公偉儀表腰腹十圍神氣鎮定膽識過人談邊疆情勢古今成敗娓娓數千言若江河之決臨事勇敢義形於色與僚友處簡節疏日開誠布公胷中豁然無城府有規切言則改容正襟以受生平尤尙氣誼重然諾旣與清河公訂交於黎平爾後甘苦數共事無巨細恆盡力以相匡贊居常飲食必祝休戚若一體觀察長洲宋公自昔爲莫逆交古州之變宋公被圍清江城將下公以蠟丸書密告大兵已集人心乃定宋公才裕而識遠公雅相推重嘗於巡撫自陳疏中舉以自代其急難而愛賢類如此公生於康熙

之壬午卒年四十有七歷官巡撫貴州都察院右副都御史 誥
贈資政大夫配曹夫人以賢孝聞祿入不以奉其私凡公之友於
兄弟睦於宗黨者內助之力爲多丈夫子六需太學生負通敏才
器識宏遠霍震雪方就塾天姿穎異霽霽尙在襁褓女子二孫一
喪歸之日黔之官屬士庶與夫耕夫販豎荷戈之卒奔號相屬於
道鳳孫以菰蒲下士就宥散之職來隸宇下辱公重憐其才且念
家大人向官之誼飲食之教誨之所以企望之者甚至乃一旦永
訣旣不獲從公西征作露布於馬足之下復不獲視公飯含草遺
疏於屬纊之頃是公以國士待鳳孫而鳳孫並不以眾人報公也
雖錫金卹之日痛哭於其旁抑又奚補哉其歸也將以某月日葬

於某鄉道遠弗及視其窆窆乃豫爲之銘曰

樂安華閔世澤長兮篤生偉人兆嘉祥兮仕宦廿載半戎行兮高山仰止寶武鄉兮豐功駿烈在邊疆兮高牙旣建綰金章兮志存敵愾埽欃槍兮恩酬 君父史冊光兮何天不弔倏云亡兮倦言心知悵徬徨兮驂騑短氣失孫陽兮長負翦拂首空昂兮佳城何處鬱蒼蒼兮穿壙從之念高堂兮吞聲終古淚淋漓兮願爲青松永庇藏兮

右墓誌銘張鳳孫撰

國朝詩林英名卷之二

三

常鈞

常鈞葉赫那拉氏滿洲鑲紅旗人雍正四年由繙譯舉人考授內閣中書遷陝西潼關同知洊擢甘肅安西道呈吏議革職 特旨授兵部主事充軍機章京乾隆二十一年從征準噶爾尋奏補工部員外郎二十五年四月授江南淮徐海道未赴任擢正白旗漢軍副都統六月遷刑部侍郎八月 命偕協辦大學士劉統勳清查江蘇藩庫銀額十一月復同赴江西鞠巡撫阿思哈贓款得實論罪如律 命常鈞署江西巡撫奏言各省文武大吏恭齋奏摺其未蒙賞給奏匣而用夾板者僅以紙袋緘封綾幅包裹奉批後原封領回長途往返無難私啟請於夾板外用紙封固接縫處黏

貼本職印花發回批摺請用兵部印花差官出都時酌用印花若干於咨取勘合內聲明兵部照數給發經部議准 上飭該部豫將印花存貯軍機處備用不必臨時鈐印又奏出旗爲民者往來各省向未定查驗之例恐與逃旗相混請於入籍後令該管州縣查明年已成丁者各給鈐印手票其由京赴各省入籍者令該旗給照於入籍地方繳銷換給手票至八旗另記檔案養子開戶人等其往來他省應令本旗一體給照備驗 從之十二月署安徽巡撫奏鉛銅船隻入境每有沿途偷漏謊報沈溺等弊請嗣後一經發覺將該地方官及派委員弁照失察盜賣漕糧例議處知情故縱者參革審究委員不親往稽查任聽書役捏報者照徇庇例

降三級調用如能獲盜賣銅鉛人犯亦照拏獲盜賣漕糧例議敘
下部議行又奏向來直省秋審巡撫率同司道赴按察使衙門會
審恐隨帶員役不無供應之煩請嗣後改歸撫署辦理 上是之
是月授倉場侍郎二十六年四月授河南巡撫七月祥符縣河水
漫溢疏言河水由尉氏縣賈魯河奪溜南趨請先將南岸各漫口
逐段補築 上以漫口盡行補築則大溜勢益湍急全趨缺口工
程更難措手指示堵築各事宜並 命籌辦賑務八月調江西巡
撫未行 詔豫省要工仍當實力肩任不得因五日京兆稍生觀
望九月奏清查災黎戶口及被浸倉廩請先行動撥煮賑又言衛
輝彰德懷慶河南開封等屬涸出地畝尚未乾燥難用牛力翻犁

訪有犁樓及撒裂種二法犁樓法兩人代牛牽樓一人扶樓輕搖種從底出卽已入地撒裂種法水退地涸裂縫必多握種播颺撒入縫隙二者專種溼地不用牛犁而生苗甚速見飭令各屬俱倣照辦理得 旨嘉獎十月事竣赴江西新任二十七年二月 上南巡 賜詩曰百戰得歸身九歌出牧臣無端泛河洛有術免沈淪熟路輕車易賢勞體恤頻西江魚米地休息且同民三月查奏前撫臣阿思哈清理軍屯倣民田魚鱗式繪圖成冊嗣經接任撫臣胡寶琮奏准令經徵各州縣詳開坵段四至造入交代一事兩冊日久滋弊今酌將四至段落併入魚鱗冊擬名鱗圖四至冊以歸畫一 上允之五月調甘肅巡撫閏五月 上以回部底定

錄從征諸臣功常鈞以前在西師屢著勞績 恩賞雲騎尉世職
二十八年五月請以靖逆通判移駐哈密安西同知移駐巴里坤
七月請將張掖縣縣丞移駐東樂均如所請行八月疏言奉差人
員內由兵部外由督撫覈給差牌應備夫馬廩給自有確數請責
令該衙門給發勘合時將應付確數飭知首站卽移知下站照辦
書寫印花俟差員到站並無額外需索卽將印花交差員自貼不
必鈔寫勘牌仍將應付無誤之處轉移前途如差員需索該州縣
卽不給印花一面將應過夫馬若干並無缺少遲誤及差員如何
需索據實聲明其有遺漏印花不貼惟差員是問若州縣應付遲
誤准差員指名開報督撫查察下部議行十月請裁九亭巡檢改

設鹽茶廳照磨 從之十一月調湖北巡撫先是甘肅軍務殷繁
將驛站改歸同知通判管理十二月常鈞奏紅城苦水二驛係平
番縣地方靖邊大河二驛係武威縣地方仍歸各該縣管理 從
之二十九年正月入 覲奏陝甘總督見駐肅州距西安寫遠於
考驗弁兵稽查屬員均多未便 上嘉其言甚切事理 詔總督
移駐蘭州並兼管巡撫事無庸更設巡撫原設撫標卽改爲督標
其舊設西安督標改爲提標卽令固原提督回駐西安管轄所遺
提標將涼州鎮總兵移駐固原管轄其涼州鎮標撥督標中軍副
將一員統率六月疏言湖北應山縣距河南信陽州爲楚豫門戶
向有東西兩路西路自平靖關經應山安陸雲夢孝感等縣至楊

店村爲驛路通衢東路自武勝關經廣水小河溪等處至楊店村
係商賈捷徑數算程途較西路實近百里嗣後應付差使請改由
東路護送餉鞘仍由西路又武昌省城至江南江西等省驛路由
江夏經黃岡縣至蘄水縣之巴水驛地勢窪下往來差使用船裝
載多致稽遲請改由江夏之長山鋪經武昌縣之華容店黃岡縣
之三江口渡江至巴水驛歸入正路又奏廣濟縣江隄向由該縣
典史分管黃梅縣正隄月隄由該縣縣丞管理均係駐劄縣城離
隄甚遠查廣濟縣之武穴鎮於乾隆二十六年移駐同知一員專
司捕務其駐劄地方係黃梅一邑隄工適中之處請歸該同知統
管將武穴巡檢移駐龍坪鎮黃梅縣縣丞移駐清江鎮分管隄工

統歸武穴同知管轄均下部議行是月調雲南巡撫三十年五月
疏言督撫會奏事件無論同城與否凡彼此商定者於摺首聯銜
未商定者列主臺銜名會銜聲敘摺尾事干處分分別定擬其緊
要事件不及相商或會臺衙門意見不同均照在京九卿會議例
身摺陳奏得 旨俞允四月奏開化府屬之麻姑金廠新舊塘共
十五口定爲十五牀向例月納課金近有八牀年久金盡請照錫
板金廠例開除 上允其請三十一年永昌順甯二府屬邊外土
司經莽匪滋擾常鈞令參將劉智明等於九龍江剿敗之輒奏言
賊匪聞風喪膽勢可解散已無須添兵會剿 上以其未能直搗
巢穴切責之二月 命湯聘往代調常鈞湖南巡撫六月常德府

猝被水災劫沅陵縣知縣王元位並未履勘災區確查撫恤辰州府知府諸重光扶同欺飾請一併褫職 上是之罷重光等官尋疏報查賑戶口請加高府城及濱江卑下隄工以資捍衛報 聞八月疏言各省分發舉人得缺稍遲請分派繁缺州縣隨同幫辦上以分派幫辦是適蹈一缺兩官之弊不允是月桂陽州民侯學添被毆身死知州張宏燧以侯學添爲兇手及按察使宮兆麟覆訊正兇係侯七郎據實平反宏燧迴護原招會審各員亦持議參差事 聞 諭曰常鈞身爲巡撫乃於審理倫紀攸關命案一任屬員扶同弊混不能查究嚴參豈復勝封疆之任著來京陛見命侍郎期成額往鞫得實坐宏燧罪宏燧係常鈞曾經保奏人

員訊有奉常鈞面諭與會審各員補具聯銜印稟倒提月日情事
上以常鈞欺詐 詔革職三十二年二月 命常鈞自備資斧
往喀什噶爾辦事五月調赴哈喇沙爾辦事九月疏言哈喇沙爾
與榆林鎮所屬應行換班之屯田官兵請於明歲二月初旬乘耕
作之候先派一半前往更換其新到兵丁令舊存兵丁帶領熟習
至十月底再行更換一半得 旨允行三十六年五月受代回京
授三等待衛五十年正月 賜千叟宴常鈞與焉五十四年十月
卒

右 國史館本傳

阿思哈

阿思哈薩克達氏滿洲正黃旗人雍正四年由官學生考授內閣中書遷侍讀洊擢刑部郎中軍機處行走乾隆十年擢甘肅布政使十四年擢江西巡撫十五年三月疏言各營演放連環槍礮止用火藥須將鉛子裝入演練庶免臨時倉卒營馬原備騎兵衝突各營恐兵偷減草料多委員朋餽惟合操日令馬兵騎射一二次應令自餽俾人馬相習至技藝惟當純熟得用步法架勢不必朝更夕改 上嘉其所言得要九月調山西巡撫十六年疏報平陽府旱災未親臨撫恤 詔責之十七年十月疏報蒲解等屬被旱偏災平陽紳耆捐銀解河東道庫爲加賑之用 諭曰此奏殊屬

學部錯謬之至朕實駭聞直省偶遇偏災地方殷實之家樂善好施或自出家廩積貯或出己資糴運米石散給貧民功令原所不禁惟具數報官量加優敘以爲閭閻任卹者勸耳並非斂貲貯庫藉以助賑也國家賑濟蠲緩重者數百萬少亦數十萬悉動庫帑正項從無顧惜地方富戶所捐幾何貯庫助賑殊非體制此端一開則偏災之地貧民既苦艱食富戶又令出資國家撫恤災黎何忍出此深負朕惻憐一體之意阿思哈著交部嚴加議處所捐銀兩著發還聽該紳衿等自行辦理復諭曰阿思哈不勝巡撫之任著來京候旨尋部議革職十二月授吏部員外郎二十年三月命以市政使銜往準噶爾軍營辦理糧運四月擢內閣學士七

月議敘軍功加一級二十二年督江西巡撫先是江西軍丁自歸州縣編查殷實者多脫漏貧者將屯田典賣漕運幾至貽誤阿思哈莅任卽設法清釐以舊冊詳覈各丁族譜及保甲戶冊脫漏之丁及新生之丁登記無遺至二十五年奏查出軍丁二十七萬五千九百六十三其典賣屯田照直省分減年價回贖旗地例查契覈定銀數令原丁措贖無力則責成領運之丁及同族同船其贖回三百十一頃又查出隱漏屯地九百二十五頃查設屯原以贍運而軍丁散居屯地皆照田收租所入無多每船十年大造需費千兩每年運費數百兩皆散軍戶族津貼屯田有名無實臣酌將各船原有熟屯及贖回查出各田酌增餘租十一萬七千七百三

十兩連原額租銀一萬二千八百八十七兩共十三萬六百有奇
江西十四幫存漕船六百三十八隻除九江吉安建昌贛州等衛
原有分貼費銀其餘均酌給餘租銀以爲造船起運之費並將贛
衛餘租過多者撥濟撫饒等過少之衛四年委員編查一次軍丁
無虞脫漏漕運藉裕轉輸疏入報 聞七月實授江西巡撫十一
月江西學政謝溶生劾阿思哈婪賄派累 命尚書劉統勳侍郎
常鈞會同兩江總督尹繼善往審鞠實擬絞二十六年 詔免罪
給三品頂帶往烏魯木齊效力贖罪二十八年正月 命往伊犁
協同明瑞辦事六月授廣東巡撫十一月調河南巡撫二十九年
十月疏言河陰縣地僻事簡緊接滎澤請裁汰歸併滎澤縣管理

增設巡檢一以資彈壓其原設教諭一應改爲榮澤縣學下部議
行三十年三月疏言綠營例由步兵挑馬兵薦拔外委把總步兵
內有弓箭鳥槍藤牌礮手等項向例馬兵缺出止於弓箭馬步兵
內拔補而鳥槍兵不與是以兵皆弓箭鳥槍兵多庸陋請撥各標
營馬兵缺十分之二爲馬槍缺如步槍純熟兼能馬槍者准拔補
馬兵兼令學射如馬上槍射台式卽與弓箭馬兵一體考補外委
把總則上進有階各思努力 從之九月疏言衛河運道在在淺
阻潞縣三官廟老鶴嘴等處砂疆挺據河心重船尤易疏虞向於
衛河上下築草壩二十八以束水勢前撫臣胡寶瑤奏請疏挖並
於淺處建草壩臣查衛河發源輝縣百泉南至新鄉縣之岔河尖

與丹水合又百五十里經衛輝城北爲兌漕水次又東北至濬縣
會淇水入湯陰內黃界受湯河洹河之水至直隸大名縣境入臨
清河夏秋水盛無須草填冬令源澀草填亦屬無益不若於上游
先期蓄水臨時開放得宜舊以河水兼濟民田有官渠民渠之別
夫民田需水多在春夏漕船起運則在秋冬農工已竣民田不須
灌溉正可濟運見飭府縣督河員於九月望後起至漕船出境止
暫閉外河以上民渠支港使水歸官渠並下游閉閘瀦水重運自
可疏通原建草壩之處應停止鑿去三官廟老鶴嘴等處砂壘其
餘浮沙飭汛員集夫挑挖用刮板隨船疏濬使沙隨水蕩以利漕
運十二月疏言河工料物向係沿河州縣領帑按畝派買民多苦

累臣酌借司庫間款銀官爲試辦代買代交於七八月間委員照應辦數目赴附近產料地方照時價預給見銀約至十月各工開廠委佐雜監同交兌丞倅督察河員隨到隨收不敢稍有浮冒承辦之員得以隨運隨交惟運腳等項及新料虛鬆應扣折耗計每稽料一斤除官價九毫糧戶應貼運費錢一文較之往年不及十分之一不數日間貼費盡完解司歸款料物比民辦早完月餘疏入均報 聞三十一年疏言辦理地方公事例取印結稍不如式卽干駁換府縣多用空白赴上司衙門照寫每借端需索查鄉地鄰佑等類及在官之人本身甘結同鄉官印結原因其人別無可據必須取結爲憑至各衙門事件俱憑印文覈辦結內不過摘取

印文數言末增所結是實一語豈印文不足憑轉以甘結爲可信
至具題事件既見之奏疏又須加結送部體制亦覺未符請嗣後
一切甘結同鄉官印結例不用文者仍舊取結其具題事件及詳
咨移文於印文外加結者悉停止事歸便易下部議行三十二年
六月疏劾杞縣知縣蔡維英因辦兵差借端累民 上以阿思哈
並不瞻徇下部議敘七月審蔡維英擬杖傳 旨申飭改擬絞
三十四年六月遷雲貴總督八月因河南巡撫任內辦驟解滇於
定額外多六百餘頭 敕交部優敘九月阿思哈出銅壁關至蠻
暮軍營具奏軍糧馬匹不敷情形 諭曰前用阿思哈爲雲貴總
督以其向在北路軍營辦事諸務尙能諳習乃伊甫至騰越卽奏

該處辦糧情形已存畏難之見及至蠻暮所奏糧馬事宜專欲仰給內地竟不知就所到之處實力籌辦一味取巧豫占地步不復具有天良深負朕委任之意阿思哈著革去總督給副都統銜在領隊大臣上行走以觀後效十二月授吏部侍郎三十五年 諭曰阿思哈來京召見奏對時仍申其糧馬難於措辦之說及詰以彭寶到滇後何以購備轉得充裕而前任總督竟至束手無策阿思哈始無辭以對至詰以革職後如何效力之處稱會同大臣督率官兵攻戰其言更荒唐可笑阿思哈既革職畱營卽與兵丁無異況以曾受國恩大員獲罪急圖自效埋應衝鋒殺賊奮不顧身乃猶覲顏附於大臣之列不肖親冒矢石以巧遂其巽懦偷安之

計是誠何心其漸染積習甘於委靡無用全無滿洲勇往誠樸之氣又安望其改悔振作乎卽此一節其心更不可問而其罪更不可追仍著革職發往伊犁自備資斧效力贖罪三十九年五月諭令回京在軍機章京上行走七月授左都御史九月大學士舒赫德勦山東壽張逆匪王倫命偕額駙拉旺多爾濟率健銳火器兩營兵千協勦事平下部優敘尋以拉旺多爾濟赴城北塔灣搜制逸賊阿思哈未經同往敕部嚴察議奏部議革職詔從寬出任十一月賜紫禁城騎馬四十二年正月署吏部尙書旋署漕運總督四月實授十月卒賜祭葬諡莊恪

右 國史館本傳

舒輅

舒輅他塔喇氏滿洲正白旗人雍正四年考授內閣中書十二年遷侍讀乾隆二年授山西道監察御史四年命巡視臺灣七年授陝西督糧道十一年遷河南按察使十二年四月以前巡視臺灣需索供應濫准詞訟部議革職上原之九月遷安徽布政使十三年擢廣西巡撫十四年以道府按季分巡爲期太近請每年輪巡一次至州縣與民尤親每歲因公下鄉隨時巡查不必定期限有膜視民事者該道府卽行揭參下部議行十五年正月疏言各省鼓鑄制錢原期泉布流通不容奸徒翦邊興販惟是此輩漁利亦由不法鋪戶貪賤收買所致今飭屬嚴禁如有收買攙兌

許易錢之人與鄉地稟明究治 上命實力行之七月以廣西題缺過多請將慶遠府理苗同知宜山縣河池州思恩縣四缺鬱林州直隸州一缺均改歸部選慶遠府一缺改爲請 旨簡用 從之九月奏鎮安府屬之坡利後山與交夷接壤向未設卡巡防致上年雲南土富州差目李世昌等潛行出入釀成搶殺重案請建卡駐兵防守 上是之十月疏稱前署巡撫鄂昌奏准擬選教職人員如臨選不到卽以其次應選之人擬補歸於原選月分積缺如此辦理勢必遞行那移實於銓法有礙請嗣後遇有擬選人員如月內未據查覆卽行開缺另按雙單月分擬選下部議行十一月調江西巡撫十六年六月奏江西水災向例有貸無賑乾隆七

年以前地方官隨時籌辦或動開款或自捐資通報查覈今一遇
水發卽攜銀前往撫恤小民習以爲例冀幸恩澤無有饑時應請
旨分晰辦理以免冒濫 諭曰地方偶遇旱潦竭力補救尙恐
向隅督撫身任封疆正當先事綢繆豈得因愚民望澤無饜豫存
裁抑之見况今中外乂安大農歲積甚充何忍以傲傲待哺之窮
黎捭節升斗之費爲督撫者苟如此居心必致貧民失所殊非朕
委任司牧之意舒輅著嚴行申飭七月以豐城縣隄岸坍塌疑水
族爲祟調龍虎山提點鎮治 上以其不知政體復嚴飭之八月
調河南巡撫十月調陝西巡撫十七年卒

右 國史館本傳

同和書局發行
卷一百一十一
三

周人驥

周人驥直隸天津人雍正五年進士授禮部主事七年提督四川學政尋升員外郎乾隆元年充福建鄉試副考官二年授貴州道監察御史 命巡視淮安漕務遷吏科給事中五年奏兩廣總督馬爾泰疏報勦辦逆苗情形語多粉飾僅降 旨申飭閩浙總督郝玉麟保舉劣員事後收受餽遺止 予鐫級均不足示懲 諭曰朕因人才難得故臣工遇有處分每棄瑕錄用此實失之太寬周人驥職居言官理應隨時獻納所奏可嘉著交部議敘六年奏誣告越訴最爲良民之害蓋人情狡黠往往捏造說詞尋衅與訟更或未控州縣輒控道府未控道府輒控院司告訐成風閭閻不

勝其擾請嚴行申禁嗣後凡有誣告必按律加等治罪越訴者不得濫准 上允之敕部酌定新例頒行七年授廣西右江道十年擢湖南按察使十五年遷陝西布政使十六年正月調湖南布政使十二月疏言苗疆額兵有以苗人充補者非防微杜漸之道應設法革除 諭曰苗疆設立防汛原資其控禦彈壓乃即用苗民充伍殊非本意若一旦槩行革除亦未免過急著傳諭苗疆督撫令其密飭各營伍嗣後召募名糧不得仍將苗人充補亦勿張揚形迹有失綏靖之宜十七年奏各省道員於所屬知府新舊交盤遵例出結而於直隸州止具倉穀印結應令將庫貯錢糧一體結報下部議行十九年正月調浙江布政使七月奏浙江省城地面

遼闊事雜人稠向有派委佐貳等官分巡章程後經停止請仍復舊例就藩臬兩司經歷暨該府縣之照磨知事縣丞主簿等官派員協同汛弁分任巡查年終考覈功過量加勸懲得旨允行十月擢巡撫二十年四月奏玉環廳自設立至今已閱二十八載人文漸盛請將入籍童生歲科兩試取進文生四名武生二名附入温州府學從之七月奏海甯縣前於乾隆十四年墾地一千餘頃所有認戶多係豪強外籍從不到地墾種見在墾種者係沿海無業民竈各認戶勒令納租墾戶不甘紛紛赴控今徹底查清悉歸墾戶報升如認戶原係墾戶仍准丈給上嘉之十二月因杭州嘉興湖州紹興四府被災奏請撫恤上以與學政雷鈺疏報

不符恐有諱匿 諭人驥詳查人驥旋以散賑周徧並無諱匿奏
覆報 聞二十一年二月按察使富勒渾劾前任巡撫鄂樂舜勒
派商銀鞠實論絞 上以人驥近在同城漫無覺察 命革職效
力軍臺五月 諭曰上年浙省被災周人驥身爲巡撫不能熟籌
賑恤且有粉飾諱匿之意朕之重加處分者非獨爲鄂樂舜一事
正以凶恤民煥有忝封疆重任耳十月釋還 命署廣東巡撫御
史李綬奏人驥匿災擾民革職未久仍以原官起用不足示警
諭曰朕實因一時無人故令周人驥署理周人驥不過報災不實
非竟匿災不報李綬據實直奏朕所嘉子周人驥仍著遵前旨行
二十三年正月調署貴州巡撫十月奏黔省民人耕而不織絲布

昂貴見通飭各屬於川楚鄰省購種木棉苧麻教民紡織報聞
二十四年三月實授貴州巡撫十二月奏州縣未結積案令各府
按季查覈造冊詳報大州縣積至十案以上中小州縣及佐貳官
積至五件以上卽行揭報咨部議處如該府包荒朦混卽照徇庇
例糾參至知府有自理之案專責該管道員一體察查如所請行
二十六年六月湖南按察使嚴有禧請禁苗民結婚人驥奏黔楚
情形不同黔省苗民雜處往來洽比結婚已久一旦復申禁令轉
致驚疑且恐兵役藉端挾詐更滋煩擾請免查禁 上是之十月
奏黔省近年多種棉苧仁懷廳等處兼放山蠶可織繭綢各屬做
行得 旨嘉獎先是布政使徐垣奏人驥新開南明河不利舟行

於官民均有未便請查勘停止十一月 命總督吳達善確查以
聞尋奏該處多係峭壁河流洶涌船不能行地方官押令苗民終
年負運荒廢農功實屬未便請將人驥交部嚴議 諭曰封疆大
吏經理地方河運事宜卽始議籌畫未周工程難以興舉自應奏
明更正若以通省官民兼累之事而固執己見始終迴護遂非則
其居心行事大不可問周人驥前在浙江獲罪經朕棄瑕錄用自
當益加奮勉實心圖報乃逞其剛愎之見有心文過若此不可復
畱巡撫之任周人驥著來京候旨二十七年革職罰修直隸城工
二十八年卒

右 國史館本傳

國朝耆獻類徵初編卷百七十三目錄

疆臣二十五

李學裕

楊錫紱

瑚寶

張渠

富明安

明山
子海甯

厚切者用對得毛絨

卷百二十三

--	--	--	--	--	--	--	--	--	--

國朝耆獻類徵初編卷百七十三

通奉大夫前署江西巡撫江西布政使司布政使湘陰李桓輯

疆臣二十五

李學裕

乾隆十年六月朔余臥病北山閉關而外鍵之安徽布政使李公
屏騎從過余謂門者曰卽虛館必啟鑰參戶而入曰吾固知先生
避客之深也吾自獲見於先生始知所以爲人之道備官中外幾
二十年自省尙無負於君國無慙於吏民皆先生之教也所懼
民隱壅蔽有過而不自知今荷聖恩位邦伯而適在先生之鄉
故甫入城未受印篆而願聞緒論望先生知無不言越三日而余

邁危疾不辨人事者浹月及杪秋少蘇醫者曰子無他昨視方伯李公心脈已枯恐無可久之道余瞿然急通問復書曰某陳臬於蘇幾三載卽笞杖必設身以求其情積勞傷氣又胃痛醫人投藥物過猛故一發不可支如有瘳卽敬以聞未十日則其子以棺斂事來諷且乞銘矣公所生三子皆幼其弟之子承嗣者雖少長從宦遊而方從師務帖括外事無聞焉幕中皆新知故狀所述惟歷官及蒙恩遇而政迹無敘列者銘辭難舉雖然義不可卻也公洛陽人雍正五年進士選庶吉士不介而造余形貌偉然所爲詩及書法皆拔俗時余掌武英殿修書事因奏請其編纂見公小心畏義好賢樂善出於至誠勸之曰子公輔之器也貴仕不足道能

如鄉先輩劉洛陽更進之爲 本朝湯睢州乃無愧於爲人公竦
然及散館授檢討九年改山東道御史十年巡察直隸順廣大三
府十一年監會試內簾巡視西城轉兵科給事中稽察倉場充武
會試同考十二年奉使策封安南 賜正一品服十三年授刑科
掌印給事中轉四川建昌道按察司副使公出在外歲時必通書
余見其地士大夫商旅必詢公操行及所注措故知公爲深而欲
籍之則事實不能詳也其巡三郡官吏凜凜雖大府亦嚴憚焉在
建昌自打箭鑪至西藏民獠威懷治行甲兩川金川諸土司相仇
殺公會諸將巡視開諭皆駢首革心乾隆四年大計卓異五年引
見 天顏甚喜賜蟒服回任俟後命七年調江蘇糧道弊絕民

憲會淮陽水災制軍德公撫軍陳公於要地多委公拯濟其冬遷江蘇按察使明允無畱獄富商大豪奸私暴露欲巧法彌縫卽私計曰惟法司大府三關無道可通奈何其遷藩司蘇人皆曰吾民薄祜雅太守遷閩嶺李公復移調誰其嗣之不謂公之不數月而奄忽也公處心平恕終日溫溫而不可強以非義屬吏幕友於簿書或舛誤未嘗動聲色惟默思所以正之而官中蠹胥時因事懲革眾心感服而不知其所由然痛少失怙始舉於鄉而太夫人卽世愛弟學峻如一身甫踰三十連喪耦卽以弟子煥爲己子公始見余執後進禮余入翰林後公故事禮辭當卑遜而公終以後進自處及莅安徽通書忽用師弟子之稱余固辭公曰先生每以睢

州助我睢州既爲監司始受業於夏峰某獨不可繼武乎余告以自明萬麻末徵君卽爲海內儒宗而睢州乃鄉之後進也今公爲邦伯而余以薄劣爲部人敢以徵君自處哉而公終不易稱卽此一節非誠以古人爲準的而能如是乎惜乎余之所望於公者始少見其端倪 聖夫子累日積久以灼見其賢而不獲竟其用也然數年來余夙所心許如江西熊梅亭濟甯黃訓昭安溪李立侯皆以壯年受知於 聖主始列九卿而倏如影滅則又不若封疆大吏尙有實德之及民也然則有心者當爲國惜爲民悲而公則差可以無恨矣公卒於乾隆十年十月望後五日享年五十有五祖諱士傑父諱本質乾隆元年 誥贈如公官祖妣楊氏尙氏妣

曹氏俱 贈恭人公諱學裕字餘三元配劉氏繼室尙氏以 地
封未受錫命子四人長煥弟學峻次子乾隆甲子舉人次照側室
張氏出次燕次焜繼室呂氏出前夫人並葬洛陽城東十里鋪某
原公以某年某月某日卜兆於某岡某原銘曰
曰仁曰恭宜得其壽德載於民其聲遠聞而施則不究俛焉日有
孜孜道固宜然其淹其速則惟命之自天

右墓誌銘方苞撰

乾隆十年十月二十一日安徽布政使李公卒於官江甯令袁枚
入奠畢泣而言曰前年枚知江浦謁公於蘇公召入己二鼓與語
卽偉視枚今年枚知金陵公來作承宣司彼此色然喜有無窮言

未竟公竟委化粧無以報今將歸葬願請狀以爲公銘其幕府蔡西樵曰公年五十有五不自意死呂夫人第三娶也長子某試禮部未歸其季幼奴多村氓賓客輩暫從公遊無能知公者公誠慤其行事坦坦而肅章奏文集或輒削彙諸善狀不能記憶但遠近見者莫不額手曰李公眞君子也請略舉其槩而紀存之枚曰唯唯謹按公諱學裕號餘三世居洛陽縣以雍正五年進士入翰林累官御史巡道按察蘇州遷安徽布政使而卒巡京畿時唐山令某奪僧舍爲民房世宗怒幾不測公奏書生毀佛愚無大罪令竟免故事巡城者遇事動咨刑部延累至歲餘公停車決遣獄無滯畱捕博具數十麓曰貪紀錄而置民於軍吾不忍也杖犯者使

去碎其具於庭石爲之凹後過者猶指笑曰此李公搥骰子處也
出使安南披一品服登王正殿宣 聖諭畢乃坐述 朝廷柔遠
之意公儀觀既偉音節鏗然其王嗣黎維祐俯伏受命夷言嘆好
使臣者數萬人蜀土司大小金川閩公爲建昌道輕車往撫入密
箐中天日隱黑猺獯梟目鳥語挾雪刃喉向公公短後衣坐地召
其渠帥賜酒食命譯者曉以大義羣猺翕然喜折樹枝爲公策馬
歸城乾隆七年淮徐災募糧者眾有司以盜聞公曰此饑民非盜
也獄具所活數百十人夜閱秋審冊專意平反燭燼數升僮臥齎
餉甚酣而公竟申旦卒以此致病理安徽災賑尤勞遂不起嗚呼
公急於活人而忘所以自活使公稍自愛官必不如是止所活人

亦必不如是止而卒之公不活命耶其自致耶人不能受公之活亦人之命耶其轉累公耶雖然其自致也其人累也乃其所以可銘也銘曰

丕蔽邦成俛焉日有孜孜而力不支至於負茲死民之思乃卜澗水西灑水東而坎其中以爲公宮嗚呼其禮祀於無窮

右墓誌銘袁枚撰

日本書紀卷之二十三

五

楊錫紱

楊錫紱江西清江人雍正五年進士授吏部主事累遷郎中九年授貴州道監察御史十年擢廣東肇羅道乾隆元年署廣西布政使二年實授三年請禁州縣餽上司土產收受者嚴議六年正月署廣西巡撫九月實授時土苗石金元滋擾焚貴州永從縣治錫紱會貴州湖廣督撫鎮發兵勦擒金元未幾遷江土苗謀犯思恩府錫紱率兵往捕獲賊首李尙彩及其黨八十餘人部議軍功加一級七年五月疏言保甲平時足以弭盜遇災賑亦可按籍而稽粵西僻處天末保甲法多未奉行臣思苗獯雖與漢人不同然聚族而居一村一寨原有頭人等管束頭人等多習見官吏畧識事

體亦有識字者若因彼管束舊制寓以稽查之法諒不至驚擾臣
見飭官吏實力辦理苗獠狎獐各就情形變通其法責成知府兩
月來已有造冊呈報者如平樂縣春夏出借倉穀自保甲已立小
民各抱門牌赴領牌到給穀絕無向時冒借短減弊此其明驗

諭曰所見甚是所辦亦妥可嘉也六月疏言設兵所以衛民而積
習有累民者如城守兵於鄉民貿易入城時攫取薪蔬塘汛兵則
驅役村莊科斂自肥而飲博滋事尤甚臣於撫標內已訪獲懲治
恐僻遠相習爲常請 敕封疆大臣其相釐剔得 旨允行八年
四月梧州府知府戴肇名私餽人蔑諱其名曰長生果錫紱峻卻
之具以 聞 上曰汝可謂不愧四知矣但此過尙小或戴肇名

別有他過自應參處耳七月疏言粵西柳慶二府與黔省古州毗連向來黔省委員赴粵西買米無定期致粵西米價日昂請立章程先將應買數目知照於秋冬閒給印照採買查驗運回不得於春夏閒採買下部議從之先是錫紱奏獲逃入安南奸民黃漢周道南項亞等飭令羈禁奉 硃批卽應重處示懲何必令其展轉偷生錫紱旋奏已提犯杖斃 諭曰朕從前批示因人犯知罪無可追往往攀引多人以圖延緩前奏似有任其延案之意是以批示令其速審具題明正典刑乃楊錫紱誤會朕意竟將三犯立斃杖下三犯均係應死之人尙未至誤殺三命亦應明正其罪設使不應死者死則死者不可復生矣楊錫紱此舉實屬紕繆之至

交部察議尋議削軍功一級九年授禮部侍郎十年授湖南巡撫
十一年三月疏言桂陽礦商有隱漏侵欺之弊前撫臣蔣溥以常
甯縣白沙村爲桂陽運銅水路要隘委府佐一員駐劄稽查今卽
其地建廠設鑪令駐劄之員監督煎燒則獲銅多而鉛稅亦增至
郴州各礦僻遠畸零煉銅無幾宜仍交商辦從之十二年八月
疏劾原任戶部侍郎陳樹萱在籍每以細事與鄉人訐訟見在服
中曾以訟事至長沙府面相請託諭曰近因各省紳衿漸有恃
勢欺陵鄉里干預詞訟之習曾經降旨訓飭楊錫紱查出據實陳
奏甚屬可嘉陳樹萱交部察議尋議樹萱補官日降一級十三年
丁父憂十五年授刑部侍郎旋授湖南巡撫十六年丁母憂十八

年九月仍授湖南巡撫十月擢都察院左都御史十九年正月署吏部尙書二月禮部侍郎張泰開保同部侍郎鄒一桂之子志伊爲國子監學錄 命嚴加議處吏部議泰開一桂均降調 諭曰吏部甚屬徇庇蓋二人罪不同科鄒一桂止於不行阻止張泰開之心以朕未必卽知爲一桂之子故朦混薦剋瞻徇行私此而不懲則黨援門戶之漸將自此啟是以特令嚴加議處今該部之議所爲嚴者安在且又不分輕重均議降調朕能聽大臣之曲庇專擅乎著另議吏部堂官交都察院嚴察議奏吏部改議泰開革職一桂降三級詳奏開一桂傳都察院議錫紘等革職 詔從寬畱任二十年二月署湖南巡撫五月授禮部尙書二十一年十一月

署山東巡撫二十二年正月授漕運總督三月疏言興武江淮二
衛旗丁疲乏已極從前所領漕項勢不能繳請全豁得旨有意
沽名著於伊養廉內坐扣二十三年四月疏陳調劑漕運事一屯
田取贖宜寬年限也屯田乃贍運之本閭年久多典賣自乾隆七
年清查定例後疲丁仍不能取贖無屯田則無津貼則贍運無資
請嗣後屯田原價百金以上許三年交價價足田卽歸船一請嚴
挂欠以杜冒濫也糧船到壩坐糧廳驗色兌收不足者名曰挂欠
勒限三日兌足不完追比足數此定例也挂欠之丁非水次折耗
卽沿途盜賣請嗣後有挂欠坐糧廳勒限追完仍行懲治領運千
總所管幫內但有一丁挂欠卽限後全完亦不准議敘並總運之

同知通判督運之糧道俱不准議敘一新僉旗丁應禁勒認公私
欠項也向例丁力貧疲另僉殷丁但所革疲丁官私欠項纍纍向
俱令新丁接受是以未出運而先受累請嗣後止認篷桅槓索價
值至舊欠官項應於舊丁著追一年不完原領運千總賠還私債
令舊丁自還不許勒新丁接受如違將抑勒之備弁參革一水次
兌漕應令旗丁執槩也州縣兌漕時不肖吏胥私收折色於交兌
軍旗時串通積慣斛手輕用手法一斛有少至一二升者糧丁長
途輓運已有盤剝傷耗何堪於水次先受虧缺嗣後州縣兌漕准
令倉役執斛旗丁自行執槩仍飭監兌之員稽察不許顆粒虧短
一江南之江淮興武二幫宜運快並僉以杜狡脫也此二衛貧乏

尤甚無丁可僉緣二衛俱隸江甯省會向有運丁快丁之名運丁
運糧廩道轄快丁管駕號船屬鹽道轄一族之中一家之內分
充二丁往者運漕得利則俱稱運丁近日幫船疲乏卽冒快丁是
以每僉一丁輒自謂非運是快僉丁雖由衛所聽斷必由州縣狡
詐者關合吏胥州縣不察卽斷以是快非運僉一丁卽脫一丁因
而丁已貧疲仍令駕運安得有殷丁幫船安得有起色查漕運全
書江甯快丁原准與運丁並僉十餘年來快丁不可勝數而運丁
寥寥且竄入快丁之籍皆有力之家而貧乏者不能卸其責請定
爲運丁快丁並僉則狡脫之弊可除得旨此奏確有所見下部
議從之十月疏言江南所屬鳳中幫船止十六隻而兌糧水次

高郵五河及正陽關三處在高郵兌糧者由運河渡黃可以計日
在五河正陽關兌糧者由洪澤湖至清口渡黃湖中守風或至半
月前後船不能聯接雖有領運千總止在後管押其先行者無人
稽察抵通日米石或有不足且過開剝淺需費較多旗丁苦累查
向例幫船過少原可歸併帶運請以高郵兌運者歸揚州二幫五
河兌運者歸宿州頭幫正陽關兌運者歸宿州二幫水次旣近運
道亦同揚州二幫暨宿州兩幫原設糧艘無多增併數船不難稽
察查惟安慶幫有一百餘船耳目難周請分爲兩幫卽以所裁千
總督理安慶分幫實一舉兩便部議從之十一月疏言漕標效
力千總自部揀發每年新運視何幫缺員卽行委辦期滿咨部卽

用此輩無一定之幫不過虛應故事更或需索幫規稍不如意則
尋事責懲幫丁是委一標員幫丁卽受一番苦累請停止又每幫
有押空隨幫千總一報滿咨部候選其中頗有實心辦公者或值
中途運員參革卽委本幫重運或本係疲幫令隨幫協同辦理三
運之後漕務已熟而候選無期似屬可惜臣以爲與其請揀各員
不若酌畱熟諳請嗣後期滿除照常供職仍咨部外如有諳悉漕
務者出具考語送部引見候旨飭發漕標效力差委三年後
准照試用知縣例遇有調補遺缺人地相宜者題請補用部議如
所請二十五年疏言南省漕運自開中河糧艘南來者一出清口
卽由楊家莊入運以避清口至徐州數百里黃河之險惟徐州府

別有他過自應參處耳七月疏言粵西柳慶二府與黔省古州毗連向來黔省委員赴粵西買米無定期致粵西米價日昂請立章程先將應買數目知照於秋冬閒給印照採買查驗運回不得於春夏閒採買下部議從之先是錫紱奏獲逃入安南奸民黃漢周道南項亞等飭令羈禁奉 硃批卽應重處示懲何必令其展轉偷生錫紱旋奏已提犯杖斃 諭曰朕從前批示因人犯知罪無可遣往往攀引多人以圖延緩前奏似有任其延案之意是以批示令其速審具題明正典刑乃楊錫紱誤會朕意竟將三犯立斃杖下三犯均係應死之人尙未至誤殺三命亦應明正其罪設使不應死者死則死者不可復生矣楊錫紱此舉實屬紕繆之至

交部察議尋議削軍功一級九年授禮部侍郎十年授湖南巡撫
十一年三月疏言桂陽礦商有隱漏侵欺之弊前撫臣蔣溥以常
甯縣白沙村爲桂陽運銅水路要隘委府佐一員駐劄稽查今卽
其地建廠設鑪令駐劄之員監督煎燒則獲銅多而鉛稅亦增至
郴州各礦僻遠畸零煉銅無幾宜仍交商辦 從之十二年八月
疏劾原任戶部侍郎陳樹萱在籍每以細事與鄉人訐訟見在服
中曾以訟事至長沙府面相請託 諭曰近因各省紳衿漸有恃
勢欺陵鄉里干預詞訟之習曾經降旨訓飭楊錫紱查出據實陳
奏甚屬可嘉陳樹萱交部察議尋議樹萱補官日降一級十三年
丁父憂十五年授刑部侍郎旋授湖南巡撫十六年丁母憂十八

年九月仍授湖南巡撫十月擢都察院左都御史十九年正月署吏部尙書二月禮部侍郎張泰開保同部侍郎鄒一桂之子志伊爲國子監學錄 命嚴加議處吏部議泰開一桂均降調 諭曰吏部甚屬徇庇蓋二人罪不同科鄒一桂止於不行阻止張泰開之心以朕未必卽知爲一桂之子故朦混薦剗瞻徇行私此而不懲則黨援門戶之漸將自此啟是以特令嚴加議處今該部之議所爲嚴者安在且又不分輕重均議降調朕能聽大臣之曲庇專擅乎著另議吏部堂官交都察院嚴察議奏吏部改議泰開革職一桂降三級詳泰開一桂傳都察院議錫紱等革職 詔從寬畱任二十年二月署湖南巡撫五月授禮部尙書二十一年十一月

署山東巡撫二十二年正月授漕運總督三月疏言興武江淮二
衛旗丁疲乏已極從前所領漕項勢不能繳請全豁得旨有意
沽名著於伊養廉內坐扣二十三年四月疏陳調劑漕運事一屯
田取贖宜寬年限也屯田乃贍運之本閱年久多典賣自乾隆七
年清查定例後疲丁仍不能取贖無屯田則無津貼則贍運無資
請嗣後屯田原價百金以上許三年交價價足田卽歸船一請嚴
挂欠以杜冒濫也糧船到壩坐糧廳驗色兌收不足者名曰挂欠
勒限三日兌足不完追比足數此定例也挂欠之丁非水次折耗
卽沿途盜賣請嗣後有挂欠坐糧廳勒限追完仍行懲治領運干
總所管幫內但有一丁挂欠卽限後全完亦不准議敘並總運之

同知通判督運之糧道俱不准議敘一新僉旗丁應禁勒認公私
欠項也向例丁力貧疲另僉殷丁但所革疲丁官私欠項纍纍向
俱令新丁接受是以未出運而先受累請嗣後止認篷桅槓索價
值至舊欠官項應於舊丁著追一年不完原領運千總賠還私債
令舊丁自還不許勒新丁接受如違將抑勒之備弁參革一水次
兌漕應令旗丁執槩也州縣兌漕時不肖吏胥私收折色於交兌
軍旗時串通積慣斛手輕用手法一斛有少至一二升者糧丁長
途輓運已有盤剝傷耗何堪於水次先受虧缺嗣後州縣兌漕准
令倉役執斛旗丁自行執槩仍飭監兌之員稽察不許顆粒虧短
一江南之江淮興武二幫宜運快並僉以杜狡脫也此二衛貧乏

尤甚無丁可僉緣二衛俱隸江甯省會向有運丁快丁之名運丁運糧屬糧道轄快丁管駕號船屬鹽道轄一族之中一家之內分充二丁往者運漕得利則俱稱運丁近日幫船疲乏卽冒快丁是以每僉一丁輒自謂非運是快僉丁雖由衛所聽斷必由州縣狡詐者關合吏胥州縣不察卽斷以是快非運僉一丁卽脫一丁因而丁已貧疲仍令駕運安得有殷丁幫船安得有起色查漕運全書江甯快丁原准與運丁並僉十餘年來快丁不可勝數而運丁寥寥且竄入快丁之籍皆有力之家而貧乏者不能卸其責請定爲運丁快丁並僉則狡脫之弊可除得旨此奏確有所見下部議從之十月疏言江南所屬鳳中幫船止十六隻而兌糧水次

高郵五河及正陽關三處在高郵兌糧者由運河渡黃可以計日
在五河正陽關兌糧者由洪澤湖至清口渡黃湖中守風或至半
月前後船不能聯接雖有領運千總止在後管押其先行者無人
稽察抵通日米石或有不足且過開剝淺需費較多旗丁苦累查
向例幫船過少原可歸併帶運請以高郵兌運者歸揚州二幫五
河兌運者歸宿州頭幫正陽關兌運者歸宿州二幫水次旣近運
道亦同揚州二幫暨宿州兩幫原設糧艘無多增併數船不難稽
察查惟安慶幫有一百餘船耳目難周請分爲兩幫卽以所裁千
總督理安慶分幫實一舉兩便部議從之十一月疏言漕標效
力千總自部揀發每年新運視何幫缺員卽行委辦期滿咨部卽

用此輩無一定之幫不過虛應故事更或需索幫規稍不如意則尋事責懲幫丁是委一標員幫丁卽受一番苦累請停止又每幫有押空隨幫千總一報滿咨部候選其中頗有實心辦公者或值中途運員參革卽委本幫重運或本係疲幫令隨幫協同辦理三運之後漕務已熟而候選無期似屬可惜臣以爲與其請揀各員不若酌畱熟諳請嗣後期滿除照常供職仍咨部外如有諳悉漕務者出具考語送部引見候旨飭發漕標效力差委三年後准照試用知縣例遇有調補遺缺人地相宜者題請補用部議如所請二十五年疏言南省漕運自開中河糧艘南來者一出清口卽由楊家莊入運以避清口至徐州數百里黃河之險惟徐州府

之江北一幫長淮兩幫因受兌水次例在徐州府城是以每年仍走黃河不能避險然十字河竹絡壩未閉以前徐州之船由竹絡壩入運不必下至楊莊口門道里尙近自乾隆十四年竹絡壩不開之後非下至楊莊口門無由轉入運道深冬致冰凌剝傷春行則有呂梁二洪及埽灣急溜之險且由徐城至楊莊逆溯阜河紆迴幾七百里請將徐州之江北長淮幫船住泊阜河至兌糧時令弁丁仍赴徐城受兌兌畢卽用小船運至黃河與阜河相連處過壩入船所需運價旗丁自認需用剝船令州縣酌定價值代雇雇船誤責在州縣剝運誤責在旗丁得旨如所請行又言運河內楛石起除不盡宜驗實參處凡有關座之越河宜一律疏通管河

應汛宜備挑取器具部議 從之尋 諭曰楊錫紱自任漕督以來於一切轉運事宜頗見實心釐剔有裨漕政所有從前濫行請豁漕項應於養廉內按年分扣銀兩著予加恩寬免二十六年正月疏言運蘇糧船至天津卽另由甯河縣之新河口入海河又由海河轉入寶坻縣之小河然後由白龍港劉家莊達蘇州之五里橋交卸本年三月幫船至津因候甯河縣挑挖新河口至四月八日始從天津開行入至河口又自劉家莊至五里橋計程九十餘里有淺七十餘處州縣雖撥夫疏濬終以沙流易淤爲辭致回空糧船凍阻甯河嗣後請責成地方官專管凡船到境淺阻卽督夫竭力疏濬遲延則參運員疏濬不力則參地方官庶回空無虞凍

阻部議 從之十月疏陳漕運四事一各關限單宜裁也糧船北上撫臣給發限單所以速運臣又同巡漕諸臣親行督押立法已極周詳乃板閘臨清天津三關亦有給發限單例查係明時准倉臨倉等分司原管船務是以有限單之式今制稅歸關船歸道府各關惟司正稅並不催漕限單徒爲虛設而請領繳銷適滋吏胥勒索應將板閘臨清天津三關限單裁革一收漕違例知府之處分宜重也知府與州縣管轄最親收兌漕糧尤宜加意稽察乃因例不議處知府多不實力稽查或徇庇州縣與糧道齟齬請嗣後州縣收漕如有攙雜潮潤經糧道查出知府不先揭報者將知府照徇庇劣員例議處一奸丁藉充書役抗避僉點之弊宜除也軍

屯內奸猾之徒謀充文武衙門書役以抗僉點衛所差拘各衙門公然庇護藉此藏身請嗣後凡係軍丁遇僉選之年無論大小衙門書役一體句僉如身在公所不能出運卽令子弟承領出運不得藉詞抗避各衙門亦不得曲爲庇護一頭舵水手脫逃之例宜嚴也糧船頭舵水手皆係旗丁雇覓往往於領工價後潛逃旗丁恐誤運出錢另雇雇後復逃卽報明運弁緝拏而此輩游手單身復難緝獲臣查糧艘卽係軍船水手受雇潛逃卽同遺棄請嗣後頭舵水手有工費給足而潛逃者通行嚴緝審明發邊衛充軍得旨所奏俱可行從之尋加太子少師二十七年三月 上南巡御製詩賜之曰轉漕由來大政關得人久任謂卿閑四星儲蓄

天容與千里北南歲往還革弊深應體民隱董媮兼欲恤丁艱奉
公盡職誠斯在扈蹕儀文儘可刪二十八年晉加太子太保二十
九年七月疏言軍民戶籍各分旣隸軍籍卽應聽僉辦運乃各省
衛所紳宦富戶因辦運艱難百計思脫或將屯田轉售專置民產
向州縣納糧或冒入民籍考試入學中式或以民籍報捐貢監職
官或移易族譜或抽毀卷牘閱年旣久一遇報僉紛紛辨訴胥吏
多爲右袒州縣或礙情面往往憑狡辨之詞斷爲是民非軍衛所
官弁坐視而莫可如何是僉一富戶卽脫一軍籍僉一紳宦亦脫
一軍籍也查運丁除應得隨運屯田外造船則有官給價銀在家
則有月糧在途則有行糧雖多寡不同皆以資其辨運原非空役

身既殷富苟有人心卽應辨運至力能捐納職官者原圖報效乃以素隸之軍籍百計圖脫誠不知其所欲報效者何在況宦家富民承認一丁原不必身行或令族中子姪爲之或令知事家人代之今富且貴者以勢利求脫而所僉皆無力窮民於情理未得其平請嗣後遇丁力已疲勢須另僉卽富戶紳宦徑行僉報而仍潛令人猝辯或挺身自訴一經審虛富戶則按律治罪紳宦卽據實題參庶奸狡不使脫漏辨運不患無人 諭曰楊錫紱此奏可謂大破情面無瞻徇之習如所議行交部議敘尋議紀錄一次七月疏言糧船夾帶私鹽定例綦嚴直隸山東淮安揚州各有搜索惟揚州查鹽督臣專委守備一鹽臣專委分司鹽大使一臣標委遊

擊一可謂慎重矣乃此外又有淮揚道巡快十名無官而但有其役又揚州遊擊有守備同屬一營而將備各差查鹽兵丁六名又江都甘泉各差快手六名隨同搜查每回空幫至五臺山卽銜尾停泊而衙門眾多不能齊集需候經時是未查而已有稽遲矣及至齊集快手兵丁分爲八班遞進搜查或該管官因事不到兵役無所拘束往來自由又有藉稱文武各家人隨意上船彼此皆稱奉委大約一日止查十餘船以一幫五十船計之非三四日不能竣此臨查之稽遲也查竣後放至鈔關復有兵役攔船搜鹽不過羈阻索錢此查後之稽遲也南漕如江廣幫船乃通漕殿後每年回空過揚早則十月遲則十一月尙須涉歷江湖然後抵次已及

受兌之時安有修船之暇其爲苦累已非一日臣思事權宜歸於
一雜出徒爲滋擾若以總督鹽政委員爲不可信豈州縣之兵役
轉可盡信請嗣後專聽總督鹽政委員實力辦理餘兵役一槩停
止又向例糧船查出私鹽專參押空之弁領運千總免議實係沿
途逗遛巧爲規避此後遇私鹽發覺領運千總無論在幫與否一
體參處得旨所奏是部議從之三十年三月 上南巡復
賜詩曰內供卿貳外封疆司運今番政最良不必精嚴事皆就善
於驅使眾胥襄卽今水次排南舸弗誤秋來到北倉更議僉丁蠲
積習不拘流俗審應臧七月疏言駱馬湖當邳宿之間周一百四
十三里每當秋冬蓄水濟運乃沿襲相傳以駱馬湖水專濟江廣

重運而江浙幫船至古城驛以上卽阻淺起剝難望駱馬湖涓滴之助今年四月幫船阻滯臣商之河臣高晉先開柳園隄口運河之水立長五六寸江浙幫船遂得遄行次開王家溝口及江廣船至湖水未嘗告竭可見從前拘守譌傳使全湖之水半歸無用且此湖上受沂水下通六塘河入海每歲沂河水發由湖洶涌而下多爲海州沈陽之患若於四五月引湖水濟運則湖身寬裕至秋沂水驟至亦容受有地俾海州沈陽少減水患實爲一舉兩利從之三十二年十二月卒 賜祭葬如例諡勤愨

右 國史館本傳

維乾隆三十三年歲在戊子十二月初一日清江宮保漕督楊勤

愨公薨於位越旬餘遺疏至京 天子爲之震悼 賜祭葬如禮

特命予諡凡飾終之典備具在朝之臣罔不嗟歎余方以母憂在苫由之中惘惘累日哭於寢門明年冬十一月公子有涵以書來乞銘嗚呼余追隨公後者屢矣在吏部爲同官暨公出任漕督余先後攝倉場篆於公相表裏公之言論風采余親炙最久公之政事皆余所心儀而目覩者也余曷敢以不文辭公諱錫紱字方來一字蘭畹世居清江之上湖里其始遷祖宏中公在南宋尤著當時號爲六君子者也自是厥後代有聞人至贈公湄村先生復以理學顯公其仲子也公爲諸生時卽知名雍正甲辰舉於鄉丁未成進士分部得吏部考功司由郎中擢貴州道監察御史外補

廣東肇羅道乾隆丙辰 上卽位由巡道特署廣西布政使未幾
實授此公受知之始異數也辛酉 命署廣西巡撫旋實授蓋自
是將大用公矣嗣 內召佐宗伯甫一歲奉 命巡撫湖南以外
艱歸旋 命佐司寇未至京復出撫湖南以張太夫人憂守制回
籍服屆滿復奉 命仍撫湖南旋以左都御史 召繼奉 旨署
吏部尙書至乙亥二月湖南巡撫缺人 上以公在楚湘年久仍
命往署五月授禮部尙書十一月又奉 命署山東巡撫丁丑
正月以兵部尙書總督漕運公所至多異政粵西與安南接壤苗
民錯處公嚴立禁防而除去煩苛安靜無擾湖南素稱好訟公分
別良莠示以科條期年而民俗一變三莅其地父老咸歡迎如慈

父母焉至其爲漕督也所釐剔尤多 上亦信之專而任之久糧艘積弊爲之一清運丁之瘠疲者咸有起色奸胥猾吏向盤踞其中者均惴惴不敢名一錢前此數十年所未有也公捐館後繼公任者 上皆以一遵公約束爲訓所撰漕運全書今署漕督雲門黃公遂表上之垂爲令嗚呼公之心力亦瘁於此書矣公遭際聖明所敷奏率皆切於世務多見諸施行又公以部曹起家屢典文事所取多得人 御製宸章屢邀 特賜豐貂內紵之錫賚殆無虛歲兩晉宮銜至太子太保始終 恩禮優渥再三公之遇合可謂榮矣而公之忠誠事 主慈惠臨民識與不識皆能言之公其可謂不負所學矣至於居家孝友敦宗睦族推食解衣在他人

有其一節卽詫爲美談者在公特爲餘事又公於經濟爲長然詩古文亦多出入唐宋大家不苟爲命筆所著有四禮從宜四知堂詩古文明志居時藝唐風蟋蟀官箴說籌運草春草吟落葉詩皆可出而問世公之歿距生於康熙四十年十月初一日得年六十有八以乾隆三十四年十二月十二日葬於日中山祖塋之傍子六人長有濟辛酉舉人先歿次有涵壬申進士戶部陝西司郎中次有濬候選州同次有澳丙子舉人浙江清泉場大使次有洵幼殤次有泰候選鹽大使孫九人長懋學承重次懋璟懋珩懋瑄懋玖懋怡懋瑗懋琰懋恬孫女十一人曾孫二人熙芹熙績曾孫女四人銘曰

國朝通志卷之三十三
山川間氣篤生偉人用資康濟生爲名臣全受全歸沒爲明神是
謂不朽垂千萬春白石齒齒清流粼粼我公如在巍然冠紳蔥蔥
鬱鬱維江之濱山長水遠視此貞珉

右墓誌銘表曰修撰

國家漕東南之粟上輸 神倉聯鉅艦以載凡六千九百六十有
九艘艘各有運丁丁所雇募舵工水手之屬不下數萬人艘入運
河沿河左右待募牽纜之夫亦不下數萬人眾事繁於是各直
省並設衛所員弁領運以糾偷惰以察奸慝而必以文武威風知
大體可敬信之大臣總其事乾隆二十二年正月清江楊勤愨公
以前禮部尙書奉 特旨轉兵部尙書補授漕運總督公既視事

諮訪利病爬羅剔抉興之革之與眾同欲慮漕運或有阻滯時與
河臣協謀疏濬以時蓄洩俾其通達 上嘉獎焉而公淡泊甯靜
化導運官撫恤疲困靡有私求在任十二年凡糧艘所過安靜不
擾沿河居民往來行旅無不帖然三十三年冬十二月朔薨於位
上聞震悼 賜祭葬如禮 特命予諡凡飾終之典罔不備具
嗚呼公之忠誠結主知 聖天子之知人善任使可謂千載一時
何其盛也明年十二月歸葬日中山祖塋又二年乾隆辛卯恩科
會試公之孫懋珩成進士出公之行狀及其墓誌以示同年生魯
仕驥俾撰辭以銘其墓道之碑仕驥後生始進未能窺測我公公
忠體 國之誠於萬一奚敢妄有稱述再拜稽首以辭懋珩曰先

大父知子久愛子文章子其勿辭仕驥再拜受命謹按狀公諱錫
紱字方來號蘭畹江西清江人也曾祖諱相輔祖諱文燾父諱增
瑛三代並以公貴 誥贈光祿大夫如公官階曾祖妣聶氏祖妣
張氏妣張氏並 誥贈一品夫人公生而穎異幼卽端重若成人
稍長肆力於學尤篤嗜宋儒書務求所學有裨實用雍正五年成
進士初任爲吏部考功司主事升員外郎中皆在吏部轉貴州道
監察御史由御史出任廣東肇羅道 今上登極元年十月升署
廣西布政使越一年實授六年升廣西巡撫九年入爲禮部侍郎
十年又出任湖南巡撫十三年丁父憂去任十五年服闋補刑部
侍郎仍出任湖南巡撫十六年丁母憂十八年服闋仍補授湖南

巡撫未到任升都察院左都御史十九年署吏部尙書二十年二月仍出署湖南巡撫其年冬入爲禮部尙書二十一年冬又出署山東巡撫明年春正月遂總督漕運事二十三年晉太子少師二十八年加太子太保公旣自少讀書卽講求實用及在官試其所學學日以顯故所至內外皆有實政初仕吏部時明習條例老吏不能欺高安朱文端公深器之其出而治外也清心寡欲正己率屬汲汲以興水利廣積貯敦學校宏教化爲事在肇羅道任歲巡視瀕海之田修築圍基絕其水患在廣西屢平土苗之變並勦捕黔省逆苗而審知猺獞苗民愚而嗜利其黠者動以乞窳書符煽惑聚眾嚴飭所屬多方緝捕絕其根株更令實力行保甲法以靖

奸匪凡逆苗田產歸官卽令苗民承種收其租以資積貯借給貧苗既斲且撫安集有方苗民咸化屬吏或以人漫饋者公怒卻之入告上曰真不愧四知者湖南民好健訟多習邪教公皆一一嚴懲禁之又以湖南產穀之鄉鄰省皆賴以接濟蓄積尤宜加厚其溢額倉穀或調支協撥卽飭所在隨時買補而長沙岳州常德澧州諸境濱臨洞庭沿湖田廬全資隄垵護衛例於每歲秋冬督民修築然多視爲故事豪矜蠹胥包攬侵扣工力不均推諉延誤公嚴飭有司委熟諳隄工實力辦治而輕舟減從時巡視之察其勤惰予以勸懲隄工之成旣堅且厚彌望屹立民以無虞公凡三莅湖南父老懽迎如慈父母其政績之大者如此其細者不勝書

也公久任封疆數歷中外三十餘年凡所陳奏悉協大體而尤關國計民生之大者在湖南日以各省水利久廢愚民不知遠慮數畝之塘往往培土爲田一遇旱乾卽他膏腴都成棄壤請敕各省督撫凡有陂塘處所嚴禁改墾上詔行之又以湖南每歲採木有司至苗地視其所有木輒籍記之而賤價勒買商木運至江南私賣請自後商木憑牙行採買不得官爲交易其在苗地者州縣官爲審問聽民願賣者買之運過辰關按驗乃行遂著爲例其在漕督最久敷陳亦最多上皆允準施行是以漕政肅清軍民胥賴公旣薨繼公任漕政者上皆以遵公約束命之所訂漕運全書雲門黃公署漕督時表上焉嗚呼公眞可謂不負所學者矣公

爲人寬宏樂易待人以恕而自守極嚴平生於聲色貨利一無所好而以人才爲性命偏長薄藝靡不記錄尤加意敦崇正學之士獎誘激勸如恐不及居家孝友惇睦化其宗族鄉黨皆爲仁讓教子弟一以禮法綜公生平自始學至宦成居家視唐權文公宋范文正呂正獻三公靡有愧焉仕驥未及見公猥以文字辱公之知深懼弗稱承懋珩命謹著其風節之大者於阡而系以銘若其子姓詳於誌其所著述懸於家塾傳於學士大夫之口者可考而知也銘曰

聖主御世賢臣得位維勤懋公洪普厥施初出而仕見知正人始終一節不辱其身 天子常稱有體有用 主知旣隆臣節增重

醇儒之學純臣之心不懈于位終日欽欽淡泊甯靜其稟也正學
以成之爰定厥命廬阜之高章水之清公生其間山川之雲匪公
鍾靈惟山及水乾坤正氣公萃厥美萃美在躬車服以庸 盛朝
用人惟德之崇維公之德世可法則遺命子孫竭誠報 國有子
有孫世受 國恩傳公之教逾久彌敦公教所垂豈惟孫子凡厥
志士孰不仰企企公之教仰公之功齊魯楚粵慶流無窮楚粵齊
魯公德所溥公德之溥功由 聖主 聖主用公公績乃彰於萬
斯年視此銘章

右神道碑銘魯仕驥撰

公諱錫紱字方來號蘭畹江西清江人父英玉以名諸生授經講

學鄉里宗師之公自幼穎異爲文灑灑數千言稍長究心於濂洛
關閩之書內行篤修來自慊而後已雍正五年成進士初仕爲吏
部考功司主事明習條例老吏不能欺高安朱相國攝部事最器
公十年由御史出爲廣東肇羅道端已率屬一切餽遺請託皆不
行肇境田瀕海者多藉圍基爲外衛公每歲親往相視修築完固
終其任無水患乾隆元年署廣西布政使條奏數事其二事言革
職佐雜官宜免追邊俸州縣官不得以土產獻上官五年土苗吳
金銀等作亂公與巡撫討平之明年九月授廣西巡撫貴州土苗
石金元燒永從縣治公發兵合剿平其穴擒石金元旣遷江土苗
數百謀犯思恩府城公發兵往捕獲賊首李彩及其黨八十餘人

行保甲法恤苗民之乏食俾得耕作民賴以安屬吏或以人蕩饋者諱其名曰長生果公怒卻之以入告 上曰是不愧四知者矣八年入爲禮部侍郎明年補湖南巡撫公以各省水利日廢愚民不知遠計數畝之塘往往加土爲田一遇旱乾都成棄壤有司惟計田糧較重以改則升科爲勸墾之功所謂令近利而忘遠害者也請 敕各省督撫凡有陂塘處所嚴禁改墾 上詔行之時湖南每歲採木有司至苗地凡所有木悉籍記之又賤買商木運至江南輒賣其贏餘公奏請自後商木憑牙行採買不得官爲交易其在苗地者州縣官爲審問聽苗民有願賣者乃買之運過辰關按驗乃行著爲例十四年丁父憂歸十六年起爲刑部侍郎仍出撫

湖南明年丁母憂歸十九年冬起爲左都御史凡有奏對侃侃持
大體明年正月署吏部尙書二十一年出署湖南巡撫五月補禮
部尙書其年冬出爲山東巡撫時二十一州縣被水公奏請蠲貸
有差糶常平米減價三分之一以魚臺土城低窪請移置高處絕
後患明年授漕運總督在任十二年每與河臣協謀河務以時蓄
洩俾漕運通達 上常嘉獎焉時旗丁多疲困公加意撫恤運官
不敢有私求旗丁感公德建生祠於河上公性淡泊平居未嘗不
讀書奏疏詳盡事理每下部多如說施行所著書有四禮從宜節
婦傳漕運全書及詩文集行於世三十三年冬薨於位年六十有
八 賜諡勤愨 予祭葬皆如禮

贊曰近世名臣推朱文端楊文定蔡文勤是三公者負正直之操
屹然爲當世望若楊公者其三公之亞歟旣已遭逢 聖主敷歷
內外而天不永其年卒未竟其用有心者當爲 國惜爲民悲而
公則可無憾矣余與公爲同年友稔知公故爲之傳

右家傳彭啟豐撰

先生督漕體卹旗丁及押運各官纖埃不染使得過行數十年來
論漕政者必舉先生第一

右湖海詩傳張維屏錄

瑚寶

瑚寶伊爾庫勒氏滿洲鑲白旗人雍正五年武進士授三等侍衛六年派往北運河工監修防汛旋補陝西永興堡守備七年隨征巴里坤 賞銀四百兩八年準噶爾賊眾二萬餘犯科什圖卡倫瑚寶隨總兵樊廷往剿遇賊於尖山獲駝九十復自托賴卡倫前進敗賊於北山又遇賊於烏素達坂擊追之翌日賊分七隊迎敵官兵衝殺自辰至申直抵科什圖斃賊無數賊圍峩崙瑚寶赴援夜半賊四面衝營瑚寶統領先鋒雪中轉戰七晝夜奪波羅額並白墩紅山鏡兒泉等處生擒賊首六賊潰遁九年三月準噶爾賊犯土魯番瑚寶復隨樊廷進剿尋 命撤回本汛 賞銀三百

兩九月署延綏鎮左營遊擊十一年授定邊營都司十三年遷黃甫營遊擊調肅州鎮右營遊擊乾隆元年調督標後營遊擊四年遷陝西固原參將六年遷安西靖遠營副將七年派駐哈密九年駐防期滿 特命給總兵銜再畱三年十一年擢山西大同鎮總兵 賞戴花翎十二年二月遷陝西固原提督先是固原兵丁有糾眾搶劫之案至是 諭曰固原兵丁之驕縱犯上不法已極亦由許士盛急遽輕率以致激成事端瑚寶莅任應加意整頓但亦不必過於峻厲彼無知之輩愚悍性成易爲流言所動必當安慰眾心使知國家象養體卹之深恩思守法奉公之大義瑚寶係旗員向曾駐防在外諳習邊情今簡任提督勿因甫經到任急切辦

理以致人心惶懼惟當慎密持重緩急得宜使兵知畏法漸次轉移可耳又諭曰固城內外兵多民少而民人中回民過半私立掌教等名此於人心習尚俱有關係但相沿已久未易繩以官法驟爲改革瑚寶駐劄固城應就近時時體訪量度情形以期永杜弊端至標兵中回人倚恃身在戎行敢於滋事應畱心分別其豪悍者懲革之怯弱者沙汰之漸次整飭使營伍肅清但不宜顯露形迹并不可以此意宣示營弁防其洩漏又致譏言駭聽所關更復不小慎之疏陳固原兵丁善後事宜一營兵賢愚不等請仍行互結例五人聯具一結一各省兵丁有子弟內頂補者有另招募者請將餘丁新兵俱先造清冊遇缺頂補一散餉例發流軍請於

前三日將借給接濟應扣預出示曉諭仍於驗餉日查對流軍數目給發一申明賞罰分條刊發令將弁等時爲講解一開操時於每十日內分弓箭烏槍技藝三項輪操一操演所需鉛藥等項向以公費不敷令兵丁自備請動公費製給一固原原額馬兵三千名步兵千名請改設馬糧八十分以敷公用一兵丁缺乏請於冬季領餉時將春餉預支五千兩以足歲底之費卽於次年分四季扣除下部議行并諭曰諸事如此畱心行之以安靜持之以永久庶邊疆重鎮賴以甯輯十二月奏言無互結兵五十餘名半係滋事回民皆革遞原籍又有頗知孝友勤學技藝者量拔以示鼓舞上嘉獎之十三年二月奏言標屬附近慶陽等十六協營馬

步額兵缺出先將本兵子弟充補如無子弟毋庸召募卽於標下新兵內撥補約計每年本標補六協路補四以見存新兵名數覈算協路可去新兵四百餘名不特可節三四年糧餉清釐新兵更爲迅速 上嘉之時調固原馬步兵二千往金川軍營奏言向例兵二名合給馱馬三匹以載軍裝臣思二騾能任三馬之載若以所折三馬價採買二騾爲數可減三分之一 詔如所請九月署甘肅巡撫兼辦總督事務十一月 諭曰目下要務惟以派兵料理一切妥協爲上至撫臣之事乃刑名錢穀一日有一日之責正不可以攝篆而忽視之奏言陝省今歲歉收大兵經行草料採買維艱將甘省倉貯豆石就近撥運俟兵過照買還倉奉 旨此奏

於經理大兵軍需甚有裨益其通融協濟不分彼此足見實心任
事殊屬可嘉是月授兵部尙書十二月擢鑲黃旗漢軍都統十四
年正月署陝甘總督 諭曰陝甘係入川要路臺站供億等事往
來查察一應軍郵吏治民情宜加意撫輯實力整頓以副委任二
月奏言瓜州五堡回民生計維艱請照乾隆八年例於廳倉內借
給小麥四千石 從之尋署湖廣總督四月擢漕運總督先是寶
慶協撤回兵丁張又龍等受同鄉船戶囑託令益陽典史另雇本
地船隻典史爭論并毆衙役把總彭永年以應付遲誤兵丁往催
衙役扭打飾報提督史載賢據報入告 上命瑚寶查辦旋經前
督新柱密查奏 聞而瑚寶仍據原奏未能鞫實受囑各情節並

以新柱見赴雲南請俟回任會辦 上責其於封疆事理全未明
晰一味推諉十五年十月奏言請將截留山東幫船應追原領銀
米錢文自本年爲始分作三年扣還以紓丁力十六年正月奏言
直屬偏災州縣見將河南運通粟米截留十萬石扣賑查河南省
今歲起運粟米不敷截留請於河南山東二省運米內各截留五
萬石均 從之又奏言上江宿州亳州鳳陽下江宿遷邳州等處
去年被災業將本年應徵新舊漕糧分別蠲緩此項減船軍丁苜
葢日用之需原與截留軍丁無異因災減歇未免拮据得 旨於
例給折半之外再賞給二分八月奏江省起運白糧船向例五年
調撥爲期太久以致新舊輪運卽有殷實堅固丁船不得一體選

運請照漕船三年調次例凡運過白米三次卽另選軍船領運下部議行九月奏十三年截畱江省起運漕糧分貯山東備賑所有給過各幫旗丁月耗銀兩例應追繳但各旗丁見領錢糧僅供一運之用請將滁蘇等幫應追銀兩分年扣完 上允之十七年六月命來京會軍機大臣議裁各省漕船陋規一切章程十八年三月以失察逆犯盧魯生捏造僞稟事部議革職 詔從寬畱任二十一年六月因病請解任調理七月卒 賜祭葬諡恭恪

右 國史館本傳

張渠

張渠直隸武強人由副貢任太常寺博士加捐郎中雍正五年補刑部郎中尋充大通橋監督七年發廣東以道府用八年四月上以渠兩任倉差聲名俱好辦理亦屬諳練 諭督撫酌量題補六月題補惠州府知府奉 旨擢肇羅道十年遷按察使十二年三月疏言竊案宜分夥黨多寡器械有無定罪請嗣後三人以下持械行竊雖不得財杖六十徒一年四人以上雖不得財亦無器械爲首者徒一年爲從者杖一百得財爲首者發邊衛充軍從者流三千里六人以上不論會否得財首從徒三年賊重爲首者流三千里從者減一等至十人以上不分首從俱發邊衛充軍地方

官疏防諱匿照強盜例處分疏入議行四月遷布政使十三年正月調江蘇布政使乾隆三年疏言江省營馬放青向無定所多踐食田禾又壞濱江海處爲牧場與民爭訟請令駐防六旗營汛視馬數定牧場禁民占墾如無曠土卽將營中公地州縣官寨改設或值民間草地豁租立界如踐食田禾旗兵鞭一百營兵杖四十過多者依毀伐稼穡律治罪革伍追賠該管官失察者罰俸縱庇者降革又奏請變通舊例二條一向例地丁錢糧經徵州縣欠一分至四分者降職戴罪徵收督催道府直隸知州欠五分以上降職戴罪督催俱限內不完始議降調署任官初參三分以上經徵督催俱降一級調用二限未完不及一分降一級畱任臣思正官

僅止虛降而署官之咎獨嚴勢必嚴行酷比請署官處分與正官
畫一庶免偏枯一向例戰船小修勒限四月大修六月違限一月
者承修官降一級調用二月三月以上降二三級調用五月以上
革職督修官與督撫俱分別罰俸降調至內河弁兵平時哨船與
外海戰船不同而修造違限一例處分輕重失宜請酌定不及一
月者免議兩月三月以上罰俸四月以上降一級畱任五月以上
降一級調用督修以次遞減較別項工程處分已重比外海戰船
處分已減承辦之員不致概罹重罰均下部議行尋擢湖南巡撫
疏言乾州永綏同知鳳凰營通判管轄紅苗遇逋犯懸賞購捕養
廉僅自給請每年各增銀二百兩以資緝捕 詔如所請行四年

二月調江蘇巡撫十一月疏劾蘇州織造兼管泲墅關海保貪婪枉縱各款命總督郝玉麟等會鞠得實擬罪如律五年四月疏言吳江縣盛澤鎮地界浙江商販雲集易藏奸匪請將縣丞移駐以資彈壓部議從之七月調湖北巡撫十一月卒

右 國史館本傳

富明安

富明安滿洲鑲紅旗人姓富察雍正五年由筆帖式遷戶部主事
洊擢郎中乾隆十一年授廣東惠潮嘉道十三年調廣西蒼梧道
十六年以前任惠潮嘉道任內失察奸民李阿萬藏匿經卷議降
二級調用旋經總督陳大受檢舉以富明安雖失察於前但訪聞
李阿萬等圖謀肆劫密諭潮州府飭縣拏獲例得免議前奏未經
聲明應請開復並奏畱兩粵補用十七年補廣東高廉道是冬調
糧驛道十八年調廣西蒼梧道二十五年擢福建按察使二十六
年調廣西八月遷江西布政使二十七年十月疏請南昌府同知
通判二員中擇一員定爲滿缺專司繙譯部旗清字文移 上以

駐防省分特設理事同知今江西並無駐防而請增滿員有心取巧嚴飭之二十八年 特旨派巴里坤辦事三十二年三月因廣東巡撫明山劾富明安前任廣東糧道任內浮收倉米得 旨革職解京確審軍機大臣等訊無浮收情弊九月署山西布政使三十三年九月疏言晉省驛站共二十二驛內二十驛計程七十八里路實平坦或山徑高下不一者路不過四五十里或五六十里者接送馬匹均屬裕如惟霍州霍山驛至洪洞縣普潤驛八十餘里山坡陡偏馬力易疲請於霍山普潤兩驛適中之趙城縣添設一驛卽於二十二驛內酌量抽撥馬匹議行十月護理巡撫事疏參雁平道時廷霽巡查州縣縱容家人需索任性責處輿隸得

旨革廷謫職十二月擢山東巡撫三十四年九月疏言高密縣百脈湖因匯五龍河膠河諸水夏秋常致滿溢請於湖內挑濬引河引膠河之水北入膠萊運河則湖旁約有可耕地四百餘頃見委員就引河挑濬九百二十丈寬二丈深五尺已至湖心復分支河兩股由東北至岔河入膠萊運河計長九百丈俱竣事 上嘉之先是太僕寺少卿范宜賓條奏裁減東省閉壩復水夫工食十月富明安疏言水驛夫役向係長養在驛若閉壩後裁減工食勢必散逸臨時雇覓倍多糜費且閉壩多在十一月開壩有早至正月者中間兩月有餘銅鉛守凍船隻均須撥役看守請無庸裁減 上是之三十五年正月疏言濟南府屬之章邱鄒平長山新城及

青州府屬之高苑博興樂安等七縣六百餘里中有小清河由章邱長白山發源東至新城高苑兩縣界分北條爲支脈溝又東至博興縣分南條爲預備河其中條則仍爲小清河分宣入樂安之淄河歸海近年七縣諸湖泊水漲中多淤塞其北條之支脈溝分小清河上游水勢南條之預備河防小清河下截頂衝亦俱壅滯以致諸水散漫東趨樂安草橋入窪一帶良田數千頃常被水害欲弭七縣之患應從下游之樂安始臣見飭於樂安之小清河挑淤培隄並將預備河及支脈溝大加挑濬務使支幹通流建瓴而下仍飭上游各縣將支脈溝及小清河上截一體挑通淤淺不特博興之夾河樂安之八溝等處數千頃可復膏腴卽章邱鄒平常

山新城高苑等縣附近湖泊地涸出必多於民生大有裨益各縣居民咸知利病切己俱願出力興工無庸動帑 諭曰有利民生之事應爲者但不可滋弊耳三十六年二月疏言東省上年伏秋多雨窪地被淹臣已設法疏消惟濟甯州西北一帶坐落運河西岸緊靠運隄爲曹州府屬之下游各路坡水匯注又以運河勢高不能放水入運遂至閒段停積惟西面原有溝形可以疏導臣見將舊有溝渠五道逐一挑通使其南流入中頭可歸昭陽湖又蘭山縣沂河西岸江風口支河一帶原建滾水石壩分洩沂水南流入駱馬湖石壩年久蟄陷一百餘丈見飭修整并查涑河一道至江風口北亦係分洩沂水南流歸運淤淺應挑者四千八百餘丈

其餘墨河及響水等溝二十餘道均有淺滯見俱挑挖深通足資
宣洩至濟曹東等府屬各有老窪地畝或近河湖或近海口而運
河東之徒駭馬頰老黃河爲洩漲入海要途臣見飭屬相機疏濬
諭曰此實勤民之本也三十八年二月授閩浙總督五月調湖
廣總督七月疏言湖南各營千總把總向由總督考拔總督駐劄
武昌與各鎮營協有相距甚遠之地在考拔千總把總尙藉有廉
俸仍當赴武昌考補而弁兵考補外委額外長途往返資斧維艱
除湖南岳州一營距武昌甚近其考拔外委額外仍歸督臣餘請
由提督考拔議行三十九年三月疏奏獲京山縣謀逆首犯嚴金
龍父子正法尋卒 諭曰湖廣總督富明安歷任封疆老成勤慎

方資倚畀今偶患痰喘遽爾溘逝深爲軫悼著加贈太子太保所有應得卹典該部察例具奏尋議卹如例諡恭恪

右 國史館本傳

明山子海甯

明山滿洲正藍旗人姓伊爾根覺羅氏雍正五年由閒散襲佐領
遷參領緣事革職乾隆十九年 詔給主事銜在軍機處行走旋
補戶部主事遷員外郎二十年署甘肅甯夏道二十二年遷山西
按察使二十四年正月遷浙江布政使二十五年奏嚴禁窩賭二
條一拿獲賭博應將造賣賭具者追出治罪查雍正十三年刑部
議准湖南巡撫鍾保條奏賭博案內不將造賣人供出即將買有
賭具之犯照販賣賭具爲從例杖一百徒三年後律例館改照不
應重律杖八十定例既輕犯者益眾請仍照原例問擬杖徒一窩
賭必有聚賭之人往來兩鄰無不悉知嗣後如有經旬累月開場

窩賭者許左右鄰舉首照例給賞徇隱照不應重例杖八十若得財准竊盜計贓從重論部議 允行二十六年丁母憂仍在軍機處行走二十七年五月署江西巡撫八月授廣東巡撫九月疏請禁印官蟒衣跪迎督撫 上是之部議 允行十月疏言臣自江西起程聞浙江被水將來米價必昂江西本年米價甚平陳陳相因請 敕江西浙江撫臣酌量情形如需接濟卽碾撥江西常平穀二十三萬石運浙浙江民食有資江西又可收出陳易新之益得 旨嘉獎二十八年正月奏言廣東府廳貯穀前撫臣鶴年奏令附近州縣碾放春夏兵米秋後徵收還倉查廣東通判倉貯穀八萬二千七百八十餘石歲撥南海番禺東莞順德新會香山增

城清遠八縣兵米僅六千二百石十三年始出易一週粵地卑濕
入貯徵耗堪虞請自乾隆癸未年始除增城清遠二小縣仍照舊
數碾放其南海番禺東莞順德四縣每年各加撥千石新會香山
二縣每年各加撥六百石連原撥數共出陳穀萬一千四百石七
年即可全數易新 詔如所請行六月調陝西巡撫十一月復調
廣東巡撫先是鹽運使王槩署糧道浮收兵米折銀萬餘兩入己
各埠虧餉銀檄運同保成往查槩向保成跪求保全總督蘇昌明
山兄也未行參劾明山莅任奏請革任 諭曰此奏可嘉之至蘇
昌竟爲所愚而汝不爲顧兄弟私情卽行奏參不負朕任用之恩
矣勉之槩尋擬罪如律三十二年閏二月調江西巡撫暫留署兩

廣總督六月奏言崖州僻處海島產穀素少額貯穀五千三百七十八石有奇額外穀一千一百七十四石有奇連年碾放兵米所存無幾查高州府電白縣有溢額穀七千餘石與崖州連近請撥運五千石與崖州額貯穀額外穀共一萬一千五百五十二石餘爲定額歸善縣額貯穀十一萬餘石爲數甚多上年平糶尙有應買補穀價請裁六千一百七十四石二斗六升價銀批解充餉卽以抵崖州加貯額部議 從之三十二年二月調西安巡撫三十年十二月擢陝甘總督三十四年十一月以成縣知縣湯尙箴縱役索詐滋事不早糾參部議革職 諭曰明山著革職從寬畱任十一月以烏什換班兵所乘用馬明山不照定例咨新疆大臣

交原領兵牧放遽令入新收項下 上以所奏取巧交部嚴議部
議革任 詔免之三十六年五月以前調任江西巡撫時令首縣
修改衙署事發 諭曰前據高晉查審知府李枝昌一案內有墊
用前任巡撫明山修理書房銀兩之事因令該督撫秉公確查並
令明山明白回奏旋據明山覆奏彼時因書房窄狹拆去截板所
費不過十餘金俱係隨時發價而所需工匠不得不令首縣代雇
因自請交部議處朕以明山所奏如果屬實尙不致有干吏議而
其事既係首縣承辦無難徹底根查因交高晉一併查明具奏今
據高晉奏查明山於廣東調江西時卽先行札飭中軍傳諭南新
兩縣修改衙署所費約五百餘金見有印封原札可據呈覽與伊

回奏所稱無涉等語實出情理之外明山不應如此督撫到任修理衙署令首縣代辦亦事所常有但不當累及屬員或卽發價稍遲其罪亦小乃經傳旨詢問並不據實直陳輒敢託詞捏覆希冀朦混封疆大臣爲朕所倚任顧可心存欺隱乎且小事如此則何事不可爲大事尙足信乎明山著交部嚴加議處復諭曰明山見在交部嚴加議處伊係革職畱任之員部議自應革任向來督撫遇此等處分或事屬公過或情尙可原每以人才難得酌量加恩仍予畱任今明山於覆奏衙署一事敢於欺飾朦混其心已不可信且其近日辦事動輒舛錯頗不如從前之精到亦旣屢令軍機大臣嚴飭矣然人才難得尙望其改過自新今竟敢爲欺飾若

此豈可復膺封疆重寄明山著卽解任聽候部議尋議革任三十七年三月授副都統 命爲烏魯木齊領隊大臣疏言烏魯木齊增駐滿兵三千於城西北建官署兵房由內地撥綠旗兵千五百乘春建造備今秋滿兵移駐但計程綠旗兵四月方到工而滿兵今秋出口卽需住房臣酌撥烏魯木齊差屯兵二百先行工作俟內地兵到接辦修市肆百間收租備 恩賞暨公用移涼州理事同知駐烏魯木齊新城以資彈壓 從之四十四年九月卒子海甯官至浙江巡撫五十五年十月卒 諭照總督例給予卹典賜祭葬諡勤毅

右 國史館本傳

海甯

海甯滿洲正藍旗人姓伊爾根覺羅父明山官至陝甘總督終副都統自有傳乾隆三十二年海甯由筆帖式授工部主事三十三年三月在軍機處行走十二月擢工部員外郎三十四年二月兼署武備院郎中三十九年十月授戶部銀庫郎中承襲佐領四十二年十一月授雲南糧儲道四十三年十一月擢甘肅按察使四十四年九月丁父憂仍在軍機處行走四十五年正月命署奉天府府尹三月諭曰海甯面稟軍機大臣所奏李侍堯婪贓斂法各款經朕特派大臣前往查辦見據和珅等審訊屬實已降旨將李侍堯革職拏問海甯爲滿洲人且係原任總督之子由軍機司

員擢至臬司日擊李侍堯種種婪贓於回京時卽應據實上陳如不敢自行具摺亦應開列款蹟呈明軍機大臣轉爲奏達乃不過託之私相議論逮朕有所聞召伊兩次面詢海甯始終隱匿不肯指出貪婪之蹟且謂李侍堯能辦事也迨傳旨嚴詢始據開具各款是其面欺之罪不能勉以所控非誣曲爲寬貸也海甯著交部嚴加議處部議革職奉 旨依議五月 特旨賞員外郎銜往恰克圖與章京烏布德自備資斧效力贖罪四十七年十二月 賞副都統職銜前往科布多作爲參贊大臣五十七年七月 諭曰據海甯奏將由烏里雅蘇臺解往科布多應行枷號一年之什布常裕枷號月滿仍送烏里雅蘇臺管束等語什布常裕係去歲七

月解往科布多枷號之人至今年七月始滿一年海甯先期兩月
於五月十八日卽行發摺實有沽名釣譽之心殊屬非是海甯著
嚴行申飭仍交部察議部議降三級調用得旨海甯降三級調
用之處俟差滿回京之日該部再行請旨五十二年二月擢兵部
左侍郎署正白旗蒙古副都統部臣奏海甯前議降三級奉旨
從寬畱任七月調鑲藍旗蒙古副都統十二月查辦直隸延慶州
已革知州紀聞歌虧缺倉糧案擬罪如律五十三年二月調鑲黃
旗蒙古副都統帶同員外郎王士棻審山西徐溝縣知縣林琅奉
酷刑致斃牙行牛建奎王敦案琅奉革職抵罪八月署山西巡撫
十一月實授五十四年二月諭曰前據海甯面奏山西按察使

明祿年老多病著來京交部帶領引見候朕另行酌用三月奏晉省各府倉出借穀自乾隆三十年遵例俱由首縣經營惟潞安府永豐倉仍由府經歷辦理查此項貯穀雖不出糶每年仍外借各屬農民請將見存本一萬八千八百一十七石改歸長治縣經營下部議行十一月奏審擬忻州民人李承光等控該州管門長隨祁三誑誦案將祁三問擬發遣 諭曰所辦甚屬錯誤各衙門幕友書吏家人長隨往往藉端誑誦滋事受賄情節最爲可惡一經發覺竟必須嚴行治罪方足以示懲儆今祁三因李承光以銀價加長鋪戶不能獲利商同各鋪戶送銀四百三十兩求增錢價祁三收受既不能爲之辦理又不將銀退還以致李承光情急控告

是祁三以管門長隨膽敢誑受財物至四百三十兩之多贓已逾
貫非尋常受賄者可比若將該犯問擬發遣則該州業已失於覺
察連累獲咎而該犯不過發往近邊轉得置身事外且此等不安
本分之徒到配後又安知不復行訛詐別生事端海甯所擬實屬
不知律例失於寬縱此中幸無人命法當立決無人命亦當監候
除將原摺就近發刑部照蠹役詐贓例另行從重定擬外海甯著
傳旨申飭五十五年正月 諭曰昨召見朔平府知府張世祿察
其才具甚屬平常該員係兩次六年俸滿給咨送部引見之員該
撫於屬員賢否單內尙稱其居官勤勉辦事畱心因查檢從前勒
保伊桑阿任內所奏屬員賢否單內則僅稱爲在任年久黽勉供

職并有辦事拘泥之語可見勒保等於屬員賢否尙能畱心覈實而海甯填註該員考語尙稱其辦事勤勉殊屬非是該員係兩次俸滿如果才具尙好並能勤勉供職早應予以升擢乃久經俸滿並無出色之處朔平雖係簡缺但知府有表率屬員之責豈可以無用之人濫膺厥職以爲姑息養老之地著傳諭海甯接奉此旨後遇有疑難案件卽委令該員承辦其才具能否勝任之處無難立見如竟不能勝任卽應據實奏明或以京員改用斷不宜稍存姑息再俟六年俸滿以致貽誤地方該撫毋得稍有迴護致干咎戾也世祿旋患病回旗六月 諭曰海甯彙奏錢糧完欠數目一摺其單內所開錢糧各條款完欠等項各廳州縣開敘繁雜閱之

殊未明晰該省每年額徵錢糧幾及三百萬兩各州縣額徵錢糧亦
有定數其已完未完自應簡明開寫何以含混不清若此再各
省徵收分數朕時深廬念山東河南及江南湖廣西安無不早奏
卽最遠之雲南等省俱早經具奏而山西距此閒甚近何遲至此
時始行奏到可見該撫於地方一應事務近日竟漫不經心諸事
懈怠延玩海甯著傳旨申飭並著將該省每年額徵確數及節年
已完未完之處另行詳悉查明開具簡明清單速行呈覽八月調
浙江巡撫九月諭曰浙江沿海地方盜風尙未盡戢海甯到浙
後務須力加振作查拏淨盡以靖疆界十月奏千總袁鳳鳴鄭甯
巡至五遜外洋緝拏匪船被賊拒捕打傷並搶掠礮位刀械逸去

臣見在偶感風寒調理旋愈據提臣陳杰移會卽兼程馳赴温州督率官兵設法擒拏 諭曰温州一帶盜匪出沒洋面最爲商船之害上年經伍拉納親往該處督拏緝獲數案今盜匪尙敢肆劫竟至拒捕傷官掠取軍器不法已極可見沿海盜風未能盡戢海南甯見已親赴温州著傳諭該撫卽督率文武員弁設法擒拏以期全數弋獲按察使署布政使歸景照奏海南甯於本月初七日往温州十二月行抵建德寒熱復作似成瘧疾因趨程心切不甯停泊已抵蘭谿服藥未能速效神氣稍覺沈絀見暫駐趕緊醫治俟平復再行前進奉 諭曰海南甯在途次寒熱復作神氣沈絀自應卽行回省調理以期速痊若再力疾前往加以調息一時不能全愈

轉於地方公務無益見在該撫業飭溫處道高樹勳紹興府李亨特先行馳往查辦而陳杰自甯波馳赴溫州路程較近此時早已至彼海甯竟應速回省城上緊調治是月卒 諭曰昨歸景照奏海甯前往溫州查拏瑞安洋面盜匪在途患病當經降旨令該撫卽回省城調理以冀速痊今據歸景照奏報海甯行抵蘭谿地方身故殊爲可惜海甯自簡任封圻以來尙屬急公奮勉茲甫經調任浙江正資整頓乃以力疾前赴溫州督緝洋匪在途溘逝深堪憫卹海甯著加恩照總督例給予卹典該部察例具奏 賜祭葬如例諡勤毅子瑞昌刑部主事

右 國史館本傳

國朝耆獻類徵初編卷百七十四目錄

疆臣二十六

葉存仁

李治運

熊學鵬

楊仲興

王師

李瀚

吳士功

王檢

國朝耆獻類徵初編卷百七十四目錄

國朝文獻通考卷一百一十四

--	--	--	--	--	--	--	--	--	--

國朝耆獻類徵初編卷百七十四

通奉大夫前署江西巡撫江西布政使司布政使湘陰李桓輯
疆臣二十六

葉存仁

葉存仁湖北江夏人雍正六年以捐納州同發江南河工效力十二年補江蘇銅山縣知縣乾隆元年遷邳睢河務同知十年遷淮揚道十一年葦蕩營參將韓烈揭報存仁糜帑玩工經署漕運總督劉統勳等審虛褫烈職十二年遷安徽按察使十三年調浙江十四年疏請 敕各省督撫恪遵 世宗憲皇帝諭旨凡旗人外任文員六十歲以下熟習騎射副將等官不許坐轎如違令同城

文官稟參下部議行十六年二月遷浙江布政使十九年二月命刑部尙書劉統勳查南河道庫錢糧奏劾歷任道員侵欺解存仁任六月總督喀爾吉善疏奏存仁名下止應追銀七十兩零已全繳 諭曰劉統勳查參歷任河庫道侵欺錢糧原未逐員分析聲明存仁應賠之款甚少失察咎不至褫職著來京引見尋授河南布政使二十年因浙江任失察庫書包攬侵欺經巡撫周人驥奏參降補河南按察使二十二年六月授廣西布政使二十五年二月疏言廣西鼓鑄歲需白鉛三十三萬餘斤幹崗廠見存者數五年用上年又增虛崗一廠歲收甚多商售不及工本拮据查廣東河南亦歲需白鉛令赴廣西局買運腳費不多鉛可流通部議

如所請行二十七年擢刑部左侍郎兼署禮部並副都御史事二十八年正月授河南巡撫時直隸總督方觀承奏修漳河水利存仁奉旨會勘尋議於沙莊迎溜挑引河三百丈入正河於舊壩上二百十八丈順流攔築土壩又奏沙莊下游淤處開七百餘丈工竣卽併力築壩增護城隄以資捍衛疏入報 聞四月 命偕侍郎阿永阿審湖北歸州盜案五月疏奏盜犯張洪舜等卽從前犯案縱脫之盜因臬司沈作朋偏執枉縱將知州趙泰交題參事主發遣遂成冤獄及後案發沈作朋回護牽制承審各員迎合不辦請將沈作朋等革審總督愛必達不飭改正巡撫宋邦綏到甫半載非任內事亦意存消弭均難辭咎尋又查明前任巡撫周琬

湯聘扶同徇庇無意昭雪先後奏 聞鞠實奉 旨卽將盜犯正
法臬司沈作朋斬決餘各治罪如律十一月授存仁河東河道總
督十二月山東巡撫崔應階奏請挑濬荆山橋河 命協辦大學
士公兆惠同存仁等相度二十九年正月合疏奏稱荆山橋上承
南陽昭陽微山諸湖之水由王母山彭家河入運二十二年挑竣
後土積沙停應再疏治以王母山爲正河其南潘家河爲副河分
流入運上游來水足資宣洩彭家河地勢高仰屢挑屢淤毋庸再
議興修至小梁山三處支河俟湖濱涸出續挑並將湖口閘滾水
石壩開寬二十丈爲有益 從之三月疏下河廳向祇額設淺夫
每衛河水漲簽椿下埽伎藝生疏前河臣張師載奏於運捕泐三

應撥兵四十專駐協守但不能攜眷餉銀難資兩處養贍查近來
淺夫已多練習請嗣後運捕迦三廳兵糧出時仍將發駐下河兵
撤補所遺下河兵缺卽以淺夫拔補不數年悉隸爲兵發駐者可
全回原汛得旨如所議行六月存仁卒

右 國史館本傳

國朝文獻通考卷之四十四

四

李治運

乾隆元年春湖廣總兵崔某劾大學士鄂爾泰苗疆失機是時鄂方以首相受世宗遺詔輔政天子怒下崔於理刑部九卿議崔罪斬立決右審司主事李公治運年二十餘獨持不可曰如是將啟大臣擅威福之漸崔因是得末減而小李主事之名震天下其年秋余薦鴻詞科入都受知於公父編修重華公世所稱玉洲先生是也得交公公狀短小豎眉秀眸微鬢爲人端靜詳審無多言終日坐騾車赴部決事他人休公不休以雍正七年進士授刑部主事遷員外再遷禮部儀制司郎中送琉球國使還主廣西鄉試督山東學政俱有聲天子知公練刑名改授陝西榆林府知

府尋遷湖北糧道安徽按察使調浙江公吳江人最鄰浙在浙八年民無聽請之嫌戚朋無矯情之怨人以為難嘉湖二府連淞泖震澤漁匪竄焉公頒舟式而編排之盜風爲清紹興甯波兩府近海出洋者多爲奸公命州縣覈其貨書其年月姓名按籍鉤考姦無所容嘗言例雖繁統於正律心能小自能活人每勘獄窮日夜孜孜爲求其可生之路巡撫某不悅劾公迂緩沽名 天子休公於家時太夫人年八十餘公得歸養頗以爲懽而浙之士民送者涕泣不能去三十六年七月枚過吳江公病已篤聞枚至力疾出見談天下事侃侃然蓋身雖衰用世之心尙在也別後一月薨年六十二子會辰葬公畢來乞表墓且云公在浙平某獄甚善歸當

取原牘相付已而書來檢寄無從以爲大感予謂會辰無傷也漢
于公自言活人多後世當興卒其所活何人史莫得而詳也嗚呼
此其所以爲陰德歟公字甯人一字漪亭夫人張氏子一女三葬
某

右墓表袁枚撰

同身者廣矣行不漸

五

熊學鵬

熊學鵬江西南昌人祖一瀟工部尙書自有傳學鵬雍正八年進士授兵部主事十三年充貴州鄉試副考官尋遷員外郎升郎中乾隆五年授山西道監察御史六年二月奏王貝勒貝子公所屬五品以上長史護衛典儀等官係引見除授如當斥革應奏參交部覈議又滿洲蒙古漢軍旗人有爲綠營武職及八旗文員老病休致者應照在旗武職例查明曾經出兵打仗及有無功牌分別給俸從之三月請定京察濫舉處分奏言外省大計卓異卽予升用京察一等例止加級若將濫舉之堂官照濫舉之上司議處輕重未平應請將該員所犯劣蹟在保舉前者堂官降二級留

任在後者降一級畱任再筆帖式庫使等官有由司覈定者將司
官一併議處下部議行七年奏京師竊匪肆行以五城有協緝之
條三營無協拏之例嗣後遇有竊案除報明本城及該管營員躡
緝仍移會各營協緝如有弋獲酌加升賞疎縱者責革如所議行
八年 命巡視臺灣九年遷太常寺少卿十年遷通政司右通政
使十一年遷太僕寺卿十三年疏言太僕寺多司蒙古事見設員
外郎八缺蒙古僅二請於滿洲六缺內改設滿洲蒙古主事各二
並請無庸專用科甲人員 從之十五年五月京師旱 詔求直
言學鴻壽上年秋審句決人數過多近來臣工條奏更改刑名律
例多尚嚴刻請槩行禁止 諭曰此奏甚屬悖謬上年秋審句決

朕詳悉裁定其中侵貪各犯實乃法所不宥若謂因此而致雨澤
愆期遂恣貪官污吏之所爲適足以干天怒而召災沴豈得爲
修省之要務乎熊學鵬雖爲此謬論朕慎持政柄必不爲浮言所
動果使貪風未卽悛改無論京師一隅雨未霑足設令更甚於此
亦不因一時災釅而於立政之大經御世之大法廢而不舉至言
官及外省臬司條奏律例或比擬失當經部臣議駁者不一而足
以此時刑獄而尙以爲過嚴信爲罔知輕重之尤者矣黜法縱奸
思以感召休和如熊學鵬所云者直瞽論耳本宜議處但朕旣降
旨求言姑從寬勿問特詳悉剖示令中外諸臣其知明刑弼教不
可爲貪吏開倖生之路其有游談附和者必從重治罪七月以查

驗牧場馬匹請將出差養息牧放之滿卿世貴就近派往 上責
其規避下部議革職十六年二月 賞復原銜六月補光祿寺卿
十九年遷太常寺卿二十一年調順天府府尹二十四年四月擢
內閣學士兼禮部侍郎銜仍兼管府尹事閏六月遷兵部右侍郎
二十五年五月充殿試讀卷官十月調刑部右侍郎二十六年二
月充會試知貢舉奏停進呈試卷另行臚錄例三月授廣西巡撫
二十七年調浙江巡撫三十年三月京察以勤慎供職下部議敘
五月其子候選知州之台爲書吏指缺撞騙問擬杖徒學鵬自請
嚴議 上宥之並准其子贖罪三十二年四月奏各省大計藩臬
兩司向不在考覈之內但司與督撫最爲親近請嗣後令督撫

出具考語片單進呈得 旨允行閏七月奏浙江向於漕糧起行
 後將辦漕府州縣及衛所備弁等官開具賢否事實造冊咨倉場
 衙門備查查府州縣等官所司不止漕糧一項如有舉劾向不與
 倉場會覈此項冊籍徒爲具文請停止 從之三十二年丁父憂
 三十四年 特命署浙江巡撫三十五年丁母憂三十七年仍
 命署浙江巡撫三十八年正月服闋調補廣西巡撫八月上林縣
 獐匪陸李能倡造逆謀聚眾滋事學鵬帶兵往剿擒獲首逆及夥
 匪李春榮等五十餘名事竣 上嘉其妥速下部議敘四十年調
 廣東巡撫先是明江同知嵇璇失察民人私越關隘潛赴安南左
 江道秦廷基袒護改供坐罪前任同知鄒錫彤總督李侍堯查明

奏參經學鵬審訊屬實問擬斬候至是廷基自縊 諭曰熊學鵬
既將秦廷基擬以斬候乃任其在省安居並不卽行收禁致該犯
得以在寓投繯其事實由熊學鵬釀成況秦廷基袒護改供一案
熊學鵬近在粵西並未查出奏參難保無徇庇之處直至李侍堯
秉公參劾熊學鵬乃不得不嚴行定擬其隱微已不問可知朕以
熊學鵬素常辦事勤慎小心是以調赴粵東大省不料其荒唐一
至於此實爲孤負朕恩著卽革職發往川省辦理軍需奏銷事務
其軍營各員虧短官項力不能完者卽著熊學鵬賠補以爲督撫
徇情沽名者戒尋 命籍其家四十四年 召來京以老病 賞
三品銜 飭令回籍尋卒子之福乾隆丁丑科進士之官廣東高

廉道

右 國史館本傳

月日... 二十六

七

國朝文獻通考卷之...

八

楊仲興

楊仲興字直庭號訥庵廣東嘉應州人雍正八年進士授福建清流令以望議去後起廣西興安令歷湖北按察使改刑部郎中以疾乞歸先生精力過人手披口荅五官並用所至山川阨塞民食緩急與夫學校書院興廢必盡心力著有性學錄讀史提要觀察紀略四餘偶錄文集袁簡齋謂其文古奧深峭浸淫兩漢豈止規模昌黎信然

右嶺南文鈔小傳陳在謙撰

王師

王師山西臨汾人雍正八年進士分發直隸學習授元城縣知縣
調任清苑縣乾隆五年遷冀州知州七年遷正定府知府八年遷
清河道十年遷直隸按察使十一年五月遷浙江布政使九月調
江蘇布政使十二年七月江蘇巡撫安甯疏劾師辦事遲阻居心
詐僞 命解任來京候旨九月因直隸臬司任內失察邪教部議
補官日降二級調用十三年補天津道十四年四月署山東按察
使五月調署河南按察使尋授江蘇按察使七月遷浙江布政使
十五年擢江蘇巡撫十六年 上南巡 賜吳會風清額六月疏
請豁免沛縣昭陽湖水沈湖租地畝老荒麻地額徵錢糧麻斤

從之又疏言吳縣洞庭山東西遠峙前撫臣陳大受以二山糧戶
輸將赴蘇動涉風濤奏歸太湖同知就近徵收查東山不與西山
接壤山多田少所產絲棉花果必售於蘇城而漕米民食人取辦
於楓鎮售貨完糧各乘其便請將西山錢糧仍歸吳縣徵收下部
議行八月卒 賜祭葬並 恩給其祖父母父母封典十八年入
祀鄉賢祠子直望直望由舉人捐納知縣二十一年發甘肅試用
汪山丹知縣調皋蘭縣二十六年捐升知府二十七年籤掣雲南
武定府引 見 命發往甘肅以知府用二十八年補甯夏府三
十年調鞏昌府三十一年調蘭州府三十三年遷肅州道三十四
年遷山東按察使三十五年遷浙江布政使三十八年暫署巡撫

象 上幸天津直望奏進貢物 諭曰朕幸天津各督撫原不應
遠道進貢見已明降諭旨乃王直望貢物內竟有嵌珠金如意一
枚尤爲非理伊以藩司暫署撫篆卽隨眾貢獻亦不過略陳方物
何得用及金珠甚屬無謂著傳旨申飭三十九年調甘肅布政使
四十二年擢浙江巡撫四十三年正月疏言海甯州老鹽倉迤西
一帶護沙盡刷白烏字號起至鹹字號止柴塘三百丈接壤完固
其鹹字號起至號字號止舊柴塘三百丈自乾隆十年停修後柴
椿霉朽難資捍禦西塘陶字號起至帝字號止建柴塘三百六十
八丈先後辦竣但塘外無護沙應一律接槌竹簍保護塘根東塘
旦字熟字號地頂衝塘身坍塌應拆修雲字亭字號舊石塘十九

穴有奇雍正九年築外用石條作牆底樁已朽應改魚鱗石工一律添建坦水報 聞四月奏海塘沙水情形繪圖以進 上以蜀山一帶漲沙尙嫩 硃筆點誌自東南至西北開引河一道令潮漸南趨冀可北漲 命高晉會同相度施工尋合疏言海潮南趨則紹興一帶可危北趨則海南一帶受險惟直趨中小壘則兩岸均資利賴中小壘在禪機葛嶼之中西小夾峙沙深似難爲力若於新漲嫩沙上開引河形勢縣長亦難見功惟欽遵保護北塘聖訓勤加修繕爲補偏救弊之法查北塘塔山內自東而西至普兒兜皆石塘外又有坦水石坡足資鞏固普兒兜迤西至老鹽倉一帶沙浮難下樁石 恩准增繕柴塘外護石簍惟迤西章家庵

一帶老沙江流迎激迴溜日漸刷低今於章字號起至號字號止
水臨塘脚新築柴工五百丈潮神廟前自號字號起至騰字號止
長三百丈應趕築柴塘以禦大汛均添樅竹簍於柴塘西接盤柴
裏頭一座挑溜南趨至安設竹簍向用石砌並無椿木關攔應於
竹簍外排椿木兩層籤釘到底則竹簍不動更可經久見在蜀山
東頭沙尖漸已刷動其北塘自撥轉廟起至七里廟見漲陰沙四
千四百餘丈從此循塘連下接連生灘實爲轉機佳兆十一月疏
言浙江巡撫查廉萬兩足敷公私支用至兼管鹽政養廉銀四千
兩請裁歸海塘經費報部支銷並將向備鹽政衙門賞賚公用銀
五千兩一併裁減 從之四十五年直望母鄧氏年八十 御書

令壽延禧扁額賜之是年 上南巡浙省供張過華 諭曰朕清
蹕時巡臨蒞江浙原因塵念河工海塘親臨閱視兼以省方問俗
順時行慶非爲遊觀計也前屢經降旨所有經過地方止須掃除
蹕路一切供頓毋庸踵事增華今浙省仍有添建屋宇點綴鎗彩
之事兼多華縟未免徒滋繁費朕心實所不取嗣後如再有似此
過費者朕必加以嚴譴不能寬貸也 皇望旋丁母憂懇請治喪百
日後 皇海塘工程效力十二月浙江巡撫李質穎入 覲具奏海
塘情形 諭曰海甯改建石塘以王 皇望會爲浙撫且肩擔當其
事因命在工督辦但伊在服中不令與地方之務此朕用人不得
已之苦心近因王 皇望與李質穎有意見不合之處茲據李質穎

來京召對時奏及改建石塘後柴塘土塘仍需歲修以資保護等語朕從前親閱塘工老鹽倉一帶難以下椿素所深悉但思難以下椿處所其長不過數里非數十里之柴塘皆不可下椿改石也其餘可以下椿處所若一律改建石塘豈不爲一勞永逸之計乃李質穎今有是奏此事關係重大朕亦不能懸斷著大學士阿桂同李質穎馳驛前往會同富勒渾將李質穎與王直望所見不同之處秉公確勘據實覆奏至王直望實丁母憂之人朕因一時不得其人是以前令馳驛回籍治喪事畢卽至浙辦理塘工原爲公務起見其家屬自應卽回籍守制以盡私情乃據李質穎奏伊家屬仍住杭州安然聚處朕聞之爲之心動王直望並非無力令家屬

同籍之人似此忘親越禮實於大節有虧爲大臣者如此何以表率屬員維持風教從前伊父王師品行甚正無負讀書不應有此等忘親越禮之子養心殿煖閣恭懸 皇祖聖訓有孝爲百行之首不孝之人斷不可用朕每日敬仰 天語煌煌實爲萬世準則王賈望著革職仍畱塘工自備資斧效力贖罪若再不知自咎心懷怨望不肖實心自效圖贖前愆朕必重治其罪四十六年七月阿桂赴浙查勘海塘奏劾杭嘉湖道王燧貪縱不職已故嘉興府知府陳虞益在差局公同浮冒 諭曰據阿桂等奏參王燧陳虞盛劣跡並查抄資產已屢傳諭阿桂等令其嚴訊伊等資財從何得來上年朕南巡時甫入浙江水營首站見其屋宇倍增點綴花

木印面訊三寶王直望據稱陳虞盛要好自捐養廉未便阻止等語浙省上年差務係王燧陳虞盛二人總辦而水營首站又係陳虞盛專管伊養廉有數何以能捐辦房屋點綴至於如此之多其言殊不可信此事皆係王直望主張至王燧等借辦差爲名外博見長之巧陰遂貪縱之私必係王直望爲之庇護故敢肆行無忌而王直望若非與王燧有交涉染指之私亦何肯曲爲包庇蓋王直望平日辦事才具並非不能覺察阿桂務須嚴切訪查使之水落石出據實覆奏尋覆奏陳虞盛已歿王燧人本機巧王直望一意委任遂肆無忌憚藉辦差侵漁多貲難保無交通情事但往來親密私相授受實不能得其確據王燧擬發伊犁永遠充當苦差

敕逮治來京時甘肅河州逆回蘇四十三滋事 上以陝甘總督勒爾謹從前辦理不善養癰遺患 命革職治罪先是甘肅收捐監糧三十一年 諭令停止三十九年三月勒爾謹奏請照舊例收捐本色 允之直望商之勒爾謹私收折色復捏稱甘省連年被災必須監糧賑濟勒爾謹從之十一月直望疏陳捐監規條惟有嚴行稽察密赴盤查見在實貯糧六十二萬一千五百餘石體訪各屬尙有弊竇 上詰其糧數過多令勒爾謹查覆勒爾謹疏辨王直望摺內未將年數敘明遂覺過多實係兩年所捐總數詳見勒爾謹傳是年閏五月大學士阿桂勦逆回於華林寺山奏二十二日自寅至巳密雨四時見已掘溝安柵斷賊汲道賊旋平

諭曰甘肅向來俱以被旱須賑爲言幾於年年如此昨和坤一
入甘境卽遇陰雨今阿桂摺內又奏二十二日得密雨四時可見
該省亦並非竟少雨澤人言俱未足信著傳諭阿桂李侍堯確切
訪察據實覆奏尋覆奏甘肅監糧係王亶望任藩司時懇慮勒爾
謹奏請開列折色收捐捏災冒賑故得擁厚費而去 上命侍郎
楊魁會同陳輝祖嚴訊阿桂等奏比較捐監數目惟四十一年王
亶望任內捐監至六萬三千餘名爲最多而是年賑恤案內所動
糧數至一百七十餘萬石亦較每年爲甚如果是年災重何能收
捐六萬三千餘名之監生其中情弊王亶望百喙難辭 命籍其
家拏交刑部押赴熱河行在軍機大臣等會同大學士九卿審實

合疏言乾隆三十九年勒爾謹奏准復捐舊例王直望起意私收折色藉圖侵蝕授意各州縣折色所給實收及報災分數俱由王直望與首府蔣全迪預先派定屬員之善於逢迎者多發實收並令多報災分仍勒道府申送甘結以爲委卸之地又聽屬員多開戶口上下分肥是每年賑恤之帑項歸王直望一人之侵漁見在籍金銀百餘萬得自甘肅者十之八九又王直望署內每年不下二萬餘金甚至添蓋房屋天寒時輒用熱水和泥濫行浪費俱係首縣程棟支應而王直望卽多發實收多報災分暗行補償各州縣亦效尤餽送盈千累萬又於公費外每名添雜費銀一兩充公用取悅眾口並指各州縣應付腳價銀不給又代伊親友捐監勒

令屬員填給實收並不發價藐法負恩侵帑殃民請旨即行
正法諭曰國家任用總督藩司本欲令其糾察屬吏遇積蠹病
民之官隨時舉劾俾民瘼得以上陳而恩膏得以下逮也朕臨御
四十餘年無日不以敬天勤民爲念各直省偶遇偏災卽飭地
方大吏加意撫綏降旨賑恤此中外臣民所共知其見者卽查辦
此案朕早有風聞猶恐各督撫誤會朕意因噎廢食致將災賑之
事靳而不舉是以遲回未發者已二三年今諸弊已露王亶望竟
敢藉賑災恤民之舉爲肥身利家之圖卽從前恆文方世儔良卿
高積錢度等俱以婪贓枉法先後伏誅尙未至侵蝕災賑冒銷國
帑肥己至數十萬金如王亶望之明目張膽肆行無忌者王亶望

由知縣經朕加恩用至藩司巡撫乃敢負恩喪心一至於此自應
卽正典刑以彰國憲王直望著卽處斬並 敕查明王直望及各
道府將子姪親友幕賓填給監生實收遞捐官職者一體斥革大
學士等奏查戶部冊內有捐納員外王襄主事王榮王焯等註明
王直望之子請革去職銜 勅照勒爾謹之子伊凌阿等發往伊
犁交該將軍嚴行管束自備資斧充當苦差山西巡撫雅德奏查
王直望子尙有王祐等八人俱在六歲以下得 旨王祐等八人
著加恩交雅德嚴行管束至十二歲時再行陸續發遣未幾阿桂
等查奏目賊侵帑之各州縣等分別定擬下大學士九卿覈議程
棟等二十二犯入於秋審情實先予勾決又升調各省因曾任甘

肅州縣以捏災冒賑誅者復數十員 諭曰此案明吞公帑之州
縣皆王直望爲藩司時倡率舞弊致通省效尤毫無顧忌見在程
棟等二十二人之死悉由王直望之使陷於法卽與王直望殺之
何異覈其情罪雖寸磔不足蔽辜然而按律斬決無可加增實覺
罪浮於法是以前經降旨將伊子王裘等三人一并革職發往伊
犁充當苦差其幼子八人俟年至十二歲時再行陸續發遣見據
雅德奏將伊子監禁省城恐外省官官相護仍屬有名無實雅德
卽將王直望未發諸子解交刑部嚴行監禁俟及歲時卽由刑部
陸續轉發並著刑部存記雖遇赦不准奏請援宥回籍如王直望
之子有在伊犁及中途脫逃卽於拏獲地方正法如此辦理於首

惡情罪庶幾相抵而大員之侵貪作俑者亦其知炯戒也五十九年六月諭曰國史館進呈王師列傳朕詳加披閱王師在巡撫任內辦理地方事務甚爲實心任事伊子王亶望前在甘肅藩司任內於捏災冒賑一案貪婪骫法侵帑殃民實爲罪不容誅且以伊一人連及眾人俱至身罹重辟釀成巨案不得不從重懲治是以將王亶望立置典刑並將伊子槩行發往新疆充當苦差此爲懲儆貪黷起見準情治罪原所應得第念伊父王師簡任巡撫尙爲國家良臣若因伊子王亶望貪黷營私以致絕嗣於朕心實有不忍又如雅爾哈善前在西路軍營失誤軍機放走小霍卓木雖係誤聽順德訥之言但伊身係將軍彼時以軍務重大法所難宥

是以將伊正法並將伊妻子發往黑龍江以昭炯戒今念其事已閱數十年雅爾哈善身伏國典其妻子亦尙在可原並此外如勒爾謹陳輝祖楊景素王廷贊柴大紀等俱因身獲重罪將伊子發遣新疆等處者亦應一體察辦著畱京辦事王大臣同刑部將指出以上各案及此外尙有類此發遣官犯及獲重罪之子孫一併查明案由詳悉開單具奏候朕加恩辦理王亶望雅爾哈善諸人皆係朕簡擢任用因其自罹重辟累及妻孥固屬罪所應得朕於歸政以前特沛殊恩施仁法外俾其子嗣仍得釋回鄉里延其宗祀伊等伏辜泉壤亦當共知銜結也

右 國史館本傳

乾隆辛未中秋大中丞王公薨於江蘇官署所屬士大夫軍民盡
然傷之以公能體 天子愛養斯民之意而一以甯靜鎮定之卽
有從而撓其柄者而公毅然不動不必有赫赫之功而民隱受其
福卒之勤勞 王事至殞其身此遠近痛惜千萬人如同一人也
公諱師字貞甫號菽園山西平水人祖峻明郡增廣生考翼之中
順治丁酉武舉征吳逆功官蘇州城守調遼州 誥封明威將軍
公生而穎異少歲讀書遇倫常政治曰此他日見之實用者也旣
冠補諸生癸巳 恩科舉於鄉五上公車不遇略無愠容唯講求
一切兵刑禮樂農田水利古今利弊沿革之事必探原竟委公後
日之任盤錯歷艱鉅不搖不惑卓然稱當世名臣根於此也雍正

庚戌成進士初任直隸元城縣乾隆二年調繁清苑五年遷知冀州七年遷真定郡守八年遷清河道十年遷直隸臬司五月遷浙江藩司九月調江蘇任明年左遷天津道十四年遷司山東臬未抵任調河南復調江蘇仍遷浙江藩司十五年冬特授江蘇巡撫未一載薨前後公所莅任皆勤勞民事官一邑功在一邑官一郡功在一郡官全省功在全省綜而計之前可入古循吏傳中後可入古大臣傳中其初任元城也除坐差去私派請除包荒地糧遇水旱必請停賦修學宮訓士子以敦倫立品折獄以情理用法民無冤抑其調任清苑也革地總攬頭除雜派設立馬廠除莊家餽養例不畏權勢不慮誹謗民情大服知冀州冀素稱盜藪公先

聲警人盜賊相戒不敢入境有豪猾素通官吏橫行鄉里公密拘
至內署歷數其罪曰當取汝命然能改過則爲良民其人且懼且
感卒能自新有殺人冤獄已成待決矣公廉得其枉請於大吏會
鞫得眞殺人者遂平反前此冤民聘有妻聞夫犯極刑忍死待夫
正法日以身殉至是出獄卽完婚遠近傳誦知眞定設法補前守
虧欠保全孤寡正身率下所屬州縣吏惕民懷任清河道賑天津
河閒二郡災不遺不濫時大學士高劉二公奉 旨辦直隸水利
公任輔理責相地形度水勢心營手劃規條以進二公總理大綱
刻日奏功秉直隸臬事五閱月釋情罪可矜者十餘人藩屏兩浙
兩閱月出采生大案之牽累者數十人調江蘇賑恤淮海諸處受

災者詳免崑山新陽元年二年之錢糧賠累者時撫尙苛察公尙
和厚鑿柄不相入乃去位吳民惋惜如赤子離慈父側而 聖天
子諒其清節閔其勤勞以不阿大吏能秉直也噓燼倍燄潤枯倍
蘇旋重用之由天津道升任浙江藩司務持大體辛未春 皇上
巡幸江浙公先一年預爲部署毫毛不以累民知 聖天子省方
觀民務使無一物不得所也時羣情踴躍達於 九重特以封疆
重任畀之公之未任江蘇也吏議按畝起夫拘民船不使行又不
給口糧民情皇皇公至亟罷之雇夫雇船悉與價值吳人咸喜曰
我公早來數月我民久當帖席有欲掣其肘者公不顧卒莫能奪
今春迎 駕屢 召見奏民閒疾苦甚悉 天子嘉其察吏安民以

吳會風清額 賜之公受 恩逾深報稱逾切送 駕後益思興
利除弊與民休息先是 諭旨豁免乾隆元年至十三年地丁積
欠共二百二十餘萬兩公恐胥役侵漁乃籌酌規條釐剔弊原務
使民實受 君惠又長洲縣金家角地瀕於河水草叢雜素稱賊
藪商民每受竊奪公得其實飭屬捕捉鞠實治罪而釋其連及者
又吳城戶口殷蕃甲於天下而產米不給每仰給於三楚巴蜀今
夏米航少至市價騰踊而浙省告無文檄飛馳公晝夜籌畫嚴關
津以禁下洋高米價以招遠賈居民得食鄰邦亦不至匱乏而公
之心力瘁矣公致病有山四月閒赴常州秋審聞吳中米貴多藏
者或至過糴強梁者幾於搜奪公晝夜遡歸中途受暑六月初久

早公率屬虔禱步行五六里外雖得雨受病漸深至八月初病劇
猶力疾視事屬員進見勵以廉平敬慎守法勤民曰我受 朝廷
厚恩未能報效諸君能勉成我志我死猶未死也至十五日疾革
唯囑諸孤讀書報 國無一語及家事溘焉長逝公之公忠潔已
如此中立不倚如此愛民如子盡瘁國事而忘身忘家如此宜所
屬之民痛百身莫贖幾同於子產之沒老人兒號而不能自禁也
公性仁孝考解組後囊橐蕭然公力持門戶不以清況與聞堂上
考晚歲病目而性喜書卷公晨夕誦讀以娛親心二親沒喪葬盡
哀盡誠嘗以未遇 覃恩上邀封典中心惻然彌留時上章奏請
上俞允請封二代重其終身慕也居己廉儉位開府脩然仍諸

生時待人以誠有疑相質者輒披瀝肝膈而出以和平聞者各得其意如坐春風煦日中云生平著述經義有過庭偶訓詩有強恕堂拾存並行世古文及奏疏彙存於笥公生於康熙庚午正月二十日距今卒時享年六十二歲 誥贈資政大夫江蘇巡撫都察院右副都御史配鄧氏 誥封夫人淑德懿行克稱公配子三人 紹武監生宜望庚午舉人季光監生女五人孫三人長牧次沛次豫孫女三人墓在某縣某鄉葬爲某年月日吳中舊有紫陽書院公至延予爲山長每相見輒道入倫日用曰舍此無以爲道也又嘗言士先品行而後學術願公爲三吳士子先示立木次講根柢學予時有所聞陳公亦采納後情慄日浹公臨終謂歸藏志石當

乞沈歸愚侍郎子雖不文不敢違公之身後請也乃爲之銘銘曰
學有定見守有定力閱歷阻艱不見荆棘處勞以靜正曲以直暫
撻旋揚九重特識畀以節鉞徧流膏澤勤不惜身瘁矢報國
哲人乘箕哀慟疆域恤典稠疊自天寵錫靈輜還歸體安幽宅
太行鬼戕汾流澈湫千秋固安銘辭勿泐

右墓誌銘沈德潛撰

公諱師字貞甫號莪園山西平陽府臨汾縣人也先世自太原遷
焉傳二十有五世而生公公父曰理躬字翼之用軍功誥封明
威將軍康熙己酉武舉會吳三桂反滇南投名兵部願以殺賊自
效朝廷壯之遣之漢中備任使賊平授江南蘇州城守營守備

尋遷守遼城晚節歸田貧至無以自給蓋其家法以忠清著聞云
公年二十有四爲康熙癸巳舉於鄉越十有七年雍正庚戌成進
士凡六上公車而後得旣久困場屋績學益深於一切人事之情
僞時務之利病固不究悉嘗謂其子紹武等曰剝民以奉君吾恥
焉至於私營田宅抑又出若輩下矣又曰律本人情而定必洞達
人情然後可以推原律意雍正癸丑知大名府元城縣事有邨地
名王勝疇者田久荒而歲徵如故凡數十頃前吏重變科則莫以
告特請於大吏除之乾隆四年調知清苑時下曲有冤獄已定讞
得報待決有日而冤民所聘女聞之誓與夫同日死道路憐之流
言謂惜王青天不早至以致冤斃二命王青天者元城人所呼而

清苑仍之者也公既微聞其事廉得免狀力請於大吏再三始得
獲鞠竟脫焉既出獄完婚夫 詣縣堂拜謝長號以去七年遷知
正定府八年遷分巡清河道九年隨大學士高公斌吏部尙書劉
公於義旬當直隸水利周歷保定河間天津正定等處所擘畫事
宜多被採用功成 上聞而賢之十年遷直隸按察使尋遷浙江
布政使九月調任江南明年左遷天津巡道越三年復爲浙江布
政使是時兩江總督黃廷桂以士民望幸請 上南巡報 可公
善體 聖意絲粟不以累民民若不知有此大事者風聞於 上
特擢江蘇巡撫時季冬月二十有一日矣明年 聖駕至召問民
閒疾苦悉陳奏無隱及旋 蹕扈從 召對如前 御筆書額以

賜曰吳會風清時以爲大臣榮遇名實克副者當首推云自往返
行營疊承 顧問恩寵莫比回署後每中夜巡廊而行圖所以報
稱者或無故泣下家人莫識其意竟以是年八月卒官年六十有
二卒之日家無餘財妻子扶輿西歸行纏蕭索賸有殘書故劍而
已禮部侍郎長洲沈公德潛爲志其墓投筆歎曰此古所謂清白
吏不忝其家聲者也夫人鄧氏子三人

贊曰吾前後爲記注官七年侍 上久知 上心乎百姓爲古所
未有比歲 巡行方國輒先期降 詔旨誠大吏纖悉毋擾民間
所至橋梁宮觀之屬繕葺而已不期華侈而奉行者或自懷狐疑
轉相恐動窮極心力以飾觀瞻 上以事旣迄功成物不毀聊一

寓目笑而頷之其實非 聖意之所樂也同年友王公莪園之在浙予方以憂居里親見其事則見市不易廛津無改渡埋齒掩骼收卹暴露插竹樹籬包容荒穢窮黎有雇值之利富民無加派之擾但欣欣望 幸安堵以俟其後 上幸西湖過南屏將取道於松嶺之東麓有司奏是閒多編戶墳塋且犖确未汎埽請更擇其便者 上曰何傷乎南北山頭多墓田朕聞之熟矣而是時王公已爲江蘇巡撫隨 駕在杭杭人始悟公之所以獲眷者政由 聖主之愛民也爲布政使尙爾使永其年於巡撫之任其利賴更當何如爲巡撫則既有徵矣使其位爲尙書宰相其霖雨天下又不知何如也惜哉

自以... 卷之十一

右傳陳兆崙撰

三

李瀚

李瀚漢軍鑲黃旗人雍正十年舉人乾隆十三年選授山東榮城縣知縣十六年調諸城縣二十三年升膠州知州三十一年遷武定府知府三十四年升兗沂曹道三十六年擢江西布政使三十七年六月奏請停編審造冊 諭曰編審人丁舊例原因生齒繁滋恐有漏戶避差之弊是以每屆五年編查造冊以備考覈今丁銀既皆攤入地糧而滋生人戶又欽遵康熙五十二年 聖祖恩旨永不加賦則五年編審不過沿襲虛文無裨實政況各省民穀細數俱經該督撫於年底專摺奏報戶部覈實具題付之史館紀載是戶口之歲增繁盛俱可按籍而稽更無藉五年一次之另行

查辦徒滋紛擾嗣後編審之例著永行停止七月疏言直省府州縣學額設教職二員所以分任課士之責亦爲互相稽察之地如該員等有同族親友先後銓選一處難免瞻顧之私見袁州府萬載縣教諭趙由義訓導趙由傑詢其支派尙在五服以內請於所屬內酌量調補迴避下部議行並通行直省載入則例八月護理巡撫奏稱戶部議准湖南布政使吳虎炳條奏請將古錢與小錢一併查禁酌定期限設法收買臣查辦以來各屬報收除翦邊沙板小錢共二千四百餘斤其收買古錢及部行所指類似古錢者僅四十餘斤隨密遣人向鋪易錢每千挑出古錢不過一二文亦竟有並無一文者是前代古錢消磨殆盡與私鑄充斥者不同歷

久銷廢所存無多確有可信應請照兩江總督高晉奏准之例凡
實係前代古錢聽從民使停其收買其已報收買者係在例前應
同小錢一併解交司庫分別存銷報部查覈如有奸徒假借古錢
名色私鑄私販仍同小錢一體查禁以期錢法肅清 上允之九
月疏言江西通判十員兼水利銜者俱有關防惟建昌贛州二府
通判沿用木戳查該員均有督糧之責且建昌之水爲鄱陽湖分
支贛州昔稱章貢乃西江水道上游關涉農田尤需經理請將二
府督糧通判一體兼管水利頒給關防下部議行四十年二月奏
稱敎職俸滿保題與佐雜事同一例各省佐雜均俟部覆到日始
行給咨送部獨敎職人員一面保題一面給咨辦理似未畫一嗣

後請照佐雜人員例俟部覆到後給咨 從之旋授雲南巡撫先是奏言欽天監所頒時憲書按省次序如盛京所屬地方及各蒙古扎薩克並平定之準部回部等處均分別刊載今江南已分爲江蘇安徽湖廣已分爲湖北湖南陝西已分爲甘肅其太陽出入晝夜節氣時刻恐各省不同請照盛京所屬尼布楚城等處之例各按分隸省城之地圖北極高度定緯及地之經度所列於時憲書內添注省名分晰開載以歸畫一至是如所請行五月卒

右 國史館本傳

吳士功

吳士功河南光州人雍正十一年進士改庶吉士乾隆元年散館
改吏部主事洊遷郎中四年遷監察御史巡視南漕五年五月疏
劾漕標遊擊田三省貪婪得旨交總督郝玉麟鞠實擬罪如律
十二月巡視南城奏言各省督撫奏請帶往人員雍正六年諭
令俱著回京請旨另用近部院大臣簡用督撫有奏請將所屬司
員帶往以道府等官題補若爲地方起見未到任之先於該省地
方情形尙未深悉何由知道道府等缺必伊帶往之人方克勝任若
爲人才起見果係廉幹可勝任道府之員無難據實保奏不拘省
分皆可量才酌用何必以伊所奏之人帶往伊該管省分自行題

補督撫縱公正無私而於隨帶人員託爲心腹寄以耳目恐滋偏聽之弊安知到省屬員不私相交結希爲先容以取悅上官請嗣後仍照舊例槩行停止下部議行六年御史觀音保奏參士功等徇庇南城指揮郭從儀 敕都察院會同吏部查奏尋奏郭從儀違制用刑士功等卽行指參並無徇庇得 旨觀音保降二級調用三月御史仲永檀奏向來密奏畱中事多洩漏 上敕王大臣詢問永檀舉出土功奏參尙書史貽直 諭曰畱中密摺宣洩於外伊旣舉出吳士功奏參史貽直一件查上年吳士功果有此奏見交王大臣查詢翌日又 諭曰朕諭旨一道御史吳士功奏參尙書史貽直一摺目今姑且不究着與二人閱看後封貯內閣若

伊等將來不知悛改再有過犯將此取出一併從重處分七年授
山東濟東泰武道八年九月丁繼母憂十二年服闋補直隸大名
道十二月調山東兗沂曹道十三年正月調湖南糧道山東巡撫
阿里衮奏畱辦理賑務尋復以士功端方練達熟悉民情奏畱山
東閏七月 詔調山東糧道十四年遷山東鹽運使十九年遷陝
西按察使十月以辦理軍務臺站議加一級二十一年調湖北按
察使二十二年三月以前在陝西辦理馬匹議敘加一級七月
上以豫省災賑平糶需米 敕下江西湖北巡撫在該省相近河
南各州縣倉貯內酌撥運交豫省收貯其動撥穀數卽將本年應
運漕糧截畱歸款土功時護理湖北巡撫奏湖北本年額徵應運

漕米十五萬一千一百餘石遵旨截留歸款楚地潮溼米難久貯請以一米改收二穀還倉本年既經截漕所有隨漕徵解銀除應給減款丁冊等項米折銀兩並折色月糧外其餘無需支解各款及節省漕糧水腳其銀四萬一千九百餘兩請卽爲撥運豫米之用豫米見卽開運先借支司庫公項俟各屬解到截漕銀照數歸款疏入報聞是月遷陝西布政使十月護理陝西巡撫十一月次宜君翰林葭州懷遠府谷神木靖邊甯遠各州縣先早後潦暫留黃廷梓奏撥甯夏米麥五萬石分賑懷遠靖邊等縣自甯赴陝中阻黃河沿邊早寒河冰卽難挽運臣先期飭催早運抵陝其奏撥懷德米脂清澗吳堡四州縣米二萬石協濟榆林葭州山路

崎嶇冰雪載塗更難馱運蒼黎待哺孔亟臣飭添雇騾駝趕運俾
早霑實惠 諭令竭力妥爲之是月調直隸布政使奏藩庫銀錢
交代新任接收出結督撫盤查保題定例綦嚴但日久視爲具文
請嗣後撫藩離任奏請 陛見之日卽將在任庫項曾否那借有
無虧空之處另摺附奏其或在任不久調補遠省資斧不足欲借
庫項者一併據實陳奏新任撫藩接印後亦於交代限內另摺奏
聞仍照例出結保題則那借積弊可除 上以所奏簡而易行
著爲例二十三年三月仍調任陝西護理巡撫印未幾擢福建巡
撫 諭俟新撫鍾音到陝後再赴福建新任四月奏延安府兵糈
向例各縣民運交府倉分防弁兵赴府支領山高路遠往返五六

百里民運赴府費倍正供兵領回縣耗費過半查甘泉宜川延川
延安俱駐弁兵請將四縣民糧各在本縣徵收支給本縣汛兵
從之六月奏隴州汧陽縣跬步皆山歲徵屯豆五百四十九石零
鄉民赴城完納往返需費不貲見今積豆萬餘石本地營汛既不
動用鄰封難資協濟商賈不願販糴與其坐視霉爛莫若改徵折
色請於二十三年爲始每石改徵銀六錢五分解司充餉舊存豆
石糴銀報部 從之八月莅福建任二十四年四月奏私鑄錢文
質有銅鉛之別宜按錢數多寡定罪乾隆九年刑部議准福建按
察使王廷誨條奏私鑄鉛錢不及十千之犯照例聲明請 旨發
遣二十二年九卿定議私鑄銅錢不及十千者照情有可原免罪

減等例改發巴里坤等處種地蒙 恩俞允查閩省有私鑄鉛錢
不及十千之犯從前未與末減柴擬絞監候伏思鉛錢非銅錢可
比不久卽成無用其中已停復鑄者情罪較重仍擬絞候其偶然
私鑄鉛錢不及十千較私鑄銅錢不及十千之犯情罪更輕請照
例發遣給官兵爲奴俾墾田效力如議行六月奏緝獲南洲巨盜
劉良福等十八人附近竊匪七十餘人 諭曰閩省地屬海疆民
風素悍南洲濱水向有積匪恃爲淵藪正當力爲懲創以除稔惡
而衛商民該撫等能董率屬員設法緝捕積盜不能漏網深屬可
嘉下部議敘加一級八月與總督楊廷璋奏請酌改南洲塘汛及
巡哨章程詳見廷璋傳十一月奏閩屬械鬪皆由地方官遇有民

詞不早審結釀成命案臣發給冊式令各州縣將審結讞語挨日填註按月冊報臣隨時校正記其優劣一載以來羣知奮勉案件隨到隨結可免拖累滋事 上嘉之十二月奏閩省九府二州積年平糶常平缺額穀三十一萬八千六百餘石已買足還倉臺灣府屬積年平糶未買穀十五萬二千一百石令如數買補又收捐監穀積貯加多而浙西歉收來春需糶濟民食臣酌撥臺灣十萬石聽浙江招商運販因風汛不便先以內地沿海府縣穀撥給俟臺灣穀運到還倉一轉移閒無妨於閩有益於浙 諭曰此汝認真妥辦所致可嘉也二十五年二月奏寄居臺灣皆閩粵海濱民人前任巡撫鄂彌達奏請有立業臺灣願入籍者准其呈明給照

搬眷入臺嗣經督臣郝玉麟以流寓民眷均已搬取奏請於乾隆五年停止十二年督臣喀爾吉善復奏請定限一年後不准給照迄今十有餘年禁絕往來愚民多冒險偷渡臣於一年中盤獲偷渡民人二十五案男婦九百九十名口分別遞回原籍已經發覺者如此其偷渡在洋被害者更不知凡幾伏思內外民人均朝廷赤子向之在臺爲匪者悉隻身無賴若旣報墾立業必顧惜身家各思保聚請嗣後在臺立業良民有的屬在內地者許先在臺灣該管廳縣冊報眷口姓名年歲移原籍查覆到日該管道府給路照回籍搬接過臺其內地的屬有欲過臺完聚先由內地該管州縣造冊移明臺地確查覆到詳請給照過臺責成廈門同知及

汛員遇過臺眷口驗明人照相符放行如人照不符濫行給照汛員文武官失察徇隱者參處庶良民不敢僥倖行險地方官自顧考成防範嚴明海防民生均有裨益下部議行三月奏借督提鎮臣率文武官緝獲行劫馬頭山盜犯林成功等及夥犯五千餘人

諭曰汝等文武如此和衷協力何愁地方不安靖也甚屬可嘉五月條奏稽查濱海漁船事宜一漁船應取船主澳保甲結也嗣後漁船赴縣領照先取族鄰澳保甲結令船主開具年貌籍貫出具不敢爲匪甘結覈明入照並取十船連環互結存案查驗放行一漁船出口逾期不還應責澳甲船主查報也查漁船例於三月中旬四月下旬出口至五七等月回棹九月十月出口年底回棹

向多逗遛滋事應責令澳甲船主先向進口漁船查明未回漁船見泊何處因何未回稟地方官移營押回澳甲船主不稟分別治罪一漁船帶貨應行稽查也漁船捕魚爲業非比商賈貿易卽偶有攜帶應令赴置貨地方汛口驗明給單如單外攜帶多貨沿海汛員查出移縣查明來歷一商漁船隻應於帆檣大書名號也嗣後應令各船於帆檣照原編字號書福建某府某縣某號船戶某人或商船戶某人大書深刻令遠望瞭然便於稽查如無帆檣字號或與船照不符者報究擒捕庶匪舟無從溷跡 諭曰立法可謂詳明行之尤宜實力又奏泉州府屬惠安縣西北環山東南面海所轄良興梅峯仙塘竹溪等十二鋪延袤四十里去縣治遠請

移仙遊縣白嶺司巡檢駐良興鋪之前塗部議 允行尋以閩俗械鬪多大族欺凌小族疏請 敕部定議如雨造各恃人眾致傷多命者照例入情實其族小戶丁少被大姓欺凌兇毆情急抵禦者照尋常鬪毆擬緩決其恃強糾眾欺凌小戶復斃多命仍擬情實部議駁 諭曰刑部議駁吳士功條奏械鬪案件請分別戶族強弱辦理一摺部臣所見甚是閩省地處海濱民風刁悍聚眾械鬪最爲向來惡俗該撫身任封疆正宜執法鋤奸務在安善良而移風俗乃欲將族大族小分立科條使械鬪者得以趨避其詞而司讞者因而高下其手是欲博莠頑之浮譽而不知守彌教之常經法司所指伊尙能置喙乎吳士功自任巡撫以來辦理事件時

露沾名習氣非明切訓示恐日久竟成痼疾悔之已晚試思朕慎
持國憲臣工內有能條奏敷陳巧爲嘗試者乎卽著傳諭該撫令其
刻自提撕慎勿故智復萌自貽伊戚二十六年正月總督楊廷璋
劾提督馬龍圖那用存營公項銀 命解龍圖任交廷璋會同士
功嚴審定擬五月會奏嚴鞫龍圖借用公項銀已於委員盤查時
歸補應照知人欲告而自首例減罪二等擬杖徒 諭曰此案馬
龍圖於未經查參之前預爲彌補據實檢舉謂之自首尙屬有因
今聞敗露始多方攢湊抵項且將登記數簿扯毀焚燒另造私冊
掩飾則於先侵後吐之外又增一舞文之弊矣此而謂之自首凡
前此所辦侵貪重案歷歷可數誰非於發覺後冀圖那補卸罪者

何不皆以自首貸之有如此失出之理乎方朕御極之初此種技倆尙不肖爲其所愚今臨御二十六年辦理案件一切情僞知之熟矣乃欲以三尺之童不能售其欺者竟敢於朕前嘗試將視朕爲何如主乎從來外省參案例稱督參撫審此案立意必且出自吳士功而該督楊廷璋遂因而附和之耳獨不思博虛名而弛法紀朕豈能置之不問者吳士功縱不自惜楊廷璋又何爲自以身命殉之乎此案斷無兩人同聲之理究係先出何人之意著該督撫據實明白回奏尋覆奏定案係楊廷璋主稟而督參撫審吳士功實爲主政有往來商推原札可覈 諭曰吳士功身爲巡撫以提督大員營私舞弊此何等重案乃敢妄逞技倆欲從中高下其

手且明目張膽冀於朕前直售其欺居心尙可問乎卽據札內所稱幕友援引例文云云欲楊廷璋酌定之處尤堪駭異楊廷璋吳士功爲封疆大臣卽馬龍圖亦提督大臣豈有二人胸中竟無定見悉借幕友主張此語豈可覩顏告之同官奏之君父者其曲意幹旋不問可知況原審內有事前彌補之說朕覈參將姚應夢供內該犯定媳送聘借銀五百兩曾於養廉項下扣清此項銀兩於未經奏參之前預爲彌補尙可自稱事前至買辦燕窩等銀一千餘兩俱係盤查時攢湊抵項且扯毀數簿以私冊掩飾其爲事敗假捏更何待言如此而猶欲以自首脫罪有是理乎朕臨御二十六年歷事不少人之情僞素所洞悉吳士功本係張廷玉用人其

生平貌爲直戇而城府甚深亦眾所共曉第以其人尙小有才且歷外任年久巡撫缺出一時不得其人因而擢用乃伊一得志又以閩省去京稍遠卽肆無忌憚卽如伊向因與張廷玉甚厚未免有得罪史貽直之處今又與史奕昂修好以冀解釋前恨則其人之居心邪正亦從可知矣朕本欲爲之隱惡揚善而伊乃敢顯爲此攬權嘗試之計此而付之不問朕又將何以用人吳士功著革職發往巴里坤自備資斧效力贖罪二十七年四月諭曰據楊廷璋德福奏查閩縣民楊魁等假控僞寶敕書承襲世職一案先經呈投撫標效力原任巡撫吳士功爲撫臣敕書既經目驗何以懵然不省撫署內又豈無檔案可以查覈一任惡犯玩弄若此其

所司果何事耶著傳諭巴里坤辦事大臣永甯等面詰吳士功令其據實奏覆並令自揣應得處分卽行贖罪自效五月永甯等覆奏士功稱罪無可追年已就衰情願捐銀贖罪交直隸藩庫修理城工 諭曰吳士功歷任大員身罹罪譴若於斥退之後卽得優遊事外則虛糜廩祿不思奮勉者轉自以爲得計且此輩歷任所得養廉無非國帑民膏捐資贖罪情法亦屬允協豫省見有應修城工卽係伊桑梓之地此項贖罪銀兩卽交與河南巡撫胡寶瑤收存藩庫以爲辦理城工費用吳士功著加恩准其回籍三十年九月故子玉綸官至兵部右侍郎以曾任福建學政聲名平常降授檢討

右 國史館本傳

乾隆三十年歲次乙酉九月丙申 誥授中大夫原任巡撫福建
兵部右侍郎都察院右副都御史吳公卒於里第訃於 朝朝之
士素與公遊者知公受知 天子深蓄德衷施行起大用而卒不
及俟以竟所學相與嘆息泣下走唁其孤檢討玉綸於邸舍玉綸
則鬢然喪服頓首涕泣乞銘於其師編修鄭虎文曰不孝即日徒
步出國門忍須臾死將謀葬先人於吉兆維先生文直而不華敢
請銘文曰公行應銘法勿敢辭明年拜使者於庭以公狀來按狀
公姓吳氏諱士功字惟亮號凌雲一號謚山先世江西人其仕於
元者曰文盛以武功顯八世祖魏始遷河南固始之張莊又五傳

而至自榮歿與弟自顯同冢里式孝友實開厥基是生公祖宏緒
歲饑嘗出廩粟食餓者宏緒生公考淇縣訓導用烈淮水溢具舟
糧活人人用是知吳氏後必有達者均以公貴 贈如公官公生
有夙慧性嚴重能委已於學嘗讀書山莊終歲斷跡城市雍正王
子舉於鄉明年成進士入詞館丙辰 今皇上御極之元年改吏
部主事累遷至監察御史歷湖廣京畿道時督撫臣輒奏請以所
知官自隨滋不法公奏罷之巡南漕漕官貪縱丁丁盜米賣不問
奏設科禁數言事審然有直名未幾閩督某奏他事詞連公落職
既白還故官或謂公宜謁謝白公誣者公曰此是彼職何謝爲人
服其嚴正壬戌出爲山東濟東泰武道居後母喪去職服闋起爲

直隸大順廣道丁卯移山東兗沂曹道是年屬郡饑 駕幸山左
召公入對公具以狀聞 上爲截畱漕米六十萬石卽 命公
董賑旣事民忘其災轉督糧道再遷鹽運司使六載廉不自潤王
申夏東昌泰安沂州蝗吏捕不力公親觸熱晝夜馳數百里盡六
七十日所至蝗立盡大吏嗟賞上其勞又以循卓薦者再 上由
是知公才駿駿乎向用矣甲戌遷西安按察司使丙子移湖北湖
北多私徵廣濟爲甚丁丑會公攝巡撫事窮治其獄羣吏咋不敢
蹈故習民用完實是秋遷西安布政司使冬移直隸明年春再遷
西安未至遂有巡撫福建之 命未得替仍畱陝延榆鄜災民旦
夕且死公更挽運法以濟逋懸之未入及入未備者皆以匄之地

之多麥者用抵倉穀從民便又奏更司庫交代法 天子下其章
於天下著爲令首尾一載法成令修 敕加兵部右侍郎都察院
右副都御史踐閩任至則臺灣以風災告長樂福清晉江南安同
安漳浦詔安等縣以旱告公立馳奏發倉廩緩歲租賃種食民以
大和明年獲南洲盜南洲四面阻水初爲盜辭能太所竄伏能太
誅其黨劉良福者復嘯聚勢張官噎媚不敢出氣又有林成功者
業漁爲盜於江南閩浙閒黨各數十百人公皆收縛之誅魁釋從
閩盜屏息臺灣海外上郡也禁私渡而民犯死偷渡者日益眾故
臺灣令魯鼎梅修縣志略云內地窮民在臺者數十萬其父母妻
子欲就養格於禁例賄船戶冒水手姓名挂驗婦女則載以小船

出口上大船抵臺復用渡接載率以夜行名曰灌水更有客頭句
通習水積匪用涇漏船收載數十百人閉置船底遇風則盡入魚
腹比及岸遇有沙汕驅之上名曰放生沙汕斷處或距岸遠行沒
泥淖中死名曰種芋或潮漲漂溺名曰餌魚窮民迫於飢寒相率
入陷阱言之痛心公於是據志語入告請弛禁從之撫閩三年
凡有便於民者必奏奏必得 俞旨刑德並流民夷安之既而提
督馬龍圖以侵餉論繫公治其獄坐失出奪官 命往北路軍營
效力時辛巳冬也明年放歸又五年卒年六十有七公篤於至性
幼侍母王太夫人疾籲神以身代若神許之愈事繼母彌謹葬贈
公於道堂寺躬負土手足皴裂撫兄孤子瑄如己子今已長爲名

諸生矣公體幹修偉美鬢髯爲人沈毅有大略能拯人於厄好直言意度豁如也旣歸田終日擁書坐一室未嘗有幾微感憤之色見於顏面時公子二官京師每見上上必垂問及公或以告公謂公當復用公瞪目曰果爾必以死報旣而自引其髯曰臣精力銷亡恐不堪復爲世用矣則又欲戲若不自勝者卒之日遺命勸兩子盡心官守以贖乃父負國之罪無一語及家事公夫人任氏湖廣辰州鎮總兵宣勳孫女直隸山海關同知秉權女後夫人李氏山東巡撫燭孫女候選同知盟女皆有婦德均累贈淑人任夫人所出子二人玉衡刑部陝西司郎中知湖南永州府玉綸乾隆辛巳進士翰林院檢討李夫人所出女一適聖裔候選員外

郎孔廣祚子拔貢生昭烜孫一鼎颺公之孤將於乾隆某年月日
葬公於某鄉某原兩夫人皆先公卒甲戌葬任夫人於道堂寺先
塋癸亥葬李夫人於晉家莊既固既安遺命不祔銘曰
赫赫中丞自其躬興亦曜於時胡卒不廷非卒不廷而年不再羸
惟羸其後以永名

右墓誌銘鄭虎文撰

王檢

王檢山東福山人雍正十一年進士改庶吉士乾隆元年散館授編修二年大考四年休致十三年上幸闕里召試復賜編修十四年授直隸河間府十七年遷甘肅涼莊道旋調直隸霸昌道二十年調通永河道二十三年遷長蘆鹽運使二十四年擢安徽按察使二十五年奏定例外任官員除眷屬外准帶家人二十名府道以上遞加十名違數多帶降一級調用府道以上定額本寬攜帶常不逾數近日州縣當謁選之始招用長隨多憑薦引濫收及久於外任更多置僮婢一署幾至百人無論招搖滋弊而一歲養廉亦不足供糜費請申明定例如違數多帶卽行詳參議處

上是之二十六年七月檢以皖城濱臨大江頻歲多搶劫案奏沿江乘危搶奪之案向例首犯杖一百徒三年爲從各減一等未足示懲請嗣後除有殺傷照例問擬外其但經得財未傷人者首犯杖一百流三千里爲從滿徒邊海有犯亦照此辦理得旨允行八月調直隸按察使二十八年五月調山西按察使七月遷廣西布政使九月調甘肅布政使奏各省大計舉劾例由藩司主彙借臬司會詳督撫察覈具題督撫到任未及一年者例得奏請展限而藩司新任並無展限之例殊非慎重考覈之道請嗣後藩司到任在三月以上者仍照例迅速辦理如甫經到任詳明督撫奏請展限三月上從其請著爲令二十九年擢湖北巡撫三十年

正月署湖廣總督二月以前任巡撫愛必達奏准將沔陽州所轄新隄地方添設文泉縣治卽以原駐通判改爲知縣並請建城垣倉庫監獄等項檢到任後查該處地窪城倉各項俱未興工且於民情不便奏請將新設文泉縣裁撤新隄等處仍隸沔陽卽移該州州同駐劄新隄定爲沿江要缺在外選補無庸復設通判下部議行閏二月調廣東巡撫九月刑部進湖廣招冊檢定擬情罪多失當 諭曰湖廣招冊九卿由緩決改入情實及由緩決改入可矜者較他省起數獨多覈其情罪刑部九卿所改皆爲允當該撫等原擬何以錯謬如此夫以應入情實人犯列入緩決卽爲失出而可矜者列入緩決又屬失入秋讞大典理宜詳慎持平失出失

入厥過維均皆非執法者所應有王檢初經辦理秋審於律例未能諳熟此次尙有可恕嗣後當畱心省記輕重務得其平若再定擬失常必將伊交部議處王檢著傳旨申飭三十一年二月奏洋盜出洋肆劫其糾約夥黨製造器械皆在內地該州縣如果嚴行保甲實力查察匪徒豈能藏匿除盜犯並非本地者仍照向例議處外其土著居民及流寓匪徒由該地方出口行劫者將專管及兼轄各員均照編排保甲不實稽查例議處 上從之四月奏粵民多族置祭田名爲嘗租除祭祀完糧外其租穀積蓄饒裕往往以強凌弱恃眾暴寡或糾眾出鬪其中傷者則給嘗租以供藥餌其傷故者則給嘗租以養妻孥如傷斃他姓有冒頂兇認抵者亦

照傷故例辦以致漏網奸徒愈無顧忌請飭查嘗租田自百畝以上者計每年祭祀所需酌畱數十畝其餘田新置者仍歸本人收管年遠及遞年租利所置按支均派俾貧民有田以資生兇徒無財以滋事 諭曰所奏自爲懲兇息訟起見但欲豫防積弊遽將通省鄉祠田產紛紛查辦恐有司奉行不善吏胥等或致借端滋事而族戶人等賢否不齊亦難免侵漁爭攘之弊嗣後令該督撫實力查察如有恃祠產豐厚以致糾合族眾械鬪斃命及給產頂兇之事除將本犯按律嚴懲外照該撫所請將祠內之田產查明分給一族之人俾兇徒知所警懼而守分之善良仍得保其世業以贍族人於風俗人心較有裨益三十八年八月因病請假 諭

曰該撫因感冒風寒遷延致病見在巡撫印務已交李侍堯署理該撫惟當盡心調養以冀速痊如調治漸愈精神日就平復仍可接受撫篆辦事至近日病勢是否輕減著卽行奏聞以慰廑念旋卒子啟緒原任河南開歸道

右 國史館本傳

國朝耆獻類徵初編卷百七十五目錄

疆臣二十七

方觀承

子維甸
從子受疇

國朝耆獻類徵初編卷百七十五目錄

國朝耆獻類徵初編卷百七十五

通奉大夫前署江西巡撫江西布政使司布政使湘陰李桓輯

疆臣二十七

方觀承

子維甸

從子受時

方觀承安徽桐城人雍正十一年由監生加中書銜隨定邊大將軍平郡王福彭赴北路軍營爲書記十三年回京補內閣中書乾隆二年軍機處行走三年遷兵部主事累遷吏部郎中七年七月授直隸清河道十二月署總督史貽直奏勘永定河工諭曰永定河實關緊要卿於明春協同方觀承詳酌爲之此人想宜於河務爲其不穿鑿而亦有條理也八年遷按察使九年二月命隨

大學士訥親履勘河道並海塘工十月遷布政使十一年署山東
巡撫奏稽察漕弊嚴緝盜匪二事 諭曰足見畱心地方實力行
之可也十二年正月疏言安山湖地撥民認墾升科一案臣飭屬
確勘湖中尙有積水但二麥布種於水已涸之後收穫於水未發
之先且湖田多沃壤而麥收足抵秋禾故雖有水患民願認墾升
科但升科之後官徵民納例重秋收秋禾被水請蠲請賑請豁徒
致紛繁卽如南旺湖前經臺臣條奏給民認墾其時臣隨訥親履
勘雖最窪之處亦俱乾涸貧民於中取土熬鹼高處則如屋如巖
意以爲水必不能及上年臣抵東詢知夏秋運河汶水暴漲賴有
南旺及獨山湖同時分減運道得保無虞而兩湖之水則一望瀰

漫無分高下以此觀之凡大川經由及眾水所注其宣洩潴蓄之區常閱數年數十年有若閒置而一旦用之乃知其見功爲不小未可以目前之形而忘久遠之慮也安山南旺二湖同爲運河洩水之地南旺見准報墾徵租安山請一例辦理並照直隸淀泊河灘地畝分季徵收之法其專種夏麥者於麥後徵收兼種秋禾者分麥禾兩季徵收則租額毫無減於升科而除去升科名色官地民種應徵應免可以隨宜辦理 上是其言又言委積相調義倉稱便與社倉鬻鬻但社倉例惟借種義倉則借與賑兼行而取重尤在猝然之賑大要設倉宜在鄉不宜在城積穀宜在民不宜在官秋穫告豐勸導輸納年底將捐過穀數奏明不必開具管收除

在則其數仍不在官法可行久捐輸及典守年久者照社倉例議
敘報 聞二月回直隸布政使任十三年三月擢浙江巡撫九月
疏言海塘引河見出中小鹽安流弭節其北大鹽北抵石塘根沙
漲如平地臣沿塘查勘自仁和縣之觀音堂起至海甯縣東之淡
水嶺止丈出地三十五萬四千八百餘畝民竈五千七百五十戶
臣爲認墾者覈編字號以十號爲一甲每十甲選老農一人司勸
課按其土宜分年升科仁和海甯二縣歲徵雜糧十萬石小民咸
資生業 諭曰墾田乃務民之本圖所宜畱心勸相者也又言中
小鹽貧民應撥補地畝俾安耕作查附近中鹽之許村西倉獨山
腳河莊山北各地共二萬七千餘畝堪以撥補見除將萬八千餘

畝撥給四百七十三戶餘八千餘畝畱爲續至各戶之用再所撥地必俟鹹氣盡除始可種植貧民豈能懸耒以待查有乾隆十一年各竈戶報墾升科之地附近西倉竈戶不能全種今卽令各戶佃種交租竈戶得租貧民得地兩受其益又各戶前於被水時有就竈戶課地內造屋而居者不便屢移卽令撥出二百畝劃界安居應納錢糧改歸各戶名下完納得 旨嘉允十四年二月疏言定海縣之普陀山遠在大洋每年正二月間有所謂香頭者領眾進香男女偪處一船住山寺經旬始返旣於風化有關而海洋關汛例應稽查禁物因婦女在船或致疎懈恐奸民乘機夾帶偷漏臣已飭查嚴禁 上是其言三月請纂輯兩浙海塘通志以備參

稽許之五月疏言臣於上年奏請將豆麥雜糧私運出洋者照私運米穀例治罪經部議准嗣聞浙總督喀爾吉善奉天將軍阿蘭泰等奏請酌籌彼此流通 敕部議定豆麥雜糧出口俱給印照驗放臣查沿海情形各省不一浙省如甯波屬之定海象山二縣定海屬之岱秀二山溫台屬之玉環山向許流通至嘉興屬之乍浦杭屬仁和縣之通口一帶海道又溫台連界之蒲岐所海港向俱不通商販卽本處米穀亦禁出入以杜影射偶遇歉歲暫一弛禁舊例或經奏明辦理或臨時僅據屬員詳請遽准通融易滋流弊請嗣後辦理時必將確實情形奏明請旨則就流通之中仍嚴維制之道下部議行七月疏言浙省徵收錢糧原有頒發官

戩聽糧戶稱較完納以杜捉補短封之弊而所製官戩當花戶叢
集時勢不能逐一稱較官吏藉詞捉補弊竇實多見照部頒樣戩
多爲製造發各州縣令鄉保當堂具領使一里甲之內足供輪用
花戶投糧時齎戩赴櫃交納櫃書查給印串如短少卽係櫃書剪
邊換錠不得於給串後向花戶捉補違者以重耗嚴參報 聞尋
擢直隸總督兼理河道十一月疏言永定河身自六工以下舊有
高仰之形乾隆二年大學士鄂爾泰會同督臣李衛河臣顧琮議
於半截河隄北改挑新河移北隄爲南隄另築北大隄乾隆五年
顧琮續請接築北隄與北大隄相連而下然祇係下口入河之保
障非爲改河之用近年來六工淤墊日甚水流不下情形又異今

就舊有之北大隄於六工改移下口庶水由地中暢下無阻惟北大隄內田廬墳墓甚多請俟來年汛後將改移事宜籌酌辦理至臣見議應修隄壩俱在六工以上量加培補以防漫溢將來下口改移上游亦得刷深尙非專恃加高致復淤墊爲害 諭曰改移下口之處不可輕言卽鄂爾泰之原勘亦未可卽信爲盡善不易之策使改移而數年後復致淤塞者又將何所改移乎十五年二月 上閱永定河隄 諭觀承以下口宜暢使易趨下 御製詩示之曰水由地中行行其所無事要以禹爲師禹貢無隄字後世乃反諸祇惟隄是貴無隄免衝決有隄勞防備若禹豈不易今古實異勢上古田廬稀不與水爭利今則尺寸爭安得如許地爲隄

已末策中又有等次上者禦其漲歸漕則不治下者卑加高隄高
河亦至籌之築寬牆於上置溝澮行險以傲倖幾何其不潰胡不
籌疏濬功半費不資因之日遷延愈久愈難試兩口閼未定大率
病在是無已相咨詢爲補偏救弊下口略更移取其趨下易培厚
或可爲加高汝切忌多爲減水壩亦可殺漲異取土於河心卽寓
疏淤義河中有居民究非長久計相安姑弗論宜禁新添寄條理
爾其獲大端吾略示桑乾豈巨流束手煩計議隱隱聞河南與此
無二致未臨先懷憂永言識吾意是月 賜人漚三斤三月加太
于少保六月永定河南岸三工汙溝奪漕 命將江南總河高斌
豆辦集漫口圖鈔寄酌辦觀承疏言豆辦集漫口係中河餘水泛

溢故可擇便於水緩處施工其漲溜全歸正河照舊下注不虞堵截今永定三工南爲月隄缺口北爲大隄漫口南北相對里許若將月隄堵截其已過漫口之全溜並無去路實與南湖情形不同見在新開引河附近漫口請仍堵築偪溜歸入引河以復故道

上是其言十六年正月疏言喀喇沁土默特等處種地民人漸多奉 旨查禁廷議照署督陳大受所請將有力者按五年三年之限交地回籍若原係民墾不能卽回者按畝交租俟一二年後再行給還本人上年六月理藩院咨稱土默特貝子欲不問年限槩行驅逐臣思此等貧民無家可歸卽使甘受驅逐而數萬男女槩入內地亦覺安置爲難今旣蒙 恩從寬查辦自應行之以漸請

簡公正大臣前往查辦俾蒙古民人俱各安輯 命侍郎劉綸
侍讀學士麒麟保會同貝勒羅卜藏往勘尋議仍照三年五年限
撤還嗣後不得私典至領地開荒民與價典不同俟年滿先將原
主需種地退還餘地仍許租種 從之三月疏言上年增建冰窖
減水草壩貼近從前永定河下口近因水大全河於此掣溜冰窖
以上河身自四工至七工吸刷深通比冰窖以下河身驟低至五
六尺其水仍由金門而壩臺並無刷衝至三十里外卽已澄清竟
由坦坡埝汪爾淀一帶出水可無淤墊之虞但坦坡埝之設原爲
格淀起見如遇淀水內漾不免阻遏河流應培築高厚以別清渾
卽請於坦坡埝尾東北斜穿三角淀開引河歸入葉淀由鳳河轉

輸入大清河疏下廷臣議以此時甫過凌汛與伏秋情形迥異一經盛漲挾沙直注恐致汙淀未可因一時水由壩出遽議更張令詳查再議觀承復疏言冰窖壩口掣溜在上七工尾當舊下口旁地面低於正河丈二三尺南岸距南坦坡埝較北岸距北大隄寬又加倍有漫衍而無衝溢此地勢之順也水由壩出非衝決亦非開放民情不怨此人事之順也凌汛改移經理有暇此天時之順也今日敢以必應改移爲請不復稍存歧見查河身北高南下水勢偏側竟成通河之病自七工出水後去路甚暢上游吸刷倍益寬深自數尺至丈餘不等今卽倍用人力將七工八工舊河挑與相等而出口不順已刷深之上游轉眼停淤如故是水歸故道雖屬

守經之論然不乘此就下偏南之勢仍強使北不但機會可惜竊恐伏秋盛漲南岸經理非易至原議內有一經盛漲挾沙直注恐致汙淀之語臣以渾水至三十里外卽已澄清雖盛漲多挾泥沙而水渙沙停必無直注汙淀之虞臣因慮及渾水或致入淀故不使東循龍尾直入鳳河議於王慶坨之南開引河二十里東北入葉淀迂其途而廣其地更可經久無患 命尙書舒赫德河東總河顧琮會勘如觀承議五月疏言理藩院尙書納延泰條奏以多倫諾爾鋪司占蒙古游牧請毀屋另用蒙古人遞送文移查自設鋪司以來文移資其郵送解餉藉以棲止卽行旅商賈亦堪投宿並無礙游牧近因民人於鋪司之外增建坊店該處總管達錫等

恐增建漸多侵占游牧是以呈明理藩院具奏但數百里荒漠公務往來棲託無所商賈等野宿堪虞而蒙古人不諳內地文移難免舛錯今查南茶棚等六處每處尙有屋一二所無庸拆毀上渡酌畱屋一所轉山子水泉子兩處各畱屋三所如有多建容畱奸匪者責成地方官究治軍機大臣議行十一月 上以豫省黃河兩岸大隄外舊有古隄多殘缺黃水近自陽武灌入直隸之長垣東明衝開月隄三口 命觀承往勘十七年二月疏言長垣東明二縣太行古隄在隄防外其地南高北下豫省陽武等縣瀝水北注長垣全賴此隄捍衛康熙六十年後屢被衝擊口門刷深難於施工惟王家隄工東舊有引河入運故近東隄工可無恙而隄西

澀水匯至屢被衝隄今宜爲澀水籌其去路請於隄西開引河導
入舊引河使容納東注卽將所起土自隄西村起另築新隄則隄
外有河以疏澀水河內有隄以防漫溢事半功倍且隄西八村皆
得新隄爲外障民情更爲欣躍 詔如所議七月 諭曰直省錢
價昂貴由於富戶囤積山東布政使李渭請定以五十串之限但
驟行之不無滋擾應先行明切曉諭各富戶出易勿令壅滯九月
觀承疏言富戶積錢類皆深藏固閉勢難逐戶稽查與其定以所
積之限紛擾而難行不若稽其所入之數顯明而有據應令交易
買賣價在三十兩以下許其用錢如逾三十兩卽用銀違者照官
價易之舊積錢文遵 旨曉諭早爲出易加以獎賞如仍敢多積

以十之二入官至尋常出入之錢拘以官收不免滋弊似應各從民便奏至 上以所辦過遲詢問成效若何有無平減觀承覆奏富戶自諭後不敢多積錢文價俱已平減報 聞十月廷議各省採買糧石委員齎銀赴米船停泊處所收買而牙行轉運藉名昂價嗣後沿河聽商販自行轉運停隔省採買令各督撫動項交本地方官採辦委員運送則操縱隨時牙僧不得抗本地方官教令較隔省委員坐待羣得把持者難易迥別是需米雖在鄰省仍如本省自爲採買無礙商販流通其弊除而其利自見下部議行十一月疏言滿城縣之奇村河發源一畝泉匯距泉以入保定春夏之交每虞微弱臣委員於滿城東孫家堂勘得申泉又東得連室

泉夏家莊南得五花泉龍泉寺西得紅花泉俱爲葦草溼閉而渠形可尋一經濬治合流併注可增治稻田多頃商販亦得通行奉旨嘉獎十八年正月疏言熱河地方遼闊請編立煙戶定文武各官稽查責成其附近之敖漢柰曼翁牛特土默特等處令副都統每年巡查一周補營汛所不及如所議行二月奏設義倉告成凡千餘倉貯穀二十八萬五千三百餘石酌籌條規並繪圖以進諭曰諸凡周詳妥當爾惟實力行之三月疏言子牙河支河請自楊家口至閻兒莊八里改爲正河以收因勢利導之益再於閻兒莊尾北通蔡家窪沿畱兒莊東隄抽挑河槽下接黑港舊河俱於子牙橋北歸入正河 詔如所請十月請將保定雄縣二處駐

防兵米停向各縣採買以省派累照天津等處兵米例截撥豫省漕米部議從之十二月疏言永定渾流善於移徙而下口形勢尤變遷靡常年來下口漸淤請於北岸六工尾開隄放水作爲下口至五道口東南導歸沙家淀仍由鳳河入大清河廷議以甫自南岸冰窖改移下口何以又請於北岸六工開隄放水令據實覆奏觀承言自冰窖改移之後水勢暢順上年汎水盈丈挾沙直注下口十里以內舊積新淤阻塞去路至南埵中下地面尙可以資容蓄今請於北岸六工放水循南埵導歸河淀照舊以鳳河爲尾閘雖有向南向北之分其實水道本屬相通北埵至南埵三十餘里瀾漫一片或分或合原足任其蕩漾臣逐細查勘向北改移水

道仍以南埏下汛爲歸宿實於見在情形爲便十九年疏言鳳河隄工分隸永定天津兩道責成不專請將東隄並韓家北埏改隸永定道增弁兵畫一查辦均得 旨允行二十年四月加太子太保九月 命署陝甘總督由肅州至哈密抵巴里坤籌辦軍營糧馬諸務十月疏言軍營所需馬臣見解送萬三千餘匹合之軍營原存五千四百餘匹已敷一兵三馬之數但恐軍營積用復寬爲挑備撥往安西候調如不用卽以補實安西營缺又言准軍營咨約需馬三萬臣查索倫察哈爾尼魯特兵跟役無多官員分例等馬尙有可減又哈密回兵三百祇派一半亦有可減之馬計實需用二萬七八千匹臣陸續督飭解送至軍駱駝共需四千四百餘

見已解送足數餘供哈密運糧之用十一月又言哈密貯茶三萬封駝到卽運往軍營仍撥五萬封補貯哈密舊存糧十萬餘石就近撥運嗣後所貯以此數爲率隨時動撥庶緩急有備至餉銀先後已撥三十萬兩請再由藩庫撥四十萬兩貯哈密及西安甘肅兩道庫備用 諭以妥速爲要十二月疏言哈密至巴里坤中隔大坂積雪兵三百名在彼鏟除用力勤苦懇 恩日加給麪四兩允之二十一年正月回直隸任三月疏言臣前奏准於永定河北岸挑引河改作下口今行水之北埝卽向之遙埝請於北埝外更作遙埝預行展拓以爲勻沙散水之圖鳳河東隄亦接築至遙埝之尾以資穩固 從之二十二年八月奏遵 旨赴東西兩淀

督辦民船赴天津剝運漕糧 諭曰甚好卿自能妥辦也又 諭
曰今歲糧船遲緩雖經剝船起運若令旗丁運送抵通仍於回空
有礙且恐剝船未能同時畢集旗丁不免守候爲今之計莫若卽
在天津交兌令漕船及早南回不誤明年起運著傳諭方觀承并
行知倉場侍郎雙慶等派員赴津收兌除剝船腳費照例聽旗丁
出給外其旗丁將本船應交糧石如數交卸卽令催趨回空其如
何設法稽查該督等當悉心妥辦此原係漕督楊錫紱職守但伊
不過尋常循分供職於應機集事一籌莫展方觀承肆應裕如可
協助辦理期於漕運有濟觀承奏言天津北倉餘廩貯丁糧三十
萬石圍牆內設席囤可貯十萬餘石臣飭辦大席二萬片並麻繩

稅稽應用事竣仍可變價歸款所費無多至交兌之船悉令泊北倉以南起剝之船悉泊北倉以北北倉東岸分釘樁界每二里泊船一幫同時起米不相妨礙西岸畱爲河道令空船行走復咨飭南來各船並幫遄進毋拘銜尾常例迅速抵津及早告竣又言向來起剝係抵楊村以北酌視水勢深淺所剝不過十之三四腳價旗丁自給今自天津全數起剝運通腳價多至兩倍丁力較爲拮据仰懇 聖恩於直隸藩庫內借動公項交地方官代給不須更經旗丁之手仍移咨漕臣於明歲新漕內扣解歸款均得 旨嘉獎尋 命同山東巡撫鶴年籌勘南運河宣洩事宜二十三年二月疏言永定河淤灘地請於隄內外共畱十丈爲種柳取土之用

餘撥給永清等七州縣守隄貧民領種輸租 從之二十四年正月遵 旨酌定 陵寢兵役規條四事一大臣官員及各項當差人等雇用人役責成地方官查明造具來歷實係守分鄉民冊結方准充役一賃住官房之人照雇工人例一體查造冊結分別去畱一樹夫草夫更夫埽院夫及各衙門隸役照定例行文地方官募送驗充一馬蘭泰甯兩鎮屬綠營餘丁每年清查一次造冊送地方官稽查其因事革退兵歸入民籍嚴加管束 諭曰所定甚妥如所議永久實力行之二月疏言理藩院議領票赴恰克圖庫倫貿易商民不得私住喀爾喀各旗販賣致蒙古賒欠將牲畜抵償有礙生計臣查商民多在張家口設鋪奉禁以來赴恰克圖庫

倫者甚少蓋有力之商始能遠赴恰克圖庫倫一帶若中途糧乏不能不易貨接濟而先已蹈例禁之罪因此商民強半改圖惟是蒙古駝馬羊隻皮張資用內地者甚廣卽蒙古所需茶煙及布今商販稀少有無不能相通亦未見其有益可否於例禁之中加以區別領票赴恰克圖庫倫之商仍准經過喀爾喀各旗交易貨物如有盤據日久擡價放債致礙蒙古生計仍嚴行查禁 上是其言四月 上以北運河水勢微弱 命將先到糧艘截畱四十萬石貯天津北倉將來水長續到之船直抵通倉令觀承等詳悉奏聞觀承疏言前幫截畱後幫繼進常速其間爲日無多若北運之水未長則續進之船仍不免起剝請就先到各幫內每船應剝若

干卽得輕便今於北倉按應剝之數截畱原船之米餘仍抵通交
兌以剝爲截則應截五百六百船全米者勻於千數百數之半米
以次起卸俟河水長發繼進之船浮送無阻 諭獎其妥協如議
行九月因滹沱河以東鹿改流南徙由甯晉縣入滏陽河地方官
詳請導由舊路觀承勘奏言改流之晉州張岔山口新河係滹沱
舊道非平地另有衝齧且原近東鹿城南頗費捍禦今改道晉州
甯晉皆距城三十餘里近河村莊多在高阜可築隄防護不須復
濬十二月又言漳河向由豫省臨漳東北流入山東館陶與衛河
合本年秋汛盛漲改流東南直趨大名府城水退後分爲二支一
經府城之北一趨河閒府城適當其衝請於改流淤塞處濬河身

六百八十丈接入舊河其新衝河口堅築攔河大壩一百十丈以斷南流壩外加築土隄作爲重障使水無旁洩仍歸故道大名積水自消均如所議行十年涿州拒馬河河流北徙舊橋傾圮觀承奏改建石橋從之二十六年正月御史七十五條奏派員於多倫諾爾收稅命觀承議奏觀承因疏言多倫諾爾糧米皆資運販貿易貨物較前雖增而情形與八溝迥別內地茶布俱自張家口販往毋庸重徵惟恰克圖庫倫各處貿易貨物及克什克騰木植其在多倫諾爾售賣者應一律徵收課稅以杜私販下廷臣議行二十七年三月疏請寓賑於工凡河渠隄埝應修應築如千里長隄格淀大隄大清滹沱子牙北牛豬龍海河鳳河北運河兩淀

各處之減河疊道等凡三十二州縣土方銀米皆歸確實四月同
大學士劉統勳山東巡撫阿爾泰會勘山東四女寺哨馬營兩處
減水引河應加疏通並請將兩岸隄工歸德州與恩縣分管其兩
壩支河入海縣長將德州州判移駐交匯之邊陵鎮專司河捕責
成德州糧道天津道轄均得 旨允行十一月 上以河南巡撫
胡寶瑑見辦豫省民田道路溝洫甚善令觀承做而行之尋疏言
正定順德廣平大興等處民力易集上下游並皆協取略與豫省
相倣近年漳漆滏洺在在疏通是其明驗河間府屬河渠消水較
前爲速保定四境開溝種樹已定章程其餘各處俱先後開工至
田間溝洫與道溝或分或合要使澀水有歸農田杜患以期事不

勞而民不擾報 聞先是易州城北白楊嶺有安國河觀承奏准
開渠導之灌田渠成 賜名安河二十八年三月 上以天津等
屬積水未涸觀承不能設法疏消模稜玩誤交部嚴議尋議革職
命從寬畱任是月觀承疏言安河見鑿子渠建大小閘以時啟
閉並分上下游按日輪啟如上游單日用水卽閉閘導入上游子
渠下游雙日用水卽閉閘導入下游子渠設渠長二專司其事兩
旁隙地量予種藝 從之四月御史吉夢熊疏劾觀承玩視民瘼
徇縱天津道那親阿啟閘遲延不早籌宣洩六月御史朱續經復
劾直隸胥役派車船勒索賄放觀承不能督屬鋤奸 諭曰方觀
承在直年久每存息事甯人之見前此辦理疏消積水事宜不能

及時整頓經朕特派大臣履勘業將該督嚴加議處以示懲儆而
言者動以爲歸過之地直隸通省事務殷繁又值災歉之後措置
自不無竭蹶持論者置身局外坐言易而起行難使易地以處恐
其施展或未必能如該督之勉力支持也方觀承如自愧悔湔滌
前非正宜稍假時日以觀後效儻其因循玩愒復蹈前轍斷不能
逃朕洞鑒又何能屢邀寬典乎五月疏言直隸水道溝渠田間澮
細避 旨查勘入於以工代賑案內辦理茲查自大興宛平東至
撫甯西至易涿西南至望都東南至阜城又運河大道自武清至
吳橋一路共二十二州縣疊道開渠一律完竣 諭曰溝渠卽河
道之脈絡也應聯爲一氣方得宣洩之宜二十九年十月疏請嚴

麥田牧羊之禁令羊販赴津滄荒窪地牧放毋許至京西京南以
衛民息事 上是其言十二月疏言右衛兵移駐張家口其歲支
粟米通計協領等官四十四員兵千一百二十名此內有張家口
原設官三員兵三百名卽在新移官兵應支數內實不敷米一萬
四千餘石宣屬產米本少商販不通本地無可撥給請將宣化懷
來懷安三縣見支米豆照二十六年改折之例停支額豆八折改
徵粟米撥運又於蔚州西甯二處酌撥屯豆六千六百石亦照前
例折徵粟米但道遠運煩恐多糜費請卽於本地出糶收價至張
家口買米交倉以上可得米八千餘石再於移駐之領催前鋒馬
兵歲支米十五石每名改折三石以准籌撥之數惟張家口米價

較右衛昂貴所有新改折色每石加給銀二錢如此通融則兵食有資而轉輸可省下廷臣議行三十年正月 上南巡觀承迎駕 賜詩曰桀戟依京國隼旗鎮冀門中丞近張瑩大尹昔王遵任久民情悉心恆吏治敦幸哉連稔後元氣復堪論四月條舉木棉事十六則繪圖說以進 御題詩十六章並 命將觀承所作詩句書於每幅之末十二月疏請將欒城柏鄉內邱定興安肅望都等縣改建甄城三十一年二月又奏淀泊河灘淤地向係撥給貧民認種完租每戶不得過三十畝近因胥役豪強詭列多名影射兼并今俱查明撤回請歸畱養局爲養贍貧民之用八月籌辦居庸關城及關溝疊道十月奏永定河葦地已成高灘請改種禾

收租均 詔如所請十一月奏衡水縣西重建石橋成 賜名安濟橋三十二年疏言見奉部議准將宣化鎮所屬之張家口副將作為都統標營以嚴隘口查該副將所轄其在邊外者係張家口中營及萬全營膳房堡新河口堡洗馬林堡柴溝堡西陽河堡七處在腹內者係左衛懷安二處左衛西連山西天城營懷安東連宣化城守營係通山陝軍站大路並無隘可查而以上下聯絡之營汛分隸兩標一切差務實虞歧誤請將邊口七處歸都統轄左衛懷安仍隸宣化鎮兩得其宜軍機大臣議行三十三年八月卒

諭曰方觀承老成歷練任直隸總督兼理河務二十年來奉職恪勤方資倚任昨該督至石槽迎鑿見其病後氣弱卽令回任安

心靜養繼因其患瘡增劇特賜經驗藥丸遣醫診視以冀速痊今聞溘逝朕心深爲軫惜應得卹典該部察例具奏尋賜祭葬如例諡恪敏四十一年諭曰原任直隸總督方觀承宣力畿輔二十餘載懋著勤勞其身後每深軫念伊惟方維甸一子彼時尚在幼穉今年已及歲前赴良鄉接駕著加恩照襲曰修之子襲行簡之例授爲內閣中書並准其一體會試四十二年直隸總督周元理題准入祀直隸名宦祠四十四年御製懷舊詩列入五督臣中詩日以書記見用古有今則無有之祇一人曰惟觀承夫夙稱習政事銓曹尤著譽出而爲監司洊升撫與督在直二十年勤幹實有餘永定籌補苴難爲永逸圖然僅能如此誠亦蒿目予徒以

益任久稍與姑息俱未至大狼籍何必吹求善成全良臣多詎非
佳士乎五十一年 命入祀賢良祠

右 國史館本傳

公姓方諱觀承字遐穀號問亭又號宜田先世自元遷桐城祖登
嶧工部都水司主事父式濟康熙己丑進士以本族南山集獄起
全家謫戍黑龍江公弱冠歸金陵家無一椽借居清涼山僧寺有
中州僧知爲非常人厚待之公與其兄觀永往來南北營塞外菽
水之費或日一食或徒步行百餘里雍正九年族人某薦入平郡
王藩邸王與語大奇之情好日隆十年王爲定邊大將軍征準噶
爾奏公爲記室 世宗命以布衣召見賜中書銜偕往時年三十

六矣十二年冬 王師凱旋以軍功實授內閣中書乾隆元年詹
事王公奕清薦公博學鴻詞臨試不赴尋遷侍讀行走軍機房補
兵部職方司郎中出爲直隸清河道累遷布政使浙江巡撫公風
神元定識力超卓練其才於憂患之餘雖書生善騎射於世事物
理瑩徹通曉以故大學士鄂公爾泰勘南河家宰訥公親勘海塘
直隸制府高公斌勘永定河俱奏公偕行公之受知 皇上亦從
此始直隸饒陽婦被殺主名不立公夢神人示以周秋二字果獲
犯雪冤在浙弛絲米之禁開墾海口大壘漲地三萬餘頃歲增雜
糧十萬石十四年授直隸總督直隸當十三省之衝每歲 鑿輿
謁 陵盛京避暑木蘭 巡嵩嶽五臺南至江浙路必經由加之

伊犁緬甸兩度出師一切兵校往還供張儲侍百務如雲而起公
能料簡周帑徒御不驚二十年如一日十九年西陲用兵加太子
太保署陝甘總督辦治軍需日行四百里得怔忡疾仍回原任三
十三年薨壽七十一 上聞震悼給祭葬 賜諡恪敏公長於用
人安放帖妥如置器然敦良者使柔民聰強者使折獄素封者使
支應迂緩者使訓士卽其人雖不出於正而譎詭捷黠者亦使之
刺探而奔走甘苦必知賞罰必信一言必察寸技不遺以故人樂
爲用畿輔數千里如臂使指拇脈皆通御史范廷楷林玉奏直隸
丈量其地歷年不清公上疏謝罪卽奏二人剛正有才請發往直
隸補官相助爲理 上許之旗地皆王公莊戶豪縱有年二人故

負氣與斷斷相角旗地稍清而二人之鋒亦少挫矣各省督撫奉部議令民自行修城公獨奏直隸多差徭民無餘力且又樸野不受獎誘修城之費請發公帑孟子所謂用其一緩其二也 上聽其言從之公嘗言事君如事天天地無心而成化雨露雷霆無非教也人能常修省於受恩之時則雷霆乍來轉不惑亂而至誠所格天心亦回直隸旱蝗 上責公督捕不力司道勸劾一二州縣以自解公不可曰我之不職州縣何辜磁州逆匪爲亂公奏誅三人絞七人 上疑公沽名有所縱弛 嚴旨督過一夕間接十三廷寄家人慮 聖怒不測盡雨泣而公堅執前議申辨愈力 詔解犯闕下九卿軍機大臣會訊獄辭與公奏一字無譌遂卒如公

議而從此 上愈重公名省買穀鄰僧居奇公奏請需米處督撫
密咨產米處有司代購運送可杜此弊保雄兩府 亟需駐防兵米
二萬石州縣苦之公請於豫東漕米內截運供支官民兩便所治
直隸水利如永定滹沱白溝等河奇才雞距等泉俱爲搜考原委
判別濬築 上命大臣兆公惠襄公曰修高公晉屢加相度悉如
公策加意忠賢之後在浙拜劉念臺先生像卹其家在直隸訪楊
忠愍孫文正子孫給與灘荒田畝素不信佛而獨修清涼山廟所
以報中州僧也公餘之暇譜印範墨角尖不苟一嘖笑皆有意義
某太守素倨過保陽衙參公坐受之出有愠語公聞之笑曰我開
府二十年雖簿尉叩頭皆不受何於某太守獨不然耶某以宰相

于出守郡慮其氣盛故逆折之使知朝廷儀適將謙謹以有成也
不感我乃愠我耶枚奉發陝西亦過保陽公謂清遠令周君燮堂
曰袁某循吏也雖宰江甯省會而能盡心民事汝等任首縣者宜
以爲師嗚呼公以此知枚則公之爲政可知矣公桐城人僑居金
陵在平邸時祖父母父母四代俱藁葬關外每至歲時必慟哭王
哀其意爲奏請謫戍身死而無餘罪者聽其遷柩回里 世宗許
之遂著爲令及公貴三代俱 贈如公官娶劉氏 誥封夫人後
嗣屢殤六十一歲生子維甸 上聞之代爲欣喜 命抱至御前解
所佩金絲荷囊 賜之公雖貴手不釋卷好吟詩有宜田彙彙松漠
草諸集纂河渠考若干卷辨明水經注滏水之非缺漢書注洹水

之非增皆勤學經生所不及也葬句容之胄王山銘曰

月之初生蒼蒼涼涼及乎中天眾星無光方公未遇險艱備嘗豈
知天意大任方將邊風塞雨濯滌肺腑擔簦往來固其筋骸操心
慮患既危既深一朝遭際百鍊精金牙燾旌麾若固有之彤弓湛
露從容賦詩狼章鵠章山陸驅馳醜泉鬢河弊謀輔志六秉三衡
功罔不濟操舟舵穩負重肩牢所謂棟梁不搖不撓無怖斯靜無
戀斯定先民有言動心忍性哀榮終始位極人臣基於祿命成於
精神軍民勿悲公死有歸欲知偉烈請觀豐碑

右神道碑袁枚撰

方恪敏公諱觀承字遐穀桐城人也而居於江甯桐城方氏自明

以來以文學名數世矣而亦被文字之累公之祖工部都水司主事諱登嶧考中書舍人諱式濟皆以累謫黑龍江公時尙少與其兄待詔觀永歲往來塞內外以營菽水之奉奔走南北徒步或數百里數年祖考皆沒公益困然於其間厲志氣勤學問徧知天下利病人情風俗所當設施遂蓄爲一才矣平郡王福彭嘗知之雍正十年平郡王爲定邊大將軍征準噶爾卽奏爲書記 詔賜中書銜以往在軍營建策善歸補中書舍人乾隆初入軍機處累遷吏部郎中出爲直隸清河道直隸布政使擢浙江巡撫乾隆十四年遂授直隸總督自是居直隸二十年中惟西疆用兵暫署陝甘總督等軍餉半年卽返公性明於用人一見與語卽能知才所堪

任授之事隨難易緩急委寄必當及公沒而爲督撫有名若周元
理李湖等凡十餘人皆宿所拔於守令丞尉中者也直隸爲天下
總匯之區人事糅雜紛擾不易靖 乘輿歲有臨幸往來供張而
公在任又值西征軍旅之興所過備置營幕芻糧柔調桀悍公處
此皆儲備精密弛張得宜卒未嘗少舛乏而於民居無擾病焉公
自爲清河道至總督皆掌治水直隸之永定河故無定河也其遷
移靡常不可以一術治不可以古形斷公洞澈地勢相時決機或
革或因或濬或障其於河務前後數十疏從之輒利 純皇帝每
歎其籌永定之爲善非他人執成法者所能及也磁州有逆民爲
亂公擒治定斬絞罪十人餘皆釋 上疑公寬縱廷寄嚴責者數

公執不易 詔令九卿軍機訊讞乃知公所定之當 上益以賢
公公素勤於學工爲詩及書乾隆初嘗舉博學鴻詞以平郡王監
試嫌避不試仕宦數十年署中未嘗設劇公事之暇卽執書讀之
嘗偕秦文恭公輯五禮通考所著直隸河渠書百三十卷詩集十三
卷其餘雜記直隸事又數十卷及薨家無餘財而有書數十笈於
桐城及江甯皆建家祠置田以養族之貧者兄弟相愛甚遺命與
兄待詔同葬一山公在時已加太子太保其薨在乾隆三十三年
八月年七十一 賜祭葬及謚祀於直隸名宦祠及賢良祠娶劉
夫人公五十而未有子撫浙時使人於江甯買一女子公女兄弟
送之至杭州擇日將納室中矣公至女兄弟所見詩冊有相知名

問知此女所攜其祖父作也公曰吾少時與此女子祖以詩相知安得納其孫女乎卽還其家助貲嫁之公年六十一矣今吳太夫人乃生子維甸旣孤 純皇帝以公故 賜爲中書舍人成乾隆庚子 恩科進士今復爲尙書總督繼公後

姚鼐曰唐時凡入史館者必令作名臣傳一所以覘史才今史館大臣傳率鈔錄 上諭吏牘謂以避黨仇譽毀之嫌而名臣行績遂於傳中不可得見然則私傳安可廢乎余讀 國史方宮保傳爲之憮然今尙書將修族譜請敘恪敏公事遂次其傳公功在天
下還女事小然世稱公後之大興者斯亦有助焉故並書之傳末云

石家傳姚鼐撰

姚姬傳先生之爲方恪敏公傳也首言其少時艱難績學繼言其明於用人繼言其辦事弛張得宜繼言其治水有法繼言其斷獄無縱繼言其著書之勤繼言其還女得子落落不滿千言而大人物之全神皆見其論謂今史館所立大臣傳率鈔錄上諭吏牘謂以避黨仇毀譽之嫌而名臣行績遂於傳中不可得見故作恪敏傳痛芟艾之其意善矣然其敘治水也第以公洞澈地勢相時決機或革或因其於河務前後數十疏從之輒利純皇帝每嘆其籌永定之善非他人執成法者所能及也數語了之而不實書一事則因噎廢食祇求文章之潔而不顧事迹之荒後世其何以

考耶余嘗病之意欲得公奏彙讀之以窺其措注之實今讀此錄亦略見其大凡矣蓋公於乾隆七年授直隸清河道署督史貽直奏勘永定河工 諭永定河實關緊要卿於明春協同方觀承詳酌爲之此人想宜於河務爲其不穿鑿而有條理也九年署山東巡撫十二年正月疏言安山湖地撥民墾種升科一案臣飭屬確勘湖中尙有積水但二麥布種於水已涸之後收穫於水未發之先且湖田多沃壤而麥收足抵秋禾故雖有水患民願認墾升科但升科之後官徵民納例重秋收秋禾被水請蠲請賑請豁徒致紛繁卽如南旺湖前經臺臣條奏給民認墾其時臣隨訥親履勘雖最低之區亦俱乾涸高處則如屋如巖以爲水必不及上年臣

抵東詢知夏秋運河汶水暴漲賴有南旺及蜀山湖同時分洩運道得保無虞而兩湖之水則一望瀰漫無分高下以此觀之凡大川經由及眾水所注其宣洩滯蓄之區嘗閱數年數十年有若閒置而一旦用之乃知其見功不小未可以目前而遺久遠之利也安山南旺二湖同爲運河洩水之地南旺見准報墾徵租安山請一例辦理並照直隸淀泊河灘地畝分計徵收之法其專種夏麥者於麥後徵收兼種秋禾者分麥禾兩季徵收則租額毫不減於升科而除去升科名色官地民稅宜徵宜免可以隨宜辦理讀此一節卽知公爲通人爲國爲民兩得其道矣蓋天下泛濫之水須有所歸湖澤者所以滯泛濫之水者也自湖澤滯而居民遂墾其

旁地爲田見小利者從而升科升科則小民視爲己地各築隄堰以圍之使水不得入水不得入則泛濫衝決不惟運道危而良田亦受其害矣公以所見南旺湖例之則安山湖之不宜升科可見但不敢深言且南旺旣報墾收租則安山湖不得異議第請照河灘地畝分別徵收而除去升科名色則隨宜辦理國利而民亦不病矣尋擢直隸總督兼理河道十五年六月永定河南岸三工淤溝奪溜 命將江南總河高斌豆瓣集漫口圖鈔寄酌辦公疏言情形與南河不同請仍堵塞 上是之此卽姚文所云洞澈地勢之一也其後疏言上年增建冰窖減水草壩貼近從前永定河下口近因水大全河掣溜冰窖以上河身自四口至七口吸刷深通

比冰窖以下河身低至五六尺其水仍由金門而壩臺並無衝刷至三十里外而已澄清請竟由坦坡埝注爾淀一帶出水可無淤墊之虞但坦坡之設原爲格淀起見如遇淀水內漾不免阻遏河流應培築高厚以別清渾卽請於坦坡埝尾東北斜穿三角淀開引河歸入葉淀由鳳河轉入大清河疏下廷議以此時甫過凌汛與伏秋情形不同一經盛漲挾沙直注恐致淤淀未可因一時水由壩出遽議更張令詳查再議公復疏言冰窖口掣溜在上七工尾當舊下口旁地面低於正河丈二三尺南岸距南坦坡埝較北岸距北大隄寬又加倍有曼衍而無衝溢此地勢之順也水由壩出非衝決亦非開放民情不怨此人事之順也凌汛改移經理有

暇此天時之順也臣今日敢以必應改移爲請不復稍存歧見查河身北高南下水勢偏側竟成通河之病自七工出水後去路甚暢上游吸刷倍益寬深自數尺至丈餘不等卽倍用人力將七八工舊河挑與相等而出口不順已刷深之上游轉眼停淤如故是水歸故道雖屬守經之論然不乘此就下偏南之勢仍強使北不但機會可惜竊恐伏秋盛漲南岸經理非易至原議河內盛漲挾沙恐致汙淀臣以渾水至三十里外卽已澄清雖盛漲多挾泥沙而水患沙停必無直注汙淀之虞臣因慮及渾水或致入淀故不使東甬龍尾直入鳳河議於王慶坨之南開引河二十里東北入葉淀迤其途而廣其地更可經久無患 命尙書舒赫德河東總

督顧琮會勘奏如公議此十六年三月事也至十八年十二月又疏言永定河苦於流徙而下河形勢尤潰變靡當年來下河漸淤請於北岸六工尾開隄放水作爲下口至五道口東南導歸沙家淀仍由鳳河入大清河廷議以甫自南岸冰窖改移下口何以又請於北岸六工開隄放水公奏自冰窖改移之後水勢順暢上年汛水盈丈挾沙直注下口十里以內舊積新淤阻塞去路至南埝中下地面尙可以資容蓄今請於北岸六工放水循南埝導歸河淀照舊以鳳河爲尾閘雖有向南向北之分其實水道本自相通北埝至南埝三十餘里瀾漫一片或分或合足以任其蕩漾臣逐細查勘向北改移水道仍以南埝下汛爲歸宿實於見在情形爲

便得 旨允行此卽姚文所云相時決機從之輒利者也蓋永定河本名無定挾沙善怒其故道原無隄任其散漫於固安霸州一二百里之間沙渟於平地者多則會清河以入淀者少自于成龍以私意奏改河道之後築隄束水其禍遂不勝言望溪先生與顧用方論渾河事宜書欲其別改河道俾濁流直達海口而不入淀斯爲永久無弊之策今公亦不能遵行不過救弊補偏苟且一時故三年遂三變其說然不略摘其疏次之則無以考見其實并公救弊之心亦泯矣予故略其在浙江巡撫任內治海塘事宜及直隸任內議撫馭諸疏而錄取治永定河者以補其缺蓋爲姚文作注卽可爲治河者立案也後有因地制宜相機決策者其必有考

於此矣天下總督惟直隸最爲繁難蓋地方廣遠塞外事亦皆歸之而春秋上陵熱河避暑扈從迎送日不暇給故膺此重任未有能料理民事者公爲直督二十餘年無利不興而教民種棉爲利尤普三十年四月條舉木棉事宜十六則繪圖貼說以進御賜詩十六章並命公所作詩句書於每幅之末予於京邸見其墨刻真希世之寶也子維甸孫受疇皆襲其位嗚乎恪敏之澤遠矣

右書事李祖陶撰

恪敏公未遇時祖父俱以罪戍塞外公南北奔走備極流離清涼寺僧號中州者知爲偉人時周卹之公贈詩云須知世上逃名易

只有城中乞食難後官制府爲中州弟子麗雅重建清涼寺殿宇
煥然余過而有感亦題詩云細讀紗籠數首詩尙書回首憶前期
英雄第一心開事揮手千金報德時

右隨園詩話袁枚撰

恪敏精三禮與秦味經司寇同撰五禮通考官畿輔時尤畱心水
利先後延趙一清戴震輯直隸河渠書一百三十餘卷惜未梓而
行之

右名人尺牘小傳梁同書撰

宮保祖水部父中翰皆以才著水部坐累謫塞外時宮保未弱冠
隨中翰侍水部重趼徒步奉侍重闈埽馬通爲薪點潼乳爲餌備

極艱苦願誦讀不輟發爲詩文浩然有牢籠一世之意雍正十一年平郡王奉命統師北路奏聘掌書記上授中書舍人贊畫著績遠夷效順奉命撤兵由銓曹擢用監司躋方伯旋晉浙撫婺州旱荒設法賑濟全活無算督直隸舒陽肅陰民懷吏畏凡所學畫四方取則焉其詩刻畫眾形含和萬態閱通肆應不僅成一家言也

右江蘇詩事阮元撰

伊古忠臣孝子無不從患難中來席豐履厚筋力慵疲焉能卓然自立孟子天降大任一章爲萬古閤世最深之論今讀方恪敏公述本堂集祖若父爲鄉人所株連少時走省往來塞外凡二十年

假當時不遇平邱安能達名世宗漸至榮顯以伸抑鬱幽憂之氣耶誦其飢詩云飽亦與飢同長飢客意中何心甘寄廡此日忍飄蓬交遠書難寄憂多命合窮昨朝江路見元有信天翁又臥藁薦暖甚藁薦歌諸篇令人心慘怛當此時焉計有後日耶英雄喜言知遇先生經濟文章皆從患難中來又豈英雄之所能比儗也

右寄心庵詩話符葆森撰

陳兆崙云先生少搜家難閒關單步藁饋萬里跡其傷心拂鬱之境備見於出入關塞諸篇有古豪傑之所不能堪者而先生之氣愈和神愈密略無怨懟不平之鳴洎乎遭時顯貴爲所得爲在他

人或難一意奉公先生乃上紆軍國之籌下以究民疾苦而於人世嗜好一無所營當其淵然獨居歌聲若出金石不異向在逆旅蕭條時也

右正雅集符葆森錄

方恪敏公詩有云造 膝幾人容抱子 眷懷昨歲 詔迎醫自注云攜耆兒至 御前蒙 親解佩囊以 賜又蒙 恩命御醫為耆兒種痘大臣幼子仰荷 天慈高厚至此即史書紀載中亦為罕觀

方恪敏公中歲懋膺 宸眷游擢封圻人皆羨其榮遇不知其早年隨侍重闕崎嶇塞外固已備極流離如孟子所謂苦其心志勞

其筋骨蓋有人所難堪者公事親孝兄弟友愛尤篤余讀其塞上憶兒詩有云麻衣萬里呼天淚凍雪千山負米心令人不覺愀然動容也

右聽松廬詩話張維屏撰

方維甸

方維甸安徽桐城人父觀承官至直隸總督自有傳乾隆四十一年二月上巡幸山東維甸以貢生在良鄉接駕諭曰原任直隸總督方觀承宣力畿輔二十餘載懋著勤勞其身後每深軫念伊惟方維甸一子彼時尚在幼穉今年已及歲著加恩照襲日修子行簡之例授爲內閣中書並准其一體會試六月補內閣中

書充軍機章京四十六年成進士授吏部主事四十九年五月隨
參贊大臣福康安赴石峰堡軍營十一月升員外郎五十年授坐
糧廳五十二年推升郎中隨將軍福康安赴臺灣軍營十二月
賞戴花翎尋遷福建道御史五十四年充廣西鄉試正考官尋擢
禮科給事中五十五年授光祿寺少卿五十六年隨將軍福康安
征廓爾喀五十七年四月轉太常寺少卿九月經福康安保奏
諭曰方維甸隨營辦理毫無舛誤且自進兵以來衝風冒雨步行
涉險實屬奮勉著賞三品卿銜十一月遷通政司副使五十八年
十一月授光祿寺卿五十九年正月 命偕刑部尚書蘇凌阿馳
往山東審訊齊河縣民任祖三等控吏役挾嫌首告任祖虞等斂

錢聚眾致傷官役案訊明定擬如律三月 派稽察左翼覺羅學
四月轉太常寺卿八月充順天鄉試副考官六十年三月充會試
知貢舉四月授長蘆鹽政嘉慶元年三月 上恭謁 西陵維甸
隨營當差 恩予議敘九月奏請長蘆鹽課緩至明歲奏銷後分
三年帶徵經部議駁 上加恩緩至明年奏銷後分二年帶徵是
月長蘆商范光正赴部以商總楊秉鉞欺隱窩價呈控 欽派刑
部左侍郎張若淳工部左侍郎成德前往提審尋以楊秉鉞起意
謀產估價多寡懸殊運司阿林保率據估值詳報維甸卽據詳具
奏奉 旨革職交張若淳成德秉公嚴審定擬具奏尋擬維甸發
往軍臺 上以所辦殊屬含混著令來京一併交軍機大臣會同

該部片行審擬十月 諭曰此案方維甸如有聽受賄囑情事不特發往軍臺尙當重治其罪乃張若淳成德並未審明案情率將方維甸問擬軍臺不足以成信讞是以令將全案人證送京經軍機大臣查對案卷並訊之各商該鹽政實無徇私袒庇等情咎止失察辦理不善所有原議發往軍臺效力之處著寬免方維甸係方觀承之子曾在軍機章京上當差有年著加恩賞給員外郎仍在軍機章京上行走十二月補刑部員外郎四年三月充會試同考官六月升郎中八月授內閣侍讀學士隨工部尙書那彥成赴陝西督辦軍務五年閏四月授山東按察使六年二月山東巡撫惠齡咨稱楊震德因瘋砍死楊五案情跡不實定擬錯誤經部題

駁 上以讞案係維甸專責殊屬疎忽嚴飭之仍交部議處尋議
以降一級調用奉 旨銷去加一級免其降調十月擢河南布政
使時楚省邪匪未淨恐其竄越江北維甸督率豫省兵勇六千餘
名駐劄江岸分段設卡防守 上嘉之七年九月奏大功告蒞裁
撤鄉勇最爲要務須在裁撤官兵之前若陝西南山餘匪殄盡豫
省西路防兵可以酌移則以兵易勇江岸鄉勇口糧亦可節省
上是之八年五月調陝西布政使八月擢陝西巡撫南山零匪竄
景峪維甸奏南山地方遼闊林深箐密最易藏奸不特四散零匪
急須搜捕卽從前隨營長夫落後鄉勇流落南山內匪徒勾結乘
機搶掠尤須弭患未萌 上諭維甸督率各員搜緝十月以分派

各員鼓勵寨勇逐路嚴搜並以臬司朱勳時往稽查董率具奏
上嘉之尋將各路軍營糧餉及刪減塘站裁撤鄉勇有業無業派
充壯丁雜役各事宜先後奏 聞九年九月 諭曰德楞泰奏報
剿捕川陝邊界零匪全數肅清方維甸自擢任巡撫以來於搜捕
零匪辦理糧餉及籌撤鄉勇各事宜均能認真經理悉臻妥協著
加恩仍賞戴花翎十二月奏酌籌攤捐各款請司庫內 賞借銀
四萬兩作爲月款支用卽於司庫養廉內每年捐銀一萬兩歸款
十年正月奏請將定遠廳所屬簡池壩巡檢移駐黎壩城內姚家
壩巡檢移駐漁渡壩城內皆得 旨允行四月因審辦富平縣民
魏跟隨兒毆官案擬魏跟隨兒斬決經軍機大臣會同刑部改擬

國朝通志卷之八十一
三
絞監候維甸偕按察使朱勳自請議處奉 旨朱勳交部察議方
維甸寬免五月奏請陝西漢中府改爲要缺甘肅平涼府改爲中
缺下部議行尋因拏獲悄悄會匪首犯石慈應寸磔擬斬決李世
應肆應等應立決擬監候交部議處 諭曰該撫擬定此案時自
因上年辦富平縣毆官一案曾被參處因而有意從寬此則不可
嗣後當遇事講求參酌得中不得因此次被議又復心存瞻顧動
輒從嚴辦理也部議降一級調用罰俸二年 上改爲降二級畱
任仍罰俸二年十一年三月失察延安惑眾匪徒高種秋交部議
處部議降一級調用奉 旨加恩畱任又因賞給拏獲王廷登弁
兵銀兩辦理遲延 上嚴飭之仍交部議處部議降三級調用奉

旨從寬畱任六月奏川陝邊界前令提鎮帶兵會哨原因山內
餘孽或有未淨須示軍威見在地方甯謐所有提鎮會哨應請停
止仍令固原提督於每年十月到陝巡查山內邊界並閱營伍一
次陝安鎮總兵每年二月巡查邊界營汛一次 從之七月呈本
內將塔爾巴哈臺參贊大臣誤寫大人甘肅藩司書作蘭藩 諭
曰方維甸近來辦理地方事務每多遲緩疊經降旨訓飭今又舛
錯有關體制除交部議處仍傳旨申飭尋議罰俸半年時甯陝鎮
新募兵丁因停止米折藉詞滋事維甸接據稟報卽與將軍札爾
杭阿密派滿營兵一千軍標兵一千撫標兵五百預備調遣並咨
會各營分投堵擊又令總兵楊芳帶兵回陝奏入 上是之 命

借固原提督楊遇春進山督率辦理尋偕楊遇春奏賊兵三四百人由孫家梁竄向甘家壩西南卽四畝地華陽西江口各營汛及甯陝鎮屬內均有新兵若竄往句結復裹客民賊數恐致增多臣等一面帶兵進剿卽順道彈壓新兵安撫客民惟思見調之兵撫標兵見仗甚少且乏帶兵得力大員已飛咨總兵楊芳除昨調固原兵二百名外再挑二千三百名並飛咨河州鎮總兵游雲棟帶兵一千五百名來陝又延綏鎮總兵張鳳打仗奮勇亦擬咨調前來得旨所辦俱是又諭曰該撫等飛咨檄調適與朕旨相合但恐賊數增多不可無大員督辦見已降旨令德楞泰同札克塔爾帶領侍衛章京數員馳往督辦尋奏西江口新兵亦在江口營

起事滋擾與賊匪響應已有數十人擾至八里關大道又賊匪潛分一股竄至洋縣東北攻擾其西城外復來有數十人放箭爬城而上又稱漢中新兵已經調出見在城守空虛當卽飛飭游擊馬得等帶領軍標兵一千名馳赴漢中以防該匪竄出又稱楊芳途中聞該匪竄擾各營輕騎先由斜峪關入山一路安撫新兵前進諭曰所奏殊不明晰江口營新兵另起滋事諸營兵丁共有若干名滋事者是否祇此數十人未據敘明洋縣爬城之數十人又係何處賊匪是否卽係江口營之數十人並未詳細聲敘且前據德楞泰在山西途次奏稱聞此次賊匪係苟文進爲首今方維甸業已馳赴勦擊距賊甚近自應確探首惡何人躡蹤圍捕乃摺內

未曾提及一字亦未查明賊蹤見在竄往何處實不可解漢中係屬郡城前據探知賊匪向彼奔竄自應將該營兵丁酌畱守城何以全行調出以致城守空虛此時轉須派撥兵丁前往防禦方維甸等或因漢中營係屬新兵慮有句結是以全數調出但既經調用又不令向前剿賊該兵丁等以奉調前來未邀差遣不免心生疑貳妄萌他念是則殊有關係又楊芳係總兵大員既經帶兵剿賊何以又忽輕騎入山是否因所帶之兵落後未能趕上未免過形草率香來方維甸辦理竟無把握朕心深爲塵念著德楞泰加緊趨行赴彼督辦八月賊匪竄向兩河等處有趨石泉縣之勢維甸令總兵王兆夢由漢江順流而下抄赴賊前擊退之先是維甸

於叛匪滋事明飭地方官勸諭寨民人等將寨趕緊修理以衛身家九月逆匪攻撲焦家堡永固等寨寨民均能自爲守禦且擊斃賊匪多名奏入 上以維甸所辦甚是此次卽其明效尋 命維甸回省辦理糧餉軍火及彈壓地方事宜維甸奏籌辦糧運情形并請本省所調官兵照防勦兵舊例一體支給鹽菜口糧 上如所請行十月欽差大臣德楞泰率官兵勦擊賊匪賊首蒲大芳王文龍等縛獻甯陝營起事首逆陳達順陳先倫江口營首逆向貴乞降奏入 諭曰方維甸因勦賊之時無須在彼同辦諭令回省見在善後事宜關係地方者甚多著卽帶同臬司素訥並酌帶妥幹道府大員池化德楞泰軍營會辦悉心商酌維甸奏賊匪乞降

後設令仍歸原伍聚處南山復畱後患請於大兵未撤之時明白
曉諭全收器械資遣回籍交本處地方官管束 上以無此辦法
飭之尋 諭曰方維甸此奏必係聞軍營有此謬論不以爲然恐
其計出於此是以預爲密奏傳旨申飭者非申飭該撫所奏之不
當實欲使德楞泰於奉諭之後自知慚沮也德楞泰請將投出民
人三千八百餘人給資回籍並擬將隨同滋事各營兵蒲大芳等
二百二十四名遴選將弁分投管帶暫歸原營約束操防 上以
所辦錯謬 命會同方維甸將叛賊嚴訊定擬具奏十一月偕德
楞泰奏降賊業已歸伍若按名拘喚又致驚恐或生反側請緩以
時日相機辦理 上以德楞泰畏難因循旣已錯誤於前又思遷

就於後實出情理之外 命將叛匪傳集宣諭恩施貸其一死仍律以發遣之罪尋偕總督全保奏請將降賊二百二十餘名與各處未動新兵三百餘名以新疆換防爲詞分起調出到戍後新兵照例屯防其餘降賊分給各回城爲奴 諭曰國家明罰敕法措正施行不值於此等頑愚馭之以術莫若徑行加恩卽令分赴新疆各回城充當戍兵不准換回以示屏諸遠方之意十二月疏言善後事宜一山內匪徒賭博應密派兵役嚴拏懲治一南山漢南一帶游匪派員清查做照保甲之法分別土著客民將姓名田產男女雇工詢明造冊填給門牌責令鄉約牌頭稽查一甯陝廳城右係高山難於守禦應擇地方另建畱壩廳城土性夾沙秋雨淋

塌地勢偏窄請另擇形勢改建甌城洋縣舊築土城土性不堅請
改用灰土包築一撫恤難民請將軍務餘糧撥歸常平倉存貯就
近查被賊地方有地之戶借給一月籽糧無地極貧之戶賞給一
月口糧一甯陝孝義畱壩定遠四廳鎮安鳳縣二縣各該處山境
瘠薄民俗刁悍均須明幹之員方能勝任請改照邊俸之例以示
勸懲一陝安兵備道請照例節制營員以符體制奏入下部議行
時因河東鹽務復歸商運阿拉善吉蘭泰鹽池亦歸公招商承辦
上命侍郎英和內閣學士初彭齡偕維甸陝甘總督倭什布山
西巡撫同興會議尋經英和初彭齡同興議以陝西之府谷神木
葭州綏德吳堡清澗延川宜川等八州縣俱改食吉蘭泰池鹽十

二年二月維甸奏稱府谷神木葭州三處向食鄂爾多斯鹽若改食吉蘭泰池鹽禁止鄂爾多斯蒙古鹽辦理多有窒礙請免其改食吉蘭泰池鹽又疏陳鹽務事宜一陝省鹽道自改課歸丁後移駐鳳翔今鹽課復歸商辦請仍駐省城以便經理印信改鑄管理陝西鹽法分巡鳳邠兼管水利道字樣一陝省漢中延安鄜州等屬地方及清澗一縣所領鹽引請由山西巡撫照各該處應領額數於領引之便一併咨部領回移交陝西巡撫衙門轉發鹽法道封發各州縣及土商領引行運所有額銷鹽引仍舊以二年一次俱由鹽大使截角統歸鹽法道委員解交由山西巡撫呈繳至額解西安藩司鹽課統由地方官徵收解交藩庫彙請奏銷榆林綏

德吳堡米脂等縣向食土鹽由州縣發給小票請將小票裁撤一併由山西巡撫咨部領引移交陝西巡撫轉發以歸畫一而除積弊一西鄉分出之定遠廳民向食西鄉之鹽應令各該商分設子店售賣一酌撥興安引張以濟民食請將邠州涇化三水三處每年行銷河東引領額內准照鳳課例改食花馬小池鹽仍認銷河東引一千道撥入興安各府屬照例均勻代銷仍照河東規例辦課一南山內山徑叢雜小民背負銷售行走道路應聽民便嗣後以官店發票爲憑但有發票卽准銷售則南山肩負貧民藉資生計不致去而爲匪而小民亦無食淡之虞皆下部議行八月奏綏德吳堡二州縣向食三眼泉土鹽清澗延川宜川三縣向食定邊

花馬大池鹽民情相安已久請無庸改食吉蘭泰池鹽下部議行
十二月奏寶陝局鑄錢低銅不敷請照嘉慶七年奏明之例高銅
與鉛各半配鑄 從之十三年二月偕山西巡撫成甯奏酌改陝
境鹽務事宜隨時察看情形尙有應酌籌之處查鳳翔府屬一州
七縣向食靈州花馬小池鹽行銷河東引張各按丁糧攤納課銀
名曰鳳課迨河東課歸地丁後多有民販潞鹽運至彼處行銷嘉
慶十一年復商案內將該府各州縣改銷潞鹽招商辦運奏准遵
辦在案今商民交稱不便實有難於經久之勢請將鳳翔八州縣
仍食靈州花馬小池鹽引領銷河東之引攤納課銀無庸設商經
理漢中延安鄜州各屬並清澗縣應領引張原不在河東額引數

內應仍歸陝省請領內惟土商領引之處遠涉未免苦累請俱由漢中府延榆綏道領繳其興安府屬引鹽雖有不敷但山路險遠試行之始商力亦須體恤前所議於邠州各處原領河東額引撥出一千道歸入興安行銷者請暫緩改撥榆林綏德吳堡米脂等處土鹽小票改領引張一併令延榆綏道請領散給榆林永樂鹽鍋衝刷短缺課鹽向令轉賣鄂爾多斯鹽請將鋪戶姓名及所發司帖隨時報部又邠州及涇化三水二縣自改食靈鹽後民情稱便惟該處地瘠民貧無人認充土商應照長武之例民運民銷按煙戶納課無庸設立土商下部議行尋偕西安將軍德楞泰等奏請將甯陝總兵移駐漢中裁汰漢中協副將一缺華陽營參將一

缺甯陝營城守營都司一缺東江口華陽守備二缺把總七缺經制外委三缺各營千總四缺額外外委三缺 命軍機大臣會同兵部議行九月偕陝甘總督長麟奏請移駐山內雜職甯陝同知前經奏准移駐甯陝新城仍設巡檢畱駐舊治惟甯陝廳本有監獄向係巡檢兼管司獄今畱駐舊治作爲甯陝舊城巡檢應將四畝地巡檢移駐甯陝新城改爲甯陝廳巡檢兼管司獄仍爲要缺在外揀調又畱壩廳爲棧道扼要之地北至鳳縣一百九十里山路崎嶇相距太遠運餉解犯照料難周廳屬之南星地方在鳳縣畱壩之間地處適中請將青羊驛丞兼管巡檢移駐南星改爲南星巡檢仍歸部選下部議行十二月奏酌籌漢中鹽務事宜查南

鄭等九州縣額引二萬五千道每年交課三千七百五十兩設有
土商抽鹽辦課而各州縣內洋縣西鄉鹽法於康熙年間議定由
各里攤捐課銀並不抽鹽此漢中向來辦理章程也嗣復設立土
商抽鹽辦課漢中本無殷實大商並不持引運鹽皆係小販到境
抽錢抽鹽謂之抽鹽辦課俟庫項交足即將官引截角繳毀謂之
定截引角指勒多收之弊在所不免且小販皆係無業貧民資本
甚微獲利有限土商坐分其利人情甚不帖服漢中一府請照洋
縣西鄉章程一律攤納並請照鳳縣之例裁去土商永杜指勒之
弊下部議行十四年正月奏前年甯陝新兵滋事洋縣被擾尤重
懇將緩徵錢糧 加恩蠲免二月奏山內乏食貧民懇 賞給一

月口糧均從之七月授閩浙總督八月因母老未能迎養赴閩奏懇於半年後簡人更代諭曰方維甸之母年逾八十平素母子相依朕所素悉惟因閩浙地方緊要見有勦辦洋匪等事簡用乏人不得已簡伊前往今伊母不能迎養赴任伊慮及日久遠離私心負疚自屬人子至情伊母已送回原籍居住方維甸應卽迅速馳赴新任一意辦公無庸內顧俟明春二三月間著來京陛見彼時准其順道先往江甯省視到京後將伊母身體情形據實奏聞候朕降旨九月遵旨馳赴廈門查辦臺灣械鬪案件十一月奏洋盜朱瀆經官兵礮斃伊弟朱渥悔罪投首船隻礮械全數呈繳其夥眾三千餘人請查照舊例分別遣散回籍安插其情願

隨同緝捕者挑出精壯者百五十餘人分派兵船隨同出洋緝捕
得旨允行時臺灣嘉義彰化縣械鬪已息復熾上命維甸渡
臺督率辦理十五年正月拏獲械鬪首犯林聰等並從犯一百餘
名分別定議具奏四月奏臺灣屯務廢弛請通行查勘體恤番丁
以資調遣見在經過各社體訪番情甚屬艱苦其原設屯丁四千
名亦不足數皆由各屯未墾之地每被奸民社丁人等串通欺詐
誘令典賣越界霸占應徵屯租原係州縣收發前署臺灣府楊紹
裘等議令屯弁自行徵收散給各丁不復官爲經理以致刁民抗
欠甚多而屯弁又從而侵蝕屯丁苦累益甚見派員查勘分別清
釐請照舊定章程辦理諭曰該處營汛兵丁應如何妥議之處

著查明具奏於一切辦理後應卽起程內渡前經有旨准其來京
陛見該督抵省後卽可奏報起程順赴江甯省視伊母卽行來京
瞻觀可也尋偕福建提督許文謨奏請申明班兵舊例籌議章程
一臺灣澎湖等處戍兵稽查換班限期以免曠誤一班兵應覈實
點驗按期派渡一臺灣班滿兵丁應分由鹿耳門鹿仔港兩口內
渡毋許逗畱一換班來往兵丁供支口糧酌定限制如班兵登舟
後實因風汛不順又候半月者准借一次或班期已滿新兵未到
又候一月者仍准借支其餘槩不准借一遵例操演具冊呈報以
資考覈一各營房見飭勘估興修竣後兵丁照例歸住營房以便
約束一禁止坐扣班兵糧餉以杜影射一兵丁曠缺日期覈實查

報除渡洋漂失不知存亡者仍暫留錢糧養贍眷族俟查無下落始行開除其餘遇有事故及脫逃革伍等卽日具報停支以杜侵蝕一調派兵丁緝捕彈壓請酌給口糧於臺灣生息銀兩內支給其糧運軍裝夫價應由鎮道府廳縣捐給一營員到臺應行試看以定去留疏入 上命軍機大臣會同該部議奏尋議調兵派丁糧運軍裝夫價一體由官支給在生息項下動用餘皆如所請行五月偕許文謨奏臺灣各營汛地酌議歸併以便操防查臺灣南北各陸路額設戍兵一萬二千三百八十九名除存營存城外各營分派汛兵四千三百五十八名爲數原已不少特因地方遼闊負山臨海從前分派太多每處不過數名而緊要地方轉形單弱

且分汛兵丁零星安設散處各方難以調集揀演茲據總兵武隆阿酌量情形妥議裁併臣等查近山險要及數縣交界之處路徑叢雜姦宄易於潛藏近海支港可通小船之處多有奸民私渡販運禁物其習俗獷悍煙戶繁盛村莊民情尤多浮競此等緊要地方或本未設汛或原設塘汛兵數太少不足以資防禦應請於偏僻零星各汛內裁撤弁兵增添移併將通德哈子蘭要路及查緝私礦要口裁撥增設其昔僻今衝安塘不均之處亦應酌改又如鳳山縣既於嘉慶十二年自埤頭移回舊治仍應將舊城分汛移回埤頭共計城守營左軍移駐外委二員裁移十汛兵丁併入三汛移改一汛右營移駐外委二員裁移十一汛兵丁併入五汛南

路營移駐千總一員裁移三汛兵丁添入三汛移改一汛下淡各
營移駐外委一員裁撤三汛兵丁併入一汛北路營中軍營共該
把總一員外委二員裁撤九汛兵丁歸入四汛添設二汛二塘左
營移駐把總一員外委三員裁撤十八汛兵丁併入六汛右營撤
額外外委二員移駐把總一員外委一員裁撤三汛並城二汛兵
丁併入三汛改移二汛艋舺營酌撥外委二員裁移二汛並撥本
營兵丁併入一汛添設二汛滬尾各師營酌撥把總一員並本營
兵丁添防移改一汛見在各汛兵房多坍塌裁移者可無庸修葺
其餘建兵房歸案辦理疏入 諭曰臺灣負山臨海道里表延向
曾額設戍兵一萬二千餘名用備巡防而地方今昔異宜自應隨

時酌定茲據該督等查明該處緊要地方請於偏僻零星各汛裁減弁兵增設移併各情形自係爲因地制宜起見著照所請行又疏陳約束械鬪章程臺灣民俗大抵好爭不但漳泉粵三處互相仇怨卽同籍之人亦以各縣自相仇怨習染錮蔽粹難化導惟有酌定章程申明約束遇事嚴懲於初起平時防患於未萌法在必行或可漸移惡習臣查臺灣匪徒最多如賭匪會匪等素以搶竊爲事間有械鬪不遵約束自來到處攻莊肆掠鬪案之所以蔓延者皆由於此卽林爽文陳周全蔡牽等滋事亦皆句結此等匪徒爲羽翼欲求地方甯謐必先嚴緝匪徒請責成臺灣文武官員隨地隨時嚴緝查拏解送鎮道訊辦卽應問流遣之犯亦由該鎮道定

擬彙案具奏庶辦理迅速人知警畏惟是鎮市村莊各有本保隸
役嘉穀一縣隸役又全係漳人緝捕人犯多由伊等故縱互相黨
護應飭行各廳縣隸役聽官僉差不許擅自分保不許同籍盤踞
總董等無論職員生監悉聽廳縣調遣儻有怠玩稟請革究如敢
包庇抗違卽照故縱罪人之例一體治罪並令每莊各僉約長大
姓並設族長官給戳記管束本莊本族如有私弊照總董例一體
懲治各莊之事仍不許盡由總董指使以杜把持至各籍民人同
莊雜處每多猜忌同籍各莊之中偶間一異籍村莊眾寡不敵易
致欺凌應令地方官查明此等村莊責成總董約長族長等約束
莊民毋許滋事並出保護甘結一有弊端將總董一併懲治遇有

爭論難平之事稟知地方官秉公伸理曲直以平其心儻敢藉端糾鬪即使糾聚人少旋即解散尙未殺傷亦將爲首之人立拏究辦如此豫立禁約偶犯必懲自可咸知忌憚設或兇狡之徒曷不畏法仍敢恃眾械鬪臣請於起初之時速令該鎮整兵前往不聽曉諭卽係亂民竟當相機勦捕大加懲創一處震懼他處皆可息爭較之彈壓往來旋止旋鬪似易於懾服再查地方官失察會匪例應降調失察械鬪若非全獲亦應降調失察例參疎防但臺灣惡習已經數十載會名約有四五種搶奪匪夥不下數十名械鬪黨與更不可以數計實非他省可比見在府縣更易新任莅事未久勢不能驟挽刁風立時全獲若據實報出盡力查拏尙不免於

同治十一年六月二十二日
吏議似不足杜因循之弊適以啟諱飾之端請嗣後如能查出稟報嚴緝查拏卽案犯未能全獲免其失察處分儻不稟辦卽照諱盜例革職庶使地方官咸知欺飾罪重失察過輕竭力認真無所瞻顧
諭曰方維甸奏請嚴禁總董及本保隸役黨護把持立法究治並僉設約長族長責令管束本莊本族等事均照所議行至所請酌減官兵處分一節該地方官果能隨時訪查據實稟報俾姦宄得以破露雖不能全寬處分該督等具奏到時朕尙可酌量加恩免其實降實革又疏稱商船貿易口岸牌照不符官穀難運酌議三口通行章程臺灣商船向來鹿耳門港口對渡廈門鹿仔港口對渡泉州蚶江八里坌港口對渡福州五虎門各有指定口岸然

風汛靡常商民並不遵例對渡往往因牌照不符句串丁役捏報
遭風既可私販貨物又可免配官穀八里全一口又向無應運兵
穀規避船隻尤多以致臺灣見在未運官穀積壓至十五萬餘石
之多皆由商船規避所致應請三口通行據實填寫船照務令相
符八里全商船亦令配運官穀則船戶無所規避一切捏報遭風
兵役需索弊端可以不禁自絕 諭曰商船往來販易駛赴海口
自應聽其乘風汛之便徑往收泊若必指定口岸令其對渡不但
守風折截來往稽遲且弊竇叢生轉難究詰嗣後廈門蚶江五虎
門船隻通行三口將官穀按船配運並層層稽查互相考覈之處
均著照該督所請行又奏請將羅漢門巡檢移駐蕃署寮地方

從之又奏臺灣噶瑪蘭地方田土膏腴米價較賤民番流寓日多見查戶口漳人四萬二千五百餘丁泉人二百五十餘丁粵人一百四十餘丁又有生熟各番雜處其中以強凌弱勢所不免必須官爲經理方可粗安無事其未墾荒坡尤須查明地界劃分公平以杜爭端 諭曰臺灣爲處海外諸務廢弛今方維甸到彼於地方營伍力加整頓酌改章程若地方官謹守奉行自可漸有起色第恐日久懈生且該處俱係漳泉粵民人雜處素性強悍總須時有大員前往巡閱使知儆畏嗣後福建總督將軍每隔二年著赴臺灣巡查一次用資彈壓六月奏請 陛見 諭曰本年木蘭秋獵九月初四日出哨初七日回至熱河方維甸計算程期於彼時

前來熱河請安卽隨駕回京途次亦可頻頻召對也至七月十七日爲伊母生辰方維甸先赴江甯多駐旬日不特遂其省親私情亦可爲伊母稱觴祝壽並著賞方維甸之母玉三鑲如意一柄玉鑲玻璃杯一箇玉瑞獸一件瓷盤一件瓷瓶一件八絲緞二匹五絲緞二匹用示恩賚七月奏洋匪小仁幫相率乞投各將船隻礮械全行交出計首夥一千三百名大小礮一百六十餘門烏槍器械等七百餘件請將蔡牽義子陳小仁牢監禁錮俟成丁時發往伊犁烏魯木齊等處安插文福酌給滿洲蒙古漢軍大臣爲奴吳三地一犯曾與賊眾攻撲嘉義未便以自首稍爲輕減請仍照大逆謀反律凌遲處死翁哈一犯發黑龍江給披甲人爲奴其餘分

別安插又以朱渥隨同舟師緝捕奮勉奏請酌量施恩上以維甸摺內分別定擬固屬按律辦理但所擬未免過重小仁文福二人雖係蔡牽義子但小仁親生父母均被蔡牽殺害其時小仁甫九歲不知原委直至蔡牽死後始悉前情日夜嗟哭又文福本係蔡牽船上舵工之子伊親故時尙在襁褓之中見在年只七歲此二人本非逆犯之子不必緣坐且髫齡被劫久陷賊中情殊可憫今皆自行投出自當免罪釋放妥爲安插吳三地翁哈皆可末減吳三地著發往黑龍江翁哈著發往伊犁其餘皆照所請朱渥著加恩賞拔把總以示鼓勵又奏酌議臺灣換防班兵支給餉銀及北路協左營水師兵與海壇烽火營水師兵對調各款諭曰

臺灣換防班兵應支糧餉向例按四十月畫一起止該兵丁等於班滿日卽行停餉今議令班滿兵丁候代仍支餉銀一半其內地新派換防兵丁亦先于半餉俟新班到臺灣後再將舊班兵餉停止從此舊新更代之兵口食皆各有資於差操更爲得力著卽照依辦理至換防額兵停派漳泉府籍之人一事方維甸等覈計閩省別府各營不敷派撥請仍循舊制復議請將北路協左營泉州水師二百五十名派往臺灣協以臺灣協之閩安海壇烽火營水師兵二百五十調往北路左營雖爲調濟起見但所慮尙未周密漳泉二籍之人各分氣類互相仇鬪地方官原應設法化導俾之積漸相安今因北路之水師二百五十係泉州人駐劄之地係漳

莊恐其不能安處卽議全行更調是明示以漳泉二籍兵民不可
並域而居劃分隄域日久必致該二籍之人愈啟參商莫若將此
二百五十名兵額內酌換一半使其數少而彼此雜居仍不敢顯
然樹敵再責成該管員弁隨時約束默化潛移自可冀鬪爭漸息
積習漸除也九月至熱河 陸見以母老情形陳奏 諭曰據方
維甸奏稱伊母上年自陝南旋緩程數月途中勞頓心神日形恍
惚今年又兩次患病依戀情殷勢難刻離等語閩浙地方緊要方
維甸在彼辦理妥協設此時海洋尙有緊要事務伊身膺重寄亦
難遽行更換今該處洋面肅清巨盜均已掃除地方甯謐而方維
甸母老多病兩地懸心其情甚爲可憫若將伊調任他省伊母仍

不能就養兩江又係伊本籍與例不符朕以孝治天下不忍拂人子至情方維甸著加恩准其開缺回籍省親以示體恤時浙江巡撫蔣攸銛奏有呈遞匿名揭帖訐告鹽政奇玖家人劉泰與商人俞廣東借銀弊混等款請將奇玖革職嚴訊 上命維甸偕新任鹽政蘇楞額赴浙審辦十一月訊明按律定擬懲治十六年正月偕蘇楞額奏額引壅滯請於己巳庚午綱引目內各劃出三十五萬道作一綱統銷所有應完正雜錢糧分作十年帶納並請免交增價餘息又奏請公捐河工餉銀分作三年帶完 上允所請四月 諭曰方維甸回籍以後承歡侍奉伊母自己日就安健見在 大學士戴衢亨母由臺灣偶患時病不意爲醫藥所誤遂於昨日

盜逝朕心悼惜此時軍機大臣人少樞務至重朕於中外諸臣徧加遴選惟方維甸性情公直在軍機章京上年久熟諳事務人地相宜今特簡用爲軍機大臣將來卽補尙書用資倚畀伊母從前本在京師久住於北方風土素能習慣卽此時在江甯居住亦未必如京邸之服習伊若奉母來京於散直之餘朝夕侍奉豈不公私兩遂卽遇巡幸亦不令伊隨往朕於方維甸母子之間所以優加體念者實爲無所不至方維甸亦當仰體朕用人不得已之苦衷勉思報效伊將此旨告知伊母諒伊母亦必感激樂從但不知伊母見在身體情形究竟若何若果目下精神委頓實難遠行方維甸應據實陳奏尋維甸將其母情形瀝情覆奏 諭曰據奏伊

母近日心神恍惚難以力疾遠行情詞懇切朕閱之甚爲憐憫見在天氣漸熱方維甸母子不能暫離若令其長途跋涉朕心殊爲不忍方維甸著不必來京仍在籍安心養親時屆端節並加恩賞給方維甸之母香珠一匣香袋一匣香牌一匣摺扇一匣維甸卽告知伊母俾其歡欣頤養十八年七月丁母憂兩江總督百齡奏聞諭曰方維甸歷任封疆均能勤慎盡職母老在籍侍養茲伊母吳氏病逝著加恩賜祭一壇派江甯將軍興肇前往奠醊並著興肇傳旨慰諭方維甸令其節哀守禮再圖爲國宣勞十月奉旨方維甸見在終養事畢在籍守制本應俟其終制後再行簡用但近因直豫東三省交界之處匪徒聚眾滋事謀逆調兵剿捕

正當軍需喫緊之時且此時首逆林清輒敢豫蓄逆謀突入禁城尤爲從來未有之事刻下首逆雖已伏誅逆黨尙多而近畿一帶習教與謀之夥匪潛伏未斃者不少直隸地方緊要總督一缺簡用甚難其人朕再四思維方維甸堪以勝任該督此時雖未服闋第觀有軍旅之事古人選經從戎義有權宜方維甸受朕厚恩值國家多事之秋若在家伏處於心諒亦不安所有直隸總督著方維甸著琿在任守制該督接奉此旨卽馳赴保定接印任事抵任後將應辦各事宜經理數月諸務妥協再行來京陛見其所穿服色蟒袍補褂無庸服用並無庸穿天青常服卽來京召見無論何日俱准其穿元青長褂俾得兼盡孝思想伊母九泉之下知其子

移孝作忠亦所深願此朕用人不得已之苦衷非尋常奪情可比
方維甸當勉體朕心仰副委任將此由五百里諭令知之維甸接
奉 諭旨遵卽起程奏請馳赴軍營隨同剿賊十一月 諭曰方
維甸接奉前旨能仰體朕衷力圖報稱據稱將伊母葬事趕辦完
竣定於初七日起程可憫可嘉之至前次恐軍務一時不能告竣
那彥成在彼督兵不能赴任是以降旨今據那彥成奏報連獲勝
仗已將道口桃源二處屯聚之賊殲戮淨盡見已圍攻滑城指日
卽可收復那彥成功成來京復命卽可就近赴任直隸總督之任
見有章煦在彼署理方維甸卽趕緊前來接署爲期甚暫徒令多
一番交代昨簡署方維甸時除面諭軍機大臣密發廷寄外並未

明降諭旨事可中止何必使方維甸又抱奪情之戚耶至伊摺內請赴軍營隨同剿賊更可不必前旨內墨經從戎一語不過借文爲喻令其師古達權原因直隸地方緊要欲責令認真整頓若軍營帶兵殊不乏人況軍務已可計日告蕨乎方維甸途間接奉此旨著卽轉程回籍守制伊感激朕恩欲具摺陳訴伊見在制中難具銜名呈遞著自具奏摺在江南境內交百齡代爲呈遞行至山東境交同興代爲轉遞切不可親自來京俟伊終制之後再行簡用可也維甸於途次接奉諭旨懇請來京謝恩由兩江總督百齡代奏得旨方維甸仍遵前旨卽行回籍守制二十年六月卒諭曰前任閩浙總督方維甸由乾隆年間進士仰蒙高宗

純皇帝鑒其器能益加 簡用試差鹽政在軍機章京上行走多年隨福康安前赴臺灣廓爾喀軍營著有勞績朕親政後優加拔擢山臬司用至總督所至之處俱能忠勤盡職清慎著名嗣因伊母年老多病懇請解職養親朕念其獨子破格施恩俯允所請伊今歲冬間服闋計其到京後內而尙書外而總督均堪倚畀乃伊母故後寢苦漸染沈痾驟聞溘逝深爲悼惜著加恩晉贈太子少保照總督例賜卹任內一切處分悉予開復應賠銀兩均著豁免伊子舉人候補內閣中書方傳穆著賞給進士准其一體殿試並著江甯將軍穆克登布卽日前往奠醊以示朕軫卹勞臣至意 賜祭葬諡勤襄子傳穆見官翰林院庶吉士

右 國史館本傳

方受疇

方受疇安徽桐城人乾隆四十年由監生捐鹽大使分發兩淮補伍佑場鹽大使尋捐升運判改發浙江四十二年補嘉松分司運判四十四年丁母憂留辦海塘工程四十六年服闋借補蕭山縣知縣四十九年以捕獲鄰境盜犯遷嘉興府海防同知五十三年遷直隸大名府知府五十四年調保定府尋遷清河道五十九年上幸天津差次 賞戴花翎嘉慶二年定州知州劉兆清因調署簡缺控受疇收受節規並私借銀兩等款 命解京交軍機大臣嚴訊惟借款鞫實褫職發軍臺效力三年贖回捐復原官四年

命以道銜赴伊犁聽候差委九年授直隸通永道十年遷河南
按察使十二年三月調直隸按察使九月遷布政使十三年上
幸天津以所辦隄工穩固 賞還花翎十四年五月以上年承辦
天津差務苛派州縣銀款褫花翎七月因失察寶坻縣知縣單幅
昌侵蝕賑銀部議革職奉 旨改爲畱任仍降三品頂帶十月
上五旬萬壽復 賞二品頂帶十六年三月 上幸五臺以辦理
差務妥協 賞還花翎閏三月 上回鑾 駐蹕保定 賜受疇
詩泐石蓮池書院詩曰南邦昭世德首善作旬宣舊政勉能紹新
猷務普延用人先有守圖治最無偏徙倚甘棠蔭臨風憶昔賢受
疇爲前直隸總督方觀承姪故 御製及之十八年二月擢浙江

國朝通志卷之九十五
巡撫時觀承妻吳氏卒於家 賞受疇假一月往治喪九月山東
邪匪作亂陷定陶曹縣受疇假滿入都在途聞警以曹州界連河
南馳往歸德堵禦河南教匪李文成旋陷滑縣 上命署巡撫高
杞與欽差大臣溫承惠等會剿 命受疇駐河南省城鎮撫地方
督運糧餉十二月賊平疏陳善後事宜一滑縣自收復後撫綏化
導非初任人員所能勝任應請改爲繁缺在外題補一所募鄉勇
應令原保之人保回安業並收繳器械一禁鐵匠私造軍器一滑
縣被賊村莊請將歷年積欠及本年錢糧俱豁免一查辦逆產勿
任隱匿牽連一道口鎮應設立縣丞把總各一員一被戕文武員
弁及陣亡兵丁請分別 卹賞士民婦女守節捐軀者查明咨部

旌表得 旨允行先是睢州二堡河溢以軍興停工十九年二月命受疇會同河東河道總督吳璈堵築閘二月以賑務辦理未協饑民失所 嚴飭之並下部議處尋議革職奉 旨改爲畱任三月請於滑縣增設都司一員並撥弁兵駐守 從之十月以滑縣知縣孟祀疇貪縱不法受疇誤行保薦下部嚴議尋議革職奉 旨改爲畱任八年無過方准開復二十年二月睢工合龍下部議敘五月請改荆子關協副將歸南陽鎮總兵轄歸德營參將爲撫標裁光州汛千總設光州營都司一員移鄧新營把總一員隨營協防撥荆子關協鄧新營馬守兵一百二十名並舊兵二百八十名分防州城及商城息縣等汛 允之先是汝甯光州一帶

舊有匪徒嘯聚名紅鬍子其地界連安徽湖北竄徙靡常受疇嚴
飭地方官設法掩捕並移文兩省巡撫協緝先後獲犯數百名匪
徒斂跡二十一年正月京察以綜覈錢糧並緝獲紅鬍匪犯多名
下部議敘二月奏河工歲設搶險銀三十萬兩近年險工疊出每
不敷用如俟奏明添撥緩不濟急請嗣後正項將次用完卽察看
情形應添撥若干一面具奏一面行司提取霜降後如有餘存奏
明歸款 從之六月遷直隸總督八月 上秋獮木蘭受疇以本
年遇閏天氣早寒請與藩司姚祖同公捐絛衣二千件分賞兵丁
上以其市惠邀名有乖政體嚴飭之二十二年以天津添建水
師營受疇督造礮臺營汛等工遲緩部議降調奉 旨改爲畱任

二十三年二月奏習教改悔民人請免治罪 上允之三月以延
請見任通判陳建幫辦幕務部議降調 諭曰直隸督撫大吏不
准以屬員幫辦幕務屢經降旨飭禁方受疇身任總督養廉優厚
非不能延請幕友者乃令見任通判陳建入幕辦事既曠職守又
招物議實屬違制本應照部議降調姑念一時簡用乏人著改爲
降四級畱任七月 上詣盛京恭謁 祖陵以橋梁衝毀受疇剋
期督造穩固 賞穿黃馬褂並 賞其子浙江嵗縣知縣方秉知
州銜二十四年以協濟河南馬營壩料物得 旨嘉獎二十五年
三月以延請已革知府沈華旭課士蓮池書院並與商推公事又
失察家人需索屬員規費部議革職奉 旨改爲畱任八月 上

自熱河恭奉 仁宗睿皇帝梓宮回京以受疇督辦橋梁道路一
律妥善 賞加太子少保銜道光元年請改大名協副將爲開州
協副將增設大名鎮總兵轄大名廣平順德等營河間協副將令
其常駐郡城增設鄭家口遊擊專司催漕裁天津水師營總兵移
大沽營參將駐新城統轄水師 從之二年正月因病乞假 命
侍衛容照帶御醫馳往診視尋以病劇請開缺回籍 允之六月
卒於道 諭曰方受疇前在總督任內仰蒙 皇考仁宗睿皇帝
優加恩眷嗣於嘉慶二十五年經朕賞加宮銜本年春間在任患
病賜醫診視後因病久未痊陳請開缺特降旨准其回籍調理茲
聞途次溘逝殊堪軫惜所有任內一切處分悉予開復應得卹典

該衙門察例具奏

右 國史館本傳

國史館本傳

傳

K820.49

154-922

2
文庫

--	--	--	--	--	--	--	--	--	--	--

日本書紀卷之五十五

五

154-922



21101000161285